

# ডারচের সদীক ওনা

বিত্তী এবং অঞ্চল

দিলীপকুমার মুখোপাধ্যায়



এ. মুখোজ্জি অ্যান্ড কোম্পানী প্রাইভেট লিমিটেড  
২, বঙ্গিম চ্যাটার্জী স্ট্রিট, কলিকাতা-৭০০০৭৩

# ভারতের সঙ্গীতগুণী

চিতীয় খণ্ড

প্রকাশক :

বিপুল চট্টোপাধ্যায়  
এ. মুখাজ্জী অ্যান্ড কোং প্রাঃ লিঃ  
২, বঙ্গীয় চ্যাটাজ্জী স্টেট  
কলিকাতা-৭৩

প্রথম প্রকাশ : ফার্জন ১৩৮৬

প্রচ্ছদ : তিলক বন্দ্যোপাধ্যায়

রক : স্ট্যাণ্ডার্ড ফটো এন্ড্রেডিং কোং

মুদ্রাকর :

শ্রীমত্ত্বনাথ পাণ  
নবীন শর্ষভী প্রেস  
১ ভৌম বোৰ লেন  
কলিকাতা-৬

## বিষয়সূচী

বিষয়	পৃষ্ঠা
(১) বীণাকার ও বথশিয় ॥ বন্দে আলী থা	১—১৪
(২) দিলৌর শেষ দরবারী ॥ মুরাদ থা	১৫—২৭
(৩) তানসেনের এক বংশধর ॥ তাজ থা	২৮—৫৮
(৪) স্বরের সঙ্গতীয়া সারঙ্গী ॥ গৌরীশঙ্কর মিশ্র	৫৯—৮১
(৫) কতবার আসিয়া কত ভালবাসিয়া ॥ মানদাস্তুরী	৮২—১০৭
(৬) এলাহাবাদের ঝঁপদী ॥ বিশ্বেশ্বর বন্দ্যোপাধ্যায়	১০৮—১২৮
(৭) বিশ্বৃত হারযোনিয়ম-শিল্পী ॥ মীর্জা সাহেব	১২৯—১৫০
(৮) আরেকজন শীর্ষস্থানীয়া ॥ কুকুরভাটাচার্য	১৫১—১৭৪
(৯) যাদুকরি ঠুঁঠি ॥ মৌজুদিন থা	১৭৫—২১১

## চিত্রসূচী

- |                                |                     |
|--------------------------------|---------------------|
| (১) মানদাস্তুরী                | (৫) কুকুরভাটাচার্য  |
| (২) বন্দে আলী থা               | (৬) গৌরীশঙ্কর মিশ্র |
| (৩) বিশ্বেশ্বর বন্দ্যোপাধ্যায় | (৭) মৌজুদিন থা      |
| (৪) তাজ থা                     |                     |

## ମେଘକେରୁ ଅଳ୍ପାଳ୍ପ ପ୍ରକାଶ

### ସନ୍ତୀତ ବିଷସ୍ତରକ :

ବାଙ୍ଗାଲীର ରାଗସନ୍ତୀତ-ଚର୍ଚା  
ଭାରତୀୟ ସନ୍ତୀତେ ସରାନାର ଇତିହାସ  
ଦରବାର ନଟୀ କଲାବନ୍ଧ ( ପ୍ରଥମ ପର )  
ସନ୍ତୀତେ ଶ୍ରୀରାମକୃଷ୍ଣ  
ଆସରେର ଗଙ୍ଗା  
ବିଷୁପୁର ସରାନା  
ସନ୍ତୀତେର ଆସରେ  
ସନ୍ତୀତସାଧନାୟ ବିବେକାନନ୍ଦ ଓ ସନ୍ତୀତକଳ୍ପତଙ୍କ

### ଜୀବନୀ :

ବିଚିତ୍ର ପ୍ରତିଭା  
CHAITANYA

### ଛୋଟଦେଇ :

ଏଶିଆର କ୍ରପକଥା  
କଥାୟ କଥାୟ  
ଏକଦୀ ଯାହାର ବିଜୟ ସେନାନୀ  
ଏକଲବ୍ୟ

উৎসর্গ  
শুভব আলারামণ চৌধুরী  
করকমলেষু

## নিবেদন

‘ভারতের সঙ্গীতগুণী’ ভিতীয় খণ্ডে প্রকাশে অনেক বিলম্ব ঘটে গেল। বিদ্যুৎ সঞ্চাট, প্রেসের কাজকর্মে বিপর্যয়, প্রয়োজনের সময় কাগজ অপ্রাপ্য ইত্যাদি নানা কারণে নষ্ট হয়েছে ছুটি বছর। আশা করা ষাক পরের খণ্ডগুলিতে এমন বিপত্তি দেখা দেবে না।

এই ভিতীয় খণ্ডে আছে বন্দে আলী থা, মুরাদ থা, তাজ থা, গৌরীশঙ্কর মিশ্র, মানদাস্বন্দরী, বিশ্বের বন্দেয়াপাধ্যায়, মীর্জা সাহেব, কুফতামিনী ও মৌজুদিনের সঙ্গীতজীবন-ব্যক্তিজীবনের বিস্তারিত পরিচয়। বিগত যুগের সাজীতিক ইতিহাসের বিশিষ্ট অঙ্গ তাঁদের সঙ্গীতকৃতি। সাধনা ও সিদ্ধিতে, বহু বিচিত্র দানে ও কৌতুকে সমুজ্জল সেইসব শিল্পীদের নবন-জীবন। কিঞ্চ অতীতের হারানো লোকে আত্মগোপন করেছিলেন তাঁরা। কয়েকজনের নাম পর্যন্ত লুপ্ত হয়ে যায়। একমাত্র মৌজুদিন থা ভিন্ন তাঁদের অসম গুরুত্বপূর্ণ হল এই প্রথম। প্রতিকৃতিগুলিও ছুট্টাপ্য। তাজ থার ছবিটি এই প্রথম মুদ্রিত। প্রথম খণ্ডে ষেমন, উক্ত গুণীদের সম্পর্কেও ষাবতীয় তথ্য, উপকরণ নির্ভরশোগ্য, নিরপেক্ষ স্থজ্ঞে সংগৃহীত হয়েছে। আর তাঁদের অনুষ্ঠানে স্থান পেয়েছে সমকালীন সঙ্গীত-জগতের নানা জাতব্য সংবাদ। সেইস্থজ্ঞে ভারতের বিভিন্ন কেন্দ্রে উনিশ শতক ব্যাপী এবং বিশ শতকীয় প্রথম ভাগের কৃষ্ণ ও ষষ্ঠসঙ্গীতের কয়েকটি ধারার বিবরণ পাওয়া যাবে।

‘ভারতের সঙ্গীতগুণী’ পুস্তকমালা সম্পর্কে আমার বক্তব্য সবিস্তারে জানিয়েছি প্রথম খণ্ডের ভূমিকায়। এখানে সংক্ষেপে বলি, ভারতীয় রাগসঙ্গীত-চর্চার ক্ষেত্রে বিশ্বতির অতল থেকে লুপ্ত রংগোক্তার আমার প্রধান সক্ষ এবং সমস্ত পরিশ্রমের প্রেরণ। আমাদের সাজীতিক ঐতিহ্য ও ঐশ্বর্যের প্রতি পাঠকদের বিদি ঔৎসুক্য ও অনুরাগ জাগে, তাহলেই সব শ্রম সার্থক হয়। ইতি

দোল পূণিমা,  
১১ ফাস্তুন, ১৩৮৬,  
১লা মার্চ, ১৯৮০

দিলীপকুমার মুখোপাধ্যায়

## বীণ্কার ও বখশিষ্য

বন্দে আলী থা

ইন্দোর দরবারের সে এক আশ্চর্য সংবাদ। তেমন বখশিষ্যের কথ  
কোন দরবারে মজলিসে শোনা যায়নি। সেদিন আসরের প্রথমে  
কেউ ভাবতে পেরেছিলেন যে শেষ হবে এমনভাবে?

মহারাজা শিবাজী রাও হোল্কার? না। তার কাছে কল্পনার  
অতীত ছিল এমন পরিণতি।

চুম্বা বাঙ্গি? তিনিও নিশ্চয় ভাবতে পারেননি।

বন্দে আলীর মনে ছিল কি? কে জানে।

অথচ মহারাজা কত দিন থেকে কত বার এনেছেন বন্দে আলীকে।  
বীণা বাঞ্জিয়ে থা সাহেব দরবার মাত করে দিয়েছেন। মোটা মুজরো  
পেয়েছেন। বখশিষ্যও দিয়েছেন শিবাজী রাও। তবু তো বন্দে আলী  
দরবারের নিযুক্ত বীণ্কার।

আর ইন্দোরেই গল্প-কথার মতন আসর হয়ে গেল!

সেবার কিছুদিন বাইরে ছিলেন বন্দে আলী। ফিরে এসে  
মহারাজাকে সেলাম করলেন।

তখন শিবাজী রাও একদিন থাস দরবার বসালেন থা সাহেবের  
জন্ম। সেদিন শুধু তিনি বাজাবেন। খোতাদের মধ্যে হোলকরের  
সঙ্গে থাকবেন তার প্রিয় ক'জন সভাসদ। আর চুম্বা বাঙ্গিও।  
দরবারের নর্তকী গায়িকা চুম্বা বাঙ্গি। কিন্তু সেদিন বাঙ্গজীর নাচ গান  
হবে না। তিনিও শুনবেন বন্দে আলীর বীণা।

ইন্দোর মহারাজার সবচেয়ে প্রিয় দরবারী কলাকার বন্দে  
আলী। কি মিঠে তার আঙুলের টিপ। কি মধুর তার বীণার

ঝঙ্কার। যন্ত্রের স্বরে তিনি যেন বশ করে রেখেছেন শিবাজী রাও হোলকরকে। মহারাজা তাকে সঙ্গীতগুরুর মতন মান্তা করে থাকেন।

সেকালের দিকপাল বীণাকার বন্দে আলী থাঁ। উনিশ শতকের শেষ কুড়ি-পঁচিশ বছরে আর কজন তাঁর সমকক্ষ ছিলেন এ যন্ত্রে? কাশীর সাদিক আলী থাঁ কিংবা কাসিম আলী থাঁ। এই দুই সেনৌয়া বীণা-গুণী ভিন্ন তাঁর চেয়ে নামী তখন আর কেউ নেই।

আসরে দরবারে কি নাম-ডাক সে যুগে বন্দে আলীর! আর তেমনি মুজরো।

ইন্দোর রাজ্যেই তিনি বেশিদিন থেকেছেন বটে। শিবাজী রাও তাকে দাক্ষিণ্যও করেছেন সবার চেয়ে বেশি। কিন্তু তিনি অনেক জায়গায় ঘুরেছেন, বাজিয়েছেন। নানা দরবারে, আসরে। হারদরাবাদ পুনা গোয়ালিয়র দাতিয়া বোন্ধাই কাশী এমন কি নেপালের রাণা দরবার পর্যন্ত দেখেছে তাঁর গুণপনা।

হাত ভরে তাঁর রোজগার। আর আসরে আসরে নাম যশ থাতির।

তবে থাঁ সাহেবের মেজাজ বড় খামখেয়ালী। আর চক্ষে স্বভাবও। এক জায়গায় বেশিদিন তিষ্ঠতে পারেন না। কদিন হলেই—আরে চলো চলো। তলি গুটিয়ে নিতে বলেন শিশুদের।

ব্যতিক্রম শুধু হোলকর রাজ্য।

যেমন আশ্চর্য শিল্পী, তেমনি বিচির প্রকৃতি। যেন বিপরীতের সমাবেশ। একদিকে তাঁর দস্তরমত ভোগস্থুরে লালচ। আবার অন্তরে কোথায় আছে এক মুসাফির। সে কেবল ভার হালকা করতে চায়। যত মুজরোর বহর, তত বে-হিসাবী দেমাক। ভতি থলিয়া ফাঁকা করে দিতে কতক্ষণ! হাতে রেস্ত থাকলেই আমীরী চাল ছাড়। বরদাস্ত হয় না। তখন একেবারে দিল্দরিয়া। খাইখিলাই পান-ভোজন, এমন কি দান খয়রাতও। তারপর আবার সেই ফকিরের

হাল। তাঁর মনোবীণায় স্বরৈশ্চর্ঘের অস্তরালে কোথায় লুকিয়ে থাকে এক-স্বরা একত্বাটি!

মধ্যবয়স থেকেই বন্দে আলী শিষ্যের দলে ঘেরা। অনেক শিষ্য-সেবক তাঁর। তারাই তাঁর তদ্বির-তদারক করে। নজর রাখে ওস্তাদজীর মেজাজ-মর্জির দিকে। তাঁর নিজের কোন উদ্ঘোগই নেই। শিষ্য-সেবকরাই নিয়ে যায় দরবারে। এক আসর থেকে অন্ত আসরে। তিনি জানেন শুধু আসর মাত করতে। স্বরের ঝঙ্কারে মায়ালোক স্ফজন করে দিতে। তারপর মুজরোর তোড়া তেমন হলেই নবাবী শুরু। আবার হালকা হয়ে গেলেও নিবিকার। কোন আফসোস নেই। বিনা মুজরোয় যে আসর করবেন না, তাও নয়। কদরদান মহফিলে নিজেরগরজেই বাজনা শোনাবেন ঘণ্টার পর ঘণ্টা।

অতি চিন্তাকর্ষক তাঁর বাজনার রীতি। আর ‘স্বরিল’ হাত। আঙুলের টিপে টিপে ঝরে পড়ে স্বরের ধারা। শ্রোতারা মন্ত্রমুক্ত হয়ে যায়। যন্ত্রটির ওপর তাঁর অসামান্য অধিকার। সব পর্দার সব স্বরে, এক ঘাঁট থেকে আরেক ঘাঁটে অবলীলায় তাঁর ছুটি আঙুলের চলাফেরা। স্বরের সঞ্চরণে, স্বরের নির্বরে।

বন্দে আলীর হাতে যন্ত্র যেন কথা কয়। তাঁকে লঘু চিন্তে মজা করতেও দেখা যায় বাজনা নিয়ে। ঘরোয়া পরিবেশে কত ধৰনি বার করবেন খেলাচ্ছলে। যে-কোন শব্দ নিজের যন্ত্রে নকশ করে দেখিয়ে দেন। কারুর কথার সঙ্গে মেলান বীণার স্বর।

ক্রপদ অঙ্গের বাজই তিনি শুনিয়ে থাকেন। ক্রপদ গানও করেন ইচ্ছা হলে, নিজেই বীণা বাজিয়ে। কিন্তু একেকদিনের মেজাজে ঠুংরির কাজও এই অভিজ্ঞাত যন্ত্রে করেছেন, এমন ‘অপযশ’ও তাঁর আছে। তবে তা ব্যতিক্রম। স্বতঃস্ফূর্ত মতিভ্রম থেন। আসরে দরবারে বন্দে আলীর প্রকৃত শিল্পী-রূপ—রাগ রূপায়ণে ক্রপদী নিষ্ঠা, সমাহিতচিন্ত। আর প্রায়শ উচ্চমানের বাজনা সব আসরে। নেপাল দরবারে মোহর লাভেও যেমন, কোন খাতিরের আসরেও তেমনি।

তাঁর বাজনাৰ স্থৃতি সবচেয়ে জীবন্ত আছে ইন্দোৱে। যেমন  
সেদিনকাৱ আসৱটি হয়েছিল। সেই ১৮৮০-৮২ কিংবা তাৱ  
কাছাকাছি কোন বছৱে।

সে আসৱ ইন্দোৱ শহৱেৰ ত্ৰিতল বিশাল জালবাগ প্ৰাসাদে  
নয়। ও তো নতুন রাজভবন। আৱো পুৱনো আমলেৰ আটতলা  
প্ৰাসাদ ইন্দোৱেৰ। সেখানেই বিখ্যাত দৱবাৰ।

ৱাণী অহল্যা বাঙ্গীয়েৰ (মৃত্যু : ১৭৯৬) সময়েও ছিল সেই আটতলা  
ৱাজপ্ৰাসাদ। আৱ তাৱ দৱবাৰ। কিন্তু তখন কি গৌৰব বৈভব  
তাৱ! ৱাণী অহল্যাৰ শুশুৱেৰ সময়েই তো হোলকৱ রাজবংশেৰ  
পতন হয়েছিল। তবে এ ক্ষণটি আৱো অনেক কালেৱ পুৱনো।  
সেই প্ৰাচীন নাম ইন্দ্ৰশ্বৰ। তাই থেকে ইন্দোৱ।

মলহৱ রাও হোলকৱ (১৬৯৩—১৭৬৬) এই নতুন কালেৱ ইন্দোৱ  
ৱাজ্যেৰ প্ৰথম নৃপতি। হোল নামে গ্ৰামে মলহৱ আগে বাস  
কৱতেন। সেজন্তে তিনি হলেন (মাৱাঠী ভাষায়) হোল-কৱ।  
হোলেৱ সামান্য এক কুষিজীবীৰ পুত্ৰ মলহৱ। কিন্তু যেমন তাঁৰ  
সাতস, বীৱত্ব, তেমনি বিচক্ষণ বুদ্ধি।

শক্তিমান মাৱাঠী সাম্রাজ্যেৰ পেশোয়া বা প্ৰধান মন্ত্ৰী তখন  
প্ৰথম বাজী রাও। মলহৱ রাও সেই পেশোয়াৰ এক সেনাপতিৰ  
পদ পেলেন, অতি তুলনা বয়সেই, বীৱত্বেৰ পৰিচয় দিয়ে। তাৱপৰ  
১৭২৮ সালে বাজী রাও জায়গীৰ দিলেন মলহৱ রাও হোলকৱকে।  
তাৱ কয়েক বছৱেৰ মধ্যেই মলহৱ মালবেৱ সৰ্বাধাৰ্ক হলেন।  
তাৱপৰ তাঁকে ইন্দোৱ প্ৰদেশেৰ জায়গীৰদাৰ কৱলেন বাজী রাও  
পেশোয়া।

তখন থেকেই ইন্দোৱ বাজ্যেৰ পতন ইজ মলহৱ রাও হোলকৱৰে  
হাতে। আৱ তাৱ একালেৱ রাজধানী ইন্দোৱ। মলহৱ রাওৰেণ্ট  
পুত্ৰবধু পুণ্যশ্রেণীকা অহল্যা বাঙ্গী (জন্ম : ১৭২৭-২৬)। ১৮ বছৱ বয়সে  
বিধবা ৱাণী অহল্যা সন্ধ্যাসৰত নিয়ে অতি যোগ্যতায় রাজকাৰ্য কৱে

যান। ধর্মকর্মে প্রজা-পালনে গ্রায় শাসনে আৱ বৌৰভেও প্ৰাতঃস্মৰণীয়া  
ৱানী তিনি।

অহল্যা বাঙ্গীয়ের মৃত্যুৰ প্ৰায় ৮০ বছৰ পৰে ইন্দোৱ-ৱাজ তথন  
শিবাজী রাও হোল্কৰ। কিন্তু মলহৰ রাও কিংবা রানী অহল্যাৰ  
মাতৃভ্যেৰ তুলনায় এ রাজ্য এখন নামমাত্ৰ। বাহুৰূপ যেন। কাৰণ  
শিবাজী রাও হোল্কৰ ইংৰেজৰ খেতাবী মহারাজ। প্ৰকৃত কৰ্ত্তৃ  
বা স্বাধীনতা-হাৱা একটি ‘দেশীয় রাজ্য’ মাত্ৰ।

তবে আগেকাৱ ঠাট অনেকখানি আছে। পুৱনো রাজ্যপাটেৱ  
কাঠামো। আৱ সে আমলেৱ আটতল রাজপ্ৰাসাদ। তাৱ সেকালেৱ  
দৱবারে এখন কেবল সঙ্গীতেৱ দৱবার। অতিশয় সঙ্গীতপ্ৰেমী  
শিবাজী রাও। তাৰ কল্যাণে ইন্দোৱ দৱবার হয়েছে উত্তৰ ভাৱতেৱ  
এক শ্ৰেষ্ঠ সঙ্গীতসভা। নানা গুণীজনেৱ আশ্রয় আৱ সম্ভালেৱ আসন  
এখানে। সদাশয় মহারাজ। তাঁদেৱ গুণগ্ৰাহী পোষক। আৱ তাৰ  
দৱবাবী গুণীমত্ত্বীৰ মধ্যমণি বন্দে আলী থাৰ্হ।

সেখানে তাৰ মেই ১৮৮০-১১ সালেৱ আসৱতিৰ কথা। বন্দে  
আলীৰ তথন পৱিণত বয়স। শিল্পী-সন্তাৱ চূড়ান্ত বিকশিত পৰ্ব।  
বহুদিনেৱ সাধনায় অজিত বাদন-নৈপুণ্য এবং প্ৰসিদ্ধি প্ৰতিপত্তি।

সেদিন সন্ধ্যাৰ পৱ থাৰ্হ সাহেব আসৱে এলেন। আজ বিশেষ  
দৱবার, তাই শিষ্য-সেবকৰা অনুপস্থিত।

থাস দৱবারে আছেন মহারাজ। অনতিদূৰে তাৰ ক'জন বিশিষ্ট  
পাত্ৰমিত্ৰ। আৱ এক পাশে দৱবারেৱ বাঙ্গীজী চুম্বা বাঙ্গ। গুণ  
বিচাৱেৱ আগে বাঙ্গসাহেবা দৰ্শনধাৰিণীৰ্থ। মঞ্জৰিত ঘোৱন-  
নিকুঞ্জ।

শিবাজী রাও বন্দে আলীকে বাজনা আৱস্থ কৱতে বললেন।  
প্ৰথম প্ৰহৰ রাত্ৰি। সুসজ্জিত বিৱাট দৱবার-কক্ষ। রশ্মিৱৱা চিকণ  
ঝাড়লঢ়ন। তাৱ আলো বিছুৱিত, প্ৰতিফলিত হয়েছে হোল্কৱেৱ  
মুকুমালায়, উষ্ণীষেৱ মোতিতে, অঙুৱীয়কেৱ হীৱকথণে। চুম্বা-

বাস্তীয়ের মণিহারে। দেওয়ালের বর্ণাচ্চ চিত্রাবলীতে। সুকোমল  
সুচিত্রিত গালিচায়। বন্দে আলীর সুদৃশ্য যন্ত্রিতে।

সুগন্ধী নির্যাসে আমোদিত আবহ। সুখস্পর্শ আসনে বসে থা  
সাহেব বীণা কোলে তুলে নিলেন। মহারাজকে নতি জানিয়ে, সুর  
মেলাতে আরম্ভ করলেন অচল ঠাটের চারটি তারে।

বন্দে আলীর বীণার সুর বাঁধার বিশেষ শ্বেকরণ আছে। তা বহু  
সময়সাপেক্ষ।

এই অবকাশে পরিক্রমা করে নেওয়া যায় তাঁর পূর্ব-বৃত্তান্তঃ

কিরানাৰ সন্তান বন্দে আলী থা। যুক্ত-প্ৰদেশেৰ সাহাৱাণপুৰ  
অঞ্চলেৰ একটি সামাজি গ্ৰাম কিৱানা। কিন্তু সঙ্গীতজগতে স্থান তাৰ  
অসামাজি। কাৱণ গ্ৰামখানি কলাবৎ অধৃয়িত। বহু সংখ্যায় বিভিন্ন  
ৱীতিৰ গায়ক-বাদকৰা কিৱানা থেকে সঙ্গীতজগতে আত্মপ্ৰকাশ  
কৱেছেন। বোধহয় শাহী আমল থেকে এখানে তাঁদেৱ বসবাসেৰ  
সূত্ৰপাত।

দিল্লীৰ অনতিদূৰে কিৱানাৰ অবস্থান। দৱাৰী গুণী হয়ে তাঁৰা  
জমি জায়গীৰ পেয়েছেন শাহী ফৰ্মানে। বংশানুক্ৰমে এখানে স্থায়ী  
হয়েছেন। আৱ কালক্ৰমে গড়ে উঠেছে নানা সঙ্গীত-সেবক পৰিবাৰ।  
উত্তৰ ভাৱতেৰ সাঙ্গীতিক মানচিত্ৰে কিৱানাৰ স্থান চিহ্নিত হয়ে  
গেছে। পৃথক পদ্ধতিৰ গায়নশিল্পী, বিভিন্ন যন্ত্ৰেৰ কলাবৎদেৱ জন্ম  
দিয়েছে কিৱানা। ক্রপদী খেয়ালীয়া এবং টপ্পা-ঠুঁৰিৰ গায়ক। সারঙ্গী  
বীণাৰ তবলিয়া। তাঁদেৱ পৰম্পৰা আত্মীয়তা তথা পাৱিবাৰিক  
সম্পর্ক থাকতে পাৱে। কিন্তু সাঙ্গীতিক-পৰম্পৰা কিংবা আদান-  
প্ৰদান সৰ্বথা নয়।

একই বংশে বা পৰিবাৰে দেখা দিয়েছেন ভিন্ন ৱীতিৰ গৌতশিল্পী,  
স্বতন্ত্ৰ যন্ত্ৰী। তাই এত বড় সঙ্গীতকেন্দ্ৰ হয়েও এখানে কোন বড়  
ঘৱানাৰ প্ৰতিষ্ঠা হয়নি। কিন্তু হতে পাৱত, কোন বিশিষ্ট ৱীতিৰ কৰ্ত-  
সঙ্গীত বা একটি যন্ত্ৰসঙ্গীতেৰ পীঠস্থান হলৈ। কিৱানা ঘৱানা বলে যে

খেয়াল পদ্ধতি প্রসিদ্ধ হয়, তা আবহুল করিমের দৃষ্টান্তে এবং অনেক পরের কথা। বন্দে আলীর পরবর্তী প্রজন্মে। ঠাঁর শেষ বয়সে আবহুল করিমের সূচনাপর্ব। আর কিরানায় সঙ্গীতচর্চার সূত্রপাত বন্দে আলীর অন্ত আট দশ পুরুষ, কিংবা তারও আগে থেকে।

সুতরাং বলা যায় কিরানার ঐতিহ্য তার সামগ্রিক চর্চায়। কোন একটি বিশিষ্ট ধারায় নয়। আবহুল করিমের খেয়ালের চাল যেমন ঠাঁর নিজস্ব প্রতিভার দান, তেমনি বন্দে আলীর বীণাবাদনও। এই কেন্দ্রের ঐতিহ্যমণ্ডিত সাঙ্গীতিক পরিবেশে দেখা দিয়েছে ঠাঁদের মতন বিভিন্ন, বিচিত্র প্রতিভা।

সেই কিরানায় আনুমানিক ১৮৩০ সালে বন্দে আলীর জন্ম। ঠাঁর পিতাও বীণাবাদক ছিলেন, শোনা যায়। তবে বংশানুক্রমে ছিল না। ঠাঁদের বীণার চর্চা। তাছাড়া, পিতাকে অঞ্চল বয়সেই হারান বন্দে আলী। ঠাঁর কাছে শিক্ষার স্বয়েগ তিনি পাননি। বন্দে আলী মাতুলের হাতে তৈয়ারী হন। বিখ্যাত ক্রপদী বহরম থা জয়পুরে ডাগর পরিবারের প্রতিষ্ঠাতা। তিনি বন্দে আলীর মাতুল ও শিক্ষাদাতা। পিতৃহীন ভাগিনাকে তিনি কাছে রেখে তালিম দেন।

বীণার বাজ তো ক্রপদ অঙ্গের। মাতুলের সেই ক্রপদ-বিদ্যায় গম্ভীর হলেন বন্দে আলী। ক্রপদ অঙ্গ বীণায় ঝোলেন। বহরম থা'র তালিম কঢ়ে নিতেন তিনি। ক্রপদ গানের চর্চাও মাতুলের সাক্ষাৎ দৃষ্টান্তে করতেন। গাইতেন ক্রপদ; ফলে গায়কও হয়েছিলেন। পরে আসরেও ক্রপদ গান গাইতেন বন্দে আলী। তবে আপন বীণা বাজনারই সহযোগে। তার উদাহরণ পরে দেওয়া হবে।

মাতুলের সঙ্গীত-সঙ্গ বন্দে আলী ছেলেবেলা থেকেই পান। কিরানা থেকে দিল্লী। তারপর সেখান থেকে ৫৭-র মহাবিজ্ঞোহের ঘনঘটায় চলে যান জয়পুরে, বহরম থা'রই সঙ্গে। জয়পুরের মহারাজা বহরম থা'কে দরবারে রেখে দিলেন। বন্দে আলী তখনো মামাৰ

কাছে। এমনিভাবে প্রতিতা, সাধনা ও শিক্ষায় ঘোবনেই তিনি গুণী  
কলাকার হলেন।

কোন কোন ঘরে বন্দে আলীর ওস্তাদ হিলেন নির্মল শাহ।  
তানসেনের কল্পাবংশীয় মহা-গুণী তন্ত্রকার। বিখ্যাত বীণকার  
ও মুরাও থার শঙ্কুর, কাকা ও ওস্তাদ নির্মল শাহ। কিন্তু একথায়  
গভীর সন্দেহ জাগে। কারণ, বালক বয়স থেকে বন্দে আলীর  
সমস্ত শিক্ষা পর্ব মাতৃলের কাছেই উদ্ধাপিত। বীণাবাদক নির্মল  
শাহের সঙ্গে বন্দে আলীর অস্তত তুই প্রজন্মের কাল-ব্যবধান। নির্মল  
শাহের সঙ্গে তাঁর কখনো সাক্ষাৎ ঘটার সম্ভাবনাও অল্প। তাছাড়া,  
সেনৌয়া নির্মল শাহ, অন্য বংশীয়। অনাঞ্চীয়, পেশাদার পরিবারের  
বন্দে আলীকে ঘরানা সম্পদ দেবেন কেন! সেকালের রেওয়াজে  
তা অস্থানাবিক। সঙ্গীতজগতের কোন অতিস্ফুতিতেই নির্মল শাহের  
সঙ্গে বন্দে আলীর সংস্কৰ নেই। বহুম থার সঙ্গীজীবনের সঙ্গেই  
যুক্ত আছেন বন্দে আলী। মাতৃলের কাছে তৈয়ারী হয়ে তিনি  
চলে যান গোয়ালিয়রে।

বরং গোয়ালিয়রে বন্দে আলীর কিছু শিক্ষার কথা পাওয়া যায়।  
তিনি গোয়ালিয়রে আসেন যুবক বয়সে। হন্দু হস্ত থাঁ ছ ভাই তখন  
সেখানে খেয়ালের দুর্ধর্ষ কলাবৎ। তাঁরা তুজনেই বীণকার, শুকৃষ্ট  
ডরণ বন্দে আলীর গুণমুক্ত হলেন। ফলে তাঁকে দামাদ অর্ধাং  
জামাই করে নিলেন হন্দু থাঁ। আর হস্ত থার কথায় তাঁর প্রিয়  
শিশু দেবজী বুয়া কিছুদিন বন্দে আলীকে ঝর্পদ আর টঁঠা শেখালেন।  
হস্ত থার এক ঘোগা বংশধর গুলে ইমামও তখন দেবজীর তালিম  
পান, বন্দে আলীর সঙ্গে।

গোয়ালিয়রের পর অন্য কোথাও বন্দে আলীর শেখার কথা জানা  
বাস্তু। সেই বিবাহিত জীবন থেকেই তাঁর পেশাদার জীবনেরও  
আরম্ভ। নানা আসরে দরবারে মুজরো হতে থাকে। বন্দে আলীর  
বীতিমত মাম ধশ হয় গুণী বীণকার বলে। হায়দরাবাদ থেকে

কাশী। আরো ওদিকে নেপাল দরবার পর্বত তিনি মুজৰো করে আসেন।

হনু খাই জামাই বলে আলীর ছই কঙ্গা। হজরেই তিনি বিবাহ দেন মাতুল বংশে। বহরমের সহোদর অর্থাৎ বলে আলীর অপর মাতুল হায়দর খ। বলে আলীর ছই জামাত। হলেন সেই হায়দরের ছই পৌত্র জাকরদ্দিন ও আলাবল্দে। মহম্মদ জানের পুত্র তারা। সেই ছই ভাইও জয়পুর-নিবাসী। আর পরের যুগে বলে আলীর এই ছই জামাই ধূরঙ্গর ঝুপদী বলে নাম করেছিলেন।

একেই তো উড়ু উড়ু স্বভাব বলে আলীর। পারিবারিক কর্তব্য, দায়িত্ব চুকে যায় ছই মেয়ের সাদী দিয়ে। খামখেরালী স্বভাবও তার বয়সের সঙ্গে বাড়তে থাকে। বেশিদিন ভাল জাগে না একজ। আর চরিত্রের সেই বৈপরীত্য। সুরের ধ্যানী, জাগতিক ব্যাপারে উদাসীন। আবার বিশাসভোগেও নেই অক্ষট। একই সন্তায় বায়াবর ও সুখ-নৌড়ের কপোত।

তবে সেসব তার ব্যক্তিজীবনের কথা। শিল্পী-সন্তার পরিচায়ক নয়।

বলে আলীর নাম শিল্পী এবং গুরু ছই শুণেই। বীণাবাদনে তিনি একটি ধারার প্রবর্তক। তার যোগ্য শিষ্যরা পরের যুগে তার ধারক-বাহক হন। শিষ্যদের অঙ্গেও চিহ্নিত থাকে ওস্তাদের নাম। তার সেই পরিচয়ও দেবার মতন। বলা চলে, ইন্দোর বীণ কার ঘরানার আদিপুরুষ বলে আলী।

নানা সময় মিলে ইন্দোরেই তিনি বেশি কাটান। তাই তার শিষ্যমণ্ডলীও গড়ে উঠে এখনৈ। তাদের মধ্যে শ্রেষ্ঠ তিনজন। গুরুর বিজ্ঞার উপযুক্ত আধাৰ। বিশেব মূরাদ খ। অস্ত হজর হলেন বুকু খ। ও রঞ্জব আলী। তারা তিনজনেই বলে আলীর তালিম পান বীণায় এবং ইন্দোরে থেকে। তাদের মধ্যে মূরাদ ও বুকু খাই সঙ্গীত-জীবন ও বেশির ভাগ ইন্দোরেই কেটে বাব। মূরাদ খ। ছিলেন

একান্তভাবেই বীণ্কার। আর বুন্দু থা সেই সঙ্গে সেতারও  
বাজাতেন। বন্দে আলৌর তৃতীয় প্রসিদ্ধ শিষ্য রঞ্জব আলৌ একাধারে  
বীণ্কার ও খেয়ালৌয়া। খেয়াল গানের তালিম রঞ্জব আলৌ তাঁর  
পিতা মুগলু খাঁর কাছে পান। তাঁর বীণাযন্ত্রে তালিম হয় বন্দে  
আলৌর কাছে।

বন্দে আলৌর প্রধান শিষ্য মুরাদ খাঁ। তাঁর সবচেয়ে কুতী  
উন্তরসাধক। মুরাদ খাঁ এই ধারার বীণাবাদনে যোগ্য শিষ্য গড়ে-  
ছিলেন জতিফ, মজিদ ছ তাইকে।

বন্দে আলৌর নানা সাময়িক শিষ্যের মধ্যে একজন হলেন এমদাদ  
খাঁ, কলকাতার সুপরিচিত সেতার-সুরবাহার গুণী। ইন্দোরে তিনি  
কিছুদিন বন্দে আলৌর সঙ্গ করেছিলেন।

তাঁর কাছে আরো অনেকে শেখেন অনিয়মিতভাবে। সেই সব  
শিষ্যরা কুতী কিংবা খ্যাতিমান হননি। কিন্তু উন্তাদের সঙ্গে থাকতেন  
তাঁর। খিদ্মদগারীঃকরতেন আর তাইতেই সন্তুষ্ট।

একজন মাত্র মহিলা বন্দে আলৌর তালিম পেয়েছিলেন। কিন্তু  
সে শিষ্যার কথা এখন নয়।

বন্দে আলৌর পূর্ব-কথা এই পর্যন্ত। এবার আরম্ভ করা চলে  
ইন্দোর দরবারের সেই প্রসঙ্গ। তবে তাঁর ক'বছর আগেকার বন্দে  
আলৌর বিষয়ে একটি বিবরণ পাওয়া যায়। সেটি উদ্বৃত্ত করে দেবার  
মতন। কারণ উন্তাদজীর এক অন্তরঙ্গ পরিচয় আছে এখানে। আর  
তাঁর আসরের ধরণধারণও।

বিবৃতিটি দিয়েছেন বারাণসীর ক্রমদী হরিনারায়ণ মুখোপাধ্যায়।  
কিশোর বয়সে তিনি কাশীরই ছুটি আসরে বন্দে আলৌর বীণা  
শুনেছিলেন। প্রথমটি ১৮৭৪-৭৫ সালে। আর একটি ‘তারই কিছুদিন  
পরে’।

সেই আসর ছুটি হয় যথাক্রমে (কাশীর) দীঘাপতিয়া ভবনে ও  
মদনপুরার রায়বাহাদুর পিরৌশচন্দ্র সাহিড়ীর গৃহে। প্রথমটি হল, চৌষট্টি

যোগিনীর ঘাটে, গঙ্গার ধারেই। ষে বাড়িতে বর্তমানে সীতারামদাস  
ওকারলাথের বারাণসী আশ্রম। বন্দে আলী সেই ছুটি আসরেই  
অংশ নেন। অন্ত যে গুণীরা একটি বা ছুটি আসরে যোগ দেন তাদের  
মধ্যে বীণকার সাদেক আলী থঁ।, ক্রপদী গোপালপ্রসাদ মিশ্র, তাঁর  
শিষ্য (কলকাতার) ক্রপদ-গায়ক গোপালচন্দ্র চক্রবর্তী, সেতারী  
আহমদ থঁ।, ক্রপদী রামদাস গোস্বামী, বীণকার মহেশচন্দ্র সরকার,  
সেতারী গণেশীলাল বাজপেয়ী, পাখোয়াজী কাশীনাথ মিশ্র,  
পাখোয়াজী গণেশ সিংহের নাম উল্লেখ্য।

হরিনারায়ণের বিবরণী থেকে বন্দে আলী থঁর বীণার রঞ্জিনী  
শক্তি, তাঁর যন্ত্র বাঁধার নিজস্ব রীতি, তখনকার সঙ্গীতসমাজে তাঁর  
সম্মান ও প্রভাব, বীণার সঙ্গে গান গাওয়া, তাঁর সরস সিক্ত চিত্ত,  
'কারণ' করা ইত্যাদির চাকুষ পরিচয় পাওয়া যায়। সেজন্তে  
হরিনারায়ণের বিবৃতির অংশ উক্ত করে দেওয়া হল, বন্দে আলীর  
যন্ত্র বাঁধার বর্ণনা থেকে :—

'তিনি এক একটি তার সুরে মিলাইয়া সেই তার ধরিয়া বীণা  
যন্ত্রটি তুলিয়া ধরিতেন ; যদি তারটি নরম (বেসুরা) না হইত, তবে  
সে তার রাখিতেন, নচেৎ অন্ত তার চড়াইতেন। এই প্রথম প্রকরণ।  
সমস্ত তার এইভাবে পরৌক্ত করিয়া চড়াইতেন, পরে একটি ঝঢ়ার  
দিতেন। সব তারের সুর মিলিত হইয়া একটি সুর (ধ্বনি) যতক্ষণ  
পর্যন্ত না বাহির হইত, ততক্ষণ তিনি সুর মিলাইতেন। ইহা  
দ্বিতীয় প্রকরণ।... বন্দে আলী থঁ। সরস্তী স্তব ও প্রণামাস্তে বীণা  
ঘাড়ে করিলেন এবং চারি প্রকার রীতি অনুসারে আলাপ করিতে  
লাগিলেন। পরে তারপরণ বাজাইতে আরম্ভ করিলেন এবং গণেশ  
সিংহ মৃদঙ্গে সঙ্গত করিতে লাগিলেন।... গোপালবাবু 'চরণ মেরে  
মাথে' কল্যাণের ক্রপদ গান করিয়াছিলেন। রামদাসবাবু 'গোরা  
গণেশ' কল্যাণের ক্রপদ গান করিয়াছিলেন। গোপালবাবু জিজ্ঞাসা  
করিলেন, 'এই কি কেদাবতী (প্রাচীনকালের) চিত্র?' মহেশবাবু

তৎক্ষণাৎ বলিয়া উঠিলেন, ‘কল্যাণের সনদী ঝুপদ ছই চারিটিই আছে।’ বন্দে আলী থঁ। হাসিতে হাসিতে বলিলেন, ‘কল্যাণকা দো চারহি ঝুপদ সনদী আউর সব রামানন্দী।’ থঁ। সাহেব একটু কারণ করিতেন। তিনি হাসিতে হাসিতে ‘হাদি এ আল্লাহ’ গান করিতে লাগিলেন এবং বীণা বাজাইতে লাগলেন। আমি এই প্রথম বীণার সঙ্গে গান শুনিলাম এবং পরেও আর একবার কাসিম আলী থঁ’র গান বীণার সহিত শুনিয়াছি। তৃতীয়বার শুনি নাই। ৫০ বৎসরে কি ভীষণ পরিবর্তন।’...

‘কিছুদিন পরে পুনরায় কাশীধামের মদনপুরায় স্বর্গীয় গিরীশচন্দ্ৰ জাহিড়ী রায়-বাহাদুর মহাশয়ের বাটীতে তন্ত্রকারণগণের সম্মেলন হইয়াছিল।...বাজপেয়ীজী সেতার বাজাইলেন, কিন্তু বীণার সমস্ত কার্য সেতারে দেখাইলেন। এই নিমিত্তই বন্দে আলী থঁ। অত্যন্ত খুশী হইয়াছিলেন এবং বাজন। শেষ হইলে বাজপেয়ীজীকে আলিঙ্গন করিয়াছিলেন।...পরদিন বন্দে আলী থঁ’র বীণা হইয়াছিল। থঁ। সাহেবের বীণাবাদনের কথা কি বলিব। সে বক্ষার যিনি শুনিয়াছেন, তিনি ধন্ত ; এক্ষণে আর সেরূপ বীণাবাদন শুনা যায় ন।...এদিন ঝাঁপতাল সুর-ফাঁকতাল চৌতালের মধ্যে সন্নিবিষ্ট করিয়া তারপরণ বাজানো হইয়াছিল। গণেশ সিংজী অবলীলাক্রমে সঙ্গত করিয়া থঁ। সাহেবকে সন্তুষ্ট করিলেন। থঁ। সাহেবও তাঁহার প্রশংসনাবাদ করিলেন।’ ( সঙ্গীতে পরিবর্তন, পৃষ্ঠা ৩-৮ )।

সেদিন ইন্দোর দরবারেও এমনি বাজাতে লাগলেন বন্দে আলী থঁ। তাঁর তখন মেজাজ শরীফ। কাশীর ওই আসরের মতন ‘কারণ’-করার কারণেও হতে পারে। এবং/বা কুপদৃষ্টির উপলক্ষ্যেও হতে পারে।

সে যা-ই হোক, তাঁর বীণার সুরে জমজমাট হয়ে উঠল আসর। চিত্তহারী বাজন। শিবাজী রাও বার বার সাধুবাদ করতে লাগলেন। আর উদ্বৃক্ষ হয়ে বাজিয়ে চললেন বন্দে আলী। মীড় ঘসিং ইত্যাদির

ওস্তাদ তিনি। তেমনি নানা অঙ্কারের পারিপাট্যে রাগকে প্রাণবন্ত  
করে তুলেন। অচল ঠাটের পর্দায় পর্দায়, চলন্ত আঙুলের টিপে  
টিপে শুরের স্ফুরিঙ্গ।

সম্মোহিত হলেন ইন্দোর-পতি।

বাজনা শেষ হতে শিল্পীকে উচ্ছ্বসিত প্রশংসা করে বলেন, ‘কি  
অপূর্ব বীণা আজ শোনালেন খ’। সাব। এখন আপনি কি বখ্শিশ  
চান, বলুন। যা চাইবেন, আজ আপনাকে তা-ই দেব।’

চুম্বা বাঙ্গিয়ের দিকে এক নজর চেয়ে নিলেন বন্দে আলী খ’।  
তারপর অকপটেই জানালেন, ‘এই বাঙ্গিজীকে তাহলে বখ্শিশ দিন,  
মহারাজ।’

অভাবিত আবেদন ! অপ্রস্তুত শিবাজী রাও। ক্ষণকাল তিনি  
সন্তুষ্ট হয়ে রইলেন।

তারপর গম্ভীর কণ্ঠে বলেন, ‘অন্ত কেউ একথা উচ্চারণ করলে  
তার গদ্দান যেত। কিন্তু আপনি ওস্তাদজী। আপনার কথা  
রাখব।’

চুম্বা বাঙ্গিয়ের দিকে ফিরে জিজ্ঞেস করলেন, ‘খ’। সাহেবের কথায়  
রাজি ?’

সুর্মাটানা আঁখিপক্ষ নত করলেন বাঙ্গিজী। তারপর ঈষৎ শির  
সঞ্চালনে সম্মতি জানালেন। তিনিও সুর-বিদ্ধ হয়েছিলেন।...

সে রাত্রে দয়বার থেকে জীবন্ত বখ্শিশটি নিয়ে ঘরে ফিরলেন  
বন্দে আলী। আর অচিরেই চুম্বা বাঙ্গিকে নিকা করে নিলেন।

বাঙ্গিজী হলেন বিবি। এবং শিশ্যাও। আগে থেকেই তো গায়িকা  
ছিলেন। এবার নতুন করে তালিম নিতে জাগলেন ঘরের এত বড়  
ওস্তাদের কাছে। বন্দে আলীর একমাত্র শিশ্যা চুম্বা বাঙ্গি।

কিছুকাল পরে বন্দে আলী ইন্দোর ত্যাগ করলেন। একা নয়  
অবশ্য। নতুন বিবিকে নিয়ে বোম্বাই চলে গেলেন।

শোনা যায়, সুখী হয়েছিল তাদের বিবাহিত জীবন। সশ্রমিত

সঙ্গীতচর্চায় নাকি রমণীয় ছিল তাঁদের দাম্পত্যচর্চা। আর চুন্না বাঙ্গি  
এক শ্রেষ্ঠা গায়িকা বলে নাম করেছিলেন।

এবারও একটি কল্যাসন্তান পান বল্দে আলী। তবে সে ধারার  
সঙ্গীতচর্চা থাকেন।

বোম্বাইতে বেশ কিছুদিন বাস করে বল্দে আলীরা চলে যান  
পুনায়। সেই তাঁর শেষ বসতি। অন্য কোথাও আর যাওয়া  
হয়নি।

পুনাতেই বল্দে আলীর শেষ নিঃশ্঵াস পড়েছিল। সেখানেই  
সমাধিস্থ স্তুক হয়ে আছে, তাঁর বীণাধ্বনি ! সে বোধ হয় ১৮৯৩  
সালের কথা।

তারপর পুনায় তাঁর স্মৃতিবাণিকী অনুষ্ঠান কয়েক বছর  
চলেছিল।

কিন্তু চুন্না বাঙ্গি আবার ঘরণী হয়েছিলেন নতুন করে। আর  
একজনের জীবনসঙ্গিনী হয়ে। সে ব্যক্তির সঙ্গীতে কোন খ্যাতি বা  
পরিচিতি ছিল না। চুন্না বাঙ্গি ছেড়ে দিয়েছিলেন নাচ গানের  
মুজরো।

বল্দে আলীর একটি বংশপরিচয় আগে দেওয়া হয়নি। তাঁর  
পূর্বপুরুষ ছিলেন জ্ঞান সিং, যাঁর থেকে এ বংশের সঙ্গীতচর্চার প্রসিদ্ধি।  
মোগল আমলের মাঝামাঝি সময়ে জ্ঞান সিং ছিলেন নামী ঝুপদী।  
কি কারণে তিনি মুসলমান হয়ে যান। তখন তাঁর নাম হয় শুরজ্ঞান  
খঁ।। পরের পুরুষ থেকে তাঁদের পুরোপুরি মুসলমানী নাম-পরিচয়।  
কিন্তু জ্ঞান সিং থেকে বল্দে আলী খঁ। সকলেই বংশের ধারায় থাকেন  
রাগসঙ্গীতের একান্ত সাধক।

## দিল্লীর শেষ দরবারী

মুরাদ খঁ।

মুরাদ খঁ নাকি এখনো বেঁচে আছেন ! আর থাকেন এই দিল্লী  
শহরেই ।

বাহাদুর শা জাফরের দরবারী ঝুপদী মুরাদ খঁ ।

কতদিন থেকে মুরাদ খঁ'র নাম জানা, তাঁর কথা শোনা । এক-  
কালের কত বড় ঝুপদী । এখনো তিনি দিল্লীতে রয়েছেন । আর  
এতদূর থেকে এসে তাঁর দেখা পাওয়া যাবে না ? স্বযোগ হবে না  
তাঁর গান শোনার ? এ যে আফসোসের কথা ।

কিন্তু কোথায় তাঁর ঠিকানা ? আগস্তক যাকে জিজ্ঞেস করেন,  
কেউ বলতে পারে না ।

পুরনো আমলের দিল্লী । কিন্তু তাঁর কাছে নতুন । এই প্রথম  
এ শহরে এসেছেন । কোন জানাশোনা লোক নেই । পথঘাটও  
অচেনা । মুরাদ খঁ'র ঠিকানাও নিজে জানেন না ।

একেকবার হতাশ বোধ করেন আগস্তক । আবার আশায় আশায়  
খুঁজতে থাকেন ।

পুরনো দিল্লীর একটা এলাকা । চৌকের কাছাকাছি । নোংরা  
সরু সরু রাস্তা । ছোটখাটো দোকানপাসার । সেকেলে ছাঁদের নিচু  
নিচু বাড়ি ঘর । তারই .. মধ্যে কাউকে সামনে পেয়ে জিজ্ঞেস  
করছেন :

‘মেহেরবানি করে মুরাদ খঁ'র ঠিকানাটা...’

‘কোন মুরাদ খঁ ?’

‘বাদশা বাহাদুর শা'র দরবারে ঝুপদ গাইতেন ।’

‘মালুম নেহি।’

ওই এক জবাব। কেউ জানে না। কি আশ্রয়! এত বড় কালোয়াতের নাম শোনেনি এরা?

দরবারী মুরাদ থাঁ দূরের কথা, বাহাদুর শার নামই বা কজন মনে রেখেছে? সেই কবে, ৩০ বছরেরও আগে দিল্লী ছেড়ে গেছেন বাহাদুর শাহ জাফর। মহাবিজ্ঞাহের প্রতিক্রিয়ার পর্ব তখন। বৃদ্ধ, অক্ষম, নামে-মাত্র বাদশাকেও ইংরেজরা বন্দী করে নিয়ে গেছে রেঙ্গুনে। সেখানেই চার-পাঁচ বছর পরে তিনি মাটি নিয়েছেন।

সেও কত বছর হয়ে গেল। কমবয়সীরা এসব খবর রাখে কে? কিছু বুড়ো মানুষ, রাইস্ লোক হয়ত বাহাদুর শাহ বা তাঁর দরবারের কথা জানে।

শেষ মোগল বাদশা তিনি। তবে শুধু নামে। স্বাধীনতা, রাজ্য, রাজস্ব কিছুই ছিল না। শুধু দিল্লী কেল্লার চৌহদির মধ্যে বুটিশের বৃত্তিধারী জীবন। কিন্তু অন্তরের গুণে তাঁর ছর্দাস্ত পূর্বপুরুষদের চেয়ে হয়ত বড় ছিলেন বাহাদুর শাহ। কবি, গীত-রচয়িতা তিনি। ‘জাফর’ জেখনৌ নামে উৎকৃষ্ট কিছু কবিতা লেখেন। রচনা করেন কয়েকটি গান। আধ্যাত্মিক গভৌরতার জন্যে যার কোন কোনটি বেঁচে থাকে। যেমন—তুমসে হামনে দিল্কো জাগায়া যো কুছ হ্যায সো তুঁহি হ্যায়। এক তুবকো আপনা পায়া যো কুছ হ্যায সো তুঁহি হ্যায়।’..

সুফী ভাবধারার মানুষ ছিলেন বাহাদুর শাহ জাফর। আর ছিল তাঁর—সেই দুরবস্থার মধ্যেও যতটুকু সন্তু—সঙ্গীত দরবার। নামমাত্র হলেও বাদশা তো। তাই একটা শাহী কেতা ছিল। সেই লাল কেল্লার পুরনো দরবারে আসন্ন বস্ত বাদশার জন্যে।

তিনি যেমন কবি, তেমনি কাব্যপ্রিয়। কবি-সঙ্গ পসন্দ করেন। তাঁর কাছে আসেন ঘালিব নামে সুপরিচিত মৌজা আসাদ উল্লা থাঁ।

শ্রেষ্ঠ উত্তু' কবি ও গজল রচয়িতা। তাঁর নতুন রচনা গজল শ্বেত  
রসিক বোকা বাদশাকে শোনান।

কোনদিন জমে ওঠে গান-বাজনার মহফিল। তলব যেমন হোক,  
ক'জন গুণী তো ছিলেন দরবারে। বিশেষ ছজন—মুরাদ থা আর  
নাথ থা। তাঁরা দরদৌ বাহাদুর শাহকে গান শোনাতে আসতেন।  
তাঁদের পেয়ার করতেন বাদশা।

সেই দরবারী কলাকার ছজনেই খুপদী। তবে নাথ থা সেই সঙ্গে  
খেয়াল টপ্পা ইত্যাদিও গাইতেন। একবার কলকাতায় এসেছিলেন  
নাথ থা। বউবাজারের শুপরিচিত সঙ্গীতাসর সরকার বাড়িতে গান  
শুনিয়েছিলেন।

তাঁর বিবরণ দিয়েছেন ( মনৌষী শিক্ষাবিদ ভূদেব মুখোপাধ্যায়ের  
পুত্র ) মুকুন্দদেব মুখোপাধ্যায় :—‘...একদিন কলিকাতায় বহুবাজারে  
সরকারদের বাড়িতে থা সাহেবের গান হইতেছিল, রামলাল দক্ষ  
মহাশয় ( শুশ্রাবিক গায়ক, কোল্লগরের নিকটবর্তী ভদ্রকালী নিবাসী  
'দৌন রাম' ভণিতা সংযুক্ত ভক্তি পরিসিকি গানসমূহ ইহার বিরচিত )  
তথায় উপস্থিত ছিলেন এবং তিনি গান শুনিয়া মোহিত হইয়া  
গিয়াছিলেন। সঙ্গীত সমাপ্তির পর রামবাবু বলিলেন, ‘থা সাহেব,  
আপনি নায়ক।’ থা সাহেব বলিলেন, ‘বাবুজী, আমি নায়কও নহি,  
গায়কও নহি। আমি কেবল ভজন করি।’...নাথ থা। বলিলেন, ‘বাবুজী,  
আমি দিল্লীর ভূতপূর্ব সন্দ্রাট বাহাদুর শার সভায় গায়ক ছিলাম।  
দিল্লীর রাজসভায় স্থান পাইতে হইলে দরবারীর তিনটি ভাষা জানা  
অত্যাবশ্যক ছিল—ফার্সি, সংস্কৃত ও উত্তু।’...বাহাদুর শার নাম  
করিয়াই থা সাহেব কাঁদিয়া ফেলিলেন। দিল্লির শেষ মোগজ সন্দ্রাট...  
ঘটনাচক্রে ইহাকে মিউটিনির সন্দ্রাট হইয়া পড়িতে হইলে, ইনি  
সর্বপ্রথম বোৰণা-পত্রে ভারতবর্ষে গোহত্যা ও শূকর মাংস বিক্রয়  
নিষেধ করেন।’ ( মুকুন্দদেব মুখোপাধ্যায়—আমাৰ দেখা লোক,  
পৃষ্ঠা ১৭০ )।

নাথ খাঁর মতন বাহাতুর শাহের দরবারী মুরাদ খাঁ। তিনি দিল্লীতেই রয়ে যান সেই থেকে। আর বাহাতুর শাহের ১৮৬২ সালে রেঙ্গুনে জীবন সমাপ্তি ঘটে। তারপরও কেটে গেছে ২৭ বছর।

এখন ১৮৮৯ সালের কথা। কিন্তু মুরাদ খাঁ এখনো বেঁচে রয়েছেন দিল্লীতেই। দিল্লীর এই নতুন অতিথি এ কথা শুনেছেন। কিন্তু মুরাদ খাঁর সন্ধান পাচ্ছেন না অচেনা শহরে। কেউ জানে না তাঁর নাম বা আস্তানা। সেকালের বিখ্যাত গায়ক আপন অঞ্জলেই আজ বিশ্বৃত।

কিন্তু আগস্তক আশা ছাড়তে পারছেন না। সকলকেই জিজ্ঞাসা করছেন, ‘আপনি কি জানেন মুরাদ খাঁর ঠিকানা? আগেকার আমলের দরবারী গায়ক মুরাদ খাঁ?’

খোঁজ করতে করতে তিনি চৌকে এসে পড়লেন। ওই প্রশ্নই করলেন এক বৃক্ষ মুসলমানকে দেখে।

এবার আশাপূর্ণ উত্তর পেলেন, ‘জী, হঁ। মুরাদ খাঁর পাস্তা আমার জানা আছে।’

‘তাহলে দয়া করে বলুন। আমি তাঁর কাছে যেতে চাই।’

বৃক্ষ দাঢ়িয়ে উঠে বললেন, ‘তা হলে আমুন আমার সঙ্গে।’

তারপর চলতে আরম্ভ করলেন একদিকে। তিনিও সেই অপরিচিত পথে অচেনা লোকটির সঙ্গী হলেন।

দিল্লীতে তিনি নবাগত। আর বাইরে কোথাও তিনি জানাতেন না আত্মপরিচয়। কিন্তু বাংলায় তিনি বংশগৌরবে সুপ্রসিদ্ধ নাটোরের মহারাজা জগদিস্ত্রনাথ রায়।

তখনো তিনি অবশ্য আপন পরিচয়ে বিখ্যাত হননি। কারণ সে সময় জগদিস্ত্রনাথ একুশ বছরের তরুণ। মাত্র সেই বছরেই নাটোর জমিদার-ক্রপে আত্মপ্রকাশ করেছেন। সালটি হল ১৮৮৯।

তাঁর কলেজের পাঠ সমাপ্ত হয়েছে আগের বছর। আর সেই প্রথম বাংলার বাইরে পশ্চিমাঞ্চলে তিনি যাত্রা করেছেন। উদ্দেশ্য

—তীর্থ ও ঐতিহাসিক স্থান দর্শন। আর সেই সঙ্গে স্বাস্থ্য সঞ্চয়ও। বৈদ্যনাথধাম গয়া বারাণসী প্রয়াগ আগ্রা ভূমণের পর এসেছেন দিল্লীতে। এখান থেকে লাহোর যাবেন।

এই সবের মধ্যে মুরাদ খাঁকে দেখবার কথা জগদিস্ত্রনাথ ঠিক মনে রেখেছেন। খাঁ সাহেবের গানের এত সুখ্যাতি শুনেছিলেন যে দিল্লীতে সে সুযোগ তিনি ছাড়তে নারাজ। কারণ সঙ্গীত তাঁর বড়ই প্রিয়।

কদিন এখানে কাটল। দিল্লীর ঐতিহাসিক চিঙ্গুলি জগদিস্ত্র দেখলেন সব। মুরাদ খাঁর সঙ্গে সাক্ষাৎ শুধু বাকি ছিল।

এখন সেই আশায় মুসলমান বৃন্দটির সঙ্গে চলেছেন জগদিস্ত্রনাথ। পুরনো দিল্লীর অপরিচ্ছন্ন পথে, বাহাদুর শাহের দরবারী গায়কের দর্শনপ্রার্থী।

তাঁর মনে কোন বিকার নেই। যে সব সদ্গুণে তিনি সুপরিচিত হন পরবর্তী-কালে, সেই তরুণ বয়সেও তাঁর স্বচ্ছন্দ প্রকাশ।

জগদিস্ত্রনাথের অহমিকাশূন্য মানস। ধনী দরিদ্রে তাঁর অভেদ আচরণ। উদার দরদী, ব্যথার ব্যঘী তিনি। গুণজনের আদর ও কদরে অকৃষ্ট, অকৃপণ। স্বকুমার শিল্পে আগ্রহী। বিশেষ আকর্ষণ সঙ্গীতে। ঐশ্বর্যের আড়ম্বরের মধ্যেও ললিতকলার স্বপ্নলোকচারী। শান্ত মধুর তাঁর ব্যক্তিত্ব। স্নিফ্ফ সহজ আভিজ্ঞাত্য।

অথচ, বিশ্বয়ের বিষয়, জনসূত্রে অভিজ্ঞাত নন জগদিস্ত্রনাথ। তাঁর আভিজ্ঞাত্য আপন স্বভাবগুণে অর্জিত। কারণ তিনি অতি সাধারণ অধ্যাত পরিবারের সন্তান ছিলেন। তাঁর জনক শ্রীনাথ রায় নাটোর স্টেটের একজন কর্মচারী মাত্র। রাজবংশের সঙ্গে তাঁর কোন সম্পর্ক নেই।

নাটোরের রাণী ব্রজসুন্দরী পোত্তুপুত্র নিয়েছিলেন জগদিস্ত্রকে। স্বনামধন্যা রাণী ভবানীর পোত্তুপুত্র রামকৃষ্ণ। তাঁর পুত্র বিশ্বনাথ। তাঁর পুত্র গোবিন্দচন্দ্র। গোবিন্দচন্দ্রের পোত্তুপুত্র গোবিন্দনাথ।

শেষেক্ষ জন অপুত্রক গত হলে তাঁর বিধবা রাণী ব্রজমুন্দরী জগদিন্দ্রকে পোত্য নেন। তখন তিনি এক বছর দু মাসের শিশু। সে সময় থেকেই শিশুটি নাটোর রাজভবন নিবাসী।

পরিণত বয়সে পালিকা রাজমাতার প্রতি জগদিন্দ্রনাথ গভীর শ্রদ্ধা প্রকাশ করেছেন আঘাজীবনীতে, তিনি ‘দরিদ্রের সন্তানকে রাজাধিরাজ করিয়াছেন’ বলে। ‘অতি শৈশব হইতে... দ্বাদশ বর্ষ বয়ঃক্রম কাল পর্যন্ত যাঁহাকে গর্ভধারণী জননী বলিয়াই আমার সংস্কার জন্মিয়া গিয়াছিল’ ( শ্রুতি ও স্মৃতি। মানসী ও মর্মবাণী, জ্যোষ্ঠ ১৩২৩, পৃঃ ৪৭৪-৪৭৫ )।

পরবর্তীকালে নাটোর মহারাজা জগদিন্দ্রনাথ যখন বাংলার সন্তান ও বিদঞ্চ সমাজের একজন শীর্ষস্থানীয়, সে সময়েই শুপরিচিত সাহিত্য পত্রিকা ‘মানসী ও মর্মবাণী’তে ধারাবাহিক এই স্মৃতিকথা প্রকাশ করেছেন। কি নিঃসঙ্গে তাঁর সত্যনির্ণয় ও সরলতা! প্রচার না করলেও পারতেন: ‘যে পুণ্যশ্঳েকা প্রাতঃস্মরণীয়া রানী ভবানীর নাম...উচ্চারণ করিয়া আজও অর্ধবঙ্গের নরনারীগণের অন্মসংস্থানে বাধা হইতেছে না, নিতান্ত দীন দরিদ্রের ঘরে দীনার অঙ্কে জন্মিয়াও যাঁহার পুণ্যগৃহের এক কোণে স্থান পাইবার সৌভাগ্য আমার হইয়াছে’ ( ঐ, চৈত্র ১৩২৪, পৃঃ ২০৭ )।

অমুদ্রিত থাকলে বহু লোকের কাছেই তাঁর পূর্ব বৃত্তান্ত অভ্যাত থেকে যেত। কিন্তু এখানেই তাঁর বিনীত মহত্ত্ব। অভাবিত বৈভবের অধিকারী হয়েও তাঁর ছিল দার্শনিক নির্লিপ্ততা। ‘বৈষয়িক অস্তিত্বের উৎসে’ তিনি। পরিণতকালে বিদ্রং সঙ্গ আর সঙ্গীতের অনুষ্ঠানে জগদিন্দ্রনাথ সবচেয়ে স্ফুর্তিলাভ করতেন। কাব্যসাহিত্য-প্রেম থেকে রীতিমত চর্চা আরম্ভ করেন সাহিত্যের। ‘সঙ্ক্ষ্যাতারা’ কাব্যগ্রন্থ, ‘মুরজাহান’ ঐতিহাসিক কাহিনী, বিভিন্ন বিষয়ে প্রবন্ধ, ( ১৮২৬, জামুয়ারিতে আকশ্মিক মৃত্যুর ফলে অসম্পূর্ণ ) সুদীর্ঘ স্মৃতিচারণ ‘শ্রুতি ও স্মৃতি’ ইত্যাদি তার সাক্ষ্য। মাসিক ‘মানসী’, সাধাৰিক ‘মর্মবাণী’ এবং

শেষে ‘মানসী ও মর্মবাণী’ মাসিকপত্র ( প্রভাতকুমার মুখোপাধ্যায়ের সহযোগে ) সম্পাদনা ও তাঁর সাহিত্যচর্চার অঙ্গ । রবীন্দ্রনাথের সঙ্গে তাঁর সৌহার্দ্যও প্রধানত সাহিত্যের সরণিতে ।

কিন্তু সে সব অনেক পরের প্রসঙ্গ । সাহিত্যচর্চা তাঁর অকালগত জীবনের শেষ পনের-বোল বছরের কথা । এ কাহিনী তাঁর প্রথম ঘোবনকালের । সাহিত্যচর্চা তখনো প্রকাশ পায়নি । তবে সঙ্গীতের চর্চা কিছু আরম্ভ করেছেন—পাখোয়াজে । নাটোর রাজবাড়িতে সাঙ্গীতিক আবহ তাঁর আগেও ছিল । রানী ব্রজমুনীর স্বামী গোবিন্দনাথ ছিলেন ( সুরবাহারী ? ) মহম্মদ খাঁর শিষ্য ।

জগদিন্দ্রনাথ সেই তরুণ বয়সেই সঙ্গীতপ্রেমী । সঙ্গীতশিল্পীদের দরদী । তাঁদের অনুষ্ঠানের আস্বাদ তিনি অতিশয় আনন্দের অভিজ্ঞতা মনে করেন । গুণীজনের প্রতি তাঁর সহন্দয় সৌজন্য ।

তাই এই দূর দিল্লীতে এসেও মুরাদ খাঁর সঙ্কানে চলেছেন । পরিস্থিতি আরামের নয়, বরং কষ্টকর তাঁর পক্ষে । অপরিচ্ছন্ন পরিবেশও অপ্রীতিকর বোধ হতে পারত । কিন্তু জগদিন্দ্রনাথ ভিন্ন প্রকৃতির মানুষ । তিনি আচ্ছাদনের মধ্যেও রঁজের সঙ্কানী । তাই এক শিল্পী-সন্নিধানে চলেছেন দ্বিপ্রাহ্রের দিল্লীর পথে পথে ।

আরো কিছুক্ষণ পরে, বৃন্দটি তাঁকে নানা রাস্তা পার করে নিয়ে এল । দাঁড়াল একটি সঙ্কীর্ণ গলিতে ।

তাঁরপর একটি নিচু বাড়ির দোতলার দিকে আঙুল তুলে জানালে—ওই ঘরে থাকেন মুরাদ খাঁ ।

বৃন্দ বিদায় নিলে । তাঁকে ধন্তবাদ জানিয়ে বাড়িটির নীচে এলেন জগদিন্দ্রনাথ । দেখলেন, বাইরে থেকেই দোতলায় উঠবার কাঠের সরু সিঁড়ি আছে ।

সেই ঘোরানো, মোংরা সিঁড়ি বেয়ে ওপরে এলেন তিনি । সামনেই ঘরখানি । কিন্তু দিনের বেলা ও সেখানে আলো বড় কম । তিনি ঘরের মধ্যে এসেও প্রথমে তেমন ঠাওর করতে পারলেন না ।

একটু পরে নজর পড়ল ঘরের একটি দেওয়ালে। এক অতি বৃক্ষ  
সেখানে ঠেস দিয়ে বসে। যে এতক্ষণ ঠাকে পথ দেখিয়ে এনেছিল,  
তার চেয়েও এ ব্যক্তির বার্ধক্য অনেক বেশি। একেবারে জরাজীর্ণ,  
শ্ববির যেন। শুষ্ক চর্মসার শীর্ণ শরীর। কত যে ঠার বয়স তা  
ধারণা করা কঠিন। হয়ত নবুই হতে পারে। আরো ক' বছর  
বেশি হওয়াও অসম্ভব নয়।

বুদ্ধের চোখ ছুটি বন্ধ। ঝুলে রয়েছে জ্ঞান। সামনে  
এসে জগদিল্লি সন্তানণ করলেন।

ডাকলেন ‘খা সাব’ বলে। কিন্তু কোন সাড়া নেই।

নিজাচ্ছন্ন নাকি ?

গায়ে হাত দিয়ে ঠেললেন অল্প অল্প। তখন সেই ঝুলস্ত জর  
কাক দিয়ে কোটির-গত চক্ষু খুলতে দেখা গেল।

জগদিল্লনাথ জিজ্ঞেস করলেন, ‘আপনিই কি মুরাদ খা ?’

অঙ্কুট জবাব ভেসে এল, ‘হ্যাঁ। আমারই নাম মুরাদ খা।’

তারপর ধীর স্বরে ঠার প্রশ্ন ‘কিন্তু আপনার কি দরকার ?  
কোথা থেকে এসেছেন ?’

এখানেও আত্মপরিচয় দিলেন না নাটোর।

শুধু ঠাকে খাতির করে বললেন, ‘আমি বাংলাদেশ থেকে এসেছি,  
খা সাব। আপনার গান শুনতে আমার বড়ই ইচ্ছে।’

মুরাদ খা প্রথমেই উত্তর দিতে পারলেন না। আবেগে রুক্ষ  
হয়ে গেল ঠার কণ্ঠস্বর।

জগদিল্লনাথ আশ্রয় হয়ে দেখলেন, ঠার চক্ষুকোটির ছাপিয়ে  
অঙ্গ বারে পড়ছে।

তারপর একটু আত্মস্ত হয়ে মুরাদ খা বলতে লাগলেন, ‘বাবুজী,  
কেয়া তাজব ! আপনি সেই বাংলা মুলুক থেকে আমার গান  
শুনতে এসেছেন ? কিন্তু এই দিল্লীতে কোন মানুষ আমার কাছে  
আসে না। কেউ আমার খোঁজ খবর নেয় না, বাবুজী। গানও

কেউ শুনতে চায় না। আমার বন্ধুবান্ধব আঞ্চলিকজন কেউ নেই।  
সহায় সহজ কিছু নেই। আমিও তুনিয়ার কোন খবর রাখি না।  
এই ঘরের কোণে পড়ে আছি। বাবুজী, গান আমি আর গাই  
না। বাদশা বাহাদুর শাহ মারা যাবার পর থেকে গানের দিন  
আমার চলে গেছে। ওই দেখো, ও-কোণে তানপুরাটা পড়ে  
আছে। কিন্তু একটাও তার নেই। বাহাদুর শাহ বেঁচে থাকলে  
কি আমার এ হাল হত !’

একটানা এতক্ষণ কথা বলে মুরাদ থঁ। একটু ধামলেন।

জগদিস্ত্রনাথ দেখলেন তানপুরাটা। বহুকালের হাত-  
না-পড়া অবস্থা। জোয়ারিটা আছে বটে, তবে কোন তারই  
নেই।

তিনি হতাশ বোধ করলেন। বৃথা হল এত কষ্ট করে আসা।  
বুদ্ধের এই অশক্ত শরীরে, এই পরিস্থিতিতে কি করে গানের  
অনুরোধ আর করবেন ?

জগদিস্ত্রনাথ খানিক মৌন রইলেন এই ভেবে।

কিন্তু, না। ভাগ্য তার প্রসন্ন।

মুরাদ থঁ। একটু যেন বিশ্রাম করে, বলে উঠলেন, ‘সেকিন বাবুজী,  
আজ আমি গাইব। আপনি বাংলা মূলুক থেকে আমার কথা মনে  
করে এসেছেন। আমার গান আপনি শুনতে চান। আপনাকে  
আমি ফেরাতে পারব না, বাবুজী। তবে আপনাকে তানপুরার  
তার কিনে আনতে হবে।’

আশা পূরণের আশাসে প্রফুল্ল জগদিস্ত্রনাথ। তখনি দাঢ়িয়ে  
উঠে বললেন, ‘আমি তার কিনতে যাচ্ছি, থঁ সাব।’

‘আর একটা কথা বাবুজী,’ একটু ইতস্তত করে বললেন—বলতে  
গিয়ে আবার কাদলেন মুরাদ থঁ। ‘আজ তিনি দিন আমি অনাহারে  
আছি। পেটে একটা দানা পড়েনি। খাওয়ানো দুরের কথা, বেঁচে  
আছি কিনা তালাস করতে আসেনি কেউ...’

নাটোর আৱ এক মুহূৰ্তও দাঢ়ালেন না। ঘোৱানো সিঁড়ি দিয়ে  
নেমে এলেন রাস্তায়।

একটু পৱেই পুৱী মিঠাই নিয়ে ফিরলেন। আৱ ষ্টীল ও  
পেতলের তাৰ।

মুৱাদ থা তৃপ্তি কৱে নাস্তা কৱলেন। তাৱপৰ তানপুৱায় নতুন  
তাৱ চড়িয়ে জিজেস কৱলেন, ‘সঙ্গত কে কৱবে ? সঙ্গে কাকেও  
এনেছ ?’

‘না। আমি একাই এসেছি।’ জগদিল্লি সবিনয়ে জানালেন,  
‘তবে যদি অছুমতি দেন, সমেৱ সঙ্গে ধা মিলিয়ে দিতে চেষ্টা কৱল।’

ঘৱেৱ পাখোয়াজটাৱ অবস্থাও প্ৰায় তানপুৱাৰ মতন। নাটোৱ  
সেটিকে সাফ-স্বতৰো কৱলেন কাজ-চলা গোছেৱ।

বুদ্বেৱ সেই বিশীৰ্ণ মুখেও আনন্দেৱ উদ্ভাসন হল। ঈষৎ হাসিৱ  
ৱেৰ্থা ফুটল যেন। তিনি গুণ্ডুন্ডুন কৱে একটু সুৱ ভাঁজলেন।  
তাৱপৰ তানপুৱায় সুৱ মেলালেন বেশ মনেৱ মতন কৱে। তানপুৱা  
বেঁধে, দুই নিপুণ আঙুলে খানিকক্ষণ সুৱ ছাড়তে লাগলেন। সুৱ  
মধ্যম সুৱ পঞ্চম। সুৱ মধ্যম সুৱ পঞ্চম। সা পা সা মা। সা পা সা  
মা। সুৱেৱ ভ্ৰম-গুঞ্জন আৱস্তু হল ঘৱেৱ মধ্যে। বেশ আওয়াজী  
যন্ত্ৰটি।

এইবাৱ বুৰি মুৱাদ থা গান ধৱবেন—ভাবলেন জগদিল্লিনাথ।

কিন্তু থা সাহেব যেন স্বৱটি পৱখ কৱে তানপুৱা নামিয়ে রাখলেন।  
একটা বাক্স ছিল ওদিকে। তাৱ মধ্যে থেকে বাৱ কৱলেন পঁ্যাচদাৱ  
পাগড়িৰ আলগা খোলা জট। কতকাল তাতে হাত পড়েনি,  
পাগড়িৰ আকাৱে মাথায় চড়েনি সেটি ! মলিন বিবৰ্ণ হয়ে গেছে।  
কি যে তাৱ আসল রঙ ছিল, বোৰা যায় না এখন।

সেই মেকড়াগুলো তুলে নিয়ে মুৱাদ থা পাগড়ি বাঁধতে বসলেন।

কবে ফতে হয়ে গেছে বাহাতুৱ শাৱ দৱবাৱ। কিন্তু তাতে কি ?  
ঁাৱ দৱবাৱী ওস্তাদ না মুৱাদ থা ? দৱবাৱী কেতা সহবৎ তিনি

ভুলবেন নাকি? সে সব যে গানের স্বরের মতন তাঁর সন্তার সঙ্গে  
মিশে আছে।

ছোট ঘরটির সর্বাঙ্গে প্রকট দৈনন্দিন। শ্রোতা মাত্র একজন।  
তা হোক। বাহাদুর শার দরবারী ঝপদীকে পাগড়ি বাঁধতে হবে  
রেওয়াজ মাফিক! কত দূরের সেই বাংলা মুলুক থেকে তাঁর গান  
শুনতে এসেছেন রইস লোক! খানদানের সমবদ্ধার! বিনা  
পাগড়িতে কি আসর করা যায় মেহমানের সামনে?

পেঁচিয়ে পেঁচিয়ে সেই পাগড়ি বাঁধতে লাগলেন মুরাদ থা।  
কুলে পড়া ক্রজ্জোড়ায় চোখ প্রায় টেকে ফেলেছিল। ক্রর সঙ্গে  
যেন কুলে পড়েছিল চোখ ছটোও। পাগড়ি বাঁধার সঙ্গে সেই বুজন্ত  
জ্ঞ, চোখ তিনি টেনে তুললেন। প্যাচদার পাগড়ি যখন মাথায় ঠিক  
বসে গেল, চোখ জ্ঞ ও উঠল স্বস্থানে। মুখাবয়বের লোলচর্ম একটু  
টান টান দেখাল।

এবার তানপুরাটি কোলে উঠিয়ে নিলেন মুরাদ থা।

নাটোরকে পাখোয়াজ নিতে দেখে কোমল স্বরে বললেন, ‘তুমি  
ছেলেমানুষ, পারবে কি? তা বেশ, এস। হজনে মিলে একটু  
গানালাপ করি।’

গান আরস্ত করবার আগে তাঁর আঁখিপট আর একবার চিক-  
চিক করে উঠল। কিন্তু এবার আনন্দের সজলতা।

‘কতদিন, কতদিন পরে আজ গাইতে বসেছি।’

গান একেবারেই ধরলেন না মুরাদ থা। দরবারী কানাড়ায়  
রীতিমত আলাপ আরস্ত করলেন। আর তাঁর স্বর একটু শুনেই  
জগদিন্দ্র বুঝলেন—হ্যাঁ, কানাড়া গাইবারই উপযুক্ত কণ্ঠ। ধীর  
গন্তব্যের দরাজ। মনোহারী মৌড়ের স্বচ্ছন্দ সংক্ষরণ। আলাপচারীর  
অগ্রগতির সঙ্গে দীন কুঠুরির পরিবেশ পরিবর্তিত হতে লাগল। তাঁর  
মলিন পায়জামা পিরান পাগড়ি আবৃত করে সুর ভৱপুর হয়ে উঠল  
চার দেওয়ালের মধ্যে।

সেই লোলচর্ম, স্বলিতপ্রায়-চক্ষু জীর্ণ-দেহীর এই সঙ্গীত-কণ্ঠ !  
প্রত্যক্ষ না করলে সে শ্রোতা বিশ্বাস করতে পারতেন না।

সেদিনের গানের বর্ণনায় জগদিস্ত্রনাথ পরে বলতেন, ‘মুরাদ থার  
গলা অত বয়সে খরজেও ষেমন মোটা ভরাট ছিল, চড়ার দিকেও  
আওয়াজ ছিল যুবক তুলি থার মতন ।’

আলাপের পর চৌতালে দরবারী কানাড়ায় গানও তিনি  
শোনালেন। গাইলেন মোট প্রায় এক ঘণ্টা। তারপর আস্ত হয়ে  
গান বন্ধ করলেন।

দরদী শ্রোতা আশাৰ অতীত লাভ কৱেছেন স্ববিৰ শিল্পীৰ  
কাছে। চমৎকৃত, পরিতৃপ্ত তিনি।

সেলাম করে বললেন, ‘ওস্তাদজী, যে সুখা কানে ঢাললেন জীবনে  
তা ভুলব না। কাল আমি লাহোৱ যাচ্ছি। সেখান থেকে ফিরে  
আসতে এক সপ্তা হবে। তখন আবাৰ আপনাৰ কাছে আসব।  
গানের জন্যে বিৱৰণ কৱব আপনাকে ।’

বলতে বলতে একখানি একশো টাকাৰ নোট কলাবতেৰ হাতে  
গুঁজে দিলেন।

কৃতজ্ঞতাৰ কোন ভাষা ফুটল না মুরাদ থার মুখে। নীৱবে তিনি  
অক্ষমোচন কৱতে লাগলেন।

বিদায় নিয়ে উঠে দাঢ়ালেন জগদিস্ত্রনাথ।

মুরাদ থা তখন অস্তৱেৱ স্বস্তিবাচন উচ্চারণ কৱলেন, ‘থোদা  
তোমাৰ মঙ্গল কৱন, বাবুজী ।’

সে-যাত্রায় লাহোৱ দেখতে গেলেন জগদিস্ত্রনাথ। সেখান থেকে  
আবাৰ দিল্লীতে এলেন। কিন্তু ফিরতে দেৱি হয়ে গেল একদিন।  
দিল্লী পৌছেই মুরাদ থার কথা তাঁৰ মনে হল।

ওস্তাদেৱ উদ্দেশে বেৱিয়ে প্ৰথমে চৌকে এলেন। তাৰপৰ  
সেইসব রাস্তা ধৰে এসে গলিৰ মধ্যে সেই নৌচু দোতলা বাড়ি।  
তাৰ ঘোৱানো সিঁড়ি দিয়ে উঠে ঘৰটিৱ সামনে দাঢ়ালেন।

দৱজা ভেজানো ছিল ।

বাইরে থেকে ডাকলেন একবার । সাড়া মিলজ না ।

ঠেলা দিতেই দৱজা খুলে গেল । ভেতরে এসে জগদিস্ত্রনাথ  
বললেন, ‘খী সাব, আমি এসেছি ।’

কোন সাড়া শব্দ নেই । প্রথম নজরে কাউকে দেখতে পেলেন  
না আবছায়ায় ।

তবু আরো একবার ডাকলেন, ‘খী সাব ।’

জনহীন কামরায় শুধু একটা প্রতিষ্ঠানি গুমরে উঠল । কেউ  
নেই দেখে, সিঁড়ি বেয়ে নেমে এলেন নীচে । পাশের বাড়িতে  
একজনকে দেখে জিজেস করলেন, ‘ও ঘরের মুরাদ খী কোথায় ?’

লোকটি তাঁর মুখের দিকে একটু তাকিয়ে সংবাদ দিলে, ‘তিনি  
মারা গেছেন কাল । গোরও হয়ে গেছে ।’

স্তৰ্ক হয়ে শুনলেন জগদিস্ত্রনাথ । আর কিছু জানতে চাইলেন  
না । ক’বিন্দু অঙ্গ ঝরে পড়ল তাঁর চোখ দিয়ে ।

বাহাদুর শার দরবারী কলাবত্তের উদ্দেশে নাটোরের শৃতিতর্পণ ।...  
সেদিনই তিনি দিল্লী ত্যাগ করলেন ।

## তানসেনের এক বংশধর ॥ তাজ থঁ ॥

সেদিন তাজ থাকেও বামাচরণ প্রথম দেখলেন। আর তাঁর পরিচয়ও পেলেন সেখানে। এমন দরবারী আসরে তাঁর গান শোনারও সুযোগ হল নাটকীয় পরিবেশে।

মেটিয়াবুরুজ দরবারে বামাচরণ সেই প্রথম এলেন। আর সেদিনই এত সব আশ্চর্য ঘটনা একটি আসরেই ঘটে গেল পর পর। ক' ঘন্টার মধ্যে কত রকমের মালুষ তিনি দেখলেন। আর সঙ্গীত-জগতের ক'জন স্বনামধন্য ব্যক্তিকে।

তাই সেই নবাব দরবারের স্মৃতি বামাচরণের মনে সারাজীবন অক্ষয় হয়ে রইল। নবাব ওয়াজিদ আলৌর সামনে তাঁর সেই প্রথম আসরের কথাও।

বেহালার বামাচরণ বন্দ্যোপাধ্যায়। পরে তিনি বাংলার এক সেরা খেয়াল-গুণী হয়েছিলেন। আর বামাচরণের সময় ক'জনই বাখেয়াল-গায়ক ছিলেন বাঙালীদের মধ্যে। তাই তাঁর বিশিষ্ট স্থান ছিল বাংলার সঙ্গীত-সমাজে। আর তিনি খেয়ালগানের একজন আচার্য-স্থানীয় হয়েছিলেন। কিন্তু সেদিনকার আসরের অনেক পরের কথা সেসব।

মেটিয়াবুরুজ দরবারে যখন বামাচরণ সেই প্রথম যান, তখন তাঁর বয়স মাত্র বাইশ-তেইশ বছর। গানের দিকে ঝোক তাঁর আরো অনেক কম বয়স থেকে। দক্ষরমত শিখেছেনও ক' বছর।

এই দরবারেরই বিখ্যাত ওস্তাদের কাছে বামাচরণ তখন তালিম নিচ্ছেন। সাধছেন খুব পরিশ্রম করে। বেহালা থেকে মেটিয়াবুরুজে ইঁটাইঁটি করে তালিম নিতে যান। বাড়িতে রিয়াজ করেন ঘন্টার

পর ঘটা। গজাও বেশ খানিক তৈরি হয়েছে বটে। কিন্তু গায়ক  
বলে তখনো বাইরের কেউ ঠাকে চেনে না।

সে হল ১৮৮৪ সালের কথা। তারও ছু-তিন বছর আগে থেকে  
তিনি মেটিয়াবুরুজে গান শিখতে যেতেন। নবাব দরবারের নাম-  
করা খেয়াল-গায়ক আলী বখ্স বামাচরণের উস্তাদ। গোয়ালিয়র  
থেকে এসে আলী বখ্স এখানে রয়েছেন।

ঠার কাছে শেখবার সময় থেকেই বামাচরণের নবাব ওয়াজিদ  
আলীর দরবার দেখবার সাধ। আলী বখ্সকে বলতেনও মাঝে  
মাঝে। কিন্তু এতদিন সুবিধা হয়নি। ইচ্ছা হলেই দরবারে যাওয়া  
যায় না। সেখানে সাধারণের প্রবেশ নিষেধ। উস্তাদ আলী বখ্স  
এতদিন পরে সে স্বয়েগ করে দিলেন। আর ঠারই সঙ্গে সেদিন  
দরবারে হাজির হলেন বামাচরণ।

বাইশ-তেইশ বছরের সুদর্শন তরুণ। গৌরবণ্ণ সুগঠিত শরীর।  
দীর্ঘকায়, ব্যায়ামবলিষ্ঠ অবয়ব। বাল্যকাল থেকে বামাচরণের  
পশ্চিমাঞ্চলে বাস ছিল। সেজগেই এমন স্বাস্থ্যোজ্জ্বল চেহারা।  
তখন ঠার বেশভূষাও পশ্চিমাদের মতন। পরনে ঢিলে পায়জামা  
আর পাঞ্জাবি। আর মুখে সৌথীন ছাঁটের দাঢ়ি। হঠাৎ দেখলে  
বাঙালী বলে বোধ হয় না। পোশাক-পরিচ্ছদ আকার-প্রকার সবই  
বামাচরণের তখন ছিল এমনি-ধারা।...

মেটিয়াবুরুজের গঙ্গার দিকে সেই নবাবী কোঠি। তারই মধ্যে  
দরবার-কক্ষ। নবাব ওয়াজিদ আলীর সেই ভারত-প্রসিদ্ধ সঙ্গীত-  
দরবার। উত্তর ভারতের কত স্বনামধন্য কলাকারকে নবাব নিযুক্ত  
রেখেছেন এখানে। যখনকার কথা হচ্ছে ওয়াজিদ আলী সে-সময়  
ষাট বছর পার হয়ে গেছেন। ( ঠার জন্ম ১৮২৩ সালে। )

আলী বখ্স সেদিন যখন বামাচরণকে নিয়ে নবাববাড়িতে এলেন,  
তখন সবে সঙ্গে হয়েছে। দরবারের মধ্যে এসে দেখলেন আর  
বিশেষ কেউ আসেননি তখনো। ঠারা সামনের দিকে বসলেন।

আৱ বামাচৰণ চেয়ে চেয়ে দেখতে আগলেন—লক্ষ্মী থেকে নির্বাসিত হয়ে আসা নবাবের এই মেটিয়াবুজ্জ দৱবাৰ ।

প্ৰথমেই আশৰ্য হলেন, একসঙ্গে চাৱজনকে তানপুৱা ছাড়তে দেখে। শ্ৰোতাৱা কেউ আসেনি তখন। আৱ আসৱও তো আৱস্ত হয়নি ।

অথচ চাৱজন বসে সুৱ ছাড়ছেন তানপুৱায়। একটু ধীৱ ছন্দে, একটানা সুৱের গুঞ্জন ভেসে উঠছে। শুধু তানপুৱা নয়। এক তবলাচী রয়েছেন প্ৰকাণ্ড একটি বাঁয়া নিয়ে। কেবলমাত্ৰ সেই বাঁয়ায় বোলেৱ মতন বাজিয়ে ঘাচ্ছেন। কিন্তু কোন ঠেকাৱ বোল নয়। আৱ তবলাও নেট তাঁৱ ডান হাতে। শুধু বিৱাট বাঁয়াটি থেকে প্ৰায় একটানা সুৱ বেজে চলেছে। তাৱ বেশ সঙ্গতি আছে তানপুৱাৰ ঢিমে ছন্দেৱ সঙ্গে !

বাঁয়াৱ আওয়াজেৱ সঙ্গে চাৱটি তানপুৱাৰ ভ্ৰমৰ গুঞ্জৱণেৱ সুৱে ভৱপুৱ আসৱ।

বামাচৰণ আলী বখ্সকে জিজেস কৱলেন, ‘আসৱে আৱ কেউ নেই। কিন্তু এ’ৱা তানপুৱা ছাড়ছেন, বাঁয়ায় সুৱ রাখছেন কেন?’

দৱবাৱী ওস্তাদ আলী বখ্স বুঝিয়ে বললেন, ‘নবাব ওয়াজিদ আলী শাহ দৱবাৱে এই রকমই বন্দোবস্ত কৱেছেন। বৱাৱেৱ রেওয়াজ এটা। নবাব চান আসৱে সব সময় ভৱে থাকবে সুৱ। যখনই এখানে গান-বাজনা শুন হবে, কালোয়াতৱা সুৱ ধৰে নিতে পাৱবেন। আসৱে তখনি জমে ঘাবে সুৱ। তা ছাড়া, নবাব নিজেও যখনি এখানে আসবেন, তিনি যেন সুৱ শুনতে পান। বিনা সুৱে থাকতে পাৱেন না নবাব। যেদিন গান-বাজনাৰ আসৱ বসে না, সেদিনও অস্তত একজন তানপুৱা ছাড়ে।’

বামাচৰণ চমৎকৃত হলেন। এমন আসৱেৱ কথা তিনি আৱ শোনেননি কখনো।

তানপুৱা-বাদকদেৱ দিকে লক্ষ্য কৱে দেখলেন তাঁদেৱ সুৱ

ছাড়বার কায়দা। আঙুলের একেবারে কোণ দিয়ে তারের ওপর তাঁরা টিপ দিয়ে যাচ্ছেন। এ-দরবারী তানপুরা ছাড়বারও এই বৈশিষ্ট্য। উন্নত আলৌ বখ্স্ত বামাচরণকে আঙুলের এমন কোণ দিয়ে তানপুরা ছাড়তে বলতেন। এখন সেই জিনিস বামাচরণ চাকু-ষ করলেন দরবারে। এদিকে ধৌর একটানা চলছিল চারটি তানপুরার ওপরনিচন্দ। বাঁয়ার ঢিমা লয়ের সঙ্গত তার সঙ্গে বেশ স্থৱের রেশ জমিয়ে তুলছিল।

সামনে বসে চারটি তানপুরা আর সেই প্রকাণ্ড বাঁয়ার একটানা স্থৱ শুনতে লাগলেন বামাচরণ। আর দরবারের সজ্জার দিকে একবার চোখ বুলিয়ে নিলেন। মেঝের কার্পেট থেকে কড়ির ঝাড়-লঠন পর্যন্ত। আলোর ঝাড় ছাড়াও নানা রঙীন ফালুস ওপর থেকে ঝোলানো রয়েছে। প্রত্যেক ফালুসের মধ্যে জলছে আলো। রঙীন আলোর সেইসব ফালুস আলোর ঝাড়ের চেয়ে অনেক নৌচে নেমে এসেছে। নানা রঙের বাহারে ফালুস।

কিছুক্ষণের মধ্যেই আসতে আরম্ভ করলেন দরবারের সব রইস লোক। বামাচরণের দৃষ্টি এবার তাঁদের দিকে আকৃষ্ট হল।

প্রায় সকলেরই দেখবার মতন চেহারা। পশ্চিম অঞ্চলের স্বাস্থ্য-বান মানুষ। তার ওপর যেমন স্ফুরুষ তেমনি তাঁদের বেশভূষার পারিপাট্য। তাঁরা বসবার পর আতরের খসবুতে জায়গাটা মাতোয়ারা হয়ে উঠল। বামাচরণ বসে দেখতে লাগলেন এই সব সৌধীন অমীর তুল্য ব্যক্তিদের গায়ের রঙ মুখ চোখ পোশাক-পরিচ্ছদ থেকে টুপির বাহার পর্যন্ত।

এমন সময় আর একজন এলেন। তাঁকে আবার আরো দেখবার মতন। বিশাল শরীর তাঁর, কিন্তু সুলকায় নন। আর তেমনি আভাযুক্ত গৌরকাণ্ঠি। তিনি অস্ত্রান্তদের মধ্যে এসে বসবার পর তাঁরা যেন নিষ্পত্তি হয়ে গেলেন।

অথচ নবাগতের বেশভূষা আদৌ মূল্যবান নয়। একটি আলখালী

ধরনের ঝোলা পিরাণ আর পায়জামা তিনি পরেছেন। সবই মসিন।  
কিন্তু সে দৈন্যে ম্লান হয়নি তাঁর বলিষ্ঠ দেহরূপ। সেই সঙ্গে তাঁর  
ব্যক্তিগত লক্ষ্য করবার মতো। সেই ব্যক্তিত্ব তাঁর সব কিছুর মধ্যে  
সুন্দর সামঞ্জস্য করে নিয়েছে। তাঁর মুখের গোলাপী বর্ণের সঙ্গে  
শুন্দর মেহেদী রঙও হয়েছে দিব্য মানানসই। সবসুন্দর মিলে বামাচরণ  
সেই আগন্তুকের প্রতি বিচ্ছিন্ন আকর্ষণ বোধ করলেন। আর তিনি  
এসে বসলেন ও তাঁদের কাছে, আলী বথ্সের পাশেই।

দীর্ঘদেহী পুরুষটির আলী বথ্সের সঙ্গে যেন কি কুশল বিনিময়ও  
হল। হাতের মুদ্রায় আর শির সঞ্চালনের কায়দায়। বামাচরণ  
দেখলেন তাঁর ধরন-ধারণেও বেশ অভিজ্ঞাত্য আছে। এত অভিজ্ঞাত  
ব্যক্তিদের মধ্যেও তিনি একজন বিশিষ্ট।...

খানিক পরেই নবাব ওয়াজিদ আলী দরবারে এলেন। আর  
আসন নিলেন তাঁর তথ্ত্বে। তাঁর মাথার মুকুট, গলার হার থেকে  
আঙুলের আঙুলিতে পর্যন্ত হৌরে-মুক্তের জৌলুষ।

কিন্তু বামাচরণ তাঁর দিকে ভাল করে লক্ষ্য করবার আগেই নবাব  
বললেন, ‘আজ মেরা বেগমকি গানা হোগি।’

নবাবের কথায় অবাক হয়ে গেলেন বামাচরণ। বেগমের গান  
এই প্রকাশ্য দরবারে হবে? তাও কি সম্ভব? নবাব-বেগমের মতন  
পর্দানমৌন। এখানে এত পরপুরুষদের মধ্যে আসবেন?

কিন্তু বামাচরণের তখন জানা ছিল না নবাবের গায়িকা বেগমদের  
কথা। একজন তুঙ্গন নন। ওয়াজিদ আলীর অনেক বেগমই পেশাদার  
গায়িকা থেকে পদোন্নীত। হয়েছিলেন। পরী থেকে তাঁরা বেগম।  
নাচওয়ালী গানওয়ালী সুন্দরীদের তিনি পছন্দ করে আনতেন।  
রাখতেন তাঁর ‘পরীখানা’য়। তাঁরপর তাঁদের অনেকেই তাঁর বেগম  
বনে যেতেন। মেটিয়াবুরুজের এই শেষজীবনে যেমন, তেমনি  
লক্ষ্মীতে স্বাধীন নবাবীর প্রথম আমলেও।

লক্ষ্মীতেই অবশ্য বেশি। তখন তো পুরোদস্তর স্বাধীনতা ভোগ

করছেন। ওয়াজিদ আলী সেই ঘোবনকাল থেকে নর্তকী গায়িকা  
রমণী-বিলাসী। লক্ষ্মীয়ের নৃত্যগীতপটিয়সৌদের নিয়ে অহোরাত্র ঝঙ্কত  
থাকত তাঁর হারেম। তাঁর সঙ্গীত-দরবার। কল্পসী বাইজীদের তিনি  
সাদরে ‘পরী’ বলে উল্লেখ করতেন। আর সেই পরীদের যাকে পছন্দ  
হত তাঁকেই নিকা করে নিতেন। এ-বিষয়ে তিনি পরম উদার। তাঁর  
নিজের সেখা আঞ্চকাহিনীতে এসব প্রসঙ্গ তিনি সরল মনে বর্ণনা  
করে গেছেন।

বিশেষ তাঁর ‘তারিখ-এ-পরীখানা’ (অর্থাৎ হারেমের ইতিবৃত্ত)  
কেতাবে। তাঁর প্রথম ঘোবনের এই আঞ্চকথার শেষের অধ্যায়ের  
শিরোনামাই আছে—‘একশ পরীকে বেগম করে নেওয়া হল।’

লক্ষ্মীতে নবাবী খোয়াবার আগে এসব নিয়েই মন্ত থাকতেন  
তিনি। বাইজী বেগম নাচ গান আর অপেরা। তাঁর সকল বেগমদের  
ইষ্টকোষ্ঠী জানা যায়নি। তবে কয়েকজনের পরিচয় পাওয়া গেছে  
বিশেষভাবে। যেমন বেগম হজরত মহল।

নবাব ওয়াজিদ আলী ১৮৫৬ সালে লক্ষ্মী থেকে নির্বাসিত হয়ে  
মেটিয়াবুরুজে আসেন। তারপর ইংরেজদের বন্দী হয়ে ফোর্ট  
ডিলিয়মে থাকেন। ১৮৫৭-৫৮ সালের সেই সময়, যখন লক্ষ্মীতে  
চড়িয়ে পড়ে সিপাহী বিদ্রোহ। সেই বিদ্রোহের চূড়ান্ত পর্যায়ে  
নবাবের যে বেগম সিপাহীদের পক্ষে ঘোগ দেন, তিনিই হজরত  
মহল। তাঁর নাবালক পুত্র বিজিস কাদরকে তখন বিদ্রোহী সিপাহীরা  
লক্ষ্মীর সিংহাসনে বসিয়েছিলেন। আর বিজিস কাদরের অভিভাবিকা  
হয়েছিলেন তাঁর জনী হজরত মহল। নবাব ওয়াজিদ আলীর  
এই বেগম হারেমে আসবার আগে লক্ষ্মীর এক পেশাদার বাইজী  
ছিলেন। একথা জানা যায় নবাবের ‘তারিখ-এ-পরীখানা’ থেকে।

তাছাড়া নবাবের আর এক বেগম—রাজিয়া বেগমও ছিলেন  
লক্ষ্মীর এক প্রসিদ্ধ গায়িকা। নবাব লক্ষ্মী থেকে নির্বাসিত হলে,  
রাজিয়া বেগম তাঁর ভাই ওস্তাদ হুলৈ থার সঙ্গে নেপালে আশ্রয় নেন।

সিপাহী বিজ্ঞাহ পর্বের পরেও তাঁরা থেকে বান নেপালে। ওয়াজিদ  
আলীর কাছে আর রাজিয়া বেগম ফিরে আসেননি।

নবাব ওয়াজিদ আলীর এমনি আরো বেগম ছিলেন, যাঁরা  
বাইজী থেকে উন্নীতা হন। সেদিন মেটিয়াবুরুজে যাঁর গাইবার কথা  
হল তিনিও সম্ভবত তেমনি একজন।

কিন্তু বামাচরণ এসব জানতেন না। তিনি বিশ্বিত হয়ে ভাব-  
ছিলেন—এ কি করে সম্ভব! তবে বেশিক্ষণ তাঁকে ভাবতে হল না।

তিনি দেখলেন, দরবারের সকলের দৃষ্টি পড়েছে একদিকের  
দেয়ালে। সেখানে একটি দরজার মতন অংশ রেশমী পর্দায় ঢাকা।  
সেই পর্দার শুরুকে নিশ্চয় ঘর আছে, বামাচরণের মনে হল।

তখনই রেশমী পর্দার অন্তরাল থেকে ভেসে এল তানপুরার শুঁশন।  
আর সেই সঙ্গে তবলার নিকণ।

আর অনুমানের অবকাশ নেই। সেখান থেকেই অন্তরালবর্দিনী  
জেনানা কঠের গান শুরু হয়ে গেল।

দরবারে নবাব থেকে আরস্ত করে সকলেই শুনতে লাগলেন  
অদর্শনা বেগমের গান।

গায়িকার কঠ শুনেই বামাচরণ বুঝলেন, তাঁর বয়স বেশি নয়।  
আর তাঁর বেশ শুরোল। সুমিষ্ট কঠ—যেন পাপিয়া। নিটোল মধুৰ  
স্বর-ধ্বনি, বয়সের কোন ভঙ্গুরতা সে কঠে নেই। অবশ্যই তিনি  
নবীনা বয়সী। আর বেগমও হয়েছেন হয়তো সম্প্রতি।

অস্তত বামাচরণের তাই মনে হল। তিনি মুক্ত হয়ে শুনতে  
লাগলেন নবাব-বেগমের গান।

সুদৃশ্য রেশমী পর্দার আড়াল থেকে বেগম দরবারে গাইতে  
লাগলেন।

বিশেষ করে মিছের জঙ্গেই চমৎকার হল তাঁর গান।

আসরের সকলেই অদৃষ্ট। বেগমের গানের তারিক করতে  
লাগলেন।

তারপরেই হল সেই পরিস্থিতি যা বামাচরণের পক্ষে নাটকীয় হিড়াল।

নবাব আলী বখ্সের দিকে চেয়ে হঠাতে ফরমায়েস করলেন, ‘আতি আপ গানা শুনাইয়ে ।’

এই অল্পবয়সী গায়িকার পরেই গাইতে হবে শুনে আলী বখ্স অস্তি বোধ করলেন। তার তখন পরিণত বয়স। তাহলেও নবাব দরবারে তিনি গেয়ে থাকেন মাঝে মাঝে।

কিন্তু এমন সতেজ কণ্ঠ তরুণীর গানের পরই গাইবার মেজাজ তার হয়নি। বার্ধক্যের স্বর এখন আসরে ছাপ দিতে পারবে না হয়তো। এই রকমের আশঙ্কা তার মনে জাগছিল। তা ছাড়া মহফিলের এমন গোড়ার দিকে, এই কমবয়সী গায়িকার পরেই গাইতে ইচ্ছা হয়নি আলী বখ্সের। কেমন যেন বেখাতির মনে করছিলেন। কিন্তু দরবারে নিযুক্ত কলাবত তিনি। সেজন্তে প্রস্তুতও হলেন অগত্য। নবাবের ফরমায়েস মাঝ করতেই হবে।

বামাচরণও বুঝতে পেরেছিলেন ওস্তাদজীর মনের অবস্থা।

নবাবের আদেশ শুনেই তার মনে হয়েছিল, এখন আলী বখ্সের গান না হওয়াই ভাল। এত বয়সের গলায় এ আসরে গেয়ে জমানো মুশকিল হতে পারে। কি করা যায় এখন। তার মনে হল ওস্তাদজীর জন্তে একটা কিছু এখনই করা দরকার। তখনি ভেবে তিনি এক উপায় ঠিক করলেন। আর ওস্তাদকে জানালেন সেকথা।

আলী বখ্সের সঙ্গে তাকে কথা বলতে শুনে সেই বিরাটচেহারার মানুষ জিজ্ঞেস করলেন, ‘এ লৌগে কেয়া কহতা হ্যায় ?’

অমন সুপুরুষ দর্শনধারী। কিন্তু গলার আওয়াজ তার কিরুকম মীরস ঘরবারে মতন। তার ওপর ‘লৌগে’ শুনে বামাচরণের অতি খারাপ জাগল। ছেলেবেলায় পশ্চিমে বাস করার জন্তে তিনি ভালই বুঝতেন হিন্দুস্থানী। ‘লৌগে’ চলতি কথায় যাকে বলে ‘ছেঁড়া’।

আলীর বখ্স কিন্তু তার ওই কথায় দোষ ধরেননি। তিনি জো

বিজ্ঞাকে জানতেন। বুঝেছিলেন, তিনি সাধারণভাবেই বলেছিলেন কথাটা।

আলী বখ্স ঠাকে বামাচরণের প্রস্তাবের কথাটা বললেন, ‘এ ছেলেটি আমার ছাত্র। এ বলছে, আমার বদলে ও গান গাইবে কি? নবাবকে কি অনুমতির জন্যে বলা হবে? আপনি কি বলেন?’

তিনি শুনেই ‘হঁ। হাঁ ইয়ে ত বহোঁ আচ্ছি বাঁ হ্যাম। কেঁও নহি?’ বলে সেই ধরা ধরা গলায় খুবই উৎসাহ দিলেন। তারপর তিনিই নবাবেরও অনুমতি নিলেন বামাচরণের গান গাইবার।

দরবারে গানের সরঞ্জাম তো সদা প্রস্তুত। তখনই যন্ত্র ও যন্ত্রীদের সামনে আনা হল। তবলা বাঁয়া তানপুরা। তবলচৌ আর তানপুরা ছাড়বার লোক বসে গেলেন ঠার পাশে। আর গলায় সুর ধরলেন বামাচরণ। ঠার প্রথম ঘোবনের সেই দরাজ সুরেলা কর্তৃ। বেশ ভালভাবেই ঠার গান আরম্ভ হল।

তখনকার সব বর্ণনা পরে নিজেই করতেন বামাচরণ। নিজের পরিণত বয়সে সেদিনের মেটিয়াবুরুজ দরবারের কথা তিনি এইভাবে বলতেন—

‘আমার মনে তখন সুরের মেজাজ এসে গেছে। এ যে নবাব ওয়াজিদ আলীর দরবার, স্বয়ং নবাব সামনে বসে আছেন, আলী বখ্সের কাছে, আমার না-জানা আরো উস্তাদ রয়েছেন—এসব ভয়-সঙ্কোচ কিছুই আমার হল না। একে তো জোয়ান বয়েস। উস্তাদের তালিম ও পাছি তিন-চার বছর। উস্তাদের ইঞ্জিতের জন্যে মনে এসেছে একটা বেপরোয়া ভাব। গান গাওয়া তখন আমার কাছে অতি সহজ মনে হচ্ছে। দরবারে এসেই শুনেছি চারটি তানপুরা আর প্রকাণ্ড বাঁয়ার টানা সুর। তারপর এই পাপিয়ার গলায় গান। তাই সুর ধরবার জন্যে আর আমায় চেষ্টা করতে হল না। অনুমতি পেয়েই আমার গলায় এসে গেল ভূপালী। কিছুদিন আগেই আলি বখ্সের কাছে শিখেছিলুম—‘সুবর বনায়ে গায়ে বঙায়ে...’

অনেক কাল পরেও বামাচরণ সেদিনের শুভিচারণ ওইভাবে  
করতেন।

ত্রিতালে সেই ভূপালি তিনি ধরতেই শুর জমে গেল—

‘শুঁঘর বনায়ে গায়ে বজায়ে

রিখয়ে সবন কে!

মত্ গত্ সো।’

বামাচরণের গান শুরু হতে ভারি থুশি হলেন আলী বখসু। মাথা  
হেলিয়ে ছাত্রকে ইশারায় জানালেন, ঠিক হচ্ছে।

আর সেই সন্ত্বাস্ত চেহারার ব্যক্তি সোৎসাহে সাবাস দিয়ে  
উঠলেন।

আলী বখসের তালিমের গোয়ালিয়রী চালের খেয়াল। বামাচরণ  
সেই ভারি চালে, তান কর্তব করে অস্তরা শোনাতে লাগলেন—

‘তান তার বোল কি পটেরি বিধায়ত

গাওয়ত অলঙ্কার সো।’

গান ঠার বেশ উৎরে গেল। আর ভাল লাগল সকলেরই।  
অনেকে বামাচরণকে প্রশংসা জানালেন।

তবে তাদের মধ্যে সবচেয়ে তারিফ করলেন সেই বিশাল শরীর-  
খারী। মুখে শুধু সাবাস দেওয়া নয়। মহা উৎসাহে তিনি নিজের  
আলখাল্লার চোলা পকেটে হাত পুরে দিলেন।

তারপর বামাচরণের হাতে উপুড়-হস্ত করে বললেন, ‘ইয়ে বখশিষ্য  
লেও।’

বামাচরণ অবাক হয়ে দেখলেন, তামার কটা পয়সা আর ভবল  
পয়সা।

ঠার মন ছোট হয়ে গেল। তিনি বখশিষ্যই বা নেবেন কেন,  
আর তাও এই ভিখারির মতন দান!

তিনি ইতস্তত করলেন। মৌন হয়ে রইলেন হাত গুটিয়ে।

আলী বখসু ছাত্রের মনের কথা বুঝতে পারলেন। তার কানের

কাছে বলে দিলেন, ‘লে লেও। এ’র এই কটা পয়সার অনেক দাম।  
এখানে এ’র চেয়ে বড় গুণী কেউ নেই।’

বামাচরণ ওস্তাদের কথায় সবিনয়ে গ্রহণ করলেন তামার পয়সা  
কটি। আর আলি বখ্সুকে তেমনি জনান্তিকে জিজ্ঞেস করলেন, ‘কে  
ইনি?’

আলী বখ্সু তেমনিভাবে বামাচরণের কানের পাশে মুখ এনে  
সমন্বয়ে বললেন, ‘তাজ থাই।’

বামাচরণ সে সময় তাঁর নাম বা পরিচয় কিছুই জানতেন না।  
সে সব জেনেছিলেন পরে। কিন্তু তখন আলী বখ্সুর কথায় বড়  
আশ্চর্য বোধ করেছিলেন। এ’র গলায় তো রসকষ কিছুই নেই—অথচ  
এ’কেই ওস্তাদ বললেন সবচেয়ে বড় কলাবত।

এদিকে তাজ থাই আলী বখ্সুকে এই ছোকরা গায়কের পরিচয়  
জিজ্ঞেস করলেন।

‘এক বাঙালী। মেরা শগীরদ।’ আলি বখ্সু জানলেন।

বাঙালী শনে তাজের বনে গেলেন তাজ থাই। তাঁর চোখে মুখে  
মহা বিশ্বয়ের ভাব ফুটে উঠল। কেয়া? এমন গায়কী, এমন চুম্ব  
হিন্দুস্থানী উচ্চারণ। আর এমন চমৎকার স্বাস্থ্য। অথচ বাঙালী? সেই  
করবারে আওয়াজে তিনি কয়েকবার জানিয়েও দিলেন তাঁর আশ্চর্য  
হওয়ার কথা।

তাজ থাই তখন বেশ কিছুকাল মেটিয়াবুরুজ নিবাসী ছিলেন।  
সুতরাং বাঙালীদের গড়পড়তা স্বাস্থ্য সম্পর্কে তাঁর একটি ধারণা গড়ে  
উঠেছিল। আর বাংলার লোকের হিন্দুস্থানী উচ্চারণের বিষয়েও।

যা হোক বিস্তর বিশ্বয় প্রকাশ করে তাজ থাই সাবাসও জানলেন  
ভালরকম।

তাঁরপরই দরবারে বা নবাবের কাছে পেশ করলেন—তাঁর গানের  
মেজাজ এসে গেছে। এখন তিনি গাইতে চান।

বামাচরণ দেখলেন তাজ থাইর গান গাইবার প্রস্তাবে দরবারে

বেশ চাকচ্য জাগল। সকলেই যেন উৎসাহ বোধ করলেন তাঁর গান  
শোনবার আশায়। এর প্রতি সমাদরের ভাব বামাচরণ অনেকের  
মধ্যেই প্রথম থেকে লক্ষ্য করেছিলেন। এখন যেন তা আরো বেশি  
দেখা গেল তাঁর গান গাইবার কথায়।

গানের সরঙাম তখনি প্রস্তুত হল। গান আরম্ভ করলেন  
তাজ খঁ।

সামাজিক ‘তোম্ তায় নোম’ করেই কাওয়ালীতে মালকোশের  
খেয়াল তিনি ধরলেন—

‘মদৎ করো মোহে আল্লাহ্’

এবার বামাচরণের বিশ্বিত হবার পালা। তাজ খঁ’র এ কি কঠ!  
এতক্ষণ তাঁর কথা কতবার শুনেছিলেন—কি ঝরবরে, ধরা ধরা  
আওয়াজ তাঁর। কেমন নৌরস-কঠ শোনাচ্ছিল কথাবার্তায়।

কিন্তু এখন গান আরম্ভ করতেই একেবারে অস্তরকম। দস্তুর মতন  
সুরে ভরাট হয়ে উঠল তাজ খঁ’র গলা। আর কি দাপটের সঙ্গে  
তিনি মালকোশ গাইতে লাগলেন।

মদৎ করো মোহে আল্লাহ্

নিশি বাসর তেরো হি নাম

জপত হ্ব আল্লাহ্,

নবৌকে হোকে মেহেরবানি ॥

বামাচরণ সাগরে শুনতে লাগলেন তাজ খঁ’র অসাধারণ গান।  
শুধু দাপট নয়। সবই আছে। সুরে তো ভরপুর। এক এক সময় এমন  
শোলায়েম আওয়াজ দিচ্ছেন—বিশেষ মিডের কাজে। প্রথম মুখের  
'আল্লাহ্' কথায় কি চমৎকার মিড দিলেন। সে কি সূক্ষ্ম সুরের  
জন। আর সে কোমল গান্ধারের শৃঙ্গিও শোনবার মতন সুরেল।

বামাচরণের বিশেষ করে ভাল লাগছিল এই জন্তে যে, তাজ খঁ’র  
খেয়াল গাস্তীর্ধে ভরা। আলি বখ্সের গস্তীর চালেরই মতন অনেক-  
খানি—বামাচরণ ঘার ভাসিম পান। তাজ খঁ’র এই খেঁসেও

তেমনি কোন হাল্কা তান নেই। ক্রপদ-ছৌয়া কি ভারি চালের খেয়াল। কোন খুচরো কাজ দেখালেন না তাজ থঁ। বড় বড় তানের সঙ্গে থুব শুর আর মিডের কারুকর্ম। আর গমকের ধরনে কত তানকারি। স্থায়ীর দ্বিতীয় ‘আল্লাহ’তে এমন দাপটে একটি গমক দিলেন যে চমকে ঘঠবার মতন। খরজের সা থেকে একেবারে তারার সা পর্যন্ত যেন বিজলি হেনে গেল। আর সেই গমকের দাপটে দপ করে নিভে গেল তাজ থঁ’র সামনেকার একটা রঙীন ফানুস।

দরবারে রৌতিমত একটা চমক সৃষ্টি হল। তারপর অন্তর আরও করলেন তাজ থঁ—

নূর বথস পর করম করো আপনা,  
দিজে মোরাদ হোয়ে আকদানী ॥

ঁৱার এই মালকোশ আরস্ত হবার পরই দরবারে আগেকার গানের ছাপ মুছে গিয়েছিল। বামাচরণের নিজের গান কিংবা নবাবের সেই নতুন বেগমের গান আর কারুর মনে ছিল না তখন। তাজ থোর শুরু, গানের চাল, গায়ন-ভঙ্গিমা আর ব্যক্তিত্ব। এ সবের সম্মিলনে দরবারে এক অপৰ্যাপ্ত পরিবেশ সৃষ্টি হয়ে গেল। আসর মাত করে দিয়ে এক সময়ে গান শেষ করলেন তাজ থঁ।

আলী বথস্ আর অনেকেই ঁৱাকে সাবাস দিলেন। তারিক করলেন নবাব।

বামাচরণ তো প্রথম থেকেই মুঝ হয়ে উনেছিলেন। ঁৱার মন ভরে গিয়েছিল সেই অসাধারণ মালকোশের খেয়ালে।

মেটিয়াবুরজ দরবারে তাজ থঁ’র গান বামাচরণের সেই একদিনই শোনবার সুযোগ হয়। কিন্তু তার শুতি ঁৱার সাবা সঙ্গীতজীবনের এক বহুমূল্য সঞ্চয় হয়ে থাকে।

তাজ থঁ’র গানের পরে আর কোন গান সেদিন হয়নি দরবারে। ধানিক পরে আলী বথসের সঙ্গেই বামাচরণ উঠে আসেন। কিন্তু ফেরবার আগে আর এক আশ্চর্য ব্যাপার ঘটল ঁৱার জীবনে।

তাজ খাঁর কি তুলভ মেজাজ ছিল সেদিন। আর বামাচরণেরও  
কি ভাগ্যের যোগাযোগ।

দরবার থেকে বেরবার আগেই তাজ খাঁ হঠাৎ বামাচরণকে  
বললেন, ‘হাম্ সে কুছ তালিম জেও।’

কথাটি এমন অপ্রত্যাশিত যে তিনি কি জবাব দেবেন স্থির করতে  
পারলেন না। বিশেষত সঙ্গেই রয়েছেন তাঁর উস্তাদ আলী বখস।  
তাঁর কাছে তখন তিন-চার বছর গান শিখছেন।

তখন আলী বখস ই তাঁর হয়ে তাজ খাঁকে বললেন, ‘হাঁ হাঁ।  
নিশ্চয়ই শিখবে। এ তো ওর সৌভাগ্য। আপনি তালিম দেবেন  
আপনার ফুরসুৎ মতন। খুবই ভাল হবে।’

তাজ খাঁ যাবার সময় আলি বখসকে বলে গেলেন, ‘লেড়কাকো  
মেরা পাস ভেজ দেগা।’

‘হাঁ, জরুর।’

তিনি চলে গেলে আলী বখস বামাচরণকে বললেন, ‘যা পারো  
নিয়ে নাও ওর কাছে। উনি কাকেও শেখান না। আজ কি মেজাজ  
আছে তাই তোমায় শেখাতে চাইলেন। তোমারও বরাত। মেটিয়া-  
বুরুজে এখন তাজ খাঁর চেয়ে বড় গুণী আর কেউ নেই। আমাদের  
চেয়ে উনি অনেক বেশি জানেন।’

সেদিন যেন স্বপ্নের ঘোরের মধ্যে বাড়ি ফিরছিলেন  
বামাচরণ।

মেটিয়াবুরুজ থেকে হাঁটাপথে বেহালায় আসতে আসতে এইসব  
কথাই শুধু ভেবেছিলেন। সেদিন এত রকমের অভিজ্ঞতা হয়েছিল  
দরবারে। পর্দানশিনা বেগমের গান শুনলেন আসরে। তারপর  
নিজেই গান গাইলেন নবাব আর এত গুণীজনের সামনে। তাজ  
খাঁর এমন গান শোনবার সৌভাগ্য হল। আবার, তালিম দিতে  
চাইলেন তাজ খাঁ স্বয়ং। এই সমস্ত স্বরণীয় ঘটনা পর পর একই  
আসরে ঘটে গেল। যে নবাব দরবারের কথা এতদিন শোনা ছিল,

সেখানে আসবার প্রথম দিনেই এত সব কাণ্ড। আর সেই সঙ্গে  
মুগ্ধকেও এমন কাছে থেকে দেখা।

তারপরই বামাচরণ যাতায়াত আরম্ভ করলেন তাজ খাঁর কাছে।  
মেটিয়াবুরুজের ওস্তাদপাড়াতেই তার আস্তানা ছিল। সেখানে একা  
থাকতেন তাজ খাঁ। তার কাছে বামাচরণের শেখা চলতে লাগল।  
আলৌ বখ্সের কাছে আগে যেমন নিয়মিত শিখতেন তাও বন্ধ হচ্ছে  
না। তাজ খাঁর তালিম পেতে লাগলেন উপরন্ত।

কি দিলদরিয়া মেজাজ তাজ খাঁ—সে-সময় বামাচরণ দেখতেন।  
মেটিয়াবুরুজ দরবারে তারই তলব হিল সবচেয়ে বেশি। কিন্তু সে  
টাকার মধ্যে কিছুই সঞ্চয় করতেন না তাজ খাঁ। পরের মাসের  
তলব নেবার সময় তার একেবারে ফতুর অবস্থা দেখা যেত।

বামাচরণকে যে ক' মাস গান শেখাতেন, উৎকৃষ্ট খেয়াল গান  
দিতেন—কখনো সেজন্মে টাকা নেননি। অথচ এক-একদিন কপর্দিক-  
শূন্ত অবস্থায় দিন কাটত তার।

দরবারেও তাজ খাঁ নিয়মিত যেতেন না। যেদিন যেতেন  
সেদিনও যে গাইতেন, তাও না। তালিমের ব্যাপারেও মেজাজ হলে  
তবে গান শেখাতেন। আর সে মেজাজের মাহেন্দ্রকণ ছিল বড়ই  
চুর্ণভ।

তাজ খাঁ বে কি পরিমাণ মেজাজী ছিলেন তার পরিচয় বামাচরণ  
একেবারে শেষে পেয়েছিলেন। তাজ খাঁর কাছে তালিম নেবার  
প্রায় সমাপ্তি পর্বে। আর সে শেষের দিন অতি অক্ষ্মাং  
এসেছিল।

তার ওস্তাদ-পাড়ার ডেরায় বামাচরণ গেছেন কয়েক মাস।  
বার-চোদ্দশানি গান শিখেছেন। এমন সময় একদিন গিয়ে দেখেন  
তাজ খাঁর বুর একেবারে ফাঁকা। জিনিসপত্র কিছুই নেই। তিনিক  
পরহাজির। আশপাশে খবর নিতে শুনলেন—তাজ খাঁ চলে  
গেছেন।

মেটিয়াবুরুজ ছেড়ে দরবারের নোকরিতে তুড়ি দিয়ে চলে গেছেন তিনি।

কোথারে গেলেন তাজ খা? বামাচরণ জিজ্ঞাসাবাদ করেন। কিন্তু কেউ তা জানে না।

কেন হঠাত ছেড়ে দিলেন দরবারের কাজ, মেটিয়াবুরুজের বাস?

ইং, তার উত্তর পাওয়া গেল।

মেটিয়াবুরুজ দরবারে ঢাকরি নেবার সময় নাকি এক সঙ্গে করেছিলেন তাজ খা। যখন তাঁর গানের মেজাজ হবে তখনই মাজ তিনি দরবারে গাইবেন। কিন্তু নবাব যদি কোনদিন তাজ খার বেমেজাজে, অনিচ্ছায় গানের ফরমায়েস করেন, তাহলেই দরবার ছেড়ে চলে যাবেন তিনি। নবাব ওয়াজিদ আলি রাজি হয়েছিলেন তাজ খার সর্তে।

কিন্তু নবাব সেদিন তাজ খাকে দরবারে গাইবার জন্তে ডলব করেছিলেন। অথচ তাঁর গানের মেজাজ ছিল না।

তখন তাজ খা নবাবের কাছে গিয়েছিলেন ঠিকই। তবে একেবারে ডলপি বেঁধে নবাবকে আদাব জানিয়ে বলেছিলেন, ‘বাঁ কেয়া থা? এই রইল আপনার ঢাকরি। আমি যাচ্ছি।’

এমনি নাকি ঘটেছিল। আর সেই থেকে তাজ খা নির্ধোজ। অনেকদিন পর্যন্ত তাঁর কথা এখানে শোনা যায়নি। বামাচরণ তাঁর বহু অহুসন্দৰ্ব করেন কলকাতায়। খা সাহেবের কাছে আরো অনেক নেবার জিনিস ছিল। কিন্তু তাঁর সাক্ষাৎ আর পাননি জীবনে।

কলকাতা থেকেই তাজ খা নেপালে চলে গিয়েছিলেন। কিংবা অথবে কিরে যান শক্তীতে। তাঁরপর নেপাল রাজ্যে যান। সেখানে নিযুক্ত হন দরবারে। অর্ধাঁ নেপালের আগে শক্তীতে কিছুদিন ছিলেন কিনা এসব কথা জানা যায়নি। তবে তাঁর পেশাদার জীবনে কলকাতার পরেই নেপাল দরবারের পর্ব। আর নেপালে তিনি

সপরিবারে বাস করেছিলেন। তাঁর জীবনের শেষ অধ্যায়ও কাটে সেখানে।

কিন্তু তাঁজ থাঁর নেপাল-জীবনের আগে অন্য কথাও কিছু আছে। তাঁর প্রথম জীবনের লক্ষ্মৌ প্রসঙ্গ। আর তাঁর বাণি-পরিচয় ও বংশপরিচয়ের কথা।

তাঁজ থাঁর ভাগিনা ছিলেন তসদুক হোসেন। খেয়াল গানে তসদুক হোসেনও একজন বিখ্যাত কলাবৎ হয়েছিলেন। তিনি নেপালে যেমন থাকেন, তেমনি বাংলার একাধিক স্থানেও। বিশেষ করে মেদিনীপুরের পক্ষে এবং তমলুকে তসদুক হোসেনের বাসের কথা জানা যায়। আর তাঁজ থাঁর বংশপরিচয় প্রকাশ পায় তসদুক হোসেনের সূত্রে।

তসদুক হোসেন তাঁজ থাঁর কেবল ভাগিনেয় নন, তাঁর সঙ্গী-শিষ্যও। তাঁজ থাঁর তালিম তসদুক বোধহয় নেপালে পান। কারণ নেপালে তিনি ছিলেন তাঁজ থাঁরই সমকালে।

তসদুক হোসেনের সঙ্গে বাংলার একাধিক গুণীর সাঙ্গীতিক যোগাযোগ ঘটে। তাঁদের অন্তর্ম হলেন ক্রপদী কিশোরীলাল "মুখোপাধ্যায়। কিশোরীলালের প্রধান ওস্তাদ ছিলেন উনিশ শতকের এক শ্রেষ্ঠ ক্রপদগুণী মুরাদ আলি থা। মুরাদ আলীর সংগীতজীবন বাংলাদেশেই প্রায় অতিবাহিত হয়েছিল। তাঁর ঘৃত্যও হয় কলকাতায়। মুরাদ আলী কলকাতায় প্রথমে মেটিয়াবুরুজ দরবারের শিল্পী ছিলেন, সেখানে তাঁজ থাঁ নিযুক্ত হবার আগে। মুরাদ আলীও মেজাজের জন্মে মেটিয়াবুরুজের দরবার ছেড়েছিলেন এবং কলকাতাতেই তাঁরপর শেষ পর্যন্ত থাকেন। তাছাড়া কিশোরীলাল মুখোপাধ্যায়ের কাছে তমলুকেও। কিশোরীলাল আহিরিটোলার বেনিয়াপুরু স্টীটের মুখোপাধ্যায় পরিবারের সন্তান হলেও আইন বৃত্তির জন্মে তমলুক নিবাসী ছিলেন।

তমলুকের সুপরিচিত উকিল কিশোরীলালের বাড়ি সেখানকার

একটি সংগীত-কেন্দ্র হয়ে উঠেছিল। সেখানে তাজ খাঁর ভাগিনেয় তসদ্দুক হোসেনও থাকেন কখনো কখনো। সেই সূত্রে তসদ্দুক হোসেনের মাতৃল তাজ খাঁর বংশপরিচয় পাওয়া যায় কিশোরীলালের এক পুত্রের স্মৃতিকথায়।

সে বিবরণ উল্লেখ করবার আগে, ঈষৎ অবাস্তর হলেও কিশোরী-লাল-পুত্রদের পরিচিতি দেওয়া দরকার। তাঁর পুত্রের সংগীত-জগতের নন, কিন্তু স্বদেশের মুক্তিসংগ্রামে 'এবং সাহিত্য-জগতে প্রসিদ্ধনামা। কিশোরীলালের তৃতীয় পুত্র ডঃ যাতুগোপাল মুখোপাধ্যায় বিপ্লবী আন্দোলনের প্রথম সংগঠন যুগান্তর দলের অন্তর্মনেতা। স্বরণীয় বিপ্লবী নেতা যতীন্দ্রনাথ মুখোপাধ্যায়ের অন্তর্মনেতা। সহকর্মী তিনি। যাতুগোপালের 'বিপ্লবী জীবনের স্মৃতি' গ্রন্থেই তসদ্দুক হোসেন ও তাজ খাঁর প্রয়োজনীয় কিছু কথা পাওয়া যায়। যাতুগোপালের পরবর্তী অনুজ ক্ষীরোদগোপালও যুগান্তর দলের কর্মীরূপেই বর্মায় প্রেরিত হন, সেখান থেকে ভারতের সশস্ত্র অভ্যুত্থানে সহায়তা করবার জন্মে। যাতুগোপালের কনিষ্ঠ ভাতা ধনগোপালও বিপ্লবী সংগঠনের উদ্দেশ্যে গৃহত্যাগ করে প্রথমে জাপান ও পরে আমেরিকায় গিয়েছিলেন। কিন্তু ঘটনাচক্রে ও স্বত্বাবের প্রেরণায় তিনি পরে আঞ্চ-প্রকাশ করেন সাহিত্য রচনার ক্ষেত্রে। সমগ্র গ্রন্থাবলী ইংরেজীতে রচনা করে আমেরিকা-প্রবাসী ধনগোপাল বিশ্ববিদ্যালয়ে হয়েছিলেন।

ডাক্তার যাতুগোপাল তাঁর বিপ্লবী জীবনের স্মৃতিচারণে কিশোরী-লালের এবং তসদ্দুক হোসেন, তাজ খাঁ। প্রমুখের যে উল্লেখ করেছেন এখানে তা উক্ত করা হল :

'সুবিদ্যাত গায়ক ভাগলপুরের বাবু সুরেন্দ্রনাথ মজুমদার ডেপুটি ম্যাজিস্ট্রেট ছিলেন। তিনি তমলুক এবং মেদিনীপুরে বাবার কাছে গান শিখতেন। অবশ্য তাঁর ওস্তাদ অন্য লোক ছিলেন।' কিশোরী-লালের তমলুকের বাড়িতে অনেকদিন ছিলেন 'তসদ্দুক হোসেন, তাজ খাঁ' নামক তানসেন বংশের 'সুবিদ্য'ত গায়কের ভাঙ্গে । ০০ নবাব

ওয়াজেন আলির মেটিয়াবুরজ দরবারের ওস্তাদদের মধ্যে সর্বশ্রেষ্ঠ এক সর্বমান্ত গায়ক তাজ খঁ। এন্দের মধ্যে ছিলেন। তিনি সভায় এলে অন্ত গুণীরা ‘ওস্তাদকা আওলাদ’ ( গুরুবংশ ) বলে উঠে দাঢ়াতেন। নবাবের মৃত্যুর পর ইনি নেপাল দরবারে গায়ক হয়ে সেদেশে চলে যান। তসদিক হোসেনকে তিনি গান শিখিয়েছিলেন। এন্দের গানের টঙকে বলত ‘সেনী দ্বরানা।’ ( বিল্বী জীবনের শুভি, পঁ  
১৫৫-১৫৬, যাত্রগোপাল মুখোপাধ্যায় )।

যাত্রগোপাল সঙ্গীত-জগতের মানুষ না হলেও এসব কথ্য পান তাঁর পিতা কিশোরীলালের কাছে। কিশোরীলাল যেমন তসদুক হোসেনের সঙ্গে বিশেষ পরিচিত ছিলেন, তেমনি মেটিয়াবুরজের এক-কালীন দরবারী গ্রুপদী মুরাদ আলী খঁ'র শিষ্যও। তাছাড়া তাজ খঁ। ও কিশোরীলাল সমকালীন বাস্তি।

উনিশ শতকের শেষে তাজ খঁ'র ভাগিনেয়-শিষ্য তসদুক হোসেনের সঙ্গে কিশোরীলালের যোগাযোগ দেখা যায়। তাঁর বেশ কয়েক বছর পরেও জীবিত ছিলেন তাজ খঁ। এইসব কারণে তাজ খঁ'র তাসসেন-বংশধর হবার কথা কিশোরীলাল জেনেছিলেন তসদুক হোসেনের কাছে অনিষ্টভাবে। এ সম্পর্কে তাজ খঁ'র নেপাল-জীবনের কথায় আরো আলোচনা থাকবে।

তাজ খঁ। নিজেও বলতেন যে তিনি তাসসেন-বংশীয়। যাত্রগোপালের বিবৃতির মধ্যে একটি কেবল সঠিক নয়। ‘নবাবের মৃত্যুর পর’ নয়, নবাবের জীবিতকালেই নেপালে যান তাজ খঁ। এ-অঙ্গে তাজ খঁ'র একমাত্র বাঙালী শিষ্য বামাচরণ বন্দ্যোপাধ্যায়ের শেষ পর্যন্ত অংযাগ্য।

তমলুকেও। কিরোর পূর্ব-বৃত্তান্ত।

মুখোপাধ্যায় পরিবারক্রজ্জ ত্যাগ করবার পর নেপালের রাণী দরবারে নিবাসী ছিলেন। তাঁর মেটিয়াবুরজ দরবারে যোগ দেবার আগে

তমলুকের সুপরিচিত

শোনা যায় লক্ষ্মী থেকে তাজ খঁ। প্রথমে কলকাতার এসেছিলেন।  
ববাৰ ওয়াজিদ আলীৰ জীবনেৱ তা প্ৰায় শেষ দিকে। লক্ষ্মীতে  
তাজ খঁ। খুবই আৰ্থিক অনটনে দিন কাটাছিলেন। সেকথা শুনে  
ওয়াজিদ আলী তাকে আহ্বান কৱে আনেন মেটিয়াবুরুজে। তাকে  
দৱাৰে নিযুক্ত কৱেন। সেই অবস্থায়ও ইই শতে দৱাৰে যোগ  
দেন তাজ খঁ। আবাৰ মেজাজেৱ জন্মে সেই সোভনীয় চাকুৱিশ  
এককথাৰ ছেড়ে চলে যান।

বামাচৰণ বেদিন দৱাৰে তার গান শোনেন, তাৰ হয়তো তিন-চাৰ  
বছৰ আগে মেটিয়াবুরুজে আসেন তাজ খঁ। তাৰ বেশী নয়। কাৰণ  
মেটিয়াবুরুজে অধিককাল থাকেননি তাজ খঁ।

মেটিয়াবুরুজ দৱাৰে তাজ খঁৰ যোগ দেয়াৰ ব্যাপাৰে আৱেক  
ৱকমেৰ কথাৰ শোনা গেছে। তিনি নাকি ভাগ্যাহৰণে এসেছিলেন  
কলকাতায়। তখন ওয়াজিদ আলী খবৰ পেয়ে তাকে দৱাৰে  
আমন্ত্ৰণ জানান।

মোট কথা, মেটিয়াবুরুজে নিযুক্ত হবাৰ আগে তাজ খঁৰ জীবন  
কেটেছিল লক্ষ্মীতে। তবে সে সময়কাৰ সবিশেব তথ্য তার সম্পৰ্কে  
পাওয়া যায় না। তার বাল্যজীবনেৱ কথা কিংবা পিতৃপিতামহৰ  
নামও অপ্রকাশিত আছে। জানা গেছে শুধু তার সঙ্গীত-শিক্ষাৰ  
কথা।

লক্ষ্মীৰ হায়দাৰ খঁৰ তালিমে তাজ খঁৰ সঙ্গীত-জীবন গঠিত  
হয়েছিল এই পৰ্যন্ত জানা যায়। হায়দাৰ খঁ ছিলেন তানসেনেৱ পুত্ৰ-  
বংশীয় এক দিকপাল কলাবত। তানসেনেৱ যে পুত্ৰবংশে জাফৱ খঁ  
প্যার খঁ বাসৎ খঁ ছিলেন, হায়দাৰ খঁও সেই ধাৰাৰ। হায়দাৰ খঁ  
হলেন জাফৱ-প্যার-বাসৎেৱ কাকা। জীবন খঁৰ দ্বিতীয় পুত্ৰ। হায়দাৰ  
খঁৰ দীৰ্ঘকালীন ও সুপৰিচিত শিষ্য হলেন সাদিক আলি খঁ। লক্ষ্মীতে  
সাদিক আলি আচাৰ্যেৱ সম্মানে বিজ্ঞমান ছিলেন শতাধিক বৰ্ষেৱ আৱু  
নিয়ে।

কেউ কেউ বলেন, তাজ খঁ। হলেন সাদিক আলীর শিষ্য। কিন্তু তা সঠিক কিনা বলা কঠিন। সাদিক আলী নামে দুজন বিখ্যাত কলাকার ছিলেন। একজন তো লক্ষ্মী-নিবাসী এবং হায়দার খঁ'র শিষ্য। অন্তর্ভুক্ত তানসেন বংশেরই স্বনামধন্য রবাবী-বৌগকার। তিনি জাফর খঁ'র পুত্র এবং কাশী-নরেশ দরবারে বহুদিন নিযুক্ত থাকেন। এমনও হওয়া সম্ভব যে, তাজ খঁ। উক্ত দুজনেরই শিষ্য। কারণ বারাণসী-নিবাসী সাদিক আলী এবং লক্ষ্মীর হায়দার দুজনেই তানসেনের বংশধর ও জ্ঞাতিভাই।

তাজ খঁ'র পিতার কথাও তালিমের বিষয়ে অজ্ঞাত আছে। তাজ খঁ'র প্রথম জীবন সম্বন্ধে এই সব তথ্য উক্তার হয়নি এ যাবৎ। তবু এইমাত্র জানা যায় যে তাজ খঁ। প্রথম জীবনে লক্ষ্মী-নিবাসী ছিলেন।

তাজ খঁ। ক্রপদ গানেও অভিজ্ঞ ছিলেন অবশ্যই। কিন্তু খেয়ালের কলাবৎকৃপে তাঁর পরিচয় মেটিয়াবুরুঙ্গ ও নেপাল এই দুই দরবারেই পাওয়া যায়। বামাচরণকে তিনি খেয়াল অঙ্গে তালিম দেন একথাকে সন্দেহাতীত।

তাজ খঁ'র খেয়াল গানের কথা বিশেষ উল্লেখের কারণ এই যে— তানসেনের পুত্রবংশে কথনো খেয়াল চর্চা হয়নি বলে প্রসিদ্ধি আছে। তাঁর পুত্রবংশীয়রা আসরেও ক্রপদ গেয়েছেন। খেয়াল নয়। তানসেনের কল্পবংশে প্রথম খেয়াল চর্চা আরম্ভ করেন সদারঞ্জ। কিন্তু তিনিও দরবারে খেয়াল গাইতেন না। কোন কোন শিষ্যকে তালিম দেন কেবল। তবে ঘরে খেয়ালের যথেষ্ট চর্চা করেন এবং খেয়াল গান রচনাও করেছিলেন সদারঞ্জ।

কিন্তু তাজ খঁ। ভিন্ন তানসেনের পুত্রবংশে আর কোন গুণী প্রকাঞ্চ আসরে বা দরবারে খেয়াল শোনাননি। এই সূত্র ধরে কোন সমাজেচক এমন অভিযোগও করতে পারেন যে তাজ খঁ। তানসেনের বংশধর নন।

সেনীয়া তাজ খঁ'র খেয়াল গানের চর্চা বাস্তবিকই এক গুরুত্বপূর্ণ

গ্রন্থ। কিন্তু সবচেয়ে বড় প্রমাণ বাস্তব সত্য। তাজ খাঁ আসরে দরবারে খেয়াল গাইতেন একথাও যেমন সত্য, তেমনি ঠাঁর জন্মও হয়েছিল তানসেনের বংশে। এ বিষয়ে একটি নজির আগেই দেওয়া হয়েছে। পরেও আলোচনা করা হবে নেপাল দরবারের কথায়।

তবে এখানে একটি কথাও উল্লেখ্য। তাজ খাঁ যে তানসেনের কোন পুত্রের উত্তরপুরুষ সেকথা এবং তাজ খাঁর উর্ধ্বর্তন পর্যায়ের বিবরণী জানা যায় না। বড়কু মিঞ্চা, মহম্মদ আলীরা যেমন বিলাস খাঁর বংশধর বলে পরিচিত, তাজ খাঁ সম্পর্কে তেমন তথ্য অপ্রাপ্য। জয়পুর-নিবাসী অমৃতসেন প্রমুখ তানসেন বংশধরদের কয়েক পুরুষের নাম পাওয়া যায়। তাজ খাঁর রিষয়ে তাও অজ্ঞাত। তানসেনের সব পুত্রদের বংশতালিকা এয়াবৎ উক্তার হয়নি। তাজ খাঁর পূর্বপুরুষদের বৃত্তান্তও তার অজ্ঞতম।

লক্ষ্মীতে তাজ খাঁ পরিণত যৌবনকাল পর্যন্ত ছিলেন। তার মধ্যে একবার কাশী-নরেশের দরবারে যোগ দেন বটে, কিন্তু সে বেশী দিনের জন্যে নয়। কলকাতায় আসবার আগে লক্ষ্মীতেই তিনি বরাবর বাস করেন। তবে লক্ষ্মীতে ঠাঁর বাসের শেষ পর্ব ছিল অতি কষ্টে।

যতদূর জানা যায়, তাজ খাঁর পেশাদার সঙ্গীত-জীবনের শুরু হয় নবাব গুয়াজিদ আলির লক্ষ্মী দরবার ভেঙে যাবার পরে। দরবারী দাক্ষিণ্য তিনি লক্ষ্মীতে কোনদিন পাননি। অন্য আনুকূল্যও লাভ করতে পারেননি সেখানকার সঙ্গীত-জীবনে। অথচ লক্ষ্মী-জীবনের অন্তত শেষ দিকে তিনি বিবাহিত ছিলেন; সন্তানও জন্মেছিল। কারণ মেটিয়াবুরুজে তিনি আসেন প্রোট বয়সে। মেটিয়াবুরুজের শুস্তাদ মহল্লায় তাজ খাঁ একক জীবন ধাপন করতেন। কিন্তু নেপালে ঠাঁর সংসারযাত্রা ছিল দুই পুত্র, এক কন্তা ও পত্নীকে নিয়ে। সেই সংসার-জীবন তাজ খাঁর লক্ষ্মীতেই আরম্ভ হয়েছিল।

এমন গুণী হয়েও তাজ খাঁর অতি ছুদিন ছিল লক্ষ্মীতে। নবাব-

দরবারে থাকলে হয়তো তিনি স্বাচ্ছন্দ্য লাভ করতেন। কিন্তু সঙ্গীতের পীঠস্থান লক্ষ্মীতে, যে কারণেই হোক, তাজ খাঁ ব্যর্থ ছিলেন পেশাদার জীবনে। আর সেকালের অনেক কলাবক্তব্য মতন ভাগ্যাব্বেষণে কলকাতায় উপস্থিত হন। হয়তো নবাবের মেটিয়াবুরুজ দরবারের-আশাতেও আসতে পারেন কলকাতায়। সে বিষয়ে সঠিক জানা যায় না।

লক্ষ্মীতে অতি হৃগতির অভিজ্ঞতা সত্ত্বেও তাজ খাঁ অমন সর্ক করেছিলেন মেটিয়াবুরুজ দরবারে। তাঁর তখনকার মেজাজ ওই রকমই ছিল। কিংবা হয়তো বলা যায়, শিল্পী-চিত্রে এক অনুভ খেয়াল অথবা শিল্পীজনোচিত আত্মর্ধাদাবোধেরই আতিশয়। আর লক্ষ্মীতে অতি অর্থকষ্ট ভোগ করলেও মেটিয়াবুরুজে সর্বস্ব ব্যয় করে ফেলতেন। এও এক আশ্চর্য স্বভাব তাঁর। লেশমাত্র সঞ্চয়ের দায়িত্বজ্ঞান তাঁর জীবনের এই পর্বে দেখা যায়নি।

কিন্তু নেপাল বাসের সময় তাজ খাঁর স্বভাবের বিলক্ষণ পরিবর্তন ঘটে যায়। হয়তো বয়সের অভিজ্ঞতায়। কিংবা সংসারী-জীবনের প্রভাবে। নেপাল দরবারে তিনি যেমন প্রচুর উপার্জন করতেন তেমনি সঞ্চয়ও। সে যেন আর এক তাজ খাঁ।

নেপাল দরবারের সঙ্গে তাঁর কিভাবে যোগাযোগ ঘটে, কেন্দ্ৰ সময় তিনি নেপালে যান, সে বিবরণ জানা যায়নি। কলকাতার বামাচরণ তাঁর সন্ধান করবার সময় হঠাতে শোনেন, তিনি এখন নেপাল-প্রবাসী।

তাজ খাঁ সন্তুষ্ট ১৮৯০ সালের কিছু আগে নেপালে গিয়েছিলেন ও সেখানকার সঙ্গীত দরবারে নিযুক্ত হয়েছিলেন।

রাজনৈতিক হিসেবে বিদেশ হলেও নিকটতম প্রতিবেশী রাজ্য নেপাল আত্মিক ও ধর্ম-সংস্কৃতির সূত্রে ভারতের প্রায় অঙ্গসৌ। তেমনি সঙ্গীতের ক্ষেত্রেও। ভারতীয় সঙ্গীতের নানা ধারা সেখানে বহুকাল থেকে প্রচলিত আছে। আর আঠারো শতক থেকে নেপালে

ভারতীয় পেশাদার কলাবতদের যাতায়াত। পরে নেপালের রাজ-দরবার—বিশেষ রাণা-দরবার—হিন্দুস্থানের গুণীদের নিয়েই গড়ে উঠে। আর সমৃদ্ধি লাভ করে একটি শ্রেষ্ঠ সঙ্গীত-দরবার বলে।

তাজ খাঁ থন নেপালে উপস্থিত হলেন তখন রাজাৰ দৱবার ও প্রধানমন্ত্ৰী রাণাৰ দৱবারে ভাৰতীয় কলাবতদেৱ বিশেষ সমাদৰ।

সেকালেৱ নেপালে রাজাৰ চেয়ে মন্ত্ৰীৰ কৃত্তি ছিল বেশী। রাষ্ট্ৰশাসনেৱ সৰক্ষেত্ৰে আসল ক্ষমতা নেপাল মহাৰাজাৰ নয়, প্রধানমন্ত্ৰী রাণাৰ হাতেই থাকত। তেমনি সঙ্গীত-দৱবারও গোখালী রাজাৰ চেয়ে রাণাদেৱই ছিল বৃহত্তর। নানা বিখ্যাত কলাবতদেৱ অবস্থান সেখানে হত। গুণে এবং পৰিমাণে রাণা-দৱবারেৱই সঙ্গীতচৰ্চাৰ বেশী প্ৰসিদ্ধি।

তাজ খাঁ ষে সময়ে নেপালে আসেন তখন প্রধানমন্ত্ৰী রাণা বীৱ শমসেৱেৱ আমল।

বিশ্বরাষ্ট্ৰনীতিতে ঘূমন্ত রাজ্য নেপাল। কিন্তু মুখৰিত তাৰ সঙ্গীত-দৱবার। বিশেষ প্রধানমন্ত্ৰী বীৱ শমসেৱেৱ দৱবার। তিনি সঙ্গীতেৱ শুধু দৱাজ পৃষ্ঠপোধক নন।' নিজেও সঙ্গীতজ্ঞ। উনিশ শতকেৱ সেই শেষ দিকেই ছিল রাণা সঙ্গীত-দৱবারেৱ সবচেয়ে গৌৱবেৱ যুগ। ঠিক সেই সময়েই তাজ খাঁ নেপালে এসেছিলেন। আৱ নিজ গুণে শোভা পান দৱবারেৱ এক উজ্জ্বল রঞ্জ হয়ে।

তাজ খাঁৰ অনেক আগে থেকে নেপালে আসেন ছুল্দে খাঁ। নবাব গুয়াজেদ আলিৰ এক শ্যালক তিনি। তাঁৰ সঙ্গে নবাবেৱ সেই গায়িকা-বেগম রাজিয়াও নেপালে এসেছিলেন। তাঁৰা প্ৰথমে অনেক বছৱ নেপালেৱ পশ্চিমাংশে ভূতোলে ছিলেন। তাৱপৰ ছুল্দে খাঁ যোগ দেন প্রধানমন্ত্ৰী রাণা বীৱ সমশেৱেৱ সঙ্গীত-দৱবারে।

তাজ খাঁৰ যেমন নেপালে মৃত্যু হয়, তেমনি ছুল্দে খাঁৰও। তাঁদেৱ দুজনেৱই কৰৱ আছে স্বয়ন্তুতে। নেপাল রাজ্য এই বোধ-

হয় প্রথম গোরস্থান। তার আগে কোন মুসলমানের নেপালে  
আমৃত্যু কিংবা স্থায়ী বাস ছিল না।

ভারতের এই সব মুসলমান কলাবতদের জন্যে রাণীরা প্রথম  
মসজিদও তৈরী করে দেন নেপালে। তার আগে এ রাজ্ঞি কোন  
মসজিদ দেখা যায়নি।

তাজ খাঁ যখন নেপালে এগেন তখনো দরবারে ছিলেন অশীতি-  
পর কলাবত লছমনদাস। তানসেনের মাতৃল গদাধর মিশ্রের বংশধর  
তিনি এবং অতিথণী খেয়াল-গায়ক। লছমনদাস বার্ধক্যের জন্যে  
দরবারে আর অনুষ্ঠান করতেন না। কিন্তু সঙ্গীতে অক্ষম হননি  
একেবারে। তাজ খাঁর সঙ্গে তাঁর প্রীতির সন্ধক গড়ে উঠে।  
অনেক বয়োজ্যেষ্ঠ এবং সঙ্গীত-প্রবীণ লছমনদাসকে যথেষ্ট মাত্র  
করতেন তাজ খাঁ।

লছমনদাস ও তাজ খাঁ ভিন্ন ভারতের আরো নানা গুণী তাজ  
খাঁর সময় নেপালে ছিলেন। তাঁরাও তাজ খাঁর তুল্য দরবারী  
শিল্পী হয়েই থাকেন এ রাজ্ঞি। যেমন—বেরিলীর বিখ্যাত টপ-  
খেয়াল ও খেয়াল-গায়ক এনায়েৎ হোসেন খাঁ ( ইনি গোয়ালিয়ারের  
বিখ্যাত হন্দু খাঁর জামাতা এবং ভারতে টপ-খেয়াল গানের প্রচারক  
বলে প্রসিদ্ধ )। বারাণসীর রামসেবক মিশ্র ( বিখ্যাত প্রসন্নুর  
পুত্র শিব, পশুপতির পিতা )। জয়পুরের খেয়াল-গুণী ঘগ্গে  
নাজির খাঁ। নিয়ামৎউল্লা খাঁ শরদী ( করামৎউল্লা ও কৌকবের  
পিতা )। বারাণসীর তবলা-গুণী বলদেও সহায়। তানসেনের  
পুত্রবংশীয় স্বনামধন্য বড়কু মিশ্র, বারাণসীর বহুমুখী সঙ্গীতপ্রতিভা  
জগদীপ মিশ্র ( খেয়াল টপ্পা ঠংরি গায়ক ও নৃত্যশিল্পী )। দাক্ষি-  
ণাত্যের বীণাবাদক বীণকাৰ ভট্ট প্রভৃতি। আৱ তাঁদেৱ সকলেৱ  
মুকুটমণি অতিবৃদ্ধ লছমনদাস তখনো দরবারেৱ বৃত্তিভোগী হয়ে  
বিরাজমান। সেই রত্নসভায় আৱ একটি মণি হলেন তাজ খাঁ।

দরবারে গুণপনা দেখিয়ে যথেষ্ট প্রতিষ্ঠা পেলেন তাজ খাঁ।

এখানেও তিনি ঝুপদ ধামারের সঙ্গে খেয়াল গানেরও গুণী হয়ে দেখা দেন। রাণা বৌর সমশেরের একজন অতিপ্রিয় কলাবৎ হন তিনি।

এইভাবে তাজ খাঁ নেপালের স্থায়ী বাসিন্দা হয়ে থান। জীবনের শেষ পর্যন্ত তিনি ছিলেন নেপালবাসী। আর লহমনদাস দরবারী-জীবন থেকে অবসর নিলে তাজ খাঁই দরবারের মধ্যমণি হয়ে থাকেন।

দরবার থেকে শুধু মাহিয়ানা পেতেন না তিনি। কিছু ভূসম্পত্তিও গ্রাহ করেছিলেন। তা ছাড়া দরবারে গানের জন্যে আলাদা পুরস্কারও পেতেন মাঝে মাঝে। দরবার-পতির ভাল লাগার জন্যে এক-একদিনের মেজাজী বথশিশ। এমনিভাবে তাজ খাঁর নেপালে ভাল উপার্জন হত।

তিনি সপরিবারে বাস করতেন এ রাজ্যে। আর এখানে ঠাঁর আগেকার সেই ব্যয়বহুল স্বভাব প্রকাশ পায়নি। সঞ্চয় করেছিলেন তিনি, পরিবার প্রতিপালন করেও।

তাজ খাঁর হই পুত্র জাকির হোসেন ও আবেদ হোসেন। ঠাঁদের দুজনকেই নেপালে তিনি বৌতিমত সঙ্গীত-শিক্ষা দেন। বিশেষ করে জাকির হোসেন ভাল খেয়াল-গায়ক হয়েছিলেন।

কিন্তু দুজনের কেউই সঙ্গীত-জীবন অবলম্বন করেননি কখনো। পিতার সঞ্চিত অর্থ ও বিষয় ভোগ করে গেছেন। উপার্জনের প্রয়োজন না থাকায় সঙ্গীত-চর্চায় নিবিষ্ট হননি ঠাঁরা।

তাজ খাঁ নেপালে আরো কজনকে তালিম দিয়েছিলেন। ঠাঁরা হলেন—যুক্ত প্রদেশের দেওয়াসের দু ভাই আমীর খাঁ ও নাজির খাঁ (তাজ খাঁর সুপারিশে এঁরা দুজন নেপাল দরবারে চাকুরীও পান), বান্দাৱ সিতাব খাঁ, বদায়ুনের হায়দাৱ খাঁ (এঁর পৌত্র নিসার হোসেন বর্তমানে তরানা গানের বিখ্যাত কলাবৎ) প্রভৃতি।

আর কয়েকজন শিখ্যাও ঠাঁর হন নেপাল দরবারে। ঠাঁরা

নেপালী দরবারের: বিশেষ ধরনের নটী। তাঁদের পরিচয় ‘তালিমে’  
নামে।

তালিমেরা দরবারপতির সঙ্গীতপটিয়সৌ রক্ষিত। কিন্তু উত্তর-  
ভারতীয় বাইজীদের সঙ্গে তাঁদের প্রভেদ এই যে, তালিমেরা অন্তর্ভুক্ত  
আসরে মুজরো নিয়ে গান করেন না। দরবারে নিযুক্ত কলাবত্তদের  
কাছে তাঁরা রীতিমত শেখেন কণ্ঠসঙ্গীত বা যন্ত্রসঙ্গীত। তারপর  
দরবারেই সঙ্গীত পরিবেশন করেন।

এই কলাবত্তদেরও দরবারের বাইরে কোন সঙ্গীত-জীবন নেই  
নেপালে। সেজন্তে রীতিমত গুণশালিনী হলেও তালিমেদের পরিচয়  
প্রকাশ সঙ্গীত-জগতে অভ্যাত থেকে যায়। দরবারের অন্তর্বালে  
হারিয়ে যায় তালিমেদের সঙ্গীত-প্রতিভা।

যেমন, অসামান্য কলাবতী গায়িকা বড়ী হসন। জছমনদাসের  
শিক্ষায় ক্রুপদ ও প্রবন্ধসঙ্গীতে বড়ী হসন ছিলেন একটি প্রতিভা।

এমনি চার-পাঁচজন তালিমে তাজ খাঁর কাছে গান শিখেছিলেন।  
তাঁরা সকলেই রাণা বীর সমশ্বেরের দরবারভূক্ত। তাজ খাঁর সেই  
শিশ্যাদের মধ্যে সবচেয়ে কলাবতী খেয়াল-গায়িকা হন ছোটী হসন।  
বড়ী হসনের বয়োকনিষ্ঠা বলেই তাঁর ছোটী নামকরণ। আর অতি  
ক্রুপবতী বলে হসন পরী নামেও তাঁর পরিচিতি ছিল। হসন পরীর  
কথাও বাইরের সঙ্গীত-জগৎ জানে না, বড়ী হসনের মতন।

নেপাল দরবারে তাজ খাঁর জীবন স্মৃথি-স্বচ্ছন্দে পূর্ণ হয়েছিল।  
সঙ্গীত-জীবনের এই শেষ অধ্যায়ে তিনি লাভ করেন যশ, সম্মান,  
প্রতিপত্তি, আধিক নিরাপত্তা—সবই।

জছমনদাসের অবসর নেয়ার পর তাজ খাঁ-ই নেপাল দরবারের  
সর্বমান্য গুণী হয়েছিলেন। নেপালে তাঁর সেই সম্মান বজায় থাকে  
জীবনের শেষ পর্যন্ত।

উনিশ শতকের একেবারে শেষে বীর সমশ্বের নেপালে এক বিরাট  
সঙ্গীত-সম্মেলন করেছিলেন। তরাই অঞ্চলে বীরগঞ্জের কাছে বগড়ি

নামে একটি জাগৰায় তার অধিবেশন হয় এক মাস ব্যাপী। দরবারে নিযুক্ত গুণীরা ভিন্ন ভারতের আরো নানা শ্রেষ্ঠ কলাবত সেখানে আমন্ত্রিত হয়ে যোগ দেন। সঙ্গীত-অর্ঘ্যানন্দের সঙ্গে উপপত্তিক বিষয়েও নানা আলোচনা ও মতামত বিনিময় হয় বগড়ির সম্মেলনে। তার ভিত্তিতে রাগগুলির বর্ণায়করণও নতুন করে হয়েছিল। এই সমস্ত বিষয়েই তাজ খাঁর ছিল একটি প্রধান ভূমিকা।

নেপালে তাজ খাঁর আরো পারিবারিক কথা জানা যায়। যেমন তাঁর একমাত্র কন্যার বিবাহ প্রসঙ্গ। নেপালেই এই নিকা হয়েছিল।

তাজ খাঁর সময়ে ছিলেন শরদী নিয়ামতুল্লা খাঁ। ভারতের প্রথম শরদ-বাদকদের মধ্যে একজন তিনি বিশিষ্ট। নিয়ামৎ এবং তাঁর দুই যোগ্য পুত্র করামেউল্লা ও কৌকব খাঁ। শরদ-বাদনের একটি ধারা প্রবর্তনের জন্যে স্মরণীয় হয়ে আছেন।

নিয়ামতুল্লা খাঁ। মেটিয়াবুরুজ দরবারেও নিযুক্ত থাকেন, তবে তাজ খাঁর কিছু বছর আগে। সে সময় তানসেনের পুত্রবংশীয় রবাবী-ঝুপদী বাসৎ খাঁও মেটিয়াবুরুজ দরবারে ছিলেন। আর তাঁর কাছে মেটিয়াবুরুজেই তালিম পেয়েছিলেন নিয়ামতুল্লা খাঁ।

মেটিয়াবুরুজ দরবার থেকে নিয়ামতুল্লা নেপাল দরবারে যোগ দেন। জীবনের প্রায় শেষ পর্যন্ত ( অস্ততদশ বছর ) তিনি সপরিবারে নেপালে থাকেন। ১৮৯৯ সালে দিল্লীতে মৃত্যুর কিছুকাল আগেও। নেপাল দরবারের শিল্পী নিয়ামতুল্লা ও সসম্মানে সেখানে অবস্থান করতেন। তাঁর দুই কৃতী পুত্রও উপর্যুক্ত হন নেপালে। নিয়ামতুল্লা ও তাজ খাঁর মতন নেপাল দরবার থেকে ভাল উপর্যুক্ত ও বিষয়-সম্পত্তি করেছিলেন। তাঁর সঙ্গে প্রথম থেকেই ঘনিষ্ঠতা হয় তাজ খাঁর। পরে তা স্থায়ী আভীয়তায় পরিণত হয়েছিল।

নিয়ামতুল্লার নেপাল বাসের প্রায় শেষ দিকে তাঁর কনিষ্ঠ পুত্র কৌকব খাঁ। বিপদ্ধীক হলেন। কৌকব খাঁর বয়স তখন পঁচিশ-ছাবিশ

বছর। একটি বছরখানেকের কম্বা মাত্র বর্তমান। কৌকব তখনই উদীয়মান শরদী। আর শুধু প্রতিভাবান যন্ত্রী নন, শিক্ষিত স্বাস্থ্যবান সুপুরুষ।

তাকে উপযুক্ত পাত্র হিসেবে তাজ খাঁ আপন কম্বাৰ সঙ্গে বিবাহের প্রস্তাব কৱলেন নিয়ামতুল্লাৰ কাছে। এ-ব্যাপারে নিয়ামতুল্লা বিবেচনা কৱেছিলেন তাজ খাঁৰ বংশ-পরিচয়। অর্থাৎ শুধু তাজ খাঁৰ তুল্য শুণীৰ সন্তোন নয়। তানসেন বংশীয় বলে, সে কম্বাৰ সঙ্গে পুত্ৰেৰ বিবাহ দেন নিয়ামতুল্লা। তাজ খাঁ যে সঙ্গীত-জগতেৰ মহাপুরুষ তানসেনেৰ এক বংশধৰ সে-কথা নিয়ামতুল্লা বিলক্ষণ জানতেন। তই বৈবাহিকই তখন নেপাল দৱবারেৰ নিযুক্ত শিল্পী আৰ পৱন্পৱেৰ সুপৱিচিত।

নিয়ামতুল্লাৰ মৃত্যুৰ কিছু পৱে কৱামৎ ও কৌকব খাঁ সন্তোক ভাৱতে চলে আসেন। তাৱপৱ কৌকব খাঁৰ ১৯১৫ সালে মৃত্যু হয় কলকাতায়। বৈধব্যেৰ অনেক বছৰ পৱেও তাজ খাঁৰ কম্বা বাস কৱেন মেটিয়াবুৰুজে। তাদেৱ তিন পুত্ৰ অর্থাৎ তাজ খাঁৰ দৌহিত্ৰ— ওয়ালিউল্লা, সোনাউল্লা ও বাবু। তিনজনেৰ মধ্যে সোনাউল্লা ভিন্ন অপৱ তজনই সেতাৱবাদক হয়েছিলেন। বিশেষ ওয়ালিউল্লা হন কৃতী সেতাৱী।

ওদিকে নেপালে তাজ খাঁৰ মৃত্যু হয় বিশ শতকেৰ প্ৰথম দিকে।

তাৱপৱ তাই পুত্ৰ জাকিৱ হোসেন ও আবেদ হোসেন উভৰ ভাৱতেৰ রামপুৱ রাজ্যে বাস কৱতে থাকেন। পিতাৱ কাছে তালিম পেলেও গায়কেৱ বৃত্তি গ্ৰহণ কৱেননি তারা।

তাদেৱ মধ্যে জ্যোষ্ঠ জাকিৱ হোসেন ১৯৬০ সালেৱ পৱে গতায় হন অতি বৃদ্ধ বয়সে। তাই পুত্ৰ অর্থাৎ তাজ খাঁৰ একমাত্ৰ পৌত্ৰ একবাজ এখনো রামপুৱে বৰ্তমান আছেন। কিন্তু তিনিও সঙ্গীত-জীবনে নেই।

তাজ খাঁৰ কনিষ্ঠ পুত্ৰ আবেদ হোসেনেৰ মৃত্যু হয় নিঃসন্তান

অবস্থায় । এইভাবে তাজ খাঁর পুত্রের ধারায় সঙ্গীতচর্চা লুপ্ত হয়ে যায় ।...

কিন্তু তাজ খাঁর নাম প্রসিদ্ধি যথেষ্ট থাকে নেপালের সঙ্গীত-সমাজে । দরবারের আসরে আসরে তাঁর নানা দিনের গানের প্রসঙ্গে শোনা যায় । তাজ খাঁর দরবারী সঙ্গীতচর্চার অন্তরঙ্গ সব কাহিনী । আলোচনার বিষয় হয় দরবারে তাঁর মধুর সাঙ্গীতিক ব্যক্তিত্বের কথা ।

যেমন, একদিন গান হচ্ছে দরবারে । জয়পুরের প্রসিদ্ধ খেয়ালীয়া ঘগ্গে নাজির খাঁ গাইছেন । দরবারের প্রধান কলাবত তাজ খাঁ। প্রমুখ আরো গায়ক-বাদক আছেন ঝোতাদের মধ্যে ।

নাজির খাঁ গানখানি ভাল গাইলেন বটে, তবে তান বিস্তার যথেষ্ট করলেন না । বিস্তারের কাজ দেখাবার উপযুক্ত হয়েও শোনালেন ছোট খেয়াল ।

গান শেষ হতেই তাজ খাঁ গায়কের দিকে চেয়ে মন্তব্য করলেন, ‘ইয়ে ত চাটনি হ্যায় ।’ ।

নাজির খাঁ ঠিক বুঝতে পারলেন না তাজ খাঁর একথা বলার উদ্দেশ্য । জিজ্ঞেস করলেন, ‘মতলব ?’

তাজ খাঁ ব্যাখ্যা করে দিলেন, ‘থোড়া থোড়া মিঠা চীজ । লেকিন পেট ভরা নেহি ।’

তখন নাজির খাঁ ফিরতি গান ধরলেন বড় করে । এবার বেশ খানিকক্ষণ ধরে তান বিস্তার ঘোগে গানটি গাইলেন ।

তাজ খাঁর এবার ভাবান্তর । গান শেষ হতে দরাজ গলায় সাবাস জানালেন—‘বহোঁ আচ্ছা ।’

নাজির খাঁ কৃতিম অহঙ্কার দেখিয়ে বললেন, ‘তব ?’ ( অর্থাৎ আমি কি গাইতে পারি না ? অমন মন্তব্য করেছিলে কেন ? )

‘হম চাটনি নেহি বোলনেসে অ্যায়সা গানা হোতা ?’

তখন তুজনেই হাসতে লাগলেন । আর সে হাসিতে ঘোগ দিলেন দরবারের অনেকেই ।

ରାଣୀ ବୀର ସମଶ୍ଵରେର ତୈରୀ ଲାଲ ଦରବାରେର ଆସର ଏଟି । ସେଇ  
ଲାଲ ଦରବାରେ ଜଳମାଘରେ ତାଜ ଖାର ଅନେକ ଦିନେର ଶ୍ରଦ୍ଧି-ଶୁଦ୍ଧି  
ଜୀବନ୍ତ ଛିଲ ।

କିନ୍ତୁ ଭାରତେର ସମ୍ରାନ ତାଜ ଖା ବିଶ୍ୱତ ଥାକେନ ସ୍ଵଦେଶେଇ । ତିନିଓ  
ଯେ ତାନ୍ମେନେର ଏକଜନ ଯୋଗ୍ୟ ବଂଶଧର ମେ ପରିଚୟ ଲୁପ୍ତ ହୁଏ ଯାଏ ।

## সুরের সঙ্গতীয়া সারঙ্গী গৌরীশঙ্কর মিশ্র

সুর কি সুন্দর সঞ্চরণ করে চলেছে। কি স্বচ্ছন্দ সাবলৌল  
বিস্তার এই সারঙ্গ যত্নে। মূল তারের বাজনার সঙ্গে অমর গুঁজুরণ  
করছে তরফের সারি সারি তার। ছড়ের টানে আর আঙুলের ঘর্ষণে  
টানা টানা সুরবৃষ্টিকার তুলছে। সেই সঙ্গে ছত্রিশটি তরফের তারে  
প্রতিধ্বনির পালা। সারঙ্গীর সুরতরঙ্গে ভরে উঠেছে আসর।

গানের সঙ্গে সারঙ্গের শিখন একাত্ম হয়ে মিশে আছে। কণ্ঠ-  
শিল্পীর সঙ্গীতে অঙ্গাঙ্গী মিলে গেছে সারঙ্গীর সুরবিহার। তাল-  
লয়ের ছন্দকর্মে সঙ্গতকাৰ যেমন তবলিয়া, সুরের ধারারক্ষী সহযোগী  
তেমনি সারঙ্গ-বাদক। গানের ওধু অহুসারী নন তিনি, সব যতি  
আর ছেদকে ভরে দিয়ে সুররণনে পরিপূর্ণ করে দিচ্ছেন।

কিন্তু অপরের সামনে থেকেও সারঙ্গী যেন নেপথ্যচারী। অথচ  
বাইজীর পাশে বসেই সুরে সঙ্গত করছেন তিনি। কখনো গৌত-  
শিল্পীর ছু-দিকেই ছুজন সারঙ্গ-বাদক বাজিয়ে চলেন। বাইজীর  
গানের আসর তো সারঙ্গী বিনা অঙ্গহীন। বাইজীর খেয়াল টপ্পা  
তুংরির সঙ্গে সারঙ্গের সুর অপরিহার্য। তেমনি খেয়াল-গায়কের  
আসরেও।

তবু, এমন সুরের ভাণ্ডারী সারঙ্গ-বাদকেরও যেন স্বতন্ত্র সন্তা  
নেই। তাঁর জন্মে যোগ্য মর্যাদা আর ধারণাও দেখা যায় না  
শ্রোতাদের মনে। গানের আসরে সারঙ্গী যেন উপেক্ষিত, গুণীর  
উপযুক্ত সম্মান স্বীকৃতি থেকে বর্ধিত।

অথচ বিনা সারঙ্গে বাইজীর গান অপূর্ণ। গানের সঙ্গে সারঙ্গ  
যথের সুরধারা নিরবচ্ছিন্ন প্রবহমান। বিরাম নেই সারঙ্গের সুর-

সহরীতে। কঠের সাময়িক বিরতি থাকে। গায়িকা বা গায়ক বিশ্রাম নেন ইচ্ছা মতন। তানকারীর পর সমে এসেই তিনি নৌরব হতে পারেন। পরে আবার গানের মুখ কিংবা নতুন বিস্তার খরেন সুবিধা অনুযায়ী।

কিন্তু সারঙ্গ-বাদক মূল শিল্পীর ধারা অব্যাহত রেখে দেন। গানের প্রথম কলির মুখটি তাঁর যন্ত্রে অনুরণিত রাখেন কঠেরই লবহ অনুকরণে। তিনি শুধু ধারাবাহক নন: কখনো আভাস দিয়ে চলেন নব নব সৌন্দর্যসৃষ্টির। কারণ সারঙ্গী নিজেই দস্তরমত কলাকার। রাগ-সঙ্গীতের সিদ্ধ শিল্পী। তাঁদের অনেকে গান গাইতেও পটু, যদিও আসরে তার পরিচয় দেন না। বাইজী কিংবা খেয়ালীয়া যে গান শোনাচ্ছেন সেটি তাঁরও হয়তো সুজ্ঞাত। অভিজ্ঞতায়, পেশার প্রয়োজনে, অন্তরের প্রেরণাতেও সারঙ্গ-বাদকের গানের সংক্ষয় বিপুল। নচেৎ আসরের সফল শিল্পী হওয়া তাঁর পক্ষে অসম্ভব। যন্ত্রে স্বয়ং রাগ রূপায়ণেও সুদক্ষ তিনি। কঠশিল্পীর যাবতীয় কারুকর্ম নিপুণভাবে প্রদর্শন করছেন। গানের অবকাশে কখনো যন্ত্রে দেখাচ্ছেন নতুন কোন তানকারী। আবার মূল শিল্পীর যে-কোন তান বা বিস্তারে রীতিমত সঙ্গত করেন। বাজিয়ে দেন তৎক্ষণাত। এমন কি গায়িকা বা গায়কের আবেগ পর্যন্ত ফুটিয়ে তোলেন ছড়ের টানে, আঙুলের কায়দায়।

আর এই যন্ত্রে সুরের কি রেশ! পুনর্ধৰ্নির কি ঐশ্বর্য! মূল তারে তারে স্বর-পরিধি যেমন বিস্তৃত, তেমনি ছত্রিশ তরফে অনুরূপ সমারোহ। তিনটি তাঁতে সঞ্চরমান কুশলী অঙ্গুলী আর ছড়ের স্পর্শ। তারই অনুধৰনিতে ছত্রিশটি তারের ঝঙ্কার। সুরের যন্ত্র হিসেবে অতিশয় উপযোগী, অত্যন্ত সারঙ্গ। প্রাচীন ভারতীয় যন্ত্রের এক বিকশিত, অভিনব রূপ। বীণা বৈচিত্র্যের অন্তর্ম প্রকারভেদ।

সেই সুরযন্ত্রের কাণ্ডারী সারঙ্গী। কিন্তু প্রতিভার যথোচিত

মান্তব্য অনেক সময় তিনি পাননি। সেকালের এমনি কত শুণী  
হারিয়ে গেছেন অপরিচিতির অন্তর্বালে। অনেকের নাম পর্যন্ত  
বিস্মিত হয়েছে পরবর্তী শুগ।

অতি কৃতী সারঙ্গী শুধু সহযোগীও নন; গানকে প্রাণবন্ত,  
অবিশ্রান্ত রাখবার যন্ত্রী নন কেবল; অনেক সময় আরো বড়  
ভূমিকায় ঠাকে দেখা যায়। তখন তিনি আসরের নায়ক, মূল  
শিল্পী। স্বতন্ত্র কলাকার। তবলচী থাকেন ঠার তাল জয়ের সঙ্গতে।  
তবে তেমন দৃষ্টান্ত বেশি নয়। বেশির ভাগ সারঙ্গ-বাদকই সুরের  
সঙ্গতকার। সেই রূপেই ঠাদের পরিচয়।

হয়তো তার নেপথ্য থেকে গেছে সারঙ্গীর আরেক মহৎ পরিচিতি।  
যে বাইজীর সহযোগী যন্ত্রী হয়ে আসরে বসেছেন, হয়তো ঠারই  
ওস্তাদ তিনি। ঠার শিক্ষাতেই বাইজী প্রতিষ্ঠা পেয়েছেন। তিনিই  
প্রস্তুত করে দিয়েছেন গায়িকাকে। গানের সঞ্চয় দান করেছেন।  
আসরে বাইজীর মুক্ত শ্রোতারা উচ্ছ্বাস জানিয়েছেন সেই গানে।  
গায়িকার শিক্ষক সঙ্গতীয়া সামনেই রয়েছেন—প্রশংসামুখের শ্রোতা-  
দের কাছে পরিচয়হীন।

অনেক সময় সারঙ্গীর নাম পর্যন্ত আসরে অজ্ঞান। থেকে যায়।  
শ্রোতাদের আগ্রহ নেই যন্ত্রীর দিকে। ঠার শিক্ষকতার জীবন তো  
আরো অন্তর্বালবর্তী। তা শুধু চোখের আড়ালে নয়, জ্ঞানেরও  
বাইরে। সঙ্গীত-জগতের শ্রান্তি স্মৃতিতেও তিনি লুপ্তকীর্তি।

তেমনি ওস্তাদ গৌরীশঙ্কর মিশ্র কিংবা কালী ওস্তাদের নামও  
সুপরিচিত নয়। সঙ্গীত-জগতেও জীবন্ত নেই ঠাদের শ্মরণ।

অথচ নিখিল ভারতের নিরিখেও ঠারা প্রথম সারির কলাকার  
সারঙ্গ-বাদক। সেকালের শ্রেষ্ঠ গায়িকাদের মধ্যে দুজন—শ্বেতাঞ্জিনী  
ও কৃষ্ণভামিনী ঠাদেরই ছাত্রী। দুই ওস্তাদের শিক্ষাতেই গায়িকা-  
ব্যয়ের সঙ্গীত-জীবন গড়ে উঠেছে। শুধু তাদিম দেয়াও নয়।  
শ্বেতাঞ্জিনী ও কৃষ্ণভামিনীর গানের আসরে দুদিকে সারঙ্গী হয়ে-

বসেছেন গৌরীশঙ্কর ও কালীপ্রসাদ। আসরে আসরে শ্রোতারা  
সেই রূপে উস্তাদ দুজনকে দেখেছেন। কিন্তু কজন জেনেছেন তাঁদের  
শিক্ষক-পরিচয়?

সেকালের এক আচার্য-স্থানীয় গুণী গৌরীশঙ্কর মিশ্র। আদর্শ  
শিক্ষক। অতি-সফল, পরম নির্ভর সহযোগী বাদক। একক আসরে  
সার্থক, স্বতন্ত্র যন্ত্রশিল্পীও।

সঙ্গতকার হিসেবে তিনি গায়ন-শিল্পীকে উত্কৃষ্ণ করতেন।  
আবার ঘূল কলাকারুণ্যে গুণপনা দেখিয়েছেন প্রথম শ্রেণীর  
আসরে। কলকাতায়, কাশীতে, দিল্লীতে।

রাগবিদ্যায়, বাদননৈপুণ্যে, শিক্ষকতায় গৌরীশঙ্করের প্রতিভা  
সমানভাবে সুপ্রকাশ। খেয়াল টপ্পা ঠুংরি টপ্-খেয়াল দাদরা থেকে  
কাজুরী চৈতী লাটুনী পর্যন্ত গানের তিনি শিক্ষাদাতা। তাঁর শিক্ষার  
গঠিত গায়িকারা পেশাদার জীবনে প্রতিষ্ঠা পেয়েছেন।

নিজে সুকৃষ্ট গায়কও গৌরীশঙ্কর। আসরে গান গাইতেন না  
বটে, কিন্তু যাদের শেখাতেন, নিজে গেয়েই সব কাজ দেখিয়ে  
দিতেন। আর নানা রীতির গানের সংক্ষয়ও ছিল তাঁর প্রচুর।  
সেকালের পেশাদার গায়িকাদের বিভিন্ন প্রকার গানেই পারদশিনী  
হবার রেওয়াজ ছিল। একটি কি ছুটি রীতিতে গায়নশক্তি নিয়ে  
মুজরো করতে পারতেন না তাঁরা। গৌরীশঙ্করের মতন নানামুখী  
অভিজ্ঞ উস্তাদেরই সেজন্ত সমাদর ছিল।

একক বাদক হিসেবেও সম্মানিত ছিলেন তিনি। শুধু কলকাতার  
নয়, পশ্চিমাঞ্চলেও। উস্তাদজীর সুদীর্ঘ সঙ্গীত-জীবনে কলকাতার  
নানা আসরেই তাঁর একক বাদন শোনা যায়। তাঁর শেষ বচ্ছ  
আসরও হয় কলকাতায়। তাঁর জীবনের প্রায় অস্তিম পর্বে। তা হল  
১৯৩৭ সালের ২৫শে জুলাইয়ের কথা। সেদিন ছিল ক্যালকাটা  
মিউজিক অ্যাসোসিয়েশনের বার্ষিক উৎসব। জালাবাবু নামে  
সুপরিচিত দামোদরদাস খানা ছই অ্যাসোসিয়েশনের একজন

প্রতিষ্ঠাতা-সংগঠক। তাঁর (১৭ বারাণসী ষষ্ঠি ফ্লিটের) বাড়িতেই  
সে আসর বসে। সেদিন শিল্পীদের মধ্যে ছিলেন দানবীবাবু নামে  
বিখ্যাত সতীশচন্দ্র দত্ত (তিনি একাধারে ক্রপদী এবং পার্শ্বয়াজী),  
ক্রপদী গোপেশ্বর বন্দ্যোপাধ্যায় প্রমুখ। তাছাড়া খেয়াল গান  
শোনান হরেন্দ্রকৃষ্ণ শীল (সুরবাহার-গুণী হিসেবেই তিনি বেশি  
প্রসিদ্ধ)। রামকিষণ মিশ্রও খেয়াল গেয়েছিলেন। খুসি মহম্মদ  
বাজিয়েছিলেন হারমোনিয়ম আর তরুণ বৌরেন্দ্রকিশোর রায়চৌধুরী  
—বীণা। আর একক সারঙ্গ শুনিয়েছিলেন পৌরীশঙ্কর মিশ্র। তাঁর  
বয়স তখন বাহাস্তর-তিয়াত্তর বছর। কিন্তু বাজনার হাত প্রায় পূর্ণ  
মাত্রায় ছিল। সকলে সেদিন মুক্ত হন তাঁর বাদনশক্তিতে।

তাঁর পাঁচ বছর আগে (১৯৩২) গৌরীশঙ্করের আরেকটি বড়  
আসর হয় কাশীতে। কবীর চৌরা মহল্লায় বিশেষ করে তাঁরই জন্মে  
সেই জলসা।

তখন তিনি কলকাতারই স্থায়ী বাসিন্দা হয়ে আছেন। আর  
বাতায়াত হয় না কাশীতে। তাই তাঁর বাজনা একবার ভাল করে  
শুনতে চান বারাণসীর গায়ক বাদক গুণীজনের। গৌরীশঙ্করের সে  
আসরে কজন বিখ্যাত কলাবৎ এসেছিলেন। যেমন, খেয়াল টপ্পার  
ওস্তাদ বড়ে রামদাসজী, বীণা-গুণী মিঠাইলাল, তবলিয়া মৌলবীরাম  
মিশ্র, প্রবীণ গায়ক ও সারঙ্গী ঠাকুরপ্রসাদ (গৌরীশঙ্করের কাকা),  
তবলিয়া ভিকু মহারাজ (শাস্ত্রপ্রসাদের ওস্তাদ), তবলিয়া কঠো  
মহারাজ। গৌরীশঙ্করের বাজনায় তাঁরা সবাই পরিতৃপ্ত হয়েছিলেন।

তাঁর আরো একটি বড় আসর হয় দিল্লীতে। তা তাঁর আরো  
কম বয়সের কথা। আর সে আসরটিও অন্ত রকমের। এক তৃতীয়  
সারঙ্গীর সঙ্গে তাঁর সেদিন প্রতিদ্বন্দ্বিতা হয়েছিল। সে আসরের কথা  
বলবার আগে, গৌরীশঙ্করের সঙ্গীত-জীবনের বিবরণ দেবার আছে।

তিনি পঞ্চাশ বছরেরও বেশি যুক্ত থাকেন কলকাতায় সঙ্গীত-  
সমাজে। খেতাজিনী ও কৃষ্ণভামিনীর মতন আরো হজন শ্রেষ্ঠ।

বাঙালী বাইজীরও সারঙ্গী গৌরীশঙ্কর। তাঁরা হলেন কিরণময়ী ও শুরমা। অনেক আসরে জুটিতে গাইতেন ছই ভগিনী। আর তাঁদের সঙ্গে সারঙ্গ বাজাতেন তিনি আর তাঁর ভাই কালী ওস্তাদ। অনেক আসরে গৌরীশঙ্কর একাও সঙ্গত করতেন।

নানা খ্যাতনামা গায়ক-গায়িকার সারঙ্গী রূপেই তাঁকে দেখা গেছে আসরে। কাশীর ঠুংরি গায়িকা বড়ী মোতিবাই তখন প্রায়ই কলকাতায় মুজরো করতে আসতেন। আর গৌরীশঙ্কর তাঁর সঙ্গে বাজাতেন আসরে আসরে। মেটিয়াবুরুজের মিহি কঢ়ের গায়ক পিয়ারা সাহেবের অনেক গানের আসরেও তিনি সারঙ্গী থাকতেন। কৃষ্ণচন্দ্র দে এবং ইন্দুবালার সঙ্গেও তাঁর বাজনা হত আসরে। পিয়ারা সাহেব, কৃষ্ণচন্দ্র আর ইন্দুবালার কোন কোন গ্রামফোন রেকর্ডেও মিশ্রজী বাজিয়েছেন।

তবে সারঙ্গ-বাদক হিসেবে গৌরীশঙ্করের সবচেয়ে খ্যাতি ছিল গহর জানের সঙ্গতীয়া বলে। বাংলা আর ভারতের নানা অঞ্চলে তিনি গহর জানের সহযোগী থেকেছেন।

বাইজীদের শীর্ষস্থানীয়া তখন গহর জান। সবচেয়ে বেশি হারের মুজরো তাঁর। আর উত্তর ও দক্ষিণ ভারতের আসরে দরবারে তাঁর মতন ডাক আর কেউ পান কিনা সন্দেহ। পশ্চিমে বোম্বাই আর দক্ষিণে মহীশূর হায়দরাবাদ পর্যন্ত মুজরো করেন গহর জান। সে সময় গহরের ছদিকে ছই সারঙ্গীকে দেখা যেত। গৌরীশঙ্কর আর পাটনার এমদাদ থঁ। তাঁদের মধ্যে বাইজীর ডানদিকে বসতেন গৌরীশঙ্কর আর বাঁয়ে এমদাদ থঁ। সেকালের রেওয়াজ অনুষ্যায়ী দক্ষিণের সারঙ্গ-বাদকের মর্যাদা ছিল বেশি। ছজনের মধ্যে তিনিই অধিকতর গুণী বলে গণ্য হতেন। তখন গহর জানের প্রধান সারঙ্গী হয়ে যেতেন গৌরীশঙ্কর। পাটনা কাশী এলাহাবাদ লক্ষ্মী রামপুর দিল্লী পাতিয়ালা কাশীর বোম্বাই ব্যাঙ্গালোর হায়দরাবাদ প্রভৃতি সর্বত্র।

সন্তান পঞ্চম জর্জের দরবার হল দিল্লীতে, ১৯১১ সালে।  
সেখানেও গহর জানের সঙ্গে গৌরীশক্তির সারঙ্গ বাজালেন।

এমনি ছিলেন ওস্তাদজী। সর্বভারতীয় ক্ষেত্রেই প্রথম সারিয়ে  
কলাকার। আর গহর জানের ডানদিকের সারঙ্গ—এই পরিচয়ও  
যথেষ্ট ছিল সেকালে।

গহর জানের সঙ্গে তাঁর যোগাযোগের দৃষ্টি কারণ। গৌরীশক্তিরের  
পিতা বেচু ওস্তাদের ছাত্রী গহর জান। আর দ্বিতীয়ত, গৌরীশক্তিরের  
নিজস্ব গুণ। তাঁর নির্ভরযোগ্যতা। আসরে এমন শুর-সঙ্গতকার  
কজনই বা ছিলেন তখন। গহর জানের অতি আস্থা ছিল তাঁর  
ওপর।

যৌবনকালেই গৌরীশক্তির কৃতী বাদক। ছেলেবেলা থেকে গান-  
বাজনা শিখেছেন। বড় হয়েছেন নিজেদের পেশাদার পরিবারে।  
আর প্রথম জীবনেই তৈরি হয়ে বৃহত্তর সঙ্গীতক্ষেত্রে যোগ দিয়েছেন।  
প্রথমে নিযুক্ত হয়েছেন নেপাল দরবারে। তখন গহর জানের সঙ্গে  
যোগাযোগ ছিল না।

নেপালে কিছুদিন থেকে চলে এসেছেন কলকাতায়। গহর  
জানের সঙ্গে তাঁর বাদক-জীবনের সূত্রপাত এখানেই।

তারপর গৌরীশক্তির কলকাতায় স্থায়ী বাসিন্দা হয়ে গেলেন।  
সঙ্গীতগুণে আর শুন্দর স্বভাবে সম্মানের আসন করে নিলেন নিজের  
জন্মে। গুণী মহলে সকলের স্নেহধন্য হয়ে উঠলেন। সেকালের  
শ্রেষ্ঠ শিল্পীদের মিশ্রজী কেমন প্রিয় ছিলেন তাঁর একটি প্রমাণ তাঁর  
জন্মাষ্টমীর আসর।

প্রতি জন্মাষ্টমীতে গৌরীশক্তির এক ঘরোয়া আসর করতেন।  
সেদিন সন্ধ্যা থেকে সারারাত গান-বাজনা হত তাঁর বাড়িতে। জোড়া-  
সঁকোর সেই বলরাম দে স্ট্রীটের ভাড়া বাড়িতে। সে জলসায়  
তাঁর সাদর আহ্বানে কত শ্রেষ্ঠ কলাকাররাই যোগ দিতেন। এমন কি  
মুসলমান গায়ক-গায়িকারা পর্যন্ত। পুরুষদের মধ্যে যেমন শরদী

করামৎউল্লা, মৌজুদিন প্রমুখ। লছমী ওস্তাদ তো আসতেনই। তেমনি গায়িকাদের মধ্যে কলকাতা আর কাশীর শ্রেষ্ঠ। বাইজীদেরও সে আসরে দেখা যেত। সেখানে গান শুনিয়েছেন গহর জান, আগাম্যালী মালক। জান, চলবুলাগ্যালী মালক। জান, নূরজাহান বাই, যাদুমণি, কিরণময়ী ও শুরমা, শ্বেতাঞ্জিনী, কৃষ্ণভামিনী। কলকাতানিবাসিনী লক্ষ্মীর প্রসিদ্ধ নর্তকী বাচুয়ার নাচও সে আসরে হয়েছে। কাশীর বাইজীদের মধ্যে গান শুনিয়েছেন ছসনা বাই, বড়ী ময়না, মচুয়া বাই।...

কলকাতা আর কাশীর সঙ্গীত-জগৎকে গৌরীশঙ্কর নিজের জীবনে জুড়ে রেখেছিলেন। তার জন্মাষ্টমীর আসর ছিল তার একটি ঘোগস্তুতি।

কলকাতার সঙ্গীতসমাজে একজন অস্তরঙ্গ হয়ে তিনি বাস করতেন। গহর জান, শ্বেতাঞ্জিনী, কৃষ্ণভামিনী, কিরণময়ী, শুরমা ও আরো নানা বাইজীর সারঙ্গী দেখা যেত তাকে। কখনো একক বাজনার আসরে। আবার নাট্যমঞ্চে মাঝে মাঝে যে জলসা হত, সেখানেও ঘোগ দিতেন গৌরীশঙ্কর। কোন কোন মঞ্চে নাটকের মধ্যেও নেপথ্য বাদকের ভূমিকা নিতেন। শুরন্তি করতেন নাটকীয় পরিবেশে, বিশেষ নাট্যমুহূর্তে।

তার শিল্পী-জীবন ও মানসের এমনি নানা দিক ছিল। কিন্তু সেসবের জন্মে তার মূল রাগসঙ্গীত-চর্চা ব্যাহত হয়নি কখনো।

মধ্যবয়স থেকেই আচার্যের সম্মান পান গৌরীশঙ্কর। শ্বেতাঞ্জিনী, কৃষ্ণভামিনীর মতন শ্রেষ্ঠ গায়িকারাই শুধু তার ছাত্রী নন। আরো গৌরবের কথা আছে তার শিক্ষক-জীবনে। স্বনামধন্য কৃষ্ণচন্দ্র দে-ও তার কাছে শিখেছিলেন। কৃষ্ণচন্দ্রের সঙ্গে গৌরীশঙ্করের সাঙ্গীতিক ঘোগাযোগ ছিল দীর্ঘকালের। তার অনেক গানের আসরে গৌরীশঙ্কর সারঙ্গ বাজিয়েছেন। তেমনি গ্রামোফোন রেকর্ডেও।

গায়িকা ইন্দুবালারও প্রথম ওস্তাদ গৌরীশঙ্কর। কলকাতায়

বাংলা গানের জন্যে ইন্দুবালা বেশি পরিচিত। কিন্তু বৃহত্তর সঙ্গীত-ক্ষেত্রে তিনি খেয়াল ঠুঁঠি দাদুরা গানেও প্রতিষ্ঠা পেয়েছিলেন। উত্তর ভারতের নানা কেন্দ্রে, দাঙ্কিণ্যাত্ত্বের মহীশূর দরবারেও ইন্দুবালার নামডাক ছিল রাগসঙ্গীতের গায়িকা হিসেবে। সেই সঙ্গীতের পাঠ তাঁর গৌরীশঙ্করের কাছেই আরম্ভ হয়। মিশ্রজীর শিক্ষাত্তেই সম্ভব হয় তাঁর স্বরসাধনা আর কণ্ঠপ্রস্তুতি। সে প্রসঙ্গ ইন্দুবালা তাঁর শৃঙ্খলাকথায় বর্ণনা করেছেন :

‘...একদিন কাকার বন্ধুবন্ধবদের গান শোনাতে হল। যেটুকু সামান্য পুঁজি ছিল, তা থেকেই তু’ একটা গান শোনালাম। ভাল জাগল সকলের।

সকলের পরামর্শে কাকা আমার গান শেখার ব্যবস্থা করলেন। আমাদের বাড়িতে লছমী মিশ্র আসতেন। তাই উত্তোলে তাঁর ভাই শ্রীযুক্ত গৌরীশঙ্কর মিশ্রের কাছে আমার প্রথম পাঠ শুরু হল। কিন্তু সহজে নয়।

গৌরীশঙ্করজী শুধু যে গুস্তাদ ছিলেন তাই নয়, মেজাজেও ছিলেন বড় কড়া। অসামান্য গহর জানের সঙ্গে সারেঙ্গী বাজাতেন। সারা ভারতবর্ষ চষে বেড়াতেন। অত বড় শুণী যিনি, তিনি কি আমার মত সামান্য বালিকাকে এক কথায় গান শেখাতে রাজি হন ?

আমার মার আমন্ত্রণে এলেন বটে, আমার গানও শুনলেন, শেখাতেও রাজি হলেন ; কিন্তু আশচর্য এক শর্তে।

মাকে বললেন ‘আমি তোমার মেয়েকে শেখাতে পারি, কিন্তু তোমায় আমার পৈতে ছুঁয়ে শপথ করতে হবে যে, আমি না বলা পর্যন্ত তোমার মেয়েকে সা রে গা মা সাধতে হবে। কিন্তু অন্য কিছু রেওয়াজ করার চেষ্টা যেন না করে।’

মা শপথ করলেন।

গুরুজীর মাইনে ধার্য হল মাসিক পঁচিশ টাকা। তারপর দিন দেখে নাড়া বাঁধা হ'ল। মিশ্রজী আমায় সা রে গা মা'র কয়েকটি

রুকমফের শিখিয়ে সেই যে চলে গেলেন আর পাত্রাই নেই। আমি তো সাৱে গা' মা' সাধতে সাধতে প্ৰায় জল কৰে ফেললাম। কিন্তু গুৰু কোথায়! কেবল মাৰো মাৰো গুৰুজীৰ ভাই শ্ৰীযুক্ত কালীচৰণ মিশ্র মাইনে নিতে আসতেন। তখন আমাৰ বিছৰে পৰীক্ষা দিতে হত। একঘেয়ে একই জিনিস গাইতে গাইতে আমাৰ প্ৰায় কান্না পেয়ে যেত।

ঠাকুৱকে কেঁদে কেঁদে বলতাম, ‘কৰে আমি প্ৰাণ খুলে গান গাইতে পাৱবো।’

আমাৰ পাশেৰ বাড়িতেই গান শিখত আমাদেৱই পাঢ়াৰ রাজলক্ষ্মী। পৱে সিনেমা থিয়েটাৰ কৰে বড় রাজলক্ষ্মী নামে তাৰ পৱিচয় হয়। সে যখন গান শিখত আমি পাশ থেকে অনায়াসে সেটা গলায় তুলে নিতাম ।১০০তবে গলা খুলে গাইবাৰ যো ছিল না। কাৰণ বাধা ছিল গুৰুৰ কাছে মা'ৰ প্ৰতিজ্ঞা।

এমনিভাৱে কান্নায়, ছংখে, হতাশায়, অভিমানে বছদিন কেটে গেল। তাৰপৰ হঠাৎ একদিন গুৰুজী এসে হাজিৱ।

গুৰুজী এসেছিলেন নিজেৰ বাড়িতে জন্মাষ্টমীৰ দিন উৎসবেৰ আয়োজন কৰতে। জন্মাষ্টমীৰ দিন বিৱাটি গানেৰ আসৱ বসত সেখানে। নানান জ্ঞানী গুণীৰ ভিড় হতো সেখানে। সেখানেই গহৰ জ্ঞানকে প্ৰথম চোখে দেখি। সে কথা পৱে বলছি।

প্ৰায় এক বছৱ পৱে গুৰুৰ সঙ্গে দেখা হওয়াৰ কথাটা আগে সেৱে নিই। গুৰুজী এসেই সা-ৰে-গা-মা'ৰ পাঠ নিলেন।

যা শিখিয়ে গিয়েছিলেন সব শোনালাম। শুনে ভাৱী থুশী।

ভাই কালীজীকে ডেকে বললেন, ‘ইন্দুকে এবাৰ রাগ দাও।’

‘বাঙুৱী মোৱী মোৱা জি না ছুঁয়ো।’ ইমনেৰ এই গান দিয়ে গুৰু হল আমাৰ প্ৰথম গানেৰ তালিম। এৱ সঙ্গে একটা ঠুমৱী ও গজলও দিলেন। গলায় তখন সুৱ এমন বসে গেছে যে গান তিনখানা তড়িঘড়ি শিখে নিতে একটুও অসুবিধে হল না। এদিকে জন্মাষ্টমীৰ

সেই উৎসবও এসে গেল। আমিও নেমস্তন্ম পেলাম। তবে শুধুই  
শোনবার জন্যে। উৎসবে হাজির হয়ে চোখ ধাঁধিয়ে গেল।...আমায়  
একবার কেউ ডাকলও না।...বাড়ি ফিরে মাকে অভিমানের কথা  
বললাম। কথা শুনে মাছঃখ পেলেন। পরদিন ওস্তাদজীকে ডেকে  
সব বললেন। চুপ করে শুনলেন গুরুজী।

শেষে যা বললেন, তা আমার আজও মনে আছে। বলেছিলেন,  
'ইন্দুর রূপ নেই। অল্প শিখে সে যদি পাঁচজনের সামনে এসে  
দাঢ়াতে চায় তো অপমানিত হবে। রূপ অনেক অভাব ঢাকতে  
পারে। কিন্তু যে শুধু গুণের জোরে আদর পেতে চায় তাকে তেমন  
গুণী হতে হবে।...'

গুরুর কথায় আমার গান শেখার উৎসাহ যেন আরো বেড়ে  
গেল। কালীজীর তদারকীতে গান শেখা চলতে লাগল। আশাবরী,  
ভৈরবী—একটার পর একটা রাগ শিখে যেতে লাগলাম। এক বছর  
ধরে অনেক কিছুই শিখলাম। দেখতে দেখতে আবার সেই জন্মাষ্টমীর  
দিন এসে গেল। আবার সেই গানের আসর।...’ ( আনন্দবাজার  
পত্রিকা, বার্ষিক সংখ্যা ১৩৭৯—পৃঃ ৮৮-৮৯—অতীত দিনের স্মৃতি,  
ইন্দুবালা )

এই বিবরণ থেকে বোকা যায়, কৃষ্ণাধনাকে কতদুর গুরুত্ব দিতেন  
গৌরীশঙ্কর। আর শিক্ষাদানের ব্যাপারে কি নিয়ম-নিষ্ঠ ছিলেন।  
ছাত্রীর কথানি ঐকাণ্ডিকতা দেখে তবে সম্মত হতেন শিক্ষা দিতে।

ইন্দুবালার সঙ্গে তাঁর গুরু-শিষ্যা সম্পর্কের সেই সূচনা। তাঁর পর  
থেকে বহুকাল ওস্তাদজীর সঙ্গে তাঁর গায়িকা-জীবনের সহযোগিতা  
ছিল। ইন্দুবালার গানের অনেক আসরে বাজিয়েছেন গৌরীশঙ্কর।

আবার বাংলার বাইরেও অনেক স্বাক ফিল্মে ইন্দুবালা অভিনয়  
করেছেন। গানের ভূমিকাতেই দেখা দিয়েছেন বেশি। কখনো  
তাঁর অনুরোধে ওস্তাদজীকেও ছায়াচিত্রে ঘোগ দিতে হয়েছে। সারঙ্গ-  
বাদকের সাজেই বসেছেন ইন্দুবালার কোন আসরের দৃশ্যে। আসরের

মতন যন্ত্র বাজিয়েছেন। যেমন ইস্ট ইণ্ডিয়া ফিল্ম কোম্পানীর ‘স্টেপ মাদার’ ছিলতে। এক বাইজৌর আসরে দল্লুর মত সারঙ্গীর ভূমিকায় অবতীর্ণ গৌরীশঙ্কর। সেই দৃশ্য থেকেই নেওয়া হয়েছে বর্তমান বইতে মুদ্রিত গৌরীশঙ্করের প্রতিকৃতি। নচেৎ ওস্তাদজৌর ভবি হয়তো অপ্রাপ্য হত। ইন্দুবালার সঙ্গে তিনি এমনি আরো একখানি সবাক চিত্রে কাজ করেছিলেন মাঝাজে।

আরেকজনকেও গৌরীশঙ্করের সাময়িক ছাত্র বলা যায়। তিনি বাংলার সঙ্গীতরত্ন ভৌমদেব চট্টোপাধ্যায়। খুবই তরুণ বয়সী তখন ভৌমদেব। কলেজের প্রথম দিকের ছাত্র। গৈরিক বসনে সে সময় তাকে দেখা যেত। সেই পর্বের উদীয়মান গায়ক-প্রতিভা ভৌমদেব কিছুদিন শিক্ষার্থী হয়ে যাতায়াত করতেন গৌরীশঙ্করের কাছে। তা হল ১৯২৫-২৬ সালের কথা। ওস্তাদজৌ তখন প্রবৌণ—বয়সে এবং সঙ্গীতে। ষাট বছর পার হয়েছেন। ভৌমদেবের শিক্ষক হিসেবে নগেন্দ্রনাথ দত্ত ও বাদজ খাঁর নামই অবশ্য ধর্তব্য। তবে কিছুদিনের জন্যে যে গৌরীশঙ্করও তাঁর এক ওস্তাদ ছিলেন এ কথা ও নথিভুক্ত রাখা যায়।

শ্বেতাঞ্জলি, কৃষ্ণভামিনী, কৃষ্ণচন্দ্র দে, ইন্দুবালা প্রমুখ এঁরা সকলেই ওস্তাদজৌর শিক্ষা পান কঠসঙ্গীতে। আর তিনি সারঙ্গের তালিম দুজনকে দেন। সেই দুই শিশ্যই তাঁর আত্মীয়। বাঙালীরা সারঙ্গ শেখেন না। না হলে বাঙালী শিক্ষার্থীদেরও এ যন্ত্র শেখাতেন গৌরীশঙ্কর।

তাঁর দুই সারঙ্গী শিষ্য হলেন ছন্দুলাল মিশ্র ও চামু মিশ্র। দুজনকেই তিনি কলকাতায় তৈরি করেন। আর তাঁরাও এই শহরে থাকেন ওস্তাদজৌর মতন।

ছন্দুলাল তাঁর শ্বালক-পুত্র। সারঙ্গ যন্ত্র আর গান দুয়েরই তিনি তালিম পান গৌরীশঙ্করের কাছে। মধ্যাবয়স পর্যন্ত সারঙ্গ-বাদক থাকেন। কিন্তু পরিণত বয়সে গানকেই একমাত্র বৃক্ষি করেন

ছন্দুলাল। গায়ক-রূপে সঙ্গীতসমাজে স্বীকৃতি পান। আজও অশীতিপর ছন্দুলাল গৌরীশঙ্করের এক ধারক-বাহক হয়ে বর্তমান।

চামু মিশ্র হলেন ওস্তাদের ভাতুপুত্র। অপুত্রক গৌরীশঙ্কর চামুকে সঘত্তে গড়ে তোলেন। ছেলেবেলা থেকে শিক্ষা পেয়ে চামু প্রতিভাবান সারঙ্গ-বাদক হন তরুণ বয়সেই। কিন্তু মাত্র ছাবিশ বছরেই তাঁর জীবনে পূর্ণচেদ পড়ে (১৯৪৩)। চামু মিশ্রের এমন অকালমৃত্যু না ঘটলে তাঁর মধ্যেই সারঙ্গী গৌরীশঙ্করের প্রতিমূর্তি লাভ করত পরবর্তীকাল।

ওস্তাদজীর শিষ্য প্রসঙ্গে আরেকজনের নামও যোগ করা যায়। তিনি হলেন বাংলার সুপরিচিত গুণী অনাথনাথ বশু। খেয়াল ও ঠুঁটির কলাবৎ অনাথনাথ তাঁর শিষ্যস্থানীয়। গৌরীশঙ্করের কাছে গানের অনেক উপদেশ-নির্দেশ তিনি পেয়েছেন। উপকৃত হয়েছেন রাগবিদ্যায়। ওস্তাদজী তাঁকে অনেক রাগের রাস্তা দেখিয়েছেন। অনাথনাথের নানা গানের আসরে বাজিয়েছেন তাঁর সঙ্গে। গৌরীশঙ্করের সঙ্গে তাঁর দৌর্যদিন সাঙ্গীতিক যোগাযোগ ছিল।

ওস্তাদজী যে গায়কও ছিলেন সে কথা আগে বলা হয়েছে। অনেক যন্ত্রী, বিশেষ সারঙ্গী, তো অর্ধেক গায়ক। গান তাঁরা জানেন অস্তুরঙ্গভাবে। নচেৎ গানের অত সূক্ষ্ম কারুকর্মে সুর-সঙ্গত করতে অপারগ হতেন। তবে গৌরীশঙ্কর তাঁর চেয়েও বেশি। ছেলেবেলা থেকেই রৌতিমত গান শিখেছেন পিতার কাছে। যেমন অভ্যাস করেছেন সারঙ্গ যন্ত্রে, ঠিক তেমনি নিষ্ঠার সঙ্গে। তাঁদের পরিবার বা ঘরানার এইটি বৈশিষ্ট্য। একাধারে গান আর সারঙ্গের চর্চা। সেজগ্যেই যন্ত্রী হিসেবে সুর তাঁদের হাতে আরো বসে। আঙুলের স্পর্শ আর চলন হয় আরো সুরেলা। গান চর্চার ফলে সঙ্গতকার হিসেবেও তাঁরা আসরে সফলতর হন। আবার গানের শিক্ষক বা ওস্তাদরূপেও বরণীয় হতে পারেন পেশাদার জীবনে। তাই এই মিশ্র

ঘরের যাঁরা সারঙ্গী বৃক্ষের জন্যে প্রস্তুত হতেন, দম্পত্তির মত গানও  
শিখতেন।

গৌরীশঙ্করের জীবনেও তাই উত্তোলিত ছিল যন্ত্র ও কণ্ঠসঙ্গীত।  
তাঁর সারঙ্গে গানই বাজত। শুধু তান বিস্তারই নয়। কণ্ঠের  
ভাবাবেগ পর্যন্ত রণিয়ে উঠত তাঁর ছড়ের টানে। সারঙ্গের এই  
বৈশিষ্ট্য। অন্য কোন বাড়ই এমন সুচারুভাবে গানের শুরু-সঙ্গতের  
যোগ্য নয়। খেয়াল ঠুংরির সঙ্গে এমন একাত্ম হওয়া অন্য যন্ত্রের  
পক্ষে অসম্ভব। এতগুলি তরফের তাঁরে ঝঙ্কারের ঐশ্বর্যেও সারঙ্গ  
অন্য।

গৌরীশঙ্করের প্রসঙ্গে এই যন্ত্রের সব গুণের কথাই মনে আসে।  
সারঙ্গ বাড়ীরীতির এক সমৃদ্ধ ঐতিহ্য বহন করে এনেছিলেন  
তিনি। বারাণসী থেকে কলকাতায় প্রসারিত করেছিলেন তাঁর  
ধারা। বাংলায় তাঁর সঙ্গীতকৃতির এই এক উল্লেখ্য ভূমিকা।  
মিশ্র ঘরানার সারঙ্গ-বাদনকে তিনি বাংলার সঙ্গীতচর্চার সঙ্গে যুক্ত  
করেন।

গৌরীশঙ্করের প্রৌঢ় বয়সে আরেক গুণী সারঙ্গী প্রতিষ্ঠা পান  
কলকাতার সঙ্গীতক্ষেত্রে। সেই কলাকার ছোটে খোঁ। একক  
অনুষ্ঠানে তিনিও বীতিমত কৃতিত্ব দেখান। কিন্তু গৌরীশঙ্করের তুল্য  
দীর্ঘকাল তিনি দান রাখেননি বাংলার সঙ্গীত-জগতে। তাঁর কোন  
উত্তরাধিকারও এই প্রদেশে থাকেনি। চোদ-পনেরো বছর এখানে বাস  
করে ১৯৪৬ সালে কলকাতা ত্যাগ করে যান ছোটে খোঁ। ইন্দোরের  
কাছে তাঁর পূর্ব নিবাস গোয়ালদায় বাস করতে থাকেন। আর ফিরে  
আসেননি কলকাতায়।

গৌরীশঙ্কর কিন্তু নানা বন্ধনে বাঁধা ছিলেন বাংলার সঙ্গীত-  
জীবনে। তাঁর দেহান্তের পরেও তাঁর একটি রেশ স্মৃতিধারায় রয়ে যায়।

কাশীর প্রাচীন সারঙ্গ-ধারার উত্তর-সাধক গৌরীশঙ্কর।  
সেখানকার বিরাট কথক সম্পদায়ের এক সুযোগ্য প্রতিভূ। কবীর-

চৌরা সেনপুরা রামাপুরা ইত্যাদি এলাকায় বিস্তারিত সেই কথক সমাজ। নানা শাখাপ্রশাখার মধ্যে পরম্পর সম্পর্কিত তাঁরা। মিশ্র তাঁদের পদবী।

যন্ত্র আর কঠসঙ্গীতের নানা বিভাগে তাঁরা বিশেষজ্ঞ হন। ভারতের বিভিন্ন অঞ্চলকে প্রভাবিত করেন নিজেদের সাধনায়। তাঁদেরই কোন কোন শাখা স্থায়ী হয়ে পড়েন কলকাতায়। বাংলার রাগসঙ্গীতচর্চার শ্রীরাম্বন্ধি করেন। যেমন নানা রৌতির গান আর বীণাদি যন্ত্র-সঙ্গীতে রামকুমার, লক্ষ্মী ওস্তাদ, শিউসহায়। তেমনি বিবিধ কঠ ও যন্ত্রসঙ্গীতে রামসেবক, পশুপতিসেবক, শিবসেবক। তবলায় মৌলবৌরাম, নানুসহায় প্রভৃতি। তেমনি এক সারঙ্গ-বাদক গায়ক-ধারায় কথক-বংশীয় গৌরৌশঙ্কর মিশ্র।

উনিশ শতকের মাঝামাঝি থেকে এই প্রক্রিয়ার সূত্রপাত। আর বিশ শতকের প্রথম ভাগে তার সুপরিণতি।

গত শতাব্দে ভারতীয় সঙ্গীতচর্চায় সেই নবজাগ্রতির পর্ব। আর বাংলা তার মুখপাত্র। তারই একটি অধ্যায় হয় কাশীর কথক সম্প্রদায়ের একাংশ বাংলায় স্থিতি করার ফলে। সেই ঐতিহাসিক ঘোগাঘোগে তাঁদের উত্তরাধিকার বাংলাদেশে বর্তায়।

সারঙ্গ-বাদক-গায়ক বুদ্ধু মিশ্রের বংশের সঙ্গীত-সম্পদও তেমনি অঙ্গাঙ্গী হয়ে যায় বাংলার সঙ্গীতক্ষেত্রে।

গৌরৌশঙ্করের পিতৃপিতামহের এই পরিবার একাধারে গায়ক ও সারঙ্গ-বাদক।

গৌরৌশঙ্কর মিশ্রের পিতামহ বুদ্ধু মিশ্র। কবীর-চৌরা মহল্লায় কবীর-মন্দিরের পিছনে তাঁর বাড়ি। বুদ্ধু মিশ্রের ঢাই পুত্র। বেচু ওস্তাদ ও ঠাকুরপ্রসাদ। দুজনেই পিতার তালিম পান গানে আর সারঙ্গ যন্ত্রে। বেচু ওস্তাদের কাছে গান শেখেন গহর জ্ঞান। আর তাঁর সময় থেকেই এ বংশের সঙ্গে কলকাতার সংযোগ। শুদ্ধিকে ঠাকুরপ্রসাদ থাকেন কাশী-নিবাসী।

বেচু ওস্তাদের কলকাতায় অন্য সম্পর্কও ছিল। লছমী ওস্তাদের পিতা রামকুমার মিশ্র হলেন বেচু ওস্তাদের ভগিনীপতি। তবে বেচু ওস্তাদ কাশী-নিবাসী থেকেই কলকাতায় আসা-যাওয়া করতেন।

তাঁর পাঁচ পুত্র। শ্যামাচরণ, গৌরীশঙ্কর, কঙ্কর, বুদ্ধি ও কালী-প্রসাদ। পাঁচজনেরই জন্ম কাশীতে আর সকলেই হন পেশাদার গায়ক-বাদক। তৃতীয় কঙ্কর বারাণসীতে থাকেন এবং ভাইদের মধ্যে প্রথম মৃত্যু হয় তাঁর। অপর চারজনই প্রতিষ্ঠা পান, স্থায়ী বাসিন্দা হন কলকাতায়। কেউ গায়ক কেউ তবলিয়া কেউ সারঙ্গী হয়ে আমৃত্যু এখানকার সঙ্গীত-জগতে যুক্ত থাকেন।

শ্যামাচরণ আর বুদ্ধি মিশ্র হলেন তবলাগুণী বুদ্ধি অবশ্য গায়কও ছিলেন। আর গৌরীশঙ্কর ও কালীপ্রসাদ বংশের ধারায় সারঙ্গী। সেই সঙ্গে দুজনেরই গানের যেমন অভিজ্ঞতা, তেমনি সংগ্রহ। তাঁরা দুজন পিতার শিক্ষাতেই গঠিত। তবে গৌরীশঙ্কর বংশের অতিরিক্ত শিক্ষাও কিছু পান। তিনি সারঙ্গের তালিম পেয়েছিলেন কাশীর বিরাই মিশিরের কাছেও। কবীর-চৌরা-নিবাসী বিরাই মিশিরও অবশ্য কথকদেরই এক সুপরিচিত সারঙ্গ-বাদক পরিবারের গুণী।

পেশাদার জীবনের প্রথমেই গৌরীশঙ্কর নেপালে থাকেন। তারপর স্থায়ী হন কলকাতায়। এখানে গহর জানের সঙ্গে তিনি তখন থেকেই সহযোগী।

কলকাতায় আসার সময় গৌরীশঙ্করের বয়স ত্রিশও হয়নি। আর এখানেই তাঁর মৃত্যু হয় অশীতিপুর বয়সে। তাঁর পঞ্চাশ বছরের সঙ্গীত-জীবন এই শহরেই উদ্যাপিত বলা যায়। তাঁর জন্মসন আনুমানিক ১৮৬৫।

গৌরীশঙ্করের শিষ্যদের কথায় বলা হয়নি, কনিষ্ঠ কালীপ্রসাদও তাঁর শিক্ষা পেয়েছিলেন। তিনিও কলকাতায় প্রসিদ্ধ হন কালী

ওস্তাদ নামে। গৌরীশঙ্করের সঙ্গীত-জীবনে চিরদিন সহযোগী কাশীপ্রসাদ। তুজনে অনেক সময় একই ছাত্রীকে শিখিয়েছেন। যেমন কৃষ্ণভামিনী কিংবা ইন্দুবালাকে। আসরে সান্তুষ্ট বাজিয়েছেন একই বাইজীর তুদিকে বসে। যেমন শ্বেতাঞ্জলি কিরণময়ী সুরমা কৃষ্ণভামিনীর সঙ্গে। তাই সহোদর অধ' শতাব্দ একই বাড়িতে বাস করেছেন। জোড়াসাঁকোর ১৫৮ বলরাম দে স্ট্রীটে।

এই ঠিকানা থেকেই গৌরীশঙ্কর সারা ভারতের আসরে দরবারে মুজরোয় যেতেন, গহর জানের সঙ্গে। এখানেই তাঁর জন্মাষ্টমীর আসর হত বছরের পর বছর।

ওস্তাদজী কখনো কখনো আজাদাও পশ্চিমের আসরে যোগ দিতেন। আর কাশীর সঙ্গে তাঁর সম্পর্ক বজায় ছিল বরাবর। সেখানে নিজেও যাতায়াত করতেন। আর কাশীর গুণীরা কলকাতায় এলে সহযোগী থাকতেন তাঁদের আসরে। এখানে তাঁদের মুজরোর বাবস্থাও করে দিতেন। বাইজী গানেই সুরসঙ্গতের রেওয়াজ। তাই বাইজীদের সঙ্গে মিশ্রজীর সংযোগ ছিল বেশি। তাঁর মুজরো নিয়মিত হত বাইজীর আসরে। বেশি শিক্ষা বাইজীদেরই দেন। খেয়াল টপ্পা ঠুংরি দাদরা টপ্খেয়াল হোরি আর চৈতী কাজরা সাউনী—শেখাতেন সব রকমই।

তাঁর মধ্যে টপ্পার বিশেষ স্থান। কাশীতে টপ্পা গানের ঐতিহ্যেমন সমৃদ্ধ, তেমনি এই মিশ্র ঘরেও। কাশীর একেক কলাবৎ টপ্পা রৌতির বিশেষজ্ঞ। যেমন ছোটে রামদাস। এই ঘরেরই শিশু তিনি। গৌরীশঙ্করের কাকা ঠাকুরপ্রসাদের শিক্ষা পান ছোটে রামদাস।

গৌরীশঙ্করও টপ্পা-প্রবণ। তাঁর শিক্ষাতেই টপ্পা, টপ্খেয়ালে অমন কলাবতী গায়িকা হন কৃষ্ণভামিনী।

টপ্পার কি ঐশ্বর্য যে মিশ্রজী যন্ত্রে দেখাতেন! যেমন তাঁর গিট্কারি জন্মজ্ঞানে অলঙ্করণে রূপকার, তেমনি টপ্পা অঙ্গে তাঁর রাগের পরিবেশনা। তাঁদের ঘরানাই হল টপ্পা রৌতিতে বিশেষজ্ঞ।

তাই তিনি টপ্পাৰ চালে এত বিচ্ছিৰ রাগও বাজাতেন। টপ্পা গানে  
কটি সংযুক্ত শোনা যায় সচরাচৰ। কিন্তু গৌরীশঙ্কৱের একক  
আসৱে টপ্পায় এমন অনেক রাগ বাজত যা অনেকেৰ গান বাজনাৰ  
পাওয়া যেত না। ছাত্ৰছাত্ৰীদেৱ তিনি দিয়েছেনও সেসব। যেমন—  
পূৰিয়া, মোঢ়িণী, ভৌমপলশ্বী, নটমল্লাৰ, মালকোশ, সাহানা, মূলতান  
ইত্যাদি।

বলা যায়, বংশেৱ ধাৰায় গৌরীশঙ্কৰ ছিলেন টপ্পা বৌতিতে সিদ্ধ।  
না হলে দিল্লীৰ সে আসৱে পাল্লা দিতে পাৰতেন না।

সেই লড়াইয়েৱ আসৱেৰ আগে বলে নিতে হয় তার জীবনেৰ  
শেষ অধ্যায়টি।

বৃন্দ বয়স পৰ্যন্ত তিনি বেশ সক্ষম ছিলেন। স্বাস্থ্যবান নৌরোগ  
শৱীৰ ছিল প্রায় পৰিণত বয়স পৰ্যন্ত। শ্বামবৰ্ণ একহারা চেহাৰাৰ  
মাহুষ। আকাৰেও ছোটখাটো। পাঁচ ভাইয়েৱ মধ্যে তিনিই সবচেয়ে  
ক্ষুদ্ৰাকৃতি। সেই যে আসৱে দৌৰ্ঘকায়া সুৱমা বাইজীকে পাহাড়  
বলতেন নিজেকে গাছেৱ সঙ্গে উপমা দিয়ে—‘পাহাড় চলতি ছয়।  
ওৱ হম্ লোগ সব পেড় হ্যায়।’

শাস্তি, আত্মসন্তুষ্টি স্বভাৱ গৌরীশঙ্কৱেৰ। শিল্পীৰ পৱিত্ৰতাতে  
স্বচ্ছন্দেই দিন যাপন কৱতেন। বাংলাৰ সঙ্গীতক্ষেত্ৰেৰ সঙ্গে মিশে  
গিয়েছিলেন সুখে দুঃখে। বাঙালী গায়ক-গায়িকা সঙ্গতকাৰ  
সঙ্গীত-প্ৰেমীদেৱ সঙ্গে প্ৰীতিৰ সম্পর্ক গড়ে উঠেছিল। জীবনযাত্ৰাৰ  
উচ্চাকাঙ্ক্ষী নন বলে কোন অভাৱ বোধ কৱেননি উন্নাদজী।

শুধু একটি ক্ষেত্ৰ ছিল। কাৰণ অপুত্ৰক। তবে তা নিয়েও  
বিশেষ দুঃখ বোধ কৱতেন না। কাৰণ তারা চার ভাই-ই পুত্ৰহীন,  
একমাত্ৰ বুন্দি ভিন্ন। আৱ বুন্দিৰ বড় ছেলে চামুকে তে। নিজেৰ  
সন্তানেৰ মতন গড়ে তোলেন। আৱ অল্প বয়সেই সারঙ্গবাদক চামু  
অতিশয় গুণপনা দেখাচ্ছিলেন আসৱে। সেজন্মেও গৌরীশঙ্কৰ বেশ  
তৃপ্ত ছিলেন।

এমনিভাবে তাঁর জীবন চলেছিল তিয়াত্তির-চূয়াত্তির বছর পর্যন্ত।  
আসরে আসরে সারঙ্গ সঙ্গত। ছাত্রছাত্রীদের শিক্ষাদান। সিনেমায়  
যে মাঝে মাঝে বাজাতেন, তাও এই পরিণত বয়সে।

এমন সময়, সেদিন এক আসর থেকে বাড়ি ফিরছেন। গাড়িতে  
সঙ্গে রয়েছেন গায়ক কৃষ্ণচন্দ্র দে এবং আরো কজন। সেন্ট্রাল  
অ্যাভেনিউ দিয়ে এসে, বলরাম দে স্ট্রীটে তাঁদের গলির সামনে গাড়ি  
দাঢ়াল।

গৌরীশঙ্কর কিন্তু নামতে পারলেন না গাড়ি থেকে। শরীরের  
দক্ষিণ দিক একেবারে অবশ হয়ে গেছে! ডান হাত, ডান পা অঙ্গম!  
আকস্মিক পক্ষাঘাত!

সঙ্গীরা বোবৰার পর সকলে তাঁকে নিয়ে এলেন ধরাধরি করে।  
তাঁর দোতলার ঘরে ওস্তাদজী শয্যাগত হলেন।

তেমনি অশক্ত হয়েই রইলেন মাসের পর মাস। চিকিৎসা চলতে  
লাগল। সে সময় তাঁর অত্যন্ত যত্ন নিয়েছিলেন গোবৰবাবু।  
স্বনামধন্য মল্লবীর, সঙ্গীতসেবী, কলাকারদের পৃষ্ঠপোষক গোবৰবাবু  
গৌরীশঙ্করের এক গুণমুঞ্চ। ওস্তাদজীর চিকিৎসাদির জন্যে তিনি  
নানারকম সাহায্য করেছিলেন।

সে যাত্রা অল্লে অল্লে অনেকখানি আরোগ্য লাভ করলেন গৌরী-  
শঙ্কর। তবে আগেকার স্বাস্থ্য আর ফিরল না। ক্রমে সারঙ্গ হাতে  
দেখাও দিতে লাগলেন আসরে। কিন্তু আগেকার ক্ষমতায় বাজাতে  
আর সক্ষম হননি। কারণ তেমন সচল থাকেনি ডান হাতটি। দীর্ঘ-  
কালের সাধন ছিল। তাই কোনরকমে সঙ্গতীয়ার কাজ করতে  
লাগলেন আসরে। এমনিভাবে দিন যেতে লাগল।

প্রথম পক্ষাঘাত হয়েছিল ১৯৩৮ সালে। লালাৰাবাবুৰ বাড়িতে  
ক্যালকাটা মিউনিক অ্যাসোসিয়েশনের সেই বড় আসরের বছর-  
খানেক পরে। একটু শুল্ক হয়ে আবার তাঁর বাজনাও আরম্ভ  
হয়েছিল। কিন্তু তারপরেই বাধল দ্বিতীয় মহাযুদ্ধ। আর ১৯৪২-৪৩

সালে সেই বোমাতক্ষে দলে দলে শহর তাগ, ছত্রিক্ষ, নিষ্পদ্মীপ, বোমা-আক্রমণ ইত্যাদি। কলকাতায় অনেক কিছুর মতন সঙ্গীত-জগৎও বিপর্যস্ত হয়ে গেল।

মহা সঙ্গ ঘনিয়ে এল গৌরীশঙ্করের পেশাদার জীবনে। ঠাঁর দুদিনের ওপরে আবার দুর্ঘট। মাত্র কদিনের কালাজ্বরে—পরম স্নেহের পাত্র, হাতে গড়া, ভবিষ্যতের আশা-ভরসা চামু মিশ্রের জীবনদৌপ নিভে গেল।

সেই দারুণ দৃঃসময়ে এল বোমাৰ বিপদ। আৱ কলকাতার মানুষদেৱ শহুৰ ছেড়ে যাওয়াৰ হিড়িক। জনশূন্য হয়ে পড়ল কলকাতা। গৌরীশঙ্করও সেই স্বোতে পুরুলিয়া চলে গেলেন। সেখানে বাস কৱতে লাগলেন চামুৰ কনিষ্ঠ দামোদৱেৱ সঙ্গে।

পুরুলিয়া বাসেৱ মধ্যেই মৃগী রোগেৱ আক্রমণ হল। তখন আবার ঠাঁকে আঘীয়েৱা নিয়ে এলেন কলকাতায়। এখানে রোগেৱ দুর্ভেগ বাড়তেই লাগল। কোন চিকিৎসাতেই আৱ নিৱাময় হতে পাৱলেন ন। গৌরীশঙ্কর। অবশেষে ১৯৪৫ সালে চিৰশাস্তি লাভ কৱলেন, ১৫৮ বলৱাম দে স্ট্ৰীটেৱ বাসায়। কলকাতার পঞ্চাশ বছৱেৱ বেশি দিনেৱ সারঞ্জি স্তৰ হয়ে গেল। বয়স তখন আশী পাৱ হয়েছিল।

ঠাঁর অনেক আসৱেৱ স্মৃতি জীবন্ত হয়ে আছে সঙ্গীত-সমাজে। তাৱ মধ্যে একটি বিশেষ কৱে বলবাৰ মতন। দিল্লীৰ সেই জলসায় সারঙ্গ-নেওয়াজ মন্তব্য থঁ। আৱ শাস্তুশিষ্ট গৌরীশঙ্কর মিশ্রেৱ কথা।

ছোটে থঁৰ খন্দাদ বুন্দু থঁৰ মামা মন্তব্য থঁ। দুধৰ্ষ বাজিয়ে বলে পশ্চিমে ঠাঁৰ নামডাক। কোন গায়ক-গায়িকাৰ সঙ্গতে মন্তব্য থঁ। কথনো সারঙ্গ বাজাননি। বৱাৰৱ মূল শিল্পী হয়ে বসেন আসৱে। কি দাপটেৱ সঙ্গে ঠাঁৰ বাজনা! নানা রকমে তিনি সারঙ্গ ঘন্টেৱ মৰ্যাদা বাড়িয়ে দিয়েছেন। সেতাৱ শৱদেৱ মতন তান তোড়া বিস্তাৱ তো কৱেনই সারঙ্গে। আবার আলাপেৱ অঙ্গও দেখান।

মন্মন থাঁর রাগালাপের জন্মে নতুন সম্মান পায় যন্ত্রটি। আরেকটি অভিনবত্ব তিনি করেছেন। প্রচলিত আকারের অনেক বড় মাপের সারঙ্গ ঠাঁর। সেই বৃহৎ যন্ত্রে আলাপ থেকে শুরু করে খেয়াল অঙ্গের গৎ তান বিস্তার সবই শুনিয়ে দেন।

নিজের বড় আকারের সারঙ্গটির তিনি নতুন নামকরণ করেছেন—  
সুরসাগর। বাজনার মুসিয়ানায় সে যন্ত্রে সুরের অজ্ঞ তরঙ্গধ্বনিটি তোলেন মন্মন থাঁ।

আসরে আসরে তিনি একক বাজিয়ে সাড়া জাগিয়েছেন। তেমনি সম্মান ঠাঁর দিল্লীর সঙ্গীত-সমাজে। এখানকার অতি বিখ্যাত কলাকার তিনি। আর আপন গুণের বিষয়ে সচেতন। দর্পণও।

সেবার দিল্লী এসেছেন গৌরীশঙ্কর।

মন্মন থাঁর নাম আর পরিচয় তিনি আগে শুনেছিলেন বটে। কিন্তু কখনো ঠাঁর বাজনা শোনেননি। সেদিন সে শুয়োগ পেলেন একটি আসরে। এখানে এসেছেন গৌরীশঙ্কর শ্রোতা হিসেবে।

মন্মন থাঁ ঠাঁর নিজস্ব যন্ত্রে শোনাতে লাগলেন—আলাপচারীর পর গৎ, জ্ঞানকারী আর নানা অলঙ্কারের কাজ। অপূর্ব বাদন-রৌতিতে ঠাঁর সুরসাগর সুরের উমিমালায় ঝঙ্কার দিতে লাগল।

শ্রোতাদের মুক্ত করে দিয়ে একসময় বাজনা শেষ করলেন থাঁ। সাহেব। সকলে ঠাঁকে সাবাস দিলেন, মিশ্রজীও।

কিন্তু সেই প্রশংসার মধ্যে মন্মন থাঁ বড়ই অঙ্গীকাৰ প্রকাশ করলেন। নিজের প্রকাণ্ড সারঙ্গের দিকে দেখিয়ে এই নর্মে জ্ঞানালেন—এ যন্ত্র কে আর বাজাতে পারবে! অ্যায়সা কোই হ্যায়?

বিস্মিত হলেন গৌরীশঙ্কর। “বিরক্তও। প্রকাণ্ড আসরে মন্মন থাঁ অহংকার জ্ঞানাচ্ছেন এমনভাবে! লড়াইয়ের আহ্বান জ্ঞানাচ্ছেন! মিশ্রজীর মধ্যে শিল্পীর অভিমান আর আত্মসন্ত্রম জেগে উঠল। মনে অনেই বললেন—হ্ম হ্যায়।

মন্মন থাঁর দিকে চেয়ে সবিনয়ে জ্ঞানালেন—‘কোশিশ করেছে।’

‘আপ?’ তাঁর ছোটখাটো সাদামাঠা চেহারা দেখে সক্তিকে  
জিজ্ঞেস করলেন থঁ। সাহেব। গৌরীশঙ্করকে তাঁর জানা ছিল না।

‘জী, হঁ।’ তেমনি বিনৌতভাবেই তিনি জবাব দিলেন।

প্রিয় হল, সেখানেই গৌরীশঙ্করের আসর হবে কিছুদিন পরে।  
আজকের শ্রোতারাও সেদিন হাজির থাকবেন। মন্মন থঁর মতন  
বৃহদাকার শারঙ্গ বাজিয়ে শোনাবেন মিশ্রজী। সেই নতুন যন্ত্র প্রস্তুত  
হলেই তিনি থঁ সাহেবকে খবর দেবেন। তখন তাঁর আসরের  
বন্দোবস্ত হবে এখানে।

পরের দিন মিশ্র মহল্য সন্ধান করে তিনি যন্ত্রের ফরমায়েস  
দিলেন। আর রয়ে গেলেন দিল্লীতে। তাগিদ দিয়ে নতুন যন্ত্র  
করালেন। সেই বড় মাপের সারঙ্গে রিয়াজ করতে লাগলেন  
দিবাৰাত্রি।

তারপর মন্মন থঁকে আসরের দিন প্রিয় করতে বললেন।

নির্দিষ্ট আসরে এলেন থঁ সাহেব। আর তাঁর সঙ্গে সমবাদার কিছু  
ব্যক্তিরা। উৎসুক, কৌতুহলী শ্রোতায় আসর ভরে গেল। যন্ত্র বেঁধে  
নিয়ে, ছড়ের টানে ঝক্কার ঘোলেন গৌরীশঙ্কর। সে তাঁর এক নতুন  
রকমের দৃশ্য। মাথার পাগড়ি ছাড়িয়ে উঠেছে তাঁর হাতের যন্ত্রটি।

আবাস্য সারঙ্গের সাধক। কদিনের রিয়াজে বড় যন্ত্রেও হাত  
চুরস্ত করে নিয়েছেন। মন্মন থঁ আর দিল্লীর শ্রোতাদের শোনাতে  
হবে, মিশির ঘর কি বাজ। থঁ সাহেবের সদস্ত আহ্বানের জবাব  
দিবে হবে। তিনি বাজাতে লাগলেন গভীর আস্তুপত্যয়ে।

বাজনা যতই অগ্রসর হল, শ্রোতারা আশ্চর্য হয়ে গেলেন মিশ্রজীর  
তানের বচর দেখে। এমন টঁপ্পা অঙ্গ তাঁরা সারঙ্গের একক আসরে  
কখনো শোনেননি। বিস্মিত মন্মন থঁ দেখতে লাগলেন, এ যন্ত্রে  
দস্তুরমত জম্জমা আর খটকার কাজ। ‘বানারসের’ বাজিয়ে কি  
দানাদার বাহারের সব তান ঘোলেন! মনে মনে মানলেন—হঁ,  
এলেমদার বটে।

সুরের কারুকর্মে গৌরীশঙ্কর বাজনা জমিয়ে ভরিয়ে তুললেন !  
মুরকির তান ঝরতে লাগল ফুলবুরির মতন । ‘সাবাস’ ‘সাবাস’ রব  
উঠল শ্রোতাদের মধ্যে ।

বড় যন্ত্রের বড় আওয়াজে টপ্খেয়ালের মুন্সিয়ানা দেখালেন  
তিনি । আসর মাত করে দিলেন ।

বাজনা শুনে খুশি হলেন সবাই । শেষ হতে সমবদ্ধারদের তারিফ  
আবার বর্ষিত হল ।

গৌরীশঙ্কর কিন্তু কোন বাগাড়স্বর করলেন না । আহ্বান  
জানালেন না মশ্বন থাকে—উঠাইয়ে ত অ্যায়সা তান আপ্কা  
যন্ত্রমে !

কিছুই বলতে হল না তাকে । শ্রোতারা বুঝলেন, এ ধরনের  
তানকারী মশ্বন থাকে হাতে কোনদিন বাজেনি ।

কিন্তু কোন প্রশংসাবণী ফুটল না থাকে সাহেবের মুখে ।

তিনি স্তুক হয়ে বসে রইলেন । নিজেই বড়াই করতে গিয়ে  
বেইজ্জৎ হয়েছন খুদ দিল্লীতে !

কাশীর ওস্তাদটি বড় জোর জিতে গেছেন ।

## কতবার আসিয়া কত ভালবাসিয়া

মানদাশুল্লব্রী

টপ্খেয়াল আর খেয়াল গানের কলাবতী মানদাশুল্লব্রী।  
গায়িকার নামের সঙ্গেই যেন গানখানির রেশ ভেসে আসে।

সেই আকুল-করা মরমী সুরে ভৱে যায় সঙ্গীতের আকাশ।  
অন্ত সব পরিচয় আড়াল করে মৃত্তিমতী হয়ে ওঠে—গান। সুর  
আর বাণীতে অঙ্গময়ী।

শিল্পীর আর সব রেকর্ড ছাপিয়ে কেদারার মিষ্টি গানটি অনুরণন  
করে—

কতবার আসিয়া কত ভালবাসিয়া  
গিয়াছি ফিরিয়া কত কাঁদিয়া কাঁদিয়া...

কিরণময়ীরই সগোত্রা, সঙ্গীতে আর শ্রেণীতে। কান্ত কলার  
গুণে আর ভাগ্য-বৈগুণ্যে। খেয়াল টপ্খায় আর টপ্খেয়ালে ওই  
ধরনেরই পারদর্শিনী। হয়ত আরো খ্যাতির সুযোগ পেয়েছিলেন।  
আরো জীবন্ত হয়ে আছেন প্রতিস্থৃতিতে। স্মরণ মননের নির্দশনও  
রেখে গেছেন কিরণময়ীর চেয়ে বেশি। সেইসব গ্রামোফোন  
রেকর্ড।

হজনে একই সময়ের, প্রায় সমবয়সিনী। কিরণময়ী হয়ত কিছু  
অগ্রজ। আরো আগে বিদায় নেন গানের জগৎ থেকে।

কিন্তু মানদাশুল্লব্রী অত দুর্ভাগিনী নন। অমনি পরিবেশেও  
সম্মানের স্থান করে নেন সম্পন্ন অবস্থায়। কিরণময়ীর চেয়ে সুন্দর  
করে বাঁচতে পেরেছিলেন। তবে হয়ত অপূর্ণতা ছিল এক বিষয়ে।  
খণ্ডিত হলেও ঘরণী জননী কিরণময়ী।

কিন্তু তাঁর সঙ্গে আরেক পার্থক্য মানদার। কিরণময়ীর মতন

তিনি বাঙ্গী হননি। অর্থাৎ মানদা শুধুই গায়িকা। নর্তকী নন + নিজের বাড়িতে, বাইরের আসরে, কৌর্তন-বাসরে কিংবা গ্রামোফোনের গীত-শিল্পী। সঙ্গীত-জীবনে এই ঠার পরিচয়। শুধু গানের প্রদীপ জ্বলেই তিনি জীবন-দেবতার আরতি করেছিলেন।...

শিল্পী হিসেবে মানদার ভাগ্য অনেক দিকে ভাল। ভাবীকালের আসরেও ঠার দান থেকে গেছে। আছে প্রতিকৃতির স্মরণিকা। সঙ্গীত-জীবনের সংবাদ। কিছু ব্যক্তি-পরিচিতি। আর, বহুসংখ্যক গানের রেকর্ড। গ্রামোফোন-জগতের কালজয়ী কৌতু। বিশ শতকের প্রথম তিন দশক ব্যাপী খ্যাতি।

গ্রামোফোনে মানদাসুন্দরীর প্রায় প্রতিটি গানই শুন্দর। রেকর্ড হিসেবে সফল। শোনবার মতন। আর, কয়েকটি গান শুনে তোলা যায় না।

রেকর্ড যুগের প্রথম পর্বের গায়িকা তিনি। কিন্তু তখনই প্রথম সারির গীত-সাধিকা। শুমার্জিত, শুরেলা কঠের শিল্পী। দুরদী শ্রোতার মন ভরে ওঠে একেকটি গানের শুরে। সেই চির-বিরহের আকৃতিতে কেদারায় কি মাধুর্য সঞ্চার করে—

কতবার আসিযা কত ভালবাসিযা।  
গিযাছি ফিরিযা কত কাদিযা কাদিযা॥  
কত নিশি জেগেছি কতই বা কেঁদেছি  
তবু দেখা পাই না সাধিযা সাধিযা॥...

যে একবার শোনে, তার কানে থেকে যায় সেই শুরের রেশ।

লালচাঁদের পরই মানদা গ্রামোফোনে আসেন। ঠার রেকর্ড হতে থাকে একটির পর একটি। সঙ্গীতপ্রিয়দের চিন্ত আকৃষ্ণ করে। নানা ঘরে স্থান পায় সেসব রেকর্ড। কলকাতা ছাড়িয়ে, মফস্বল শহর পার হয়ে পল্লী অঞ্চলেও পৌছে যায়। এই উদীয়মানা গায়িকার গান বাজতে থাকে বাংলার জেলায় জেলায়।

গায়কদের মধ্যে লালচাঁদ বড়াল, আর গায়িকা মানদাসুন্দরী

ও পান্নাময়ীর রেকর্ডের তখন সবচেয়ে বেশি নাম। আর সর্বাপেক্ষা চাহিদা। সবচেয়ে বেশি লোকে শোনে।

তাঁদের মধ্যে পান্নাময়ীর শুধু কৌর্তন। কিন্তু লালচাঁদের মতন মানদারও প্রায় সবই রাগসঙ্গীত। বেশির ভাগ টপ্খেয়াল ধরনের। বাংলা খেয়ালও বলা যায় মানদার কোন কোন গানকে। বাঙালী শ্রোতাদের মন রাগে রঞ্জিত করে দেয় তাঁর গান।

বাংলার সঙ্গীত-জগতে সে একটা যুগ এসেছিল। এক ভূমিকা পালন করেছিল গ্রামোফোন রেকর্ড। আর সেখানে মানদাসুন্দরীরও স্মরণীয় দান ছিল। বাংলার সাঙ্গীতিক ইতিহাসে মনে রাখিবার মতন সে নাম।

নামের কথায় এক সমস্যার কথাও বলতে হয়। মানদাসুন্দরী ছুজন ছিলেন কি?

বাংলার মধ্যে এক মানদাসুন্দরী অভিনয় করতেন। গানের জগ্নেই প্রসিদ্ধ তিনি। ‘মলিনা বিকাশ’ গীতিনাটোর ( স্টারে ১২৯৭, ২৯ ভাজ মঞ্চস্থ ) নায়িকা নটী। গিরিশচন্দ্রের এই রচনায় সুরসংযোজক, সঙ্গীতাচার্য রামতারণ সান্ত্বাল। তার ছথানি গান শুনিয়ে শ্রোতাদের মুগ্ধ করতেন মানদা। বিশেষ তাঁর ‘পাখি তোর পেলে মধুর স্বর’ ( পূরবী, দাদরা ) আর ‘দেখলে তারে আপন হারা হই’ ( হাস্তীর, কাওয়ালী ) গান ছথানি তখন লোকের মুখে মুখে শোনা যেত। তা ছাড়া, গিরিশচন্দ্রের ‘চগু’, ‘মহাপূজা’, ‘প্রফুল্ল’ নাটকেও মানদা গানের ভূমিকায় দেখা দিতেন স্টার মধ্যে। ‘প্রফুল্ল’তে ‘মা তোমার এ কোন দেশী বিচার’ ( বিস্মিত লয়ে ভৈরেঁ। মিশ্র ) গানটি যেমন কঠিন তেমনি বিখ্যাত আর গুরুত্বপূর্ণ। সুপ্রসিদ্ধ গায়িকা-নটী নরসুন্দরীরই ও গানের জগ্নে নাম ছিল। তাঁর বিকল্পে গানখানি গাইবার অধিকারিণী ছিলেন সে যুগে মানদাসুন্দরী।

গায়িকা-অভিনেত্রী মানদাকে বেশিদিন মধ্যে দেখা যায়নি। শেষ ক'টি অভিনয় ভিন্ন তিনি অবতীর্ণ হন ‘তরুবালা’ নাটকে পার্শ্বলের

ভূমিকায়। ১৯০৬ সালের ১৩ই এপ্রিল, পুরনো বেঙ্গল থিয়েটারে।  
সেখানে তখন নতুন করে ‘শ্রাশনালি থিয়েটার’ নাম দিয়ে চলছিল।  
সে রাতেই মানদার শেষ মঞ্চে অবতরণ।

সেই ‘তরুবালা’র দশ বছর আগে ( ১৮৯৬ ) স্টারে নেমেছিলেন  
ওই গানের ভূমিকায়। আর তার প্রথম মঞ্চে অভিনয় ‘চণ্ড’ নাটকে,  
১৮৯০ সালে। ( এটিই গিরিশচন্দ্রের প্রথম ঐতিহাসিক নাটক,  
মধুসূনের ১৪ অক্টোবরে অমিত্রাক্ষর ছন্দ এ রচনায় ব্যবহার করেন  
নতুন রীতিতে। দানীবাবুর ও রঘুদেবজী চরিত্রে প্রথম নতুন ভূমিকা  
এই নাটকে )।

১৮৯০ সালে সূচনা আর ১৯০৬ সালে সমাপ্তি। মঞ্চের নটী  
মানদাসুন্দরীর ওই ক'টি মাত্র অভিনয়-রজনী। সুকর্ণী গায়িকা বলে  
প্রতিষ্ঠা পেলেও নাট্যশালা থেকে তিনি কিন্তু বিদ্যায় নেন অকালে।  
তার কারণও জানা যায় না।

সমস্তা এই, অভিনেত্রী মানদা আর গ্রামোফোনের মানদা কি  
অভিন্ন ?

রেকর্ড-গায়িকা মানদাসুন্দরীর জীবন অনেকখানি জানা। তিনি  
গুরুত্ব বিশ্বনাথ রাওয়ের শিষ্য। বাংলার সঙ্গীত-জগতের এক  
সুপরিচিত গুণী। ১৯২৭ সালে তার একটি আসরের বিবরণ পাওয়া  
গেছে, যখন তার গায়ন-ক্ষমতা পরিপূর্ণ, অটুট। গীতকৃষ্ণ পূর্বাপর  
সতেজ। বয়স ও স্বাস্থ্য দৃশ্যত পঞ্চাশের অনধিক।

ছই মানদার এক হওয়ার প্রতিপক্ষে সন্দেহের কারণ—১৮৯০  
সালে যিনি মঞ্চে অবতীর্ণ, ৩৭ বছর পরের গায়িকাও কি তিনি ?  
কালের ব্যবধান লক্ষ্য করবার মতন।

আবার ছই মানদা অভিন্ন হওয়ার পক্ষেও যুক্তি হতে পারে—  
অভিনেত্রীর ‘প্রফুল্ল’ নাটকে গাওয়া ‘মা তোমার এ কোন্ দেশী বিচার’  
গানটি গ্রামোফোনেও আছে রেকর্ড-গায়িকার তালিকায়। আর সেকালে,  
মঞ্চে যিনি গান, রেকর্ডেও তারই গাইবার রেওয়াজ দেখা যেত।

সেজন্টে সমস্তাটি জানিয়ে রাখা হল, সিদ্ধান্ত না নিয়ে ।...

সেকালে ক্রুপদী-ধামারী বিশ্বনাথ রাও বাংলার সঙ্গীতজগতে এক সম্মানিত আচার্য। কলকাতার আসরে ধামার গানকে তিনি নতুন করে প্রচলন করেছিলেন। বাঁটের কাঙ্কর্মে ভরা চমৎকার সার্গমে মাতিয়ে দিতেন বাঙালী শ্রোতাদের। বছরের পর বছর কলকাতায় বাঙালীদের সঙ্গে বাস করে, তিনিও বাঙালী বনে যান। বাঙালীদের সঙ্গেই ওস্তাদজীর মেলামেশা ছিল বেশী। নাটোর-রাজ জগদ্বিজ্ঞানের আসরে তিনি অনেক সময় আসর-পতির সম্মানে উপস্থিত থাকতেন। বাংলায় কথা বলতেও পারতেন, উচ্চারণে একটু পশ্চিমী টান দিয়ে। আর আসরে ক্রুপদ ধামার গাইলেও, ঘরোয়াভাবে শোনাতেন কিছু কিছু বাংলা গান। বিশ্বনাথজীর রেকর্ডও সব বাংলা গানের। সেই ‘হর হর হর বম্ বম্ বামে শোভে গৌরী’ ( প্রভাতী ), ‘এমন দিন কি হবে তারা’ ( কাফিসিকু ), ‘রাখ রাখ মিনতি মম আজিকে গো রাই’ ( খাম্বাজ ), ‘মুই অধমের অধম’ ( আশাবরী ), ‘তারা তারা তারা বলে কবে আমার প্রাণ যাবে’ ( ছায়ানট ), ‘জাল ফেলে যম রয়েছে বসে’ ( বেহাগ ) ইত্যাদি।

ওস্তাদ বিশ্বনাথ রাওয়ের শিষ্যদের মধ্যে লালচাঁদ বড়াল ( ধামার ও সার্গম ), দানীবাবু নামে সঙ্গীত-জগতে সুপরিচিত ক্রুপদী-পাখোয়াজী সতীশচন্দ্র দত্ত, ক্রুপদী অমরনাথ ভট্টাচার্য, ঘোগীজ্ঞনাথ রায় ( নাটোর ), ব্রজেজ্ঞনাথ গঙ্গোপাধায় ( ‘বন্দে মাতরম’ গায়নের জন্যে বিখ্যাত ), ক্রুপদী বিনোদবিহারী মল্লিক ( পাখোয়াজ-গুণী গোপালচন্দ্র মল্লিকের পুত্র ), লালচাঁদ-পুত্র কিষণচাঁদ বড়াল, প্রফুল্লচন্দ্র ঘোষ প্রভৃতির নাম করা যায়। আর মানদাসুন্দরী। তাছাড়া স্তর আশুতোষ চৌধুরী ও প্রতিভা দেবী পরিচালিত ‘সঙ্গীত সজ্জ’রও অন্তম শিক্ষক বিশ্বনাথজী।

ওস্তাদের স্মৃতে সঙ্গীত-জগতের এই পরিবেশে মানদার গায়িকা-জীবন।

আসৱে তিনি খেয়াল আৱ টপ্পখেয়াল গাইতেন। তাৱ আসল  
পৱিচয় ছিল রাগসঙ্গীতেৰ শিল্পী হিসেবে। কিন্তু কৌর্তন-গায়িকা  
বলেও মানদাৱ নাম ছিল। কৌর্তনেৰ আসৱ কৱতেন ভাল দক্ষিণ।  
নিয়ে। অবশ্য তা শ্রাদ্ধ-বাসৱেই। সেকালে শ্রাদ্ধ-অনুষ্ঠানে কৌর্তন-  
গায়িকাৰ চলন ছিল। গৃহস্থ পৱিবাৱে ‘পতিতা’দেৱ সাধাৱণ  
সঙ্গীতাসৱ সে যুগে সন্তুব না হলেও ব্যতিক্ৰম দেখা যেত কৌর্তন-  
বাসৱে।

মানদাৰুন্দৰীৰ খেয়ালাদি গানেৰ বেশি আসৱ নিজেৰ বাড়িতেই  
হত। গান শোনাতেন মুজৰো নিয়ে। তবে যে কোন ব্যক্তিৰ পক্ষে  
অবাৱিত দ্বাৱ নয়। পৱিচিত কোন সূত্ৰেৰ প্ৰয়োজন হত। কিছু  
স্বাতন্ত্ৰ্য বজায় রেখে চলতেন গায়িকা, পেশাদাৱ হলেও। মুজৰো  
কৱতেও যেতেন কলকাতাৰ কোন কোন আসৱে। কলকাতাৰ  
বাইৱে থেকেও ডাক আসত। শহৱেৰ আসৱ বসত বিশেষ ধৰনেৰ  
বাগান-বাড়িতে।

আসৱ থেকে গায়িকা বলে যে নাম, তা কিছু গতীবদ্ধ ছিল।  
কাৱণ তথনকাৱ সঙ্গীত-সমাজ তো সেইৱকমই। কিন্তু গ্ৰামোফোন  
ৱেকডে'ৱ মাধ্যমে তাৱ নাম সঙ্গীতপ্ৰিয় বাঙলীৰ ঘৱে ঘৱে পৌছে  
যায়।

মানদাৱ ৱেকড় হয় অন্তত ৫৫খোনি গান। আৱো ছিল কিনা  
নিশ্চিত বলা যায় না। কাৱণ সম্পূৰ্ণ তালিকা অপ্রাপ্য। কিন্তু সে  
যুগেৰ নিৱিখে তাৱ ৱেকডেৰ সংখ্যা থুবই বেশী। তথন ৱেকড় কৱা  
যেমন কঠিন ছিল যন্ত্ৰপাতিৰ কাৱণে, প্ৰচাৱও হত কম। গ্ৰামো-  
ফোনেৰ সেই প্ৰথম পৰ্বে মানদাৱ কাছাকাছি ৱেকড় কৱেন আৱ  
মাত্ৰ দুজন। পান্নাময়ী ও কুফভামিনী। জালচাঁদ বড়ালেৰ ৱেকড়-  
সংখ্যা মানদাৱ অৰ্ধেক। অবশ্য জালচাঁদ অল্লায় না হলে যে আৱো  
ৱেকড় কৱতেন, সে বিষয়ে সন্দেহ নেই।

মানদাৱ ৱেকড়-সঙ্গীত পৱিমাণেৰ সঙ্গে গুণেও লক্ষ্য কৱবাৱ

মতন। গানের মান চূল করে তিনি স্লোকপ্রিয় হননি। বরং মার্জিত, উন্নীত করেছিলেন রেকড'-শ্রোতাদের সঙ্গীত-রুচি। বাংলা খেয়াল, বাংলায় টপ্পখেয়াল শুনিয়ে তাদের কান তৈরি করে দেন।

একটি হিন্দী গান আছে তার তালিকায়। ‘এ বিরহী শুনো শুনো বচন হমারি’— ইমনে গাওয়া। গানখানি ছোট খেয়ালের সুন্দর নমুনা। আসরে যে পূর্ণাঙ্গ খেয়াল গাইতেন, রেকর্ডে তার সময়াভাব। এই তিনি মিনিটে তান বিস্তারের সুযোগ নেই। তবু তান করেছেন অলস্বল। বাণী আরম্ভের আগে ইমনের স্বর-বিশ্বাস শুনিয়েছেন। তারপরই জমিয়ে ধরেছেন—এ বিরহী শুনো শুনো বচন হমারি। বেশ মনোহারী শোনায় শিক্ষিতপটু গায়িকার কণ্ঠ।

ইমনটি ভিল তার অন্ত সব গানই বাংলা। তার মধ্যে দুখানি কীর্তনাঙ্গ। ‘এস এস রসিক নেয়ে’ ও ‘ও আমাৰ সুন্দৱ না’। মানদা যে উৎকৃষ্ট কীর্তন-গায়িকা ছিলেন, তার আভাস আছে এই রেকর্ডে। পূর্ণাঙ্গ পদাবলী তিনি কীর্তন আসরে শোনাতেন।

তার বাকি সব রেকর্ডের গান ছোট খেয়াল আৰ টপ্পখেয়াল ধৰনের। বাংলা খেয়ালাঙ্গও বলা যায়। কোন কোন গানের কাব্য অংশ দীর্ঘ। তাই তানের অবকাশ পাননি, যেমন—‘আৱ কবে দেখা দিবি মা হৱ রমা’। কিন্তু অন্ত গানগুলির সৌন্দৰ্য বৃদ্ধি করেছেন অল্প তানে। গানের ভাব কথার তানে শ্রতিমধুর হয়েছে। মোলায়েম বোল তানের ধৰনে গভীর হয়ে ফুটেছে বাণীর আবেদন। মানদাৰ টপ্পখেয়ালের মুসিয়ানা তিনি মিনিটের রেকর্ডও কিছু ধৰা আছে।

সঙ্গীত-রসিক অমিয়নাথ সান্ত্বাল এক জায়গায় বলেছেন, ‘উত্তম উত্তম টপ্পখেয়ালও শুনেছি বাংলাৰ গায়িকাদের মুখে। এ দেৱ মধ্যে মানদাসুন্দৱী ও কৃষ্ণভামিনীকে শীৰ্ষস্থানীয়া বলে মনে কৱতে বাধ্য হয়েছি।’ ( বেতাৰ জগৎ, ৩৩ বৰ্ষ, ১৩ সংখ্যা, পৃঃ ৫২১ )

যথা কথা। মানদাৰ রেকর্ডও তার সংক্ষিপ্ত প্রমাণ। আৱ

সংক্ষেপে রাগসঙ্গীত ও কাব্যসঙ্গীতের যুগল মিলন যেন। রাগ-কৃপে  
পরিবেশিত হয়েও বাংলা গানে রস স্ফুট।

কলাবতীর সুরেলা, সুমিষ্ট কণ্ঠ। পরিমাজিত প্রস্তুতি। নিটোল  
স্বরে পরিচ্ছন্ন উচ্চারণ ও গায়ন-ভঙ্গিমা। দুর্দুলী, হৃদয়স্পর্শী এক একটি  
গান। অনুভবে আবেগে সপ্রাণ। পরিমিতি বোধের জন্যে খেয়াল,  
টপ্পার ছোট ছোট তান বাংলা গানে মানিয়ে গেছে। ঈষৎ সুর-  
বিস্তার শোনা যায় কোন কোনটিতে। যেমন, ‘আর কারো কাছে যাব  
না আমি’ (মূলতান), কিংবা ‘যে যাবার সে যাক সই রে’ (পূরবী),  
কিংবা ‘যাবে কি হে দিন আমার বিকলে চলিয়ে’ (ভীমপলক্ষী)।

গায়িকার গলার তবিয়ৎ লক্ষ্য করবার। তারা গ্রামের পঞ্চম  
ধৈবতেও অনায়াস অটুট সুরেলা। নেই কোন স্বরবিকৃতি।

রাগের রূপ ফুটিয়ে তুলেছেন সাবলীলভাবে। একটি ভৈরবীতে  
(‘ও মা দয়াময়ী কোন গুণে তোর...’) মুলিয়ানায় দুই মধ্যম  
প্রয়োগ করেছেন। সব গানেই হচ্ছন্ন সুরপ্রবাহ। কোন চেষ্টা বা  
আড়ষ্টতা-রহিত। কি প্রেমসঙ্গীত, কি ভক্তিভাবের গান সকলই  
আন্তরিকতাময়।

শিল্পীর আবেদন উচ্ছ্বসিত হয়ে ওঠে শ্রোতার হৃদয়-তটেও।  
কেদারার গানখানি কি সুন্দর অনুভব জাগায়—

কতবার আসিয়া কত ভালবাসিয়া।  
গিয়াছি ফিরিয়া কত কাদিয়া কাদিয়া...।

এ তো শুধু স্বরবিন্ধাসের ছকে গেয়ে যাওয়া নয়। মিড দিয়ে  
দিয়ে কি মিষ্টি করে গাওয়া। কথার পরে কথার ভাবে, সুরের পরে  
সুরের তরঙ্গীতে মিলিয়ে মিশিয়ে দেওয়া। এক স্বর অঙ্গাঙ্গী সুরে  
জীন হয়ে যায় স্বরাস্তরে। বাণীর ‘বার’ ‘আসিয়া’ ‘বাসিয়া’ ‘গিয়াছে’  
‘কাদিয়া’-তে কি মধুর মিডে মোচড়ে শ্রোতার মর্ম সিঞ্চিত করে  
দেয়। কেদারার কোমল কারণ্যে হাহাকার করে বিরহিণীর  
মথিত অভিমান—

କତ ନିଶି ଜେଗେଛି କତଇ ବା କେଦେଛି  
ତବୁ ସାଡ଼ା ପାଇ ନା ସାଧିଯା ସାଧିଯା ॥

କି ପ୍ରତପ୍ତ ଆବେଗ ଆକୁଳ ହୟେ ଓଠେ ତାରା ପ୍ରାମେ—  
ହେ ନାଥ କୋଥା ତୁମି ଦେଖା ଦାଓ ଦେଖା ଦାଓ,  
ଆମି ଯେ ତୋମାରି, କୋଲେ ତୁଲେ ନାଓ ନାଓ...

ଦରଦୀ ସ୍ଵରେ ଆର୍ତ୍ତିତେ ଧ୍ୱନିତ ହୟେ ଓଠେ ‘ଦେଖା ଦାଓ ଦେଖା ଦାଓ,  
ଆମି ଯେ ତୋମାରି, କୋଲେ ତୁଲେ ନାଓ ନାଓ’ ଏଇ ଆଉ-ନିବେଦନ ।

ଦୌର୍ଣ୍ଣ ମର୍ମେର ସ୍ତରଣା ଶେଷ ଚରଣେର ଦୋଳାୟିତ ଛନ୍ଦେ ଝକୁତ ହତେ ଥାକେ—

ସହେ ନା ସହେ ନା ଆର ଆସା ଯାଓୟା ବାର ବାର  
ନିଯେ ଆସେ ନିଯେ ଯାଯ ମାତିଯା ମାତିଯା ॥

ଚିର-ଦୟିତାର ଚିର-ଅତ୍ୱପିର କାଦନ !

ତେମନି ମୂଳତାନେର ଗାନ୍ତିତେ ମୃତ ହୟେଛେ ଏକାକ୍ଷ ପ୍ରାଣେର  
ପ୍ରେମାବେଶ—

ଆର କାରୋ କାହେ ଯାବ ନା ଆମି  
ତୋମାରି କାହେ ରବ ହେ ।

ଆର କାରୋ ସନେ କବ ନା କଥା  
ତୋମାରି ସନେ କବ ହେ ॥

ଚିରସ୍ତନ୍ତୀ ବାସନା, ଯା ଚିରଦିନଇ ଅପୂର୍ବ ଥେକେ ଯାଯ !

କିଂବା ମିଶ୍ର ସାହାନାର ସେଇ ମରମୀଯା ଗାନ୍ଧାନି । ଅଲ୍ଲ କଥାର ତାନେ  
ଭାବେ ଏଥାନେ କେମନ ଶୁଷମାମୟ—

ତୋମାରି ପ୍ରେମେର କଥା ହୁଦୟେ ରଯେଛେ ଗାଁଥା ।

ନିଶିଦିନ ଜାଗେ ମନେ ମୋହାଗେର ତବ କଥା ॥

କତ କଥା ଛିଲ ମନେ,  
କତ ଆଶା ଛିଲ ପ୍ରାଣେ,  
ସେ ଆଶାଦଳ ଶୁଖ୍ୟେଛେ,  
ସେ ତୁଳ ଭେଙ୍ଗେ ଗେଛେ,  
ଏତ ପ୍ରାଣ ମୟେଛେ, କହିତେ ପ୍ରାଣେ ବ୍ୟଥା ॥...

ଆଶାବରୀର ଗାନ୍ତିତେ ଶିଳ୍ପୀ କେମନ ତାନ କରେଛେ, କାବ୍ୟେର ମାଧୁରୀ  
ଅକ୍ଷୁଣ୍ଣ ରେଖେ—

ଆମାୟ ଭାଲବାସ ନା ବାସ,  
ଆମି ତ କଥନ ତୋମାର ଛାଡ଼ିବ ନା ଆଶ ॥  
ଯଥାୟ ତଥାୟ ଥାକି,  
ତୋମା ଛାଡ଼ା ହଇଲେ ଶୁଖୀ,  
ମାରିଲେ ମାରିତେ ପାରୋ,  
ରାଖିଲେ ତୋମାର ପାଶ ॥

ହାସ୍ତୀରେ 'ଲାଜେ ମରେ ଯାଇ' ଗାନେ ଟଙ୍ଗାର ଚମକାର ଦାନାଦାର ତାନ  
ଦିଯେଛେନ । ଆବାର ଶେଷେ ଯୋଗ କରେଛେନ ତାରାଣା ।

'ପ୍ରାଣପଣେ ପ୍ରାଣ ସଂପଳାମ ଯାରେ' ବାଗେତ୍ରୀତେ ଶୁନ୍ଦର ଖଟକାର କାଜ  
ଦେଖିଯେଛେନ ।

ରାଗେର ସଙ୍ଗେ ଭାବେର ମିଳନେର ଆରେକଟି ଉଦାହରଣ । ଛୋଟ ଖେଳାଳ  
ଅର୍ଥଚ ଉପଭୋଗ୍ୟ କାବ୍ୟସଙ୍ଗୀତ—

ଯେ ଯାବାର ମେ ଯାକ ସଇ ରେ,  
ଆମି ତ ଯାବ ନା ଜଲେ ।  
ଭରିଯା ଏନେହି କୁଞ୍ଜ ନୟନ ମଲିଲେ ॥

ଏ ଗାନେ ପୂର୍ବବୀର ସକର୍ଳଣ ରେଶ ଗାନେର ଶେଷେଓ ପ୍ରାଣେ ରଣିଯେ ଶୁଠେ ।

ତୀର ଖାସ୍ତାଜେ ଏକଟି ଚମକାର ଗାନ ଦରଦ ଦିଯେ ଗାଓୟା—

ଯାତନା ଦିତେ ଆମାରେ ଆର କି ରେଖେଛ ତୁମି  
ଗରଲେ ସରଳ ଭେବେ ହୟେଛିଲାମ ଅନୁଗାମୀ ॥

କୋନ କୋନ ଗାନେର ଆରଣ୍ୟେଇ ତାନ ଦିଯେ ଗାୟିକା ଗାନେର ଡୌଳଟି  
ଦେଖିଯେଛେନ । ଯେମନ ବେହାଗେ 'ଓହି ଯେ ବାଁଶରି ବାଜିଲ ବିପିନେ' ।  
ମିଳୁତେ 'ଏଥନ୍ତି କି ବ୍ରନ୍ଦମୟୀ' ( ନାଟୋର-ରାଜ, ସାଧକ ରାମକୃଷ୍ଣର  
ରଚନା ) । ସୋହିନୀତେ 'ଓହି ଯେ ବାଜିଲ ବାଁଶରି ଯମୁନା ପୁଲିନେ' । ମିଆ  
ଭୈରୋଟି 'ମୀ ତୋମାର ଏ କୋନ ଦେଶୀ ବିଚାର' । ଇମନେ 'ଏ ବିରହୀ  
ଶୁନୋ ଶୁନୋ ବଚନ ହମାରି', ଇତ୍ୟାଦି ।

মানদার ভক্তি-ভাব ও পূজার গানগুলিও সুর আর গায়ন-রৌতিতে উপযুক্ত। ‘সাধে কি করণাময়ী করি মা তোমার উপাসনা’য় পূরবী সার্থক হয়েছে। আবার ভাব প্রকাশে সহায়তা করেছে বিলম্বিত সংয়ের ছন্দ।

সঙ্গীতরূপে শিল্পীর রসসৃষ্টি প্রায় সমস্ত গানেই। আর দৃষ্টান্ত না দিয়ে ঠার গ্রামফোন রেকর্ডের একটি তালিকা করে দেওয়া হল— এ তালিকার বাইরেও কোন রেকর্ড আছে কিনা বলা যায় না।

- (১) প্রাণপথে প্রাণ সঁপজাম যাবে---বাগেশ্বী।
- (২) আর কারো কাছে যাব না আমি—মূলতান।
- (৩) এ প্রেম ছলনা—ইমন।
- (৪) যে যাবার সে যাক সই রে—পূরবী।
- (৫) লাজে মরে যাই—হাস্বীর।
- (৬) কতবার আসিয়া কত ভালবাসিয়া—কেদার।
- (৭) যাতনা দিতে আর বাকি কি রেখেছ তুমি—খাস্বাজ।
- (৮) ওই যে বাঁশরি বাজিল বিপিনে—বেহাগ।
- (৯) তোমারি প্রেমের কথা হৃদয়ে রয়েছে গাঁথা—সাহানা মিশ্র।
- (১০) এখনও কি ব্রহ্মময়ী হয়নি মা তোর—সিঙ্কু।
- (১১) চিরদিন কি এমনি যাবে কালী বল না—ইমন কল্যাণ।
- (১২) কলুষ বিনাশনী কালী ও মা—তোড়ি ভৈরবী।
- (১৩) আর কবে দেখা দিবি মা হর রমা—হাস্বীর।
- (১৪) ওই যে বাঁশরি বাজিল ধনুনা পুলিনে---সোহিনী।
- (১৫) আমায় ভালবাস না বাস—আশোয়ারি।
- (১৬) মা তোমার এ কোন্ দেশী বিচার—ভৈরো মিশ্র।
- (১৭) ওমা দয়াময়ী কোন্ গুণে তোর—ভৈরবী।
- (১৮) আর বাঁশি বাজায়ে মা শ্যাম—বেহাগ খাস্বাজ।
- (১৯) মনের সাধে শিখের হৃদে—ভৈরবী।
- (২০) হরি হে কে জানে তব—ভীমপলশ্বী।

- (২১) শুনো শুনো বচন হমারি, এ বিরহী—ইমন।
- (২২) সাধে কি করুণাময়ী—পূরবী।
- (২৩) এস এস বলে রসিক নেয়ে—কৌর্তন।
- (২৪) ও আমাৰ সুন্দৱ না— „
- (২৫) যাবে কি হে দিন আমাৰ বিফলে চলিয়ে—ভৌমপলঞ্চী।  
 ( alias প্রতিভা দাসী )।
- (২৬) পীরিতি কয়েছি বিসৰ্জন, ওগো—খান্দাজ।
- (২৭) প্রাণ আমাৰ কাহারে জানাৰ—ভৈৱৰী।
- (২৮) কেন মন চায়—খান্দাজ মিশ্র।
- (২৯) হারে রে রাম নাম নিতি—ভৈৱৰী।
- (৩০) বাঁশিৰি বাজিল যমুনায় ( ওগো শ্যামেৰ )—ভৌমপলঞ্চী।
- (৩১) এস রে নয়নে, তোমায় লুকায়ে রাখি—ভৈৱৰী।
- (৩২) আমি তোমাৰ জন্মে কাঁদি—বিঁঁঝিট খান্দাজ।
- (৩৩) আৱ জলে যাওয়া হল ন' ( আমাৰ )—খান্দাজ।
- (৩৪) রাধা নামে অভিলাষী রাধা নামে সাধা বাঁশি—ভৈৱৰী।
- (৩৫) অঞ্চল ছাড়ি চঞ্চল শ্যাম ওহে গুণধাম—কাফি সিঙ্কু।
- (৩৬) শ্যাম রাখি কি কুল রাখি সই—খান্দাজ।
- (৩৭) চৰণ ছাড়িয়ে কেন দাও না—কানাড়া মিশ্র।
- (৩৮) আমি আমি করি বুঝিতে না পাৰি—ভৈৰো মিশ্র।
- (৩৯) আমায় পিছন থেকে কে যেন ডাকে—ভৈৱৰী।
- (৪০) কে বলে তাৰিণী তোমায় কালোবৱণী—ভৈৱৰী।
- (৪১) জানি না কি বলে ডাকি শ্যামা মা—খান্দাজ।
- (৪২) দেহি শ্রীচৰণ জুড়াক এ প্রাণ—ভৌমপলঞ্চী।
- (৪৩) সেথা আমি কি গাহিব গান ( রজনীকান্তেৰ রচনা )  
 —গোৱী।
- (৪৪) (সখি) তাৱে ভুলিব কেমনে—বিঁঁঝিট।
- (৪৫) ( আমায় ) বল সখি মনোবেদনা কৰ কাৰে।

- (৪৬) (সদা) কালী কালী কালী বল মন—রামকেলী।
- (৪৭) কালী করুণাময়ী শিবাণী অভয়া—পিলু মিৱ।
- (৪৮) ঐ ভয়ে মুদি নে আঁখি—সিঙ্গু কাফি।
- (৪৯) মা আমাৰ কি এমন দিন হবে—সিঙ্গু তৈৰবী।
- (৫০) সখি রে মৱমে পৱশে তাৱি গান—তৃপালী।
- (৫১) সে কেন রে কৱে অপ্রণয়।
- (৫২) সই রে তাৱি রূপ মনে পড়ে—পৱজ।
- (৫৩) মাৰো মাৰো তব দেখা পাই—সিঙ্গু।
- (৫৪) আমায় ছজনায় মিলে পথ দেখায় বলে।
- (৫৫) দুই হৃদয়ের নদী একত্র মিলিল যদি।

শেষের তিনটি গান রবীন্দ্রনাথের। কিন্তু রবীন্দ্রসঙ্গীত নয়।

কারণ রবীন্দ্রনাথের দেওয়া সুরে মানদা গাননি। যেমন, ‘মাৰো মাৰো তব দেখা পাই’ গানখানি রবীন্দ্রনাথ গঠন কৱেন কৌর্তনাঙ্গে। কিন্তু গায়িকা সেটি সিঙ্গুতে টপ্পার তান যোগে নিজস্ব ধৰনে গেয়েছেন। রবীন্দ্রনাথের সুরের কথা মনে না রাখলে, সেকালের একটি বাংলা টপ্পাঙ্গ গানের নির্দশন হিসেবে ধৰা যায় এটিকে। সে যুগের এক গুণী টপ্পখেয়াল ও খেয়াল-গায়ক ছিলেন ভাগলপুরের সুরেন্দ্রনাথ মজুমদাৰ। তিনিও ‘মাৰো মাৰো তব দেখা পাই’ টপ্পার তান দিয়ে গাইতেন। রবীন্দ্রনির্দিষ্ট সুরের পরিবর্তে আপনাপন ইচ্ছাকুল্যায়ী রবীন্দ্রনাথের গান গাইবাৰ দৃষ্টান্ত শুধু তাঁৰা নন। গহৰ জ্ঞানের কথা বলা হয়েছে তাঁৰ অধ্যায়ে। আৱো ছিলেন কৃষ্ণভামিনী, পূর্ণকুমাৰী, পিয়াৱা সাহেব, ব্ৰজেন্দ্ৰনাথ গঙ্গোপাধ্যায়, কে. মল্লিক প্ৰমুখ। তাঁৰা স্বেচ্ছাকৃত সুরে রবীন্দ্রনাথের গান শোনাতেন। কেউ গ্রামোফোনে, কেউ বা সাধাৰণ আসৱে। মানদাসুন্দৱী ভিন্ন অ-রবীন্দ্র সুরে তাঁৰ গান রেকৰ্ড কৱেছেন পূর্ণকুমাৰী, কৃষ্ণভামিনী, ব্ৰজেন্দ্ৰনাথ। আগেকাৰ কালে এমন চলত।

মানদাসুন্দৱীৰ গানেৰ আংশিক পৱিচয় আছে রেকৰ্ডে। তাঁৰ

সম্যক গুণপনা আসৱেই প্রকাশ পেত ।

শিল্পীর এই অস্তুরসন্তা-রূপ সুন্দর মনোমন্দির ।

আর লৌকিক পরিচয় কিরণময়ীর মতন ছায়ারহস্তে ঘেরা ।  
জীবন-কথা সামান্য মাত্র উক্তার করা যায় সেই আলো-অঁধারি  
থেকে ।

প্রায় শ'খানেক বছর আগেকার দক্ষিণ কলকাতা । ভবানীপুরে  
হাজরা পাকের পশ্চিমে একটি চিহ্নিত এলাকা, রামকৃষ্ণপুরে সঙ্ক্ষ্যা-  
বাজারের পাশে যেমন । হাজরা পাক পার হয়ে হাজরা রোড আরো  
পশ্চিমে গেছে । সে রাস্তার উত্তরে এক নিষিদ্ধ পল্লী ।

সঙ্কীর্ণ গলিযুঁজি নিয়ে সেই অঞ্চলটি । তার উত্তর-পশ্চিমে  
ধাঙ্ডদের বস্তি । বাকি সব জায়গা নিয়ে বারবধুদের বাস ।

তার মধ্যে একটি গলি কিছু সুপরিসর । মেটি উত্তরে বন্ধ ।  
দক্ষিণে, হাজরা রোডের দিক দিয়ে সেখানে যাতায়াত হয়ে থাকে ।

সে পল্লীতে ছোট মাঝারি নানা আকারের ঘর আর বাড়িও ।  
পাকা দোতলা একতলাও যেমন, তেমনি আছে টালির ঘর, টিনের  
চালা । অসচ্ছল থেকে অবস্থাপন্ন—নানা স্তরের ।

লঠনের আলোয় দরজায় দাঢ়ানোদের সংখ্যাই বেশি । আবার  
কজন বিশিষ্ট অস্তুরাজবর্তিনীও ।

এলাকার পশ্চিম দিকে সুস্থ সমাজের গৃহস্থ পাড়া । দক্ষিণে  
হাজরা রোডের পারেও যেমন ।

আর এত নিকটে থেকেও আদিম কলঙ্কিত জীবিকার শিকার  
এখানকার নিবাসিনীরা ।

তার মধ্যে কখনো বা ঘর-সংস্থারও দেখা যায় । সবই মাতৃতাত্ত্বিক  
পরিবার । পিতৃ-পরিচয় কচিং প্রকাশ ।

সঙ্ক্ষের পর সেসব গলিতে টিম্বিম্ব করে গ্যাসের আলো । তাতে  
অঙ্ককার ভাল কাটে না । সেখানকার আগস্তকরাও হয়ত চায় সেই  
আবছায়া । মিটমিটে আলোয় সেই ক্ষণিকের অতিথিরা আসে ।

তারা কিন্তু সামাজিক জীব। হতভাগিনীদের জীবিকার সংস্থান করতে যায় সমাজ ধেকেই। আবার রাতের অঙ্ককারে সমাজেই ফিরে থাকে।

মানদা-জননী এ পাড়ার এক বিশিষ্টা বাসিন্দা। তাঁর নিজস্ব আবাস। অর্থাৎ পরষ্পরে পদী সম্পত্তি। তিনি অন্য পর্যায়ের। কল্পার মতন সঙ্গীতগুণ ছিল না বটে। কিন্তু রূপবতী। তেমন তেমন কোন নির্ধারিত বিলাসীর সঙ্গে তাঁর সংস্রব।

কোন নাট্যমঞ্চের কর্তৃপক্ষ এককালীন তাঁর নাকি অনুরাগী পোষক ছিলেন। আর সে সঙ্গতিপন্নার তৈর্থস্থানে দান-ধ্যান ছিল পরিণত বয়সে। জীবনের শেষ পর্যন্ত তাঁর এখানেই বাস।

ই পরিবেশে মানদার আবাল্য জীবন। তবে ধরনধারণে কিছু ভিন্ন প্রকার। মায়ের দৃশ্য-রূপ পেয়েছিলেন। আর জননীর যা ছিল না, সেই কল্পাবতী হয়েছিলেন মানদা। তার প্রস্তুতিপর্বের এই মাত্র সংবাদ জানা যায় যে, উস্তাদ বিশ্বনাথ রাওয়ের তালিম অনেক-দিন পেয়েছিলেন। আর সঙ্গীত-বৃত্তিই হয় জীবনের অবলম্বন। কৌর্তন তিনি কার কাছে শিখেছিলেন, সেকথা জানা যায়নি।

পেশাদার গায়িকা হিসেবে মানদাস্তুন্দরী অত্যন্ত সফল হয়ে-ছিলেন। সমাদর স্বীকৃতিলাভের সঙ্গে উপার্জনও হতে থাকে দস্তুরমত। আর তাঁর প্রায় পরিণত বয়সে সামাজিক ধারণায় পরিবর্তন দেখা দেয়। অর্থাৎ আধুনিক যুগের সূত্রপাত। শিল্পীর সম্মানে মানদাও তখন স্থান পান একেকটি গৃহাসরে। তাঁর গুরুত্ব যথেষ্ট। কারণ, সম্মেলন-পূর্ব যুগে সেইসব ঘরোঁয়া আসরই ছিল প্রকাশ্য গুণপনা প্রদর্শনের মধ্য। তেমনি আসরে মানদা ঘোগ দিতেন শ্রেষ্ঠ কল্পাবৎদের সঙ্গে, একাসনে।

আসরের মুজরো, গ্রামোফোনের আয়, কৌর্তন-বাসরের দক্ষিণ। সবের জগ্নেই গায়িকার অতি সচ্ছল জীবনযাত্রা। জননীর "উত্তরা-ধিকারও হয়ত ছিল।

গ্রানিময় ছিল না নাকি তাঁর জীবন যাপনের ধারা। বজ্রবল্লভা  
নন মানদা আর মার্জিত কৃচিতে আস্ত্রধারাসম্পন্ন। বহিরঙ্গ  
কূপেও তাঁর প্রতিফলন দেখা যেত। হাব-ভাব অবয়বে এক  
'আভিজ্ঞাতা', যা এ সমাজে ছল্ভ-দর্শন।

হাজরা রোডের উত্তরে মেই গলিতে পাশাপাশি তিনখানি বাড়ি  
তাঁর। মাঝেরটি তুলনায় কিছু বড়। সেখানেই বসবাস করে গেছেন  
আমৃত্যু।

সে গৃহের সদরে মর্মর ফলকে লেখা—মানদা ভবন।

গানের জগ্নে তো খুবই বিখ্যাত হয়েছিলেন। এ অঞ্চলে তাই  
সকলের পরিচিত থাকে তাঁর নাম। এমন কি, মেই বসত বাড়ির  
সরু রাস্তাটিকে লোকে বলে—মানদার গলি।

আরো একজন নামী গায়িকার বাস এই গলিতে ছিল। মানদা  
ভবনের উত্তর দিকে। প্রসিদ্ধ কৌর্তন-গায়িকা হেমাঙ্গিনী। শুধু  
কলকাতায় নয়, বাংলার নানা জেলা থেকেও ও হেমাঙ্গিনীর ডাক আসত  
কৌর্তনের আসরে।

মানদার সঙ্গে হেমাঙ্গিনীর দ্রুততা দেখা যেত। অতি নিকট  
প্রতিবেশিনী। মানদার একটি বাড়ির পরেই হেমাঙ্গিনীর বাস।  
উর্ধ্বার ভাব ছিল না, সমব্যবসায়িনী হলেও। বরং ছজনের সহ-  
যোগিতা দেখা যেত। গানের ব্যাপারে আদান-প্রদান। কোনদিন  
হয়ত হেমাঙ্গিনীর হারমোনিয়ম আসত মানদার বাড়িতে। জানলায়  
মাথা কাত করে হেমাঙ্গিনী দেখতেন, প্রিয় দামী হারমোনিয়মটি বাহক  
ঠিকমত আনচে কিন।

সেই হেমাঙ্গিনীর পুত্র সতীশ ঘোষ। পরে কলকাতায় এক  
উৎকৃষ্ট কলাবৎ হন। যেমন ক্ষেয়াল তরানার গায়ক। তেমনি  
গুণী তুলিয়া।

পিতৃপরিচয় অজ্ঞাত থাকে এ পাড়ার সন্তানদের। কিন্তু সতীশ-  
চন্দ্রের ঘোষত্ব কি করে ঘোষিত হল, কে জানে।

হেমাঙ্গিনী মানদার প্রায় সমবয়সিনী। কৌর্তন ভিল অঙ্গ গান গাইতেন না। সেজন্তে তাঁর গানের আসর হত না সে বাড়িতে।

কিন্তু মানদার আসর নিজের ঘরে প্রায়ই হয়ে থাকে। মানদা ভবনের দোতলায়।

কক্ষটি মাঝারি আকারের। কিন্তু ভালভাবে সাজানো। ওপরে আলোর একটি বাড়। ঘরের অনুপাতে সেটি বড় বলতে হয়। তিন দিকের দেয়ালেই একেকটি প্রমাণ মাপের আয়না। দামী, ভিনিশীয় তৈরী। মেঝে ভাল কার্পেটে ঢাকা।

মানদার অনেক দিন-রাতের সঙ্গীত-সঙ্গে ধন্ত সেই ঘর। কত নিষ্ঠক নিশ্চিথে সে পল্লীর পশ্চিমে, দক্ষিণের বাড়ি থেকে লোকে শোনে তাঁর গান।

মানদা ভবনে বিশ্বনাথ রাও এসেছেন শিক্ষক রূপে। গুরুর সঙ্গে ছাত্রীর সঙ্গীতিক যোগাযোগ অনেকদিন পর্যন্ত থাকে। বিশ্বনাথজীর সঙ্গে কখনো আসতেন কোন শিশু। গুরু-ভগ্নীর কাছে সঙ্গীত সম্পর্কে। ব্রজেন্দ্র গাঞ্জুলী এইভাবে এসেছেন। কিছু সৌখ্য লোককে দেখা গেছে মুজরো দিয়ে মানদার গান শুনতে।

কিন্তু-সঙ্গীত জগতের বাইরে থেকেও কিছু ব্যক্তির আগমন মানদা ভবনে ঘটত। তাঁর কারণ একেবারে ভিল। তাঁদের বলা ষায় সমাজসেবী বা দেশসেবী।

সঙ্গীত ছাড়া আরো কিছু মহৎ গুণও পতিতার ছিল। দেশের প্রতি ভালবাসা স্থান পেয়েছিল তাঁর হৃদয়ে। বিপ্লবীদের তিনি সহায়তা করতেন গোপনে, এই জনক্রিয়। বন্ধান্ত্রণ ও অন্যান্য দেশ-সেবার কার্যেও অর্থ দিতেন। অসহযোগ আন্দোলনেও নাকি সহানুভূতি ছিল গায়িকার। সেই জাতীয় আলোড়ন কোন কোন নটীর প্রাণেও সাড়া জাগায়। যেমন, পুরানো আমলের অভিনেত্রী নীরদাসুন্দরী। মানদাও তেমনি একজন।

এককালে একটি বইয়ের খুব প্রচার হয়েছিল—‘শিক্ষিতা পতিতার

আঞ্চলিক—মানদা দেবী প্রণীত।’ গায়িকা মানদাসুন্দরী সে লেখিকা নন। বইটি জাল। ‘মানদা দেবী’ নামে কোনও নারীর রচনাও তা নয়। অসাধু লেখকের ব্যবসায়িক ফন্দী মাঝে।...

গ্রামোফোন রেকর্ড গায়িকার নাম মুজিত থাকত—‘মানদা-সুন্দরী দাসী।’ রেকর্ড সঙ্গীতের পুস্তকাদিতেও তাই। শিল্পী নিজেও ‘দাসী’ পরিচয় দিতেন। দস্তখৎ করতেন সেইভাবে। সেকালে সেই বিনীত আচরণেরই চলন ছিল। স্বয়ং-আখ্যাত। ‘দেবী’-কুলের আবির্ভাব হয় অনেক পরে। মানদাসুন্দরীদের অমন অস্তুৎ দাবীদার হওয়া স্বপ্নাতীত। দেখে শুনে রাজশেখের বশ মশায় বেশ টিপ্পনী কেটেছেন—এ যুগের সিনেমাগ্যালীরা দেবীদের জাত মেরে দিয়েছেন!

যাক সে কথা। গায়িকার একটি রেকর্ড (‘যাবে কি হে দিন আমার বিফলে চলিয়ে’) দেখা যায়—‘Manda Sundari Dasi alias Prativa Dasi’ অর্থাৎ মানদাসুন্দরী দাসী ওরফে প্রতিভা দাসী।

কৌতুহল জাগায় মানদার এই প্রতিভা নামটি। যেন আধুনিক ভাবের কিংবা গৃহস্থ-কল্পার স্মারক। সে যুগের নটীদের এ ধরনের নাম প্রচলিত ছিল না। তাদের পরিচিতি থাকত ‘বালা’, ‘সুন্দরী’, ‘ময়ী’ ইত্যাদি যোগে।

প্রতিভা কি তার নিজস্ব নাম বা ‘পিতৃ’দত্ত, অথবা জীবনসঙ্গীর সম্মাধিত? এই মাজিত নামের অস্তরালে কোন উল্লেখযোগ্য পরিচয় আঘাতে করে আছে কিনা কে জানে। গায়িকার প্রতিকৃতিও যেন আভাস দেয় কোন সুভজ্জ উৎস।...

জীবনের শেষদিকে অগ্র রূপে দেখা যেত মানদাকে। এ অঞ্চলের লোকেরা তাকে প্রত্যহ দেখতেন। গানের আসরে নয়। সকাল-বেলা তিনি যেতেন গঙ্গাস্নানে।

নিযুক্ত ট্যাঙ্কিটি গলির মোড়ে হাজরা রোডে এসে দাঢ়ায়। এক

বৃক্ষ শিখ তার চালক। হর্ণ শুনে মানদা এসে বসেন গাড়ির পিছনের  
সৌটে। হাজরা রোড়টুকু পার হয়ে হরিশ মুখার্জী স্ট্রিট বরাবর ট্যাঙ্ক  
চলে যায়। উত্তরে, বড় গঙ্গার দিকে।

প্রতিদিন সকাল সাতটা সাড়ে সাতটার সময়।

তখন নতুন কেউ সামনে থাকলে এ পাড়ার লোক তাকে দেখায়।  
ট্যাঙ্কের দিকে সন্মুখের সঙ্গে চেয়ে, বলে, ‘ওই গাড়িতে মানদামুন্দরী।  
মন্ত বড় গাইয়ে।’

আরো পরে দৃষ্টিশক্তি হারাল গায়িক। তখন থেকে গঙ্গামুন্দুনে  
যাওয়াও বন্ধ। পাড়ার লোকেরা আর ঠাকে সকালে দেখতে  
পায় না।

তবে অতিথিরা ঠার সাক্ষাৎ পেতেন মানদা ভবনে। বহুদিনের  
ব্যবহার করা সেই দোলতার ঘরটিতে। দেয়ালে হাত দিয়ে এসে  
আন্দাজ করে মানদা বসেন। গান একেবারে অস্তর্ধান করেনি  
এ পর্বেও। সংবাদ পাওয়া যায় এই পর্যন্ত।

তারপর কবে সে সঙ্গীত স্তুতি হয়ে যায়, শেষ নিঃশ্বাস পড়ে  
সেই শীর্ষস্থানীয়া টপ্ খেয়াল গায়িকার—সংবাপত্রেও সে খবর স্থান  
পায় না।

অবশেষে সেই পল্লী, সেই গলি, মানদা ভবন, গ্যাসের আলো  
লুণ্ঠ হয়ে যায় সবই। মানদার মৃত্যুর কয়েক বছর পরে।

সলস্ত এলাকাটি ধূলিসাং করা হয়। নগর কলকাতার সে এক  
নবীকরণের অভিযান। উন্নয়ন পরিকল্পনার এক কৃপায়ণ ঘটে হাজরা  
পাকের পশ্চিম বরাবর।

পুরাতনের অবলোপে নতুন বসতি গড়ে উঠে।

মানদামুন্দরী হেমাঙ্গিনীদের অঞ্জলি, তার উত্তর-পশ্চিমের ধাঙ্গড়  
বন্তি সমস্ত নিশ্চিহ্ন করে দেখা দেয় আধুনিক রূপ। নতুন নতুন  
বাড়ির সারি। সামাজিক গৃহস্থ পরিবার। সুপরিসর, বিহ্যৎ  
'আলো'র পথ। নব লোকালয়া-নতুন বাজার। বিপণি শ্রেণী...।

গুরু স্মৃতি থাকে, সে সঙ্গীতকল্টের কিছু নির্দশন চিহ্ন অবস্থন করে। নিত্যকালীন আনন্দলোকের নান্দনিক। সুন্দরের মন্দিরে যে কলাবতী সুরের আরতি করেছিলেন তারই বিচ্ছিন্ন অনুরণ। কোন্ সুন্দরের অচিন্পাখির সুর তোলা শ্রোতার হৃদয় কলরে।

আর সেই আসরের কথা। একটি আসরের সূত্রে আরেকটি প্রসঙ্গ। এক প্রদীপের শিখা থেকে অন্ধ দীপ জ্বালানো।

মানবার গলি আর মানদা ভবন তখনো কালগ্রাসে পড়েনি। নিষ্ঠিত রাতে দোতলার সেই ঘর থেকে ভেসে আসে সুরেলা গলার গান, তখনকার কথা। ১৯২৭ সালে গ্রীষ্মের সময়।

ল্যান্ডাউন রোডের নাটোরভবনে সেদিন আসর বসেছে। মহারাজা জগদিস্ত্রনাথ তখন পরলোকে। সঙ্গীতচর্চার ধারা বজায় রেখেছের পুত্র যোগীস্ত্রনাথ। সে আসরের সময় গুরু বিশ্বনাথজীও ছিলেন না। হয়ত তারই সূত্রে আসেন শিশ্যা মানদা। আরো কজন কলাবৎ এসেছিলেন। বেশ বড় আসর হয়েছে একতলার প্রশংসকক্ষে।

ফৈয়াজ থা খেয়াল গাইলেন। গোয়ালিয়রের মৃত্যুঝয় মুখোপাধ্যায়ও শোনালেন সেই রৌতির গান।

কলকাতার সুরেন্দ্রনাথ দাস এমন মেয়েলি গলায় বাইজীদের ঢঙে ঠুঁঠি গাইতেন যে তাঁর নাম হয়ে যায় ‘সুরেন বাইজী’। কাশীর ওস্তাদ বড়ে রামদাসজীর ভাল ছাত্র তিনি। চতুরঙ্গ গানেও মুসিয়ানা দেখাতেন। এ আসরে ঠুঁঠি গাইলেন সুরেন্দ্রনাথ।

খেয়াল ও টপ্পাগায়ক বিজয়লাল মুখোপাধ্যায় খেয়াল শোনালেন। আর সেতার, সুরবাহার বাজালেন বাংলার এক দিকপাল যন্ত্রী জিতেন্দ্রনাথ ভট্টাচার্য। আরো কজনের গান সেখানে হয়েছিল।

মানদা গেয়েছিলেন খেয়াল।

কিন্তু তাঁর গান বেশিক্ষণ হয়নি। আরো হতে পারত খানিকক্ষণ।

সকলের আরো শোনাবার ইচ্ছা ছিল। কিন্তু আর গাইলেন না মানদা।

জিতেন্দ্রনাথের সঙ্গে তবলিয়া পঞ্চানন চট্টোপাধ্যায় সঙ্গত করেছিলেন।

তাঁর মনে আছে—‘বেশ ঠাস লয়ে মানদা গাইলেন একতালায়। গান খুব জমে উঠেছিল। কিন্তু যেন হঠাৎ তিনি শেষ করে দিলেন। কেন যে থেমে গেলেন, বোঝা যায় না। জমাটি গান এমনভাবে বন্ধ করতে দেখে অনেকেই আশ্চর্য লাগল। কেউ যেন কিছু বললেন মনে হচ্ছে। তাঁর উত্তরে মানদা বললেন, ‘আজকে আর থাক।’ তাঁকে দেখে মনে হয় বেশ রাশভারি।’

সে আসরেই মানদার কথা হয়েছিল জিতেন্দ্রনাথের সঙ্গে। ভট্টাচার্য মশায়ের বাজনা তিনি আছে ও শুনেছিলেন। মৌখিক আলাপণ ছিল তাঁর।

কিন্তু তাঁর প্রতি মানদার কতখানি শুন্দা, তাঁকে একদিন নিজের বাড়িতে গান শোনাবার ইচ্ছা মনে মনে কিরকম পোষণ করতেন, তা এই আসরে জানা গেল।

তখন জিতেন্দ্রনাথের বাজনা হয়ে গেছে। আসরের এক পাশে মানদা তাঁকে প্রণাম করে বললেন, ‘বাবা, বলতে সাহস হয় না। কিন্তু আমার অনেকদিনের ইচ্ছে। দয়া করে একদিন আমার বাড়িতে পায়ের ধূলো দেবেন কি? ভাল করে আপনাকে গান শোনাতে পারি?’

‘কেন, মা’, মানদার কুণ্ঠা লক্ষ্য করে তিনি বললেন, ‘সাহস না হবার কি আছে?’

মাথা একটু নীচু করে গায়িকা বললেন, ‘সবাইবার চোখে আমরা তো...অন্ত শ্রেণীর...’

সেতার শুরুবাহারের শিল্পী হয়ত অভিভূত বোধ করলেন। অন্তরের সঙ্গে জানালেন, ‘তুমি তো আমাদের মতন এই বিদ্যা নিয়ে

আছ মা। এখানে অন্ত কোন ঝেণীর প্রশ্ন নেই। আমি যাব  
তোমার বাড়ি।'

কৃতার্থ বোধ করলেন মানদা। জিতেন্দ্রনাথ তাঁর গান শুনতে  
স্বীকৃত হয়েছেন!

তারপর নিজের তবলচৌকে দেখিয়ে বললেন, 'তাহলে ওকেও  
নিয়ে যাব '

স্নেহভাজন সঙ্গতকার পঞ্চানন চট্টোপাধ্যায়ের সঙ্গে পরিচয় করিয়ে  
দিলেন, 'আমার সঙ্গে বাজায়। বেনারসের মান্নু সহায়ের ভাল  
তালিম পেয়েছে। ভাট্পাড়ায় বাড়ি।'

ভক্তিমতী সপ্রতিভ মানদা। জিতেন্দ্রনাথের কথা শুনেই ছু হাত  
জোড় করে কপালে টেকিয়ে বললেন, 'ভাটপাড়া? ব্রাহ্মণ পাওতের  
জায়গা!'

তারপর তাঁকেও আমন্ত্রণ জানালেন, 'তাহলে, কাকাবাবু,  
আপনিই সেদিন বাজাবেন। অত দূর থেকে আপনার তবলা আনবাব  
দরকার নেই। আমার বাড়িতে আছে।'

পরের সপ্তায় শানবাব তাঁদের দিন শুরু হল।

সেদিন সন্ধ্যার পর এলেন জিতেন্দ্রনাথ। সঙ্গে পঞ্চানন ও তাঁর  
এক বন্ধু। মানদা ভবনের দোতলার সেই ঘরটিতে।

অন্ত কোন শ্রোতা নেই। শুধু তাঁদের জন্মেই আসব।

কার্পেটের একদিকে হারমোনিয়াম, তানপুরা, তবলা।  
অন্ত ধারে গোটাকয়েক তাকিয়া। অতিথিরা সেইদিকে  
বসলেন।

অভ্যর্থনা করলেন মানদা। জিতেন্দ্রনাথের পদবুলি নিলেন।  
ছ-চার কথার পর বললেন, 'একটু চা হবে তো, বাবা?'

'হ্যাঁ, তা...'

মানদা নিজে থেকেই বললেন, হয়ত আচার বিচারের কথা মনে  
রেখে, 'বাইরে থেকে আসবে। পাঁড়েজী এনে দেবে।'

দারোয়ান গোছের এক হিন্দুস্থানী চা আর কচুরি আলুর দম নিয়ে এল।

অতিথিরা জলধোগ করছেন, এমন সময় এলেন তাঁর তবল্চী মৌলা বখ্স।

মানদাকে দেখে জিজ্ঞেস করলেন, ‘গানা হোগি ?’

‘হঁ। সেকিন্ আজ এই বাবু বাজাবেন। এঁর বেনারস বাজের তালিম।’

মৌলা বখ্স একপাশে বসে বললেন, ‘তা আমি শুনতে পারি তো ?’

‘হঁ, হঁ। কিংউ নেহি ?

আজকের তবল্চী বাদে তিনজন মাত্র শ্রোতা। বাজনার দিকে বসে মানদা কোলে তুলে নিলেন তানপুরা।

ওপর থেকে ঝাড়ের আশো তাঁর মুখে পড়েছে। তার প্রাত-কলনে দেয়ালে দেয়ালের আয়নায় মানদার প্রতিবিম্ব। বাছল্য-বর্জিত তাঁর প্রসাধন। শুভ্র পরিধান। অঙ্কারের একটি বৃহৎ আকারের মুক্তার লকেট তাঁর বুকে, চিকণ সরু হারের নীচে দৃশ্যমান। বাহতে এক এক গাছি মুক্তার কঙ্কন।

মুখভাব থেকে তমুশীতে বিচ্ছুরিত একটি দীপ্তি। ব্যক্তিক সম্পন্ন শিল্পীর অভিব্যক্তি যেন।

তানপুরায় স্বর মেলানো সম্পূর্ণ হল। স্বর্গীয় স্বড়োল ছটি অঙ্গুলি অমর-গুণ্ঠন তুলতে লাগল চারটি তারে তারে।

পঞ্চানন তানপুরার স্বরে তবলা বেঁধে নিতেই মানদা গান আরম্ভ করলেন। সদা প্রস্তুত, সাধা কর্ষে ধরে নিলেন—মুদ্রি মোরি কাহেকো...

আড়ানায় সেই বিখ্যাত বন্দিশের স্থায়ী কলি—

মুদ্রি মোরি কাহেকো। ছিন্মেঘি তুরক ছেলুওয়া।

কাহে কিও ম্যয় তোর রে...

উত্তরাজ প্রধান রাগ। অতি বিলম্বিত লয়ে গাইতে আগলেন  
উদাত্ত সুরেলা কঢ়ে।

রাগের বাদী স্বরই তারা গ্রামের ষড়জ। মানদার পিক কঠ  
মধ্য থেকে তার সপ্তকে অবলীলায় সঞ্চরণ করতে লাগল। আর  
মুসিয়ানার সঙ্গে অতিরিক্ত কিছু ফুটে উঠল তার গানে। প্রাণের  
নিবিড় অনুভব স্বরের অঞ্জলীতে। ভঙ্গি-শুকার পাত্র গুণীকে  
নিবেদনের এক পরম তৃপ্তির আশ্বাদন। ধীর ছন্দ-কারুতে রাগের  
মনোহারী বিস্তার শুধু নয়। গভীর অন্তরের রূপায়ন।

তার আবেদন প্রবীণ কলাকারের চিহ্নে সাড়া জাগাল। তিনি  
সাবাস দিতে লাগলেন সৌন্দর্যসৃষ্টির ক্ষণে ক্ষণে।

গানের বাণী অকিঞ্চিতকর। কিন্তু তারই ওপর ভর করে সুরের  
অপরূপ বিশ্রাম গায়িকা গড়ে তুললেন।

অন্তরায় সে প্রতিমার পূর্ণতা—

ইত্না হি ইত্নাত রঙিলে মারে কাহা

অব মোর রে ॥

অজস্র সার্থক আসরের গায়ন-শিল্পী। অনেক মুজরো বিনা যাকে  
শোনায় সুযোগ মেলে না। তিনি আজ রসসৃষ্টির এক তুঙ্গে আরোহণ  
করলেন এই সখের, নিরালা আসরে। সাধিকা কলাবতীর প্রভাবে  
স্বরখানি সুরপুরীতে পরিণত হল। ভট্টাচার্য মশায় উপভোগ করতে  
লাগলেন চক্ষু মুদ্রিত করে। সুরের স্পন্দনে আনন্দালিত তার  
আমস্তক। অঙ্গ ভরে উঠল চোখে।

মাঝে মাঝেই তিনি উচ্ছ্বসিত সাধুবাদ দিতে লাগলেন। ভাবে  
সজল-চক্ষু মানদাও।

চিমা লয়ের একটি গানেই প্রায় দেড় ঘণ্টা পার হয়ে গেল।  
আড়ানার বিস্তার যতখানি সন্তুষ্ম মানদা দেখালেন দরাজ গলায়।

সুরের ধারা যখন শেষ ঝাঙ্কারে নিখর হল, সে এক দৃশ্য। প্রাঙ্গ  
শ্রোতার সঙ্গে গায়িকার অঁধি থেকেও অঙ্গ ঝরছে।

কয়েক মুহূর্তেই আস্থা হলেন মানদা। পঞ্চাননকে ডবল।  
সঙ্গতের জন্যে সুখ্যাতি করলেন।

চোখ মুছে জিতেন্দ্রনাথকে বললেন, ‘বাবা, একটু বশুন। আমি  
আসছি।’

শিল্পী এবার তৎপর হলেন গৃহিণীর কর্তব্যে। জলযোগের  
বাবস্থা রেখেছিলেন। কত রকমের আম টুকরো করে সাজালেন  
শ্বেত পাথরের প্লেটে। মিষ্টান্নের মধ্যে রাবড়ির পাতিও  
রইল।

পাঁড়েজৌকে দিয়ে সেসব আনালেন অতিথিদের সামনে।  
বললেন, ‘বাবা, একটু মিষ্টি মুখ করুন।’

তাদের সামনে বসে যত্ন করে খাওয়াতে লাগলেন।

আগ্রহের সঙ্গে মানদা বললেন, ‘এই সামান্যর মধ্যে আর কিছু  
ফেলবেন না ষেন।’ তারপর ফলের দিকে দেখিয়ে ক’টি আমের নাম  
করলেন, ‘এই আমটুকু আগে মুখে দিন-তারপর এটি নেবেন।  
এর আলাদা জাত, ঠাণ্ডা জলে ডুবিয়ে রেখে খেতে হয়। আর এই  
ষেটি কোণে রয়েচ্ছে, সবশেষে নেবেন। ওর পরে আর কোন ফল  
লাগবে না।’

শুনতে শুনতে প্রধান অতিথি বিশ্বয় জানালেন, ‘ব্যাপার কি?  
এত রুকমের আম কি করে যোগাড় করলে?’

হাসিমুখে মানদা বললেন, ‘মুশিদাবাদে গাইতে গিয়েছিলুম।  
ওস্তাদ কাদের বক্স এই আমের ঝুড়ি ট্রেনে তুলে দিলেন। আপনারা  
ত্রাঙ্কণ এসেছেন, আপনাদের সেবায় লাগল।’

আমের প্রকারভেদ তাঁরা আস্বাদ করলেন।

শেষে, পরিতোষের সঙ্গে রাবড়ির পাতি ও নিংশেব করলেন  
অহিফেনসেবী জিতেন্দ্রনাথ।

বিঞ্চামান্তে কথায় কথায় রাত হল। তখন তিনি উঠে দাঢ়ালেন  
সঙ্গীদের নিয়ে।

মানদা ভক্তিভূরে তার পায়ে হাত দিয়ে প্রণাম করলেন। অঙ্গ-  
প্রাণ থেকে নিয়ে দক্ষিণা রাখলেন পায়ের কাছে।

তারপর গাঢ় ঘরে বললেন, ‘গান শেখা আজ আমার সার্থক  
হল।’

ভট্টাচার্য মশায় আশীর্বাদ করে বিদায় নিলেন।

## এলাহাবাদের ঝুপদৌ

### বিশ্বেশ্বর বন্দ্যোপাধ্যায়

মোগজ-সরাই জংশনে গাড়ি থেমেছে। অনেকক্ষণ দাঢ়াবে এখানে। এতক্ষণ কামরার মধ্যে বসে থেকে কি হবে? প্ল্যাটফর্মে একটু ঘুরে আসা যাক। এই ভেবে বিশ্বেশ্বর প্ল্যাটফর্মে বেরিয়ে এলেন।

ঝুপদৌ বিশ্বেশ্বর বন্দ্যোপাধ্যায়।

বাংলাদেশে তাঁর নামটি তখনো পরিচিত হয়নি। পরেও তেমন প্রসিদ্ধ ছিল না বটে। কারণ বাংলায় তিনি থাকতেন না তখন বাংলার সঙ্গীতসমাজের সঙ্গে কোন যোগ ছিল না তাঁর। কিন্তু পশ্চিমের সঙ্গীত-জগতে তাঁর যথেষ্ট নাম। কাশী এলাহবাদ আগ্রা গোয়ালিয়র। এমনি নানা আসরে অনেকে তাঁর গান শুনেছেন। বড় বড় জলসায় শ্রোতারা ঝুপদৌ হিসেবে দেখেছেন তাঁকে।

পশ্চিমে তাঁর বেশি পরিচয় গুরুর নামে। ঝুপদাচার্য অযোধ্যাপ্রসাদ তেওয়ারীর প্রিয় শিষ্য বলেই সকলে বিশ্বেশ্বরকে জানেন। গুরুর সঙ্গে জুটিতেও শোনা গেছে তাঁর গান। ‘এলাহবাদের বিশ্বেশ্বর’ নামেই তিনি বেশি বিখ্যাত।

কারণ এলাহবাদের বাসিন্দা তিনি। সেখানে তাঁর ছাত্ররও দেখা দিয়েছেন। গড়ে তুলেছেন ‘এলাহবাদ সঙ্গীত সমাজ’। তাঁর কর্ণধার এখানকারই নগেন্দ্রনাথ। ঝুপদ-গায়ক নগেন্দ্রনাথ মুখোপাধ্যায়, বিশ্বেশ্বরের প্রধান শিষ্য।

এলাহবাদ থেকে কাশী। এসব অঞ্জলেই বেশি নাম বিশ্বেশ্বরের। আর এলাহবাদে তো প্রায় সকলের পরিচিত। সরকারী চাকুরির জন্মে এখানে বসবাস আরম্ভ হয়েছিল। তখন থেকেই ‘প্রবাসী’ বাঙালী। বাংলা থেকে পশ্চিমাঞ্চলে যাওয়া সেকালে ছিল কষ্টসাধ্য।

সময়সাপেক্ষও। জীবিকাশ্চত্রে সে অঞ্চলে বসবাস করলে কালে-  
ভদ্রে বাংলায় আসা হত। অথচ মন পড়ে থাকত বাংলার নিকে।  
ৰৱকুনো বাঙালীর অন্তরে প্ৰবাসেৰ তৃঃখ জাগত পশ্চিমে বাসেৰ  
সময়।

গোটা ভাৰতবৰ্ষ যে আমাৰ স্বদেশ এ বোধ ঠাঁদেৱ ছিল না। তাই  
পশ্চিমেৰ বাঙালীৱা নিজেদেৱ এমনি প্ৰবাসী বলেই মনে কৱতেন  
সেকালে। যে-জন্তে, এই এলাহবাদ থেকেই পত্ৰিকা প্ৰকাশ কৱতে  
ৱামানন্দ চট্টোপাধ্যায় মহাশয় তাৰ নাম দেন—প্ৰবাসী।

বাংলাৰ বিশ্বেশ্বৰও তেমনি এলাহবাদ নিবাসী হয়েছিলেন,  
ৱামানন্দেৰও প্ৰায় ৪০ বছৰ আগে। আৱ কথনো কথনো  
আসতেন বাংলায়। তবে বেশিদিন থাকবাৰ সুবিধা হত না। ছুটি  
কাটিয়ে যেতেন মাত্ৰ, বেহোলায় কিংবা বলাগড়ে।

সেবাৱও তেমনি কলকাতায় যাত্রা কৱেছিলেন। সপৰিবাৱে,  
অনেকদিন পৱে ফিৱছেন ছুটি নিয়ে। সঙ্গে স্তৰী পুত্ৰ কষ্ট।

বাৱাণসী পাৱ হয়ে ট্ৰেন মোগলসৱাই পৌছল। এখানে দাঢ়াবে  
প্ৰায় আধ ঘণ্টা।

বিশ্বেশ্বৰ গাড়ি থেকে নামলেন। প্ৰকাণ্ড ঝংশন স্টেশন  
মোগলসৱাই।

ইাক দিয়ে ঘূৱছে ফেরিওয়ালাৰ দল। কেউ বা দোকান  
সাজিয়ে বসেছে। চা, পান থেকে খাবাৱ, ফল আৱ নানা। জিনিসপত্ৰেৱ  
বেসোতি।

এক জায়গায় পেয়াৱা বিক্ৰি হচ্ছে। সেদিকে এগিয়ে গেলেন  
বিশ্বেশ্বৰ। অতি উৎকৃষ্ট কাশীৰ পেয়াৱা। যেমন বড়, তেমনি টাটকা  
ৱসাল। দেখলেই কিনতে ইচ্ছে হয়।

বিশ্বেশ্বৰও কিনলেন পেয়াৱা।

আৱ সঙ্গে সঙ্গে গুৰুজীৰ কথা মনে পড়ল। অযোধ্যাপ্ৰসাদ  
পেয়াৱা খেতে বড় ভালবাসেন।

অমনি গুরুর জন্মেও কিনে নিলেন এক টুকরি। মহা আনন্দে  
সওদা নিয়ে কামরার দিকে চললেন।

তখনি মনে হল—কি আশ্রয়! গুরুজীকে এ পেয়ারা কি করে  
দেব? তিনি তো এখন বৃন্দাবনে। আর আমি এই ট্রেনে চলেছি  
কলকাতায় পরিবার নিয়ে!

বিশ্বের তাড়াতাড়ি কামরায় ফিরলেন।

স্ত্রীকে পেয়ারার টুকরি দেখিয়ে এই সমস্তার কথা বললেন,  
'দেখো, গুরুজীর জন্মে পেয়ারা কিনে ফেলেছি। কিন্তু তিনি  
রয়েছেন বৃন্দাবনে। এখন কি করি?'

গৃহিণী ঘেমনি বুদ্ধিমত্তা, তেমনি পতি-পরায়ণ। স্বামীকে জিজেস  
করলেন, 'তোমার কি এখন গুরুদেবের কাছে যাবার ইচ্ছে?  
সেখানে গিয়ে তাকে এই পেয়ারা দিতে চাও?'

অত্যন্ত খুশি হয়ে বিশ্বের জানালেন, 'ঠিক তাই। কিন্তু তা  
কি করে হবে? তোমাদের নিয়ে যাচ্ছি কলকাতায়?'...

স্ত্রী আশ্বাস দিয়ে বললেন, 'আমি ছেলে-মেয়েকে নিয়ে  
কলকাতায় যেতে পারব। ট্রেনের আর তো কোন ঝঞ্চাট নেই।  
খানিক রাস্তা চলে এসেছি। আর শুধু রাতটুকু। আমরা ঠিক চলে  
যাব।'

প্রায় একশ বছর আগেকার কথা। সে যুগের এক সাহসিকা  
ধর্মপঞ্জী। বন্দ্যোপাধ্যায় মশায় এদিকেও ভাগ্যবান। তার অনুরাগ  
বিরাগ ইচ্ছা অনিচ্ছাকে আপন করে নিয়েছিলেন সহধর্মী। স্বামীর  
সঙ্গীতাসঙ্গি আর তার গুরুভক্তির আধিক্যতা নিয়ে গঞ্জনার পরিবর্তে  
সহমিতা জানাতেন।

এখন স্বামীর আকাঙ্ক্ষাকে প্রতিধ্বনিত করে বললেন, 'তুমি  
ভেব না। আমরা কলকাতায় ঠিক পৌছে যাব। তুমি নিশ্চিন্ত মনে  
গুরুজীর কাছ থেকে ঘুরে এস।'

সত্যিই ভাবলেন না বিশ্বের।

পেয়ারার টুকরি আর নিজের কিছু জিনিস নিয়ে প্ল্যাটফর্মে নেনে গেলেন। খানিক পরেই ট্রেন হাড়ল মোগলসরাই স্টেশন। ঠার পরিবারবর্গ কলকাতায় ষাট্রা করলেন। আর তিনি ফিরতি ট্রেনের সঙ্কান করতে লাগলেন স্টেশনে।

মোগলসরাই থেকে হাথুরাস। সেখানে গাড়ি বদল করে মথুরা। তারপর একায় করে বুন্দাবনে গুরুজীর উদ্দেশে যাত্রা। এইভাবে বিশ্বেশ্বর পরের দিন অজধামে পৌছলেন।

এসে, অযোধ্যাপ্রসাদের কাছে দাঢ়াতেই বিষম বিশ্বিত হলেন তিনি। শিশু যে সপরিবারে কলকাতায় গিয়েছিলেন।

জিজ্ঞেস করলেন, ‘ব্যাপার কি? কলকাতায় গেলে না যে?

বিশ্বেশ্বর প্রথমে তাঁবু পদধূলি নিয়ে শুণালেন। তারপর পেয়ারার টুকরি গুরুর পায়ের কাছে রেখে বুঝিয়ে বললেন ব্যাপার।

‘ওদের কলকাতার ট্রেনে পাঠিয়ে দিয়েছি। আর আপনার জন্মে কাশীর এই পেয়ারা এনেছি। আপনি পেয়ারা বড় ভালবাসেন।’

শিশুকে দেখার চেয়ে তিনি আরো আশ্চর্য হয়ে গেলেন ষটনাৱ বিবরণ শুনে। নির্বাক হয়ে বিশ্বেশ্বরের মুখের দিকে তিনি খানিকক্ষণ চেয়ে রইলেন। আর, আশ্চর্য—বিন্দু বিন্দু অঙ্গ ঘরে পড়ল ঠার চোখ দিয়ে।

শিশুকে আলিঙ্গন করে বললেন, ‘এত তোমার গুরুভক্তি! এমন তোমার গুরুসেবার আগ্রহ! কিন্তু বিশ্বেশ্বর, আমি যে তোমায় ছলনা করেছি।’

শিশু এবার বাক্যহীন হলেন বিশ্বয়ে। গুরুজী ছলনা করেছেন—তাকে! এ কথার অর্থ? এতকাল তো অকাতরে রাগ-বিদ্যা দান করে এসেছেন। পিতার তুল্য স্নেহপূর্ণ ব্যবহার। সৌজন্য। তবে...?

অযোধ্যাপ্রসাদ আবিষ্ট হয়ে বললেন, ‘তোমায় আমি প্রায় সবই দিয়েছি। কিন্তু একটু হাতে রেখেছিলুম। মালকোশের আরো

হই প্রকার তোমাকে দিইনি। সেই অপরাধ আজ শুধরে  
নেব।'

শুভ বোধ করলেন বিশ্বেশ্বর। মাত্র এইটুকু না দেওয়ার জন্যে  
গুরু অনুত্পন্ন! এটিকে অপরাধ মনে করেছেন? ছলনা ভেবেছেন?  
এত মহৎ তাঁর প্রাণ!

সেদিনই শিশুকে অযোধ্যাপ্রসাদ শেখালেন—মালকোশের হই  
প্রকার-ভেদ।

বিশ্বেশ্বর কৃতার্থ হলেন। তারপর সে রাত্রেই কলকাতার ট্রেন  
ধরলেন।

আরো একটি ঘটনা জানা যায় গুরু-শিষ্যের। তাঁদের ভক্তি ও  
প্রিতির এক উদাহরণ বলেও মনে করা চলে এটিকে। আর 'ছজনের  
সঙ্গীত-জীবনে সহযোগিতার নির্দশনও।

পশ্চিমে সে সময় বড় বড় আসর মাঝে মাঝে হত। কাশী  
এলাহবাদ গোয়ালিয়র আগ্রা দিল্লী—এই সব শহরে। সেবার  
হয়েছিল গোয়ালিয়রে। স্বয়ং মহারাজা তার উদ্যোক্তা। নানা  
প্রসিদ্ধ কলাবৎ আমন্ত্রিত হয়ে এসেছেন। তাঁদের মধ্যে বিশ্বেশ্বর  
একজন। আর অযোধ্যাপ্রসাদেরও সেখানে গাইবার কথা।

গোয়ালিয়রে এসে তিনি গুরুর খোঁজ করলেন। কারণ  
শুনেছিলেন, গুরুজীরও আমন্ত্রণ হয়েছে সম্মেলনে। কিন্তু তাঁর  
সন্কান শহরে পেলেন না। বড়ই ইচ্ছা ছিল তেওয়ারীজীর সামনে  
গাইবেন। কিন্তু তা আর হল না বুঝি বিশ্বেশ্বরের।

আসরে এসেও তিনি গুরুর জন্যে অপেক্ষা করলেন। তারপর  
যখন তাঁর গানের পালা এল তখনও গুরুর কোন উদ্দেশ নেই।  
অগত্যা গুরুকে স্মরণ করেই গাইতে প্রস্তুত হলেন ক্ষুণ্ণ মনে।

যথাসময়ে আসরে বসে নিজের তানপুরা বেঁধে নিয়ে  
পাখোয়াজীকে শুর দিচ্ছেন। পাখোয়াজ শুরে বাঁধা হলেই আরম্ভ  
করবেন গান।

এমন সময় অতি বৃক্ষ অযোধ্যাপ্রসাদ আসরে উপস্থিত হলেন।

তাকে দেখে কৃতার্থ বোধ করলেন বিশ্বেশ্বর। তানপুরা নামিয়ে  
রেখে গুরুকে শ্রণাম করলেন।

অযোধ্যাপ্রসাদও আশীর্বাদ জানালেন স্মিত হাস্তে।

তারপর শিষ্যকে গান আরস্ত করতে বললেন।

বিশ্বেশ্বর জিজ্ঞেস করলেন, ‘গুরুজী, কি রাগ গাইব?’

সকলের সামনেই এ প্রশ্নে মুক্ত হলেন তেওয়ারীজী। চমৎকৃত  
বোধ করলেন। নিজের সমস্ত বিদ্যাই দান করেছেন শিষ্যকে।  
সঙ্গীত-জগতে বিশ্বেশ্বর এখন শুপ্রতিষ্ঠ। তবু গুরুর কাছে শিষ্যাই  
রয়েছেন। গুরুকে পূর্ণ মর্যাদা দিতে এখনো আগের মতনই আন্তরিক  
ইচ্ছা। এমন কৃতী গায়ক হয়েও আজও এত অবিচল ভক্তি।

অযোধ্যাপ্রসাদ ভাবের আবেগে উঠে দাঢ়ালেন। আসরের  
শ্রোতাদের লক্ষ্য করে বললেন, ‘আপনারা আমায় মার্জনা করবেন,  
গানের মধ্যে কথা বলবার জন্যে। কিন্তু শিষ্যের আচরণ আমার মন  
এমন স্পর্শ করেছে যে, আমি না বলে পারছি না। আমাকে আসরে  
দেখে শিষ্য অনুমতি প্রার্থনা করছে—কি গান গাইবে। এমন গুরু-  
ভক্তির কথা আমি সকলকেই জানাতে চাই। অন্য গুরুর শিষ্যেরাও  
যেন এমনি হয়। তাহলে তাদেরও সিদ্ধিলাভ হবে সঙ্গীতসাধনায়।’

আসরে ধন্ত ধন্ত, সাধু সাধু, ইত্যাদি শোনা যেতে লাগল  
বিশ্বেশ্বরের নামে।

তারপর গান আরস্ত হল। শিষ্যের সঙ্গে কণ্ঠ মেলালেন  
তেওয়ারীজীও।

দরবারী কানাড়ায় তাঁরা যুগলবন্দী শোনাতে লাগলেন।

অযোধ্যাপ্রসাদ তখন অতি প্রবীণ বয়সী। তাঁর ৯০ বছর উত্তীর্ণ  
হয়েছে। শরীরে বয়সের ভারও প্রকট। কিন্তু সঙ্গীতকণ্ঠ তখনো  
জরাজীর্ণ নয়। দেহও অপটু হয়নি। শিষ্যের সঙ্গে এই উদান্ত ভাবের  
রাগ উপযুক্ত মর্যাদায় গাইতে লাগলেন...

এত পরিণত বয়সের ক্রপদ-গায়কও সেকালে দেখা যেত আসরে। বারাণসীর ক্রপদী গোপালপ্রসাদ মিশ্র এমনি একজন গুণী। বাংলার স্বনামধন্য গায়ক গোপালচন্দ্র চক্ৰবৰ্তীর (সঙ্গীতসমাজে ‘হুলো গোপাল’ নামে সুপরিচিত) তিনি ছিলেন ক্রপদগুরু। গোপালপ্রসাদ প্রায় শতবর্ষেও গায়নসক্ষম ছিলেন। একথা ‘সঙ্গীতে পরিবর্তন’ পুস্তকে উল্লেখ করেছেন কাশাৰ ক্রপদী হরিনারায়ণ মুখোপাধ্যায়।

তেওয়ারীজীও সে আসরে বয়সের পক্ষে অভাবিত গুণপনা দেখালেন। বিশ্বেশ্বরও গুরুর মুখোজ্জ্বল কৱলেন এই উচ্চকোটিৰ রাগ কুপায়ণে।

শুধু দুরবারী কানাড়া নয়। গোয়ালিয়রের সেই আসরেই কানাড়ার অষ্টাদশ প্রকার রাগ গেয়েছিলেন বিশ্বেশ্বর। সেবার তিনিই একমাত্র শিল্পী যিনি এই দুজ্বল রাগ-জ্ঞানের পরিচয় দিয়েছিলেন। কানাড়া শ্রেণীর বিশ্বাস করেন অতি সুষ্ঠুভাবে।

সে আসরে স্বনামধন্য তাজ খাঁও তাঁর গান শুনেছিলেন। সেদিন থেকেই তিনি গুণমুঝ হন বিশ্বেশ্বরে। আর দুজনের মধ্যে যে সম্পৌতি গড়ে ওঠে তা তাঁদের বৃদ্ধ বয়স পর্যন্ত অক্ষুণ্ণ থেকে যায়।

তানমেনের এই বংশধর পরে ক' বছর ছিলেন কলকাতায়। নবাব ওয়াজেদ আলীর মেটিয়াবুরুজ দুরবারের নিযুক্ত গায়ক তখন। গোয়ালিয়রের সেই আসরের বহু বছর পরের কথা। বিশ্বেশ্বরও সে সময় এলাহাবাদ থেকে মাঝে মাঝে আসতেন বড়িশায়

তাজ খাঁ। তখন মেটিয়াবুরুজ থেকে বিশ্বেশ্বরের কাছে উপস্থিত হতেন। তাঁর শেষ জীবনের আবাস সেই বড়িশার বাড়িতে। কত-দিন সেখানে দুজনের সঙ্গীতালোচনায় কেটে গেছে। বিশ্বেশ্বরের প্রায় সমবয়সী ছিলেন তাজ খাঁ। তাঁরপর মেটিয়াবুরুজ থেকে যখন খাঁ সাহেব নেপাল দুরবারে চলে গেলেন, তখন থেকে আর দুজনের দেখা-সাক্ষাৎ হয়নি।

গোয়ালিয়রের মতন স্মরণীয় আসর আরো কয়েছিলেন বিশ্বেশ্বর।

সবই পশ্চিমের নানা অঞ্চলে। যতদিন চাকুরি ছিল, ততদিন শুধু নয়। অবসর নেবার পরও অনেক বছর ছিলেন এজাহাবাদে।

বাংলায় তিনি ফিরেছিলেন ৬৫ বছর বয়সে। তার আগে পর্যন্ত পশ্চিম নিবাসীই তো থাকেন। সেজন্ত ঠার সঙ্গীত-জীবনে শ্রেষ্ঠ অংশ ওদিকেই ধর্তব্য। ঠার প্রতিভার দীপ্তি দেখেছিলেন পশ্চিমের শ্রোতারাই। বছরের পর বছর, নানা আসরে।

উত্তর ভারতে তাই অতি সম্মানের আসন তিনি পেয়েছিলেন। সেখানকার সঙ্গীত-সমাজে বাঙালীদের মধ্যে এমন স্থায়ী মর্যাদা আর কেউ পান কিনা সন্দেহ।

ঠার সমকালীন বাঙালী ক্রপদী রামদাস গোস্বামীও একজন আচার্যস্থানীয় গায়ক ছিলেন। কিন্তু তিনি কাশীবাস করতে থান পরিণত বয়সে। গানও বারাণসীর ক'টি নির্দিষ্ট আসরেই পরিবেশন করতেন। বিশ্বেষ্যের মতন গোয়ালিয়র প্রভৃতি নানা অঞ্চলে যোগ দিতেন না রামদাস। বিশ্বেষ্যের চেয়ে দশ বছরের বয়োজোষ্ঠ তিনি। ঠার সঙ্গীতজীবনের শেষ কাল বাংলাতেই কেটেছিল। আর শিশু গঠন করেন শেষ জীবনে, বারাণসীতে। তখন উত্তর ভারতের শ্রেষ্ঠ গুণীরাও রামদাসকে সঙ্গীতপ্রবীণ রূপে সমাদর করতেন। কিন্তু গায়ক হিসেবে কৃতিত্ব দেখাবার বয়স আর তখন ছিল না গোস্বামী মশায়ের।

তেমন বিশ্বেষ্যের আর একজন বয়োজোষ্ঠ বাঙালী কলাকার ছিলেন বারাণসীর মহেশচন্দ্র সরকার। এই বাণকারকেও যথেষ্ট মর্যাদা দিতেন অন্তান্ত গুণীরা। কিন্তু মহেশচন্দ্র কাশীর বাইরে কিংবা নিজ গৃহের বাইরেও বৌগাবাদন বিশেষ করতেন না। ( ঠার বৌগা শোনবার জন্মে শ্রীরামকৃষ্ণ পরমহংস গিয়েছিলেন ঠার মদনপুরের বাড়িতে, একথা প্রসঙ্গত বলে রাখা যায়। ) এই সব কারণে মহেশচন্দ্রের প্রতিভার যোগ্য খ্যাতি হয়নি পশ্চিমের বৃহস্তর অঞ্চলে।

কিন্তু উত্তর ভারতের শ্রোতাদের মধ্যে বিশ্বেশ্বর দীর্ঘকাল প্রিয় ও প্রথ্যাতনামা গায়ক হয়ে বিরাজ করেছিলেন। তিনি ঝুপদ শোনাতেন নানা আসরে।

কৃতৌ শিল্পী বলে তিনি অন্ত গুণীদেরও স্বীকৃতি পেতেন। তাজ খাঁর তুল্য আরো ক'জন ভারতপ্রসিদ্ধ গুণগ্রাহী ছিলেন তাঁর। যেমন সরদী নিয়ামৎ উল্লা থাঁ। থাঁ সাহেব অযোধ্যাপ্রসাদকেও শ্রদ্ধা করতেন। বিশ্বেশ্বরের চেয়ে সামান্য বয়োজ্যষ্ঠ ছিলেন নিয়ামৎ উল্লা। থাঁ সাহেব তাঁকে যেমন সমাদর জানাতেন, তাঁর দুই বিখ্যাত পুত্র করামৎ উল্লা ও কৌকব থাঁও তেমনি। বিশ্বেশ্বর যখন বড়শায় অবসর জৈবন যাপন করছেন, তখন কলকাতায় কৌকব থাঁ স্থায়ীভাবে বাস করতে থাকেন। আর করামৎ উল্লা আসতেন মাঝে মাঝে। বিশ্বেশ্বরের নাম হলেই রীতিমত সম্মান দেখাতেন দুজনে। এ সবই তাঁর পশ্চিমাঞ্চলের খ্যাতি কৃতির কথা স্মরণ করে।

দরাজ উদাত্ত কঢ়ের গায়ক বিশ্বেশ্বর। তিনি গান আরম্ভ করলেই সঙ্গীতের সঙ্গে সমস্ত আসরও প্রাণবন্ত হয়ে উঠত। সুরে পূর্ণ হয়ে যেত আবহমণ্ডল। তাঁর দরাজ কঢ়ে সুরের গভীরতায় ও গান্তৌর্যে অপরূপ পরিবেশ সৃষ্টি হত।

তানমেনের রচনাটি তিনি বেশি গাইতেন আসরে। সেই ইমন কল্যাণটি যখন ধরতেন—‘জয় দেবী শক্তি রূপা সারদা ভবানী’—প্রথম কলিতেই সুরে ভরে যেত আসর।

তারপর উদাত্ত অন্তরা—

তুঁহি ডাল, তুঁহি মূল  
তুঁহি পত্র তুঁহি ফুল ॥

থেকেই আসর যেন দেবদেউল হয়ে উঠত।

শ্রোতাদের মনে হত দেবী সারদার চরণকমলে ভক্ত সাধক ভক্তির উপচার নিবেদন করছেন। দেবীর মন্দিরে সুরের অঞ্জলি দিচ্ছেন প্রাণের আকৃতিতে। তাঁর সার্থক রাগ-রূপের সঙ্গে হৃদয়ের আবেদন

অঙ্গজী মিলে যেত । আর এক অতীল্লিয় লোকের আতাস পেতেন  
শ্রোতারা ।...

হাস্তীর-নটের সেই গানখানি শুনিয়েও আসর মাং করতেন  
বিশ্বেশ্বর । এটিও তানসেনের ঝুপদ—

জ্ঞান-পতি গণেশ বিদ্যা-পতি মহেশ ।

পৃথিবী-পতি নরেশ বলপতি হলুমান ॥

সবিতা-পতি সিঙ্কু গিরি-পতি সুমেরু ।

রাজন-পতি ইন্দ্র ধর্ম-পতি দান ॥

বাজন-পতি মৃদঙ্গ পত্রঙ্গ-পতি পান ।

পক্ষীন-পতি গড়ুর অর্জুন-পতি বাণ ॥

সাহেন-পতি আকবর দিল্লী বাদশা ।

তানসেন-কো প্রভু গোপীন-পতি কান্ ॥

এই গান কি হৃদয়স্পর্শী শোন'ত তাঁর দুরদী কঢ়ে । বৃন্দ বয়সেও  
তাঁর এ গানে আসর উদ্বৃত্ত হয়ে উঠত ।

তাঁর বৃন্দ বয়সেও উত্তরপাড়ার সেই জলসায় যেমন দেখা যায়  
একদিন । সে আসরটির কথা এখানে বলা চলে ।

বিশ্বেশ্বরের তখন অনেক বয়স । সন্তুর পার হয়েছেন । এলাহাবাদ  
থেকে বাংলায় ফিরে এসেছেন শেষ জীবনে । বড়িশায় বসবাস  
করছেন ।

এমন সময় একদিন গাইতে আসেন উত্তরপাড়ায় । জয়কুম্ভের  
পুত্র রাজা পারীমোহন মুখোপাধ্যায়ের বাড়ির আসরে । সঙ্গে  
এসেছেন তাঁর এক শিষ্য, নৌলরতন রায়চৌধুরী ।

প্রথমে নৌলরতনের গান হল । শুই হাস্তীর (নট) গাইলেন তিনি ।

কিন্তু বিশেষ সুবিধা করতে পারলেন না । জমল না গান ।  
শ্রোতারা অতুপ্ত বোধ করলেন ।

সামনেই বসে রয়েছেন বিশ্বেশ্বর । শিষ্যের ব্যর্থতা তিনিও  
দেখলেন ।

তখন তাঁকেই বলা হল, ‘বন্দ্যোপাধ্যায় মশায়, এবার আপনি  
আসর রক্ষা করুন। একটি জমাটি রাগের গান শুনিয়ে দিন।’

কেউ কেউ অনুরোধ করলেন ‘ভারি কোন রাগ না গাইলে  
হাস্তীরের শুই ছাপ কাটবে না। যদি মালকোশ ধরেন, তাহলে বেশ  
হয়।’

বিশ্বেশ্বর গান আরম্ভ করলেন তাঁদের কথায়। কিন্তু তাঁদের  
ফরমায়েস মতন রাগ শোনালেন না তিনি।

শুই হাস্তীরই ধরলেন গভৌর আত্মবিশ্বাসে। একই রাগে সে  
আসর জমানো যায় কিনা দেখাতে চান।

তাঁর সঙ্গে পাখোয়াজ নিয়ে বসলেন ত্রিশূণাচরণ দত্ত। হাওড়ার  
শিবপুরে তাঁর বাড়ি।

ত্রিশূণাচরণের সঙ্গতে বিশ্বেশ্বর শুল্ফাকতা-য় গাইতে আরম্ভ  
করলেন। তানসেনের শুই যে গানটি শিশু এইমাত্র গেয়েছেন সেইটিই  
ধরলেন তাঁর উদ্বৃত্ত কঢ়ে। আর স্থায়ী কলি গাইবার পরই দেখা  
গেল—আসর হাস্তীরের শুরে আবার জমাট হয়ে উঠেছে।

সকলের মনে হল—এ যেন সে হাস্তার নয়। যাঁরা অন্ত কোন  
ভারি রাগ শুনতে চেয়েছিলেন, তাঁরাও বিস্মিত হলেন—কোন ব্যর্থ  
গায়কের গান নিয়েই আবার এমন সার্থক আসর করা যায়।

কিন্তু বিশ্বেশ্বর একা গাইলেন না বেশিক্ষণ। স্থায়ীর পর গানের  
সমে এসে একবার থামলেন।

তখন সবাই আরো আশ্চর্য হলেন, যখন বিশ্বেশ্বর বললেন,  
'নৌলু, এবার আমার সঙ্গে ধরো।'

তারপর দুজনে একসঙ্গেই গাইতে লাগলেন—

জ্ঞান-পতি গণেশ বিদ্যাপতি মহেশ।

পৃথিবী-পতি নরেশ বল-পতি হনুমান॥

সবিতা-পতি সিঙ্গু গিরি-পতি সুমেরু॥

রাজন-পতি ইন্দ্র ধর্ম-পতি দান॥.....

শিশুও এবার ঠিক ঠিক অনুসরণ করে চললেন তাকে। গুরুর  
সুরের দৃঢ় ভিত্তি তিনি পেয়ে গেছেন। এবার আর কোন অস্বিধা  
হল না তার।

সকলেট দেখলেন, বিশ্বেশ্বর রাগের রূপ কেমন ফুটিয়ে তুলে  
গানখানি সুবম সুন্দর করলেন। ঝুপদে রাগরূপই যে বড়, একথা  
নতুন করে বুজালেন স্থাই। রাগের মূত্তি যিনি যথার্থ  
দেখাতে পারেন তার প্রাণ প্রতিষ্ঠা করে, তিনিই ঝুপদের  
প্রকৃত শিল্পী। সে আসরে বিশ্বেশ্বর একথার নতুন করে প্রমাণ  
দিলেন।

উত্তোলন সেই ভাঙা আসর জোড়া দিয়ে বিশ্বেশ্বর সেদিন  
দেখালেন—ঝুপদ গানের তিনি একজন সত্যিকার গুণী। আর তাও  
সেই বাধকোর পক্ষে।

তিনি যেমন নিষ্ঠার সঙ্গে সঙ্গীত শিখেছিলেন, চো করতেন  
নিয়মিত, আসরেও তার পরিচয় দিতেন। সেকালের গুরুমুখী রাগ-  
বিদ্যা শিক্ষার এক শ্রেষ্ঠ দৃষ্টান্ত বিশ্বেশ্বর।

একই গুরুর কাছে তিরিশ বছরেরও বেশি তিনি শিক্ষা করেন।  
একটি ধারার নিদেশে গঠিত হন একান্ত নিষ্ঠায়। তারপর উত্তর  
ভারতের আসরে কলাবৎসরে স্বাকৃতিতে ধন্ত হয় তার সঙ্গীত-  
জীবন। তার প্রতিভার সেই পূর্ণ বিকশিত রূপ বাংলাদেশ দেখতে  
পায়নি।

তার সঙ্গীতশিক্ষা ও আচ্ছাদনান্ত পশ্চিমাঞ্চলে। সেখানেই তিনি  
ভাগ্যক্রমে এমন গুরু পেয়ে যান। আর সেই সঙ্গে শিক্ষার অবাধ  
সুযোগও।

কিন্তু তার প্রথম জীবনে কল্পনার অতীত ছিল এমন সার্থকতা।  
এমনভাবে সঙ্গীতের সাধনায় সিদ্ধ হবেন, প্রসিদ্ধি লাভ করবেন বৃহত্তর  
সমাজে, তা তার পূর্বজীবনে কেউ ধারণা করতে পারেনি। বিশ্বেশ্বরের  
কোথায়, কিভাবে জীবন আরম্ভ ! আর কেমন ঘটনাচক্রে পশ্চিমের

নিবাসী হয়ে গেলেন। সেখানেই এক কথায় লাভ করলেন এক দিকপাই সঙ্গীতাচার্যকে।

বছরের পর বছর তাঁর কাছে শিক্ষা করতে আগমনেন। তাঁরপর সঙ্গীতসমাজে পেলেন যশ সমাদর প্রতিষ্ঠা। বারাণসী থেকে গোয়ালিয়র পর্যন্ত কেন্দ্রে দীর্ঘকাল প্রসিদ্ধ হয়ে রইলেন। বাংলা থেকে সুদূর পশ্চিমে গিয়ে এমন সাফল্য তাঁর হল, জীবনের অন্ত বুক্তিতে থেকেও। চাকুরিজীবী হয়েও প্রথম শ্রেণীর কলাবৎ। অপেশাদার থাকলেও পেশাদার সমাজে স্বীকৃত গুণী। সব যেন গল্পকথার মতন।

সেকালের উদযোগী বাঙালীদের এমন অনেককে দেখা গেছে। উত্তর ভারতের বিভিন্ন বিষয়ের ইতিবৃত্তে নাম রেখেছেন তাঁরা। বিশ্বেশ্বর যেমন সঙ্গীতজগতে।

সেই উনিশ শতকের ভারতবর্ষে বাঙালীর তখন ঐতিহাসিক বধিষ্ঠুত যুগ। জাতীয় জীবনের নানা ক্ষেত্রে তাঁর জয়যাত্রার অধ্যায়।

সেই পর্বেই বিশ্বেশ্বরের কর্মজীবনের সূচনা হয়েছিল।

আজ থেকে প্রায় দেড়শ বছর আগেকার কথা। বিশ্বেশ্বরের জন্মসন হল ১৮৩৩। লুগলী জেলার বলাগড় তাঁর জন্মস্থান।

পিতা পঞ্জানন বন্দেয়াপাধ্যায়ের কোন পরিচয় ছিল নাই। কিন্তু মাতুল বংশ সুবিখ্যাত—বড়িশার সাবর্ণ চৌধুরী পরিবার। বড়িশারই ‘কৃষ্ণগোবিন্দ লজ্জ’ নিবাসী কৃষ্ণগোবিন্দ রায়চৌধুরীর ভাগিনেয় ছিলেন বিশ্বেশ্বর।

বলাগড়ের গ্রাম্য পাঠশালায় তাঁর প্রথম পাঠ হয়েছিল। তাঁরপর ১৮৪২ সালে ইংরেজী শিক্ষার আশায় আসেন মাতুলালয়ে।

কিন্তু সেকালের বড়িশায় যানবাহনের অভাব। সেখান থেকে বালকের পক্ষে কলকাতায় যাতায়াতে বড়ই অসুবিধা দেখা গেল। তখন তাঁকে বাগবাজারে নিয়ে আসা হল, আর এক

আাৰীয়েৰ বাড়ি। সেখান থেকে ক্যাথিড্ৰাল চাৰ্চে তাঁৰ বিদ্যাশিক্ষা হতে লাগল।

এদিকে তাঁৰ অসাধাৰণ মেধা কিছু ছিল না। জুন্যুৱ কেম্প্রিজ পৰ্যন্ত পাঠ কৱলেন সতেৱ বছৰ বয়সে। বিদ্যালয়েৱ শিক্ষা এই পৰ্যন্তই হল।

তাৰপৱেৱ বছৱেই ( ১৮৫১ ) বিশ্বেশ্বৱ একা পশ্চিমে চলে গেলেন। সুদৰ্শন তৱণ এবং সুগঠিত স্বাস্থ্য। তাঁৰ তেমনি মনোবলও। তিনি ভাগ্য অন্বেষণে, আৱো সঠিকভাৱে বলতে গোল, ইংৱেজেৱ চাকুৱিৱ আশায় যাত্ৰা কৱলেন পশ্চিমাঞ্চলে। চাকুৱি কৱে ‘বড়’ হতে হবে—এই ছিল জন্ম। তখনকাৰ ইংৱেজী শেখা বাঙালী ছেলেদেৱ যেমন ‘আদৰ্শ’ দেখা যেত !

কলকাতা থেকে প্ৰথমে তিনি জামালপুৰ পৌছলেন। তাৰপৱ সেখান থেকে ‘ঘোড়াৰ ডাকগাড়ি’তে ফৈজাবাদ।

যাত্রাপথেই বিশ্বেশ্বৱেৱ ভাগ্য হাতছানি দিলে। সেই গাড়িতেই এক ফৌজী পদস্থ ইংৱেজেৱ সঙ্গে আলাপ হয়ে গোল তাঁৰ। ইংৱেজী-জানা বাঙালী তৱণ। সুপুৰুষ, ভাগ্যান্বৈ দৰ্শনধাৰী কৃপেই তিনি সাহেবেৱ সহানুভূতি আকৰ্ষণ কৱলেন।

কথায় কথায় সামৰিক কৰ্তা ব্যক্তিকে জানালেন নিজেৱ আৰ্কিফন। আৱ প্ৰয়োজনেৱ কথা।

সাহেব প্ৰায় কথাই দিলেন তাঁকে। বললেন, ‘ফৈজাবাদে আমাৰ সঙ্গে দেখা কোৱো। তোমাৰ জন্মে চাকুৱিৰ চেষ্টা কৱব ?’

ফৈজাবাদে পৌছেই তাঁৰ সঙ্গে সাক্ষাৎ কৱলেন বিশ্বেশ্বৱ।

সাহেব কথা রেখেছিলেন। আৱ, অবিলম্বে। ফৈজাবাদেই মিলিটাৰি অ্যাকাউণ্ট্স অফিসে কাজ হয়ে যায় বিশ্বেশ্বৱেৱ।

চাকুৱিৰ কিছুদিনেৱ মধ্যেই তিনি এলাহাবাদে বদলী হয়ে আসেন। স্থায়ী বাসিন্দা হন এখানেই। আৱ এলাহাবাদেই তাঁৰ সৌত্তীকৃতিমত সঙ্গীতশিক্ষাৰ সূত্রপাত।

বিশ্বেশ্বরের এই যে ভাগ্যের আশায় পাঞ্চমে আসা, চাকুরি  
পাওয়া ইত্যাদি, এক হিসেবে বাহজীবন।

আগে থেকেই অন্তরে তাঁর সঙ্গীতের জন্যে আকুলতা ছিল।  
কিন্তু বাইরে প্রকাশ পায়নি সুযোগের অভাবে। উপার্জনের সমস্তাই  
বড় ছিল। তারপর এলাহাবাদে যখন পাকা চাকুরি হল, সেই  
প্রবণতা দেখা দিলে নতুন করে। নিজের আগ্রহে গানের চৰ্চা তখনই  
কিছু কিছু আরম্ভ করলেন।

কিন্তু সে গানে নিজেরই মন ভরে না। ওন্তাদের কাছে রৌতিমত  
শিক্ষার জন্যে জাগে ব্যাকুলতা। কাঁরণ জানেন, কলাবতের কাছে না  
শিখলে গায়ক হওয়া অসম্ভব।

কিন্তু উপযুক্ত গুরু কোথায় সন্ধান করবেন এই নতুন জায়গায়।  
এখানকার সঙ্গীত সমাজে তিনি একেবারেই অপরিচিত। এইসব  
চিন্তা তাঁর মনের মধ্যেই থাকত।

কি করে বিশ্বেশ্বর জীবনের সেই চরম সুযোগ পেলেন সে কথায়  
রামেশ্বর চৌধুরীর পরিচয় দিতে হয়। তখনকার এলাহাবাদের  
একজন সর্বমান্য বাঙালী রামেশ্বর চৌধুরী।

প্রয়াগ তাঁরের কাছে ভরদ্বাজ আশ্রম। তার নিকটেই কর্ণেল-  
গঞ্জ এলাকার নিবাসী তিনি। কোটিপতি রামেশ্বরের সমগ্র  
এলাহাবাদে সে সময় বিপুল প্রতিষ্ঠা।

জনহিতকর নানা কাজে তিনি অগ্রণী, বদ্বান্ত। বিশেষ চকের  
মিউনিসিপ্যাল মার্কেট প্রধানত রামেশ্বরের দাক্ষিণ্যেই পত্তন হয়েছিল।  
কোম্পানী-বাগান নামে পরিচিত অ্যালফ্রেড পার্কেও তাঁর প্রচুর দান।  
সেই বাগানের মধ্যে খর্ণহিল্ ও মেইন মেমোরিয়াল লাইব্রেরিও তাঁর  
আনুকূল্যে গড়া। এলাহাবাদের একজন সুপ্রতিষ্ঠিত ব্যক্তি তিনি। এ  
শহরের স্থায়ী বাঙালী বাসিন্দাদের অন্ততম বিশিষ্ট রামেশ্বর।

কিন্তু এমন প্রতিষ্ঠাপন রামেশ্বর চৌধুরীও প্রথম জীবনে ছিলেন  
ভাগ্যাব্ধী। তবে কলকাতা থেকে নয়। কাশী থেকেই ভ্রমণ করতে

করতে তিনি এলাহাবাদে আসেন। বারাণসীর বিখ্যাত চৌধুরী  
বংশের সন্তান রামেশ্বর। পারিবারিক মনোমালিণ্যে অল্প বয়সে  
গৃহত্যাগকরে যান। তারপর এলাহাবাদেই প্রথমে পান কমিশনারি-  
য়েটের চাকুরি। পরে দোষ্ট মহম্মদের সময় রামেশ্বর কাবুল যুক্ত  
ইংরেজ পক্ষে যাত্রা করেন।

সেই উপজাফ্ফাই তাঁর ভাগোদয়। তারপর প্রচুর উপার্জন করে  
রামেশ্বর এলাহাবাদে ফিরে আসেন।

তিনি কি পরিমাণ বিস্তারণ হয়েছিলেন, তা জানা যায় তাঁর  
উত্তরাধিকারের ক্ষিতির থেকে। নগদ কুড়ি লক্ষ টাকা, প্রাসাদোপম  
অট্টালিকা, মাসিক পাঁচ হাজার টাকারও বেশি আয়ের জমিদারি  
ইতাদি তিনি মৃত্যুকালে রেখে যান।

এ হেন রামেশ্বর চৌধুরীর সঙ্গে পরিচিত হলেন বিশ্বেশ্বর।  
এলাহাবাদে চাকুরি সূত্রে নবাগত এবং সঙ্গীত শিক্ষার জন্যে অন্তরে  
একান্ত আগ্রহ।

রামেশ্বরের স্বভাবে নানা গুণ ছিল। তার মধ্যে একটি হল,  
তিনি সঙ্গীতের দরদী এবং সঙ্গীতজ্ঞদের পোষকও।

দূর বাংলা থেকে এসেছেন বিশ্বেশ্বর। ভাগ্যক্রমে রামেশ্বরের  
সঙ্গে পরিচয় হয়েছে। তারপর আবো সৌভাগ্যের বিষয়, রামেশ্বরের  
শ্বেত জাত করেছেন তিনি। কর্নেলগঞ্জে চৌধুরী ভবনেও যাতায়াত  
করেন তখন। এমন সময় রামেশ্বর জানতে পারলেন, অবসর সময়ে  
বিশ্বেশ্বর সঙ্গীতচর্চা করে থাবেন।

শুনে রামেশ্বর বললেন, ‘কি গান গাও তুমি? যোগ্য গুরুর  
কাছে প্রসন্ন শেখো।’

সাহস পেয়ে জানালেন দিশ্বেশ্বর, ‘আমার মনের বড় ইচ্ছ  
তা-ই। কিন্তু কার কাছে শিখব?’

রামেশ্বর আশ্বাস দিলেন, ‘আচ্ছা, দেখি কি করা যায়।’

বিশ্বেশ্বর উদ্বৃপ্ত হয়ে উঠলেন চৌধুরী মহাশয়ের কাছে

ভৱসা পেয়ে। আর তার কিছুদিনের মধ্যেই স্বৈর্য্য এসে গেল।

সেবার সঙ্গীত সম্মেলনের আয়োজন হল এলাহাবাদে।

পাঁচ-সাত বছর অন্তর তখন পশ্চিমে সঙ্গীত সম্মেলন বা বড় বড় জলসা হত। বারাণসী এলাহাবাদ গোয়ালিয়র দিল্লী আগ্রা ইত্যাদি শহরে। উত্তর ভারতের শ্রেষ্ঠ ও বিশিষ্ট কলাবক্তব্য। সেসব আসরে যোগ দিতেন। উৎসাহী শ্রোতারা অপেক্ষা করে থাকতেন সেই সম্মেলনের আশায়। কারণ, বার্ষিক নয়, কখনো পাঁচ বছর, কখনো ছয়-সাত বছর পরেও এই আসর বসত। আর, পশ্চিমে এটিই সব চেয়ে বড় জলসা।

সেই সম্মেলন সেবার এলাহাবাদে বসছে। সূতরাং শহরে তখন এটিই সব চেয়ে বড় সংবাদ। অনেকের সঙ্গে বিশ্বেশ্বরও সে আসরের জন্যে উদ্গৌব হয়ে রইলেন। আরো এক কথা। সামাজিক সাংস্কৃতিক সমস্ত অনুষ্ঠানে যেমন, এ ব্যাপারেও রামেশ্বর হলেন একজন প্রধান।

এই সম্মেলনে বৃন্দাবন নিবাসী সঙ্গীতাচার্য অযোধ্যাপ্রসাদ তেওয়ারীও আসবেন। শুধু তাই নয়। তিনি অতিথি হবেন রামেশ্বরের আবাসে। এলাহাবাদে উপস্থিত হলেই তিনি এখানে সম্ম্যানে বাস করে যেতেন। এসব কথাও শুনলেন বিশ্বেশ্বর।

বয়সে তখনই বৃন্দ অযোধ্যাপ্রসাদ। কিন্তু দেহে মনে সঙ্গীত-শক্তিতে রৌতিমত সক্ষম। উত্তর ভারতের সমকালীন এক শ্রেষ্ঠ ক্রপদী তিনি। আকুমার ব্রহ্মচারী, ঐকান্তিক সঙ্গীত-সাধক। সঙ্গীত-চর্চা ভিন্ন অন্ত কোন লক্ষ্য বা আকর্ষণ অযোধ্যাপ্রসাদের জীবনে ছিল না। শিশুদের সঙ্গীতশিক্ষা দিতেন পুত্রস্নেহে, অকাতরে। খাগোরবাণী রৌতির ক্রপদী বলেই সঙ্গীতজগতে তাঁর পরিচিতি ছিল।

এবার এলাহাবাদ সম্মেলনে যোগ দিতে এলেন অযোধ্যাপ্রসাদ।

আর রামেশ্বর সেই উপলক্ষ্যে বিশ্বেশ্বরের সঙ্গে তাঁর যোগাযোগ ঘটিয়ে দিলেন।

অযোধ্যাপ্রসাদকে তিনি বললেন, ‘এই ছেলেটির সঙ্গীতে বড় আগ্রহ। আপনি অনুগ্রহ করে বিশ্বেশ্বরের যদি শিক্ষার ভার নেন আমি কৃতজ্ঞ হব।’

রামেশ্বরের এমন অনুরোধ। তখনি আচার্য সম্মত হলেন। আর কৃতার্থ বোধ করলেন বিশ্বেশ্বর।

সে সময় থেকেই আরস্ত হল তাঁর যথার্থ সঙ্গীতশিক্ষা। কাজের অবসরে অথগু মনোযোগে এবং পরিশ্রমে তিনি সাধনা আরস্ত করলেন।

গুরুর নির্দেশ পালন করতে লাগলেন মাসের পর মাস। বছরের পর বছর। প্রায় তিরিশ বছরের শিক্ষার্থী জীবন তাঁর। গুরু এক এক সময় এলাহাবাদে শিষ্যের গৃহেও অবস্থান করে যেতেন। পিতার তুলাই তিনি মান্য করতেন শিক্ষাদাতাকে। এমনিভাবে বিশ্বেশ্বরের সঙ্গীতশিক্ষা চলতে থাকে।

অযোধ্যাপ্রসাদের শিষ্য বলেই বিশ্বেশ্বর ক্রমে প্রসিদ্ধি লাভ করলেন। মধ্যবয়সেই প্রতিষ্ঠা পেলেন কৃতি ক্রুপদীরূপে।

উত্তর ভারতের সব বড় বড় আসরেই তাঁর গান হতে জাগল। সাফল্য মণিত হলেন ক্রুপদগুণী বিশ্বেশ্বর।

এলাহাবাদেই তিনি স্থায়ী বাসিন্দা হয়ে পড়েন। নিজের বাড়ি করেন কর্ণেলগঞ্জে। কর্মসূলের মতন এই শহর তাঁর সঙ্গীতজীবনেরও কেন্দ্র হয়।

‘এলাহাবাদের বিশ্বেশ্বর’ নামেই সঙ্গীতজগতে প্রসিদ্ধ হন তিনি। আর তাঁর একাধিক শিষ্যও তন এলাহাবাদে। তাঁদের মধ্যে সব চেয়ে পরিচিত, নগেন্দ্রনাথ মুখোপাধ্যায়। নিজে ক্রুপদের চর্চা বজায় রেখে ‘এলাহাবাদ সঙ্গীত সমাজ’ প্রতিষ্ঠা করে নগেন্দ্রনাথ গুরুর ক্রুপদের ধারা ও স্মৃতি অনেকদিন এ শহরে সঞ্জীবিত রেখেছিলেন।

পশ্চিমে বিশ্বেশ্বরের আর একজন শিষ্য ছিলেন, বেহালাবাদক সূর্য কাহার। গোয়ালিয়রে তাঁর সঙ্গে এই ষষ্ঠীর পরিচয় হয়। সূর্য

কাহার আগে ছিলেন গয়ার কোন গুণীর শিষ্য। পরে বিশ্বশ্বরের  
কাছে অনেকদিন রাগবিদ্যা শিখেছিলেন।

কলকাতাতেও ছাত্র ছিলেন বিশ্বশ্বরের। কারণ শেষজীবনে আর  
তিনি এলাহাবাদে ছিলেন না। ১৮৯৮ সালে সেখানকার পাট তুলে  
দিয়ে চলে আসেন বড়শায়। সেখানেই অস্ত্রিম পর্বের প্রায় তের-  
চোদ বছর বাস করেছিলেন।

বেহুলার বড়শা অপ্তলে মাননীয় সঙ্গীতাচার্য রূপে সম্মান পান  
বিশ্বশ্বর। জীবনের সেটি শেষ পর্যায়ে।

বেহুলার বামাচরণ বন্দ্যোপাধায় তখন কৃতৌ খেয়াল গায়ক।  
বিশ্বশ্বরের বাড়িতে বামাচরণ মাঝে মাঝে আসতেন। গান হত তাঁর।  
যেদিন সুস্থ থাকতেন, বর্ষীয়ান আচার্যও সন্ধ্যার আসরে যোগ দিতেন।  
তিরিশ বছরের বয়োকনিষ্ঠ বামাচরণকে তাঁর শিষ্যস্থানীয় বলা যায়।  
বড়শাতেই তাঁর আর এক শিষ্য ছিলেন নৌলরতন রায়চৌধুরী।

একেবারে শেষ বয়সে, প্রায় ৭০ বছরে বিশ্বশ্বর বাংলার সঙ্গীত-  
জগতে পরিচিত হতে আরম্ভ করেন। তাও মাত্র কয়েক বছর  
সঙ্গীতক্ষম থাকেন মেই সমাপ্তির অধ্যায়ে। সেজন্য কলাবত বলে  
বাংলায় যোগা প্রসিদ্ধি তাঁর হয়নি। খাতি সীমাবদ্ধ ছিল শুধু  
গুণীসমাজেই।

৭৮ বছর বয়সে তাঁর জীবনের অবসান হয়—১৯১১ সালের ১৯  
সেপ্টেম্বর। সে শোকসংবাদ পরের দিন কলকাতার দৈনিক পত্রিকা-  
গুলিতে প্রকাশিত হয়েছিল। তখন আর তিনি বড়শায় থাকতেন  
না। তাঁর শেষনিঃশ্বাস পড়েছিল কলকাতায়—ঠনঠনিয়ার ৩২  
শন্তুচরণ চাটুজো স্ট্রীটে।

নিরহক্ষার অথচ গভীর আত্মপ্রত্যয়ী ক্রপদৌ ছিলেন তিনি।  
বাংলায় তাঁর স্বল্পকালের জীবনেও মেই ক্রতি স্মৃতি খেকে যায়।

উত্তরপাড়ার একটি আসরের কথা বলা হয়েছে আগে।  
আর একটি উদাহরণ দিয়ে তাঁর কাহিনী শেষ করা হবে। এ

আসরঙ তাঁর শেষ জীবনের কথা। বড়িশায় তখন তিনি বাস করতেন।

আসর হয় কলকাতায় প্রদ্যুম্ন মল্লিক মহাশয়ের পাথুরিয়াঘাটার বাড়িতে। সেখানে তাঁর গানের সঙ্গে সঙ্গত করতে আসেন কলকাতার এক বিখ্যাত পাখোয়াজী। বিশ্বেশ্বরকে তিনি সঠিক জানতেন না।

সে আসবে তিনি রামকেলীতে গান আরস্ত করতেই পাখোয়াজী তাঁর এক শিষ্যকে বললেন, ‘তুই বাজা। এখানে আর আমি কি বাজাব।’

বিশ্বেশ্বর ক্রোধ বা দ্বিরক্তি কিছুই দেখালেন না। আলাপ শেষ করে শান্তভাবেই আরস্ত করলেন গান।

কিন্তু সেই শিষ্য পাখোয়াজী সঙ্গত করতে গিয়ে সম ধরতে পারলেন না। বিশ্বেশ্বর ধৌর কঢ়ে পাঁচ-ছয় বাব গাইতে লাগলেন গানের মুখটি।

কিন্তু এমন কঠিন তার লয় যে, পাখোয়াজী কিছুতেই সম খুঁজে পেলেন না। কেবল ‘কুড় কুড় কুড়’ শব্দই করতে লাগলেন পাখোয়াজে। ঠেকা আর বেরুল না।

সভার পরিবেশ আড়ষ্ট হয়ে উঠল। অস্বস্তি বোধ করতে লাগলেন শ্রোতারা। পাখোয়াজীর শস্তাদ তখন শিষ্যের অবস্থা দেখে তাঁর হাত থেকে পাখোয়াজ নিজেই নিয়ে বসলেন। মান বাঁচাবার জন্যে আরস্ত করে দিলেন সঙ্গত। বিশ্বেশ্বরের গান তেমনি আড়ি ছন্দে ঠায়ে চলতে লাগল।

কিন্তু ওদিকে শোচনীয় দেখা গেল পাখোয়াজীর অবস্থা। শিষ্যের চেয়ে তাঁর এইটুকু উন্নতি হল যে, সম কোনক্রমে খুঁজে পেয়েছেন। কিন্তু ওই পর্যন্ত। তিনি আশা করেছিলেন গায়ক এবার গান আরো স্বচ্ছন্দ করবেন আর তিনি হাত খুলে বাজাতে পারবেন।

কিন্তু এমন কঠিন শয়ের গতি যে, কোনরকমে ঠেকা ছাড়া আর  
কিছুই কাজ দেখাতে পারলেন না পাখোয়াজী। অথচ তিনি রৌতিমত  
নামী বাজিয়ে আর তেমনি অহঙ্কারী। তাঁর সে দর্প চূর্ণ হল এমন  
প্রকাশ্য আসরে। সকলেই দেখলেন তাঁর অপ্রস্তুত অবস্থা।

বিশ্বেশ্বর শেষ পর্যন্ত তেমনি মানেই গেয়ে গেলেন। আর মাত্র  
ঠেকা দিলেন পাখোয়াজী।

গানের পর বিশ্বেশ্বরকে তিনি অবশ্য খুবই সুখ্যাতি করলেন।  
কিন্তু তাঁর নিজের সম্মান রক্ষা হল না শ্রোতাদের বা গায়কের কাছে।  
শ্রোতারা সার্থক শিল্পী বিশ্বেশ্বরের স্মৃতি নিয়েই সেদিন ঘরে  
ফিরলেন।

## বিস্তৃত হারমোনিয়াম-শিল্পী

॥ মৌর্জা সাহেব ॥

আঙুলে খেলিতেছে সাতটি শুর সাতটি যেন পোষা পাখি ।

শুধু সাত কেন । সাতটি তো শুন্দি শুর । ঠুংরি অঙ্গে আর তেমন তেমন রাগে বারোটি শুরও হতে পারে, কোমল কড়ি নিয়ে । যেমন ভৈরবী কিংবা পিলুতে পোষা পাখির মতন কলস্বরে সেই সব শুর ঝমঝম বেজে উঠছে ।

হারমোনিয়মে কালো শাদা চাবির সারি । আর তার ওপর চলন্ত গোলাপী-গোরা আঙুল কটি । যেন মোলায়েম তুলির টানে আসা যাওয়া করছে তারা । আর চোখের পলকে শাদা কালো পর্দা কটি অনর্গঙ্গ গুঠা-নামা করে চলেছে । বাঁ দিক থেকে ডাইনে । আর এদিক থেকে গুদিকে । তারা গ্রামে শুরে এসে আবার খাদ হয়ে মন্দ সপ্তকে । সাড়ে তিন অকটেভের বিস্তার । আর সেই আঙুলের পরশ পেয়ে চাবির সার বেয়ে যেন ছোট ছোট টেউ খেলে যাচ্ছে । সেই সঙ্গে নেচে চলেছে শূরের ঝর্ণা ধারা ।

হারমোনিয়মের পর্দায় পর্দায় এত ভরিং, এমন মোলায়েম গুঠা-নামা—যেন একটির গায়ে আর একটি মিলে গেছে । একটির সঙ্গে মিশছে আর একটি শুর । যেন মিডের কাজ । শুর থেকে শুরান্তরে, মাঝেরটি স্পর্শ করে গড়িয়ে বয়ে যাওয়া । ক্ষতির স্মৃক্ষ ক্রিয়া তো হারমোনিয়মে দেখানো যায় না । তবু মিডের কাজ হচ্ছে যতদূর সন্তুষ্ট ।

শিল্পীর অন্তর শূরে এত পূর্ণ, হাত এমন সাধনে তুরন্ত যে চাবির গায়ে গায়ে মিডের ঢল নেমে আসছে । আর কত তার চিকনতা ।

কখনো শিল্পী আশ্চর্য সাপটে কটি পর্দা ছুঁয়ে যাচ্ছেন ঘরণের ধরনে।  
আর হারমোনিয়মে যেন আশ্-এর কাজ ফুটে উঠছে।

এমনি নানা অলঙ্কারে, সুরের নির্বাসে যেন কথা কইছে সুদৃশ্য  
যন্ত্রটি।

মীর্জা সাহেবের সেই হারমোনিয়ম বাদন। সেকালের আসরে  
ছিল এক মহা-উপভোগের যন্ত্রসঙ্গীত। এই শতকের ত্রিশের দশকে  
আর বিশের দশকে। আরো পাঁচ-দশ বছর আগেও।

সুরের সঙ্গতে যেমন, একক আসরেও তেমনি। খেয়াল অঙ্গেও  
মীর্জা সাহেব বাজাতেন। কি তৈরী সে বাজন। এমন এক একটি  
কর্তব করতেন যা অনেক গায়কের পক্ষেও অসম্ভব। ছোট ছোট তান  
কিংবা টুকরো ফিরৎ। কিংবা রকমারি পাণ্ট। তিন গ্রামে পাল্লা  
দিয়ে ঘুরে আসা বড় বড় তান সব দেখাতেন পরিপাটি ভাবে। সাধা  
কষ্টে খেয়াল গানই যেন হারমোনিয়মে বেজে চলেছে। কষ্টের বদলে  
যন্ত্রে। এই বাঁধা পর্দা'র বিদেশী যন্ত্রে যত্নুর সন্তু তার শেষ সীমা  
পর্যন্ত শিল্পী দেখিয়ে দিচ্ছেন সুরের বিস্তার।

মীর্জা সাহেবের বাজন। তা এত প্রাণবন্ত হবার কারণ, তিনি  
নিজেও গায়ক ছিলেন। তবে গান গাইতেন না আসরে। ঘরোয়া  
ভাবে কখনো গাইতেন। তা ছাড়া গানের তালিম দেবার সময়ও  
দেখাতেন গেয়ে। তখন শোনা যেত তাঁর সুরকষ্ট। গানে অভিজ্ঞ না  
হলে সুরযন্ত্রের ভাল শিল্পী হওয়া যায় না। প্রায় তাবৎ গুণী বাদকদেরই  
নেপথ্যজীবনে থাকেন একেক জন গায়ক। অলঙ্ক্ষ্য সেই সন্তা যন্ত্রীর  
হাতে সুর সঞ্চার করে তবেই জীবন্ত হয়ে ওঠে তাঁর পর্দা কিংবা  
তারের ঝাঙ্কার।

মীর্জা সাহেবও গানের চৰ্চা করেছিলেন ভাল ভাবে। শুধু খেয়াল  
নয়, হোরি ধামার। রামপুর দরবারের বীণকার (অস্ত্রালে ঝপদ হোরি  
ধামার থেকে টুঁরি পর্যন্ত নানা রীতির গায়কও।) উজীর থার কাছে  
তিনি হোরি ধামার শিখেছিলেন। তেমনি নিজের ছাত্রদেরও হোরি

খামার খেয়াল ঠুংরি সবই দিতেন মৌর্জা সাহেব। গান গেয়ে শেখাতেন সেসব।

তবে আসরে তিনি ঠুংরিই বেশি বাজাতেন। একক অঙ্গুষ্ঠানে কিংবা গানের সঙ্গতে। কারণ ঠুংরি তাঁর ছিল প্রাণের প্রিয়। তার মিহি কারুকর্ম, তার মিষ্টি, তার লাবণ্য তাঁর মনোহরণ করেছিল। আর তাঁর শৃঙ্গার রসের আবেদন। বোল বানিয়ে বানিয়ে হৃদয়ের আবেগ আকৃতি করে ভাবে প্রকাশ করা। বোল বানানা ঠুংরি। এই চালের ঠুংরির চর্চাই মৌর্জা সাহেব করেছেন। গান থেকে হারমোনিয়মে। আসরেই তাই বাজান। এই রৌতির ঠুংরিই তাঁর প্রিয়।

গণপৎ রাওয়ের ঠুংরিও তো এই ধরনেরই। মৌর্জা সাহেবও সেই একই ধারার শিল্পী। এই পচন্দ-করা যন্ত্র হারমোনিয়মে ঠুংরি রৌতিতে তাঁর দরদের চর্চা। হারমোনিয়ম আর ঠুংরি। এই দুই নিয়েই তাঁর আসল সঙ্গীতজীবন। ঠুংরির মরমীয়া তিনি।

তবে গানে নয়, হারমোনিয়মে। আর আসরে সেই ভাবেই তাঁকে দেখা যায়। পঞ্চাশ-বাটি কি আরো কিছু বছর আগেকার কলকাতায়। তখনকার আসরে আসরে।

ঠুংরি গানের আবেগ আর হৃদয়স্পর্শী ভাব তাঁর হারমোনিয়মে মেতে গুঠে। এক একটি ঠুংরি গানই যেন বাজতে থাকে কঠোর আবেদন নিয়ে। তাঁর যন্ত্রের চাবিতে চাবিতে, তাঁর আঙুলের মরমী ছোয়ায়। শুভ্র আঙুল কঠি শুরের ধারায় হারমোনিয়মের পর্দায় পর্দায় যেন নৃত্য করে চলে।

মৌর্জা সাহেবের হারমোনিয়ম বাজনা। এতদিন যাৰৎ এমনি ভাবে বাজিয়েছেন, এতক্ষণ ধৰে বাজান যে আঙুলগুলির এই বাঁকানো ভঙ্গী অন্ত সময়েও থেকে যায়। আঙুলের মাঝখান থেকে বাঁকা দেখায় বাজাবার ভঙ্গিমায়। হারমোনিয়ম যখন বাজান না, তখনো বাঁ হাতের আঙুলগুলি অর্ধ-গোলাকার, বাঁকানো থাকে। সোজা করা যায় না আর। সোজা করবার চেষ্টাও তিনি করেন না। এখনি

হয়ত আবার হারমোনিয়ম নিয়ে বসতে হবে। আবার তো বাজনা চলবে আঙুলের মাথা বাঁকিয়ে বাঁকিয়ে।

মৌর্জা সাহেবের বাঁ হাতের আঙুলগুলি বাঁকানো। কারণ তিনি ডান হাতে হারমোনিয়মের বেলো করেন। আর বাজান বাঁ হাতে।

গণপৎ রাওয়ের গোষ্ঠীর আরো কজনেরই এমনি বাজানোর দৃষ্টান্ত আছে। স্বয়ং গণপৎ রাও বাঁ হাতে বাজাতেন। আর বেলো করতেন ডান হাতে। তেমনি তাঁর প্রধান শিষ্যদের মধ্যে দুজন—গয়ার গফুর খঁ। আর ইন্দোরের বসির খঁও। গণপৎ রাওয়ের প্রধান শিষ্যদের মধ্যে ডান হাতে বাজাতেন অবশ্য শ্যামলাল ক্ষেত্রী, ইরসাদ (গয়ার) এমনি কজন। গয়ার সোহনীজীর নামও তাঁদের সঙ্গে করা যায় বটে। তবে তিনি গণপৎ রাওজীর তালিম পাননি অমন সাক্ষাৎ ভাবে।

মৌর্জা সাহেবও গণপৎ রাওয়ের ঠিক শিষ্য নন। কিন্তু তাঁর বিরাট হারমোনিয়ম-বাদক গোষ্ঠীর একজন বলা যায় তাঁকে। গণপৎ রাওয়ের প্রিয় শিষ্য শ্যামলাল ক্ষেত্রীও সঙ্গে মৌর্জা সাহেবের অতি ঘনিষ্ঠতা ছিল সঙ্গীতেরই সূত্রে। আর শ্যামলালজীর শিষ্য-স্থানীয় গিরিজাশঙ্কর চক্রবর্তীরও তিনি অন্তরঙ্গ ছিলেন। গিরিজা-শঙ্করের ঠুংরি গানের প্রতিভা যখন পূর্ণ বিকশিত তখন তাঁর গানের সঙ্গে মৌর্জা সাহেবের হারমোনিয়ম সঙ্গত হত নানা আসরে। কলকাতায় বল্ল আসরেই সে সময় গিরিজাশঙ্করের সঙ্গতকারী বাজনা তাঁর শোনা যেত।

আরো অনেকের সঙ্গে দেখা যেত মৌর্জা সাহেবকে হারমোনিয়ম বাজাতে। বিখ্যাত গায়ক-গায়িকা থেকে শুরু করে অখ্যাত শিল্পীর সঙ্গেও। মৌজুদিন কিংবা আগ্রাওয়ালী মাল্কা জানের সঙ্গে যেমন বাজিয়েছেন, তেমনি অন্ত অনেকেই তাঁকে পেয়েছেন। এক সুলভ উপায় ছিল তাঁর হারমোনিয়ম শোনার। সে তাঁর চরিত্রের একটি দুর্বলতাকিংবা এক প্রধান বৈশিষ্ট্য।

যেখানে সেখানে যার তার সঙ্গে তিনি আসবে বাজিয়েছেন। তবু মৌর্জা সাহেব একজন দন্তরমত গুণী। আর হারমোনিয়মে এমন শিল্পী কজন ছিলেন সেকালের কলকাতায়? একমাত্র শ্যামলাল ক্ষেত্রী ভিন্ন?

গণপৎ রাওয়েরই আর এক কৃতী শিখ্য ছিলেন কলকাতায়। হারমোনিয়ম বাদক ইরসাদ। কিন্তু ইরসাদের চেয়ে অনেক ভাল বাজিয়ে তো বসির থাঁ। বিখ্যাত খেয়াল-দিকপাল আল্লাদিয়ার ভাতুম্পুত্তু তিনি। সেই বসির থাঁ নিজেও বলতেন, ‘মৌর্জা সাব—হামসে আচ্ছা বাজা বাজাতা।’

শ্যামলালজী তো সৌধিন অর্থাৎ অপেশাদার। মৌর্জা সাহেব কিন্তু অদৃষ্টের ফেরে পেশাদার হয়ে পড়েছিলেন। যদিও অর্ধ-সৌধীন হয়ত বলা যায় তাঁকে। কারণ বিনা মুজরোতেও বাজাতেন আসবে। অন্তত সঙ্গীত-জীবনের প্রথম কিছু বছর। হয়ত বরাবর অপেশাদার থাকবার ইচ্ছা ছিল তখন। কিন্তু জীবনের শেষ দিকে সে সৌধীনতা আর ছিল না।

যে কোন আসবে যা হোক মুজরোয় তখন দেখা যেত তাঁকে। হারমোনিয়ম নিয়ে বসেছেন। কখনো একক, কখনো সঙ্গতকার। পর্দায় পর্দায় আঙুলের খেলায় সুরের লীলা ঠিকই আছে। কিন্তু প্রথম জীবনে দেখা অনেকেই হয়ত চিনতে পারবেন না তাঁকে। এই বুদ্ধিক সেই মৌর্জা সাহেব? মাথা থেকে পা পর্যন্ত একটি পরিবর্তন! চেহারায় তো হবেই। কিন্তু পোশাকে-আশাকে ধরন-ধারণে? কোথায় সেই সব লোমদার কি জরিদার টুপির বাহার? সৌধীন পিরান চুস্ত পায়জামা? ওই নৃত্যপর আঙুলে কোথায় গেল ঝকমকে আংটি? কানে তুলোর টিপ থেকে লক্ষ্মীয়ি আতঙ্কের খসবু? মাথায় চিকনকুষ কেশ? সেই গোলাপী গৌরবণ্ড আর মুখ-চোখের চমৎকার ছাঁদ শুধু খানিক আছে। শরীরটি ছোটখাটো বলে হয়ত ভাঙেনি তেমন। কিন্তু চিবুকে কপালে গালে

ফুটে উঠেছে জরার বলিরেখা। বাঁকানো আঙুলের মতন পিঠও  
একটু ঝুঁকে পড়ছে। আর শাদা চুল, শাদা জ্ব, ফর্সা গায়ের রঙের  
সঙ্গে আরো করণ দেখিয়েছে মলিন বেশবাস।

কে মৌর্জা সাহেব ?

আসরের অনেকেই হয়ত জানেন না সেকথা। জানবার কৌতুহলও  
সন্তুষ্ট নেই।

কিন্তু জানবার মতন পরিচয় আছে মৌর্জা সাহেবের। নবাব  
ওয়াজেদ আলির এক পৌত্র তিনি !

সে বংশ-কথা বলবার আগে মৌর্জা সাহেবের সঙ্গীতজীবনের  
আরো কিছু কথা বলা বলে নেওয়া যায়।

কলকাতায় তাঁর আসর সচরাচর কোথায় হত। গান কিংবা হার-  
মোনিয়ম কে কে শিখেছিলেন তাঁর কাছে, এই সব প্রসঙ্গ।

মুজরো নিয়ে কিংবা বিনা মুজরোতে নানা আসরে তিনি  
বাজাতেন। সে সব সাময়িক আসর। কিন্তু নির্দিষ্ট কটি আসর  
তাঁর ছিল। সেখানে তিনি মাঝে মাঝেই বাজাতেন। বেশির  
ভাগই একক বাদন। তা তাঁর বন্ধু-বন্ধব বা সঙ্গীতজীবনের  
সহযোগী অনুরাগী, শিশ্য প্রভৃতিদের ঘরোয়া আসরে। অবশ্য এসব  
আসরে তিনি অপেশাদার হয়েই যোগ দিতেন, গুণপনা দেখাতেন।

এমনি আসর তাঁর সবচেয়ে বেশি হত শ্যামলাল ক্ষেত্রীর  
হ্যারিসন রোডের আস্তানায়। শ্যামলালজীর সেই ১০১ সংখ্যক  
বাড়িতে। সেন্ট্রাল আভিনিউ আর কলেজ স্ট্রীটের মাঝামাঝি,  
দক্ষিণমুখী। পাঁচতলা কোঠি। তাঁর দোতলায় সে যুগের একটি  
সঙ্গীত-তৌর ছিল। কত ভারতপ্রসিদ্ধ কলাবৎ-কলাবতীদের সঙ্গীত  
চর্চায় আর যোগাযোগের কেন্দ্রস্থলে ধন্ত হত ক্ষেত্রী মহাশয়ের সেই  
নিত্য আসর। মৌর্জা সাহেবেরও অনেক দিনের অনুষ্ঠান সেখানে  
হয়ে গেছে। সেই ১০১ হ্যারিসন রোড থেকেই গিরিজাশঙ্করের  
সঙ্গে মৌর্জা সাহেবের আলাপের স্মৃতিপাত।

মেছুয়াবাজারে কিশোরীলাল চৌধুরীর বাড়িতেও প্রায়ই তাঁর বাজনা হত। চৌধুরীজীর সঙ্গে বন্ধুত্ব ছিল মীর্জা সাহেবের। এখানে মাঝে মাঝে তিনি থেকেই যেতেন। কিশোরীলাল ছিলেন পাটনার স্নেক এবং সেকালের শুপরিচিত ‘তাম্বুল বিহার’ ব্যবসায়ী। তিনি কলকাতায় একজন সঙ্গীতপ্রেমী হিসেবে বাড়িতে আসর বসাতেন। কলকাতায় মীর্জা সাহেবের মতই অনেক গুণীই শুধু নন। লক্ষ্মীর রাজা নবাব আলি, গয়ার সোহনীজীর তুল্য গুণীরাও যোগ দিয়ে গেছেন কিশোরীলালের আসরে।

মেছুয়াবাজার অঞ্জলীই ফজে মিয়া নামে তাঁর এক দোষ্টের বাড়িতেও মীর্জা সাহেব মাঝে মাঝে আসর করতেন।

প্রেমচাঁদ বড়াল স্ট্রীটে, কিষণচাঁদ, বিষণচাঁদ, রাইচাঁদ বড়াল ভাতাদের আসরেও বাজাতেন মীর্জা সাহেব।

বারাণসী ঘোষ স্ট্রীটের ছোটকালালের গৃহেও তাঁর আসর হত। ছোটকালালের পুত্র হলেন পরবর্তীকালের সঙ্গীতজগতে লালাবাবু নামে শুপরিচিত দামোদারদাস খান। পরে কলকাতায় উচ্চমানের এবং সর্বভারতীয় সঙ্গীত সম্মেলনে আর নানা সঙ্গীতাসরের সঞ্চালক হিসাবে দেখা যায় লালাবাবুকে। তাঁদের ১৭, বারাণসী ঘোষ স্ট্রীটে মীর্জা সাহেবের অনেক দিনের আসর হয়ে গেছে। ছোটকালাল তাঁর একজন শিষ্যও।

এমনি আরো কটি নির্দিষ্ট আসরে মীর্জা সাহেবের হারমোনিয়ম শোনা যেত।

তাঁর সারা সঙ্গীতজীবন কেটেছিল কলকাতায়। এ শহরের নানা ধরনের আসরে তিনি যোগ দিতেন। একবার একটি বড় জলসা হল নাট্যমন্দির মঞ্চে। বাংলার এস্রাজগুণী শীতলচন্দ্র মুখোপাধ্যায়ের সাহায্য রজনী হিসেবে অনুষ্ঠান। সে আসরে অংশ নেন হাফেজ আলি, আলাউদ্দিন খাঁ প্রমুখ অনেক বিখ্যাত কলাকার। মীর্জা সাহেবও সেদিন একক হারমোনিয়ম শুনিয়েছিলেন। সমবেত

শিল্পাদের একটি ফটোগ্রাফ নেওয়া হয়েছিল সে আসরে। মৌর্জা সাহেবকেও সে চিত্রে দেখা যায়। সেইটিই বোধহয় তাঁর একমাত্র প্রতিকৃতি।

এক সময় ‘আসর’ নামে একটি সমিতি হয় ২০, চৌরঙ্গীতে। তার উদ্দেশ্য ছিল গুণী গায়ক বাদকদের উপযুক্ত দক্ষিণা দিয়ে প্রতি মাসে অনুষ্ঠান করা। কলকাতায় তবলাচর্চার জন্যে সুপরিচিত মন্মথনাথ গঙ্গোপাধ্যায় তার অন্তর্ম প্রতিষ্ঠাতা। সেখানে পরে মন্মথনাথেরই এক স্মৃতি-রজনীর সংবাদ পাওয়া যায়। ১৯৩২ সালের ১৭ই সেপ্টেম্বর সেই জলসায় গান গেয়েছিলেন গিরিজাশঙ্কর চক্রবর্তী, তবলা বাজিয়েছিলেন লক্ষ্মীর শুন্তাদ আবেদ হোসেন। আর ‘সঙ্গীত বিজ্ঞান প্রবেশিকা’র ভাষায় ‘প্রসিদ্ধ শুন্তাদ মৌর্জা সাহেবের হারমোনিয়ম’ বাদনও সেদিন হয়েছিল।

এমনি নানাভাবে কলকাতায় সঙ্গীতজীবনে জড়িত ছিলেন মৌর্জা সাহেব।

তাঁর শিশুমণ্ডলী বিরাট ছিল বলা যায়। আর কলকাতার বাইরে বহুদূর পর্যন্ত তা বিস্তৃত ছিল, পূর্ববঙ্গের কোন কোন জেলা পর্যন্ত।

মৌর্জা সাহেবের কাছে যাঁরা নানা সময়ে শেখেন, তাঁদের কয়েকজনের নাম পরিচয় এখানে দেওয়া হল :

(১) তিলজলার সাহাৰুদ্দিন। ইনি হারমোনিয়মে ভাল তালিম পেয়েছিলেন। ভাল বাজাতেনও মৌর্জা সাহেবের ঢঙে।

(২) জানি সাব নামে পরিচিত, মেটিয়াবুরুজের তফজুল হোসেন। বিখ্যাত ঠুংরি দাদুরা গজল ইত্যাদির গায়ক পিয়ারা সাহেবের পুত্র জানি সাহেব কৃতী হারমোনিয়ম বাদক হয়েছিলেন। তিনি গায়কও ছিলেন জমিরুদ্দিন র্থা, ঝণ্ডে র্থা প্রভৃতি নানাজনের তালিমে। কিন্তু হারমোনিয়মে জানি সাব শুধু মৌর্জা সাহেবের শিক্ষাই পান।

(৩) বৌবাজারের ধীরেন্দ্রনাথ দাসও মৌর্জা সাহেবের একজন

প্রিয় শিষ্য। তিনি তাঁর ভাল তালিম পেয়েছিলেন হারমোনিয়মে। কলকাতায় খরজ-পরিবর্তন-সঙ্গম (স্কেল চেঞ্জিং) হারমোনিয়মের এক আদি নির্মাতা সুরেন্দ্রনাথ দাস তাঁর পিতা। সুরেন্দ্রনাথ নিজে হারমোনিয়ম বাদকও ছিলেন। গণপৎ রাওয়ের শিষ্য বসির থাঁ হলেন সুরেন্দ্রনাথের হারমোনিয়মের উস্তাদ। সুরেন্দ্রনাথের হারমোনিয়মের দোকান (৬৯ হ্যারিসন রোডে) শ্যামলাল ক্ষেত্রীর বাড়ির কাছেই ছিল। সেই সূত্রে শ্যামলালজী ও তাঁদের গোষ্ঠীর অনেকের সঙ্গেই ঘনিষ্ঠ ছিলেন সুরেন্দ্রনাথ। হারমোনিয়ম নির্মাতা বলেও তাঁদের সঙ্গে তাঁর সহযোগিতা থাকত। মীর্জা সাহেবও সুরেন্দ্রনাথের কাছে আসতেন হারমোনিয়মের জন্য। এমনি পরিচয়ের ফলে সুরেন্দ্রনাথের পুত্র ধৌরেন্দ্রনাথ মীর্জা সাহেবের কাছে শিখতে আরম্ভ করেন। তারপর সতের-আঠার বছর ছাত্র সম্পর্ক রাখেন, উস্তাদজীর প্রায় মৃত্যুকাল পর্যন্ত। মীর্জা সাহেবের এক যোগ্য শিষ্য হয়ে ধৌরেন্দ্রনাথ দাস কলকাতার আসরে গিরিজাশঙ্কর চক্রবর্তীর সঙ্গেও অনেকবার হারমোনিয়ম সঙ্গত করেছেন। কোন কোন আসরে গিরিজাশঙ্করের গানের সঙ্গে এক পাশে বসে বাজিয়েছেন মীর্জা সাহেব, অন্ত দিকে ধৌরেন্দ্রনাথ।

(৪) টেরিটি বাজার অঞ্জলের আলি মহম্মদ সুন্দরিও মীর্জা সাহেবের এক শগীর্দ। অতি সুন্দর ইরাণী আলি মহম্মদ সুন্দরি তাঁর কাছে হারমোনিয়ম শিখতেন।

(৫) বারাণসী ঘোষ স্ট্রীটের লক্ষ্মীনারায়ণ গান আর হারমোনিয়ম দ্রষ্টব্য-ই শেখেন মীর্জা সাহেবের কাছে।

(৬) শ্রীহট্টের তৎকালীন নবাবও তাঁর হারমোনিয়মের শিষ্য ছিলেন।

(৭) মেছুয়াবাজারের কিশোরীলাল চৌধুরীর ভাই রামনারায়ণ চৌধুরী আর কিশোরীলালের এক পৌত্রও হারমোনিয়ম শিখতেন মীর্জা সাহেবের কাছে।

(৮) ঢাকার কাজী হাউস নিবাসী মহাসৌধিন জমিদার জালা-  
লুদ্দিন আকবর কলকাতায় তাঁর কাছে হারমোনিয়ম কিছু কিছু শেখেন।

(৯) মুশিদাবাদের মৈলুদ্দিন মৌর্জাকেও তাঁর হারমোনিয়ম শিক্ষা  
দাত করতে দেখা যায়। তবে আসলে তিনি ছিলেন মৌর্জা সাহেবের  
দরদী পৃষ্ঠপোষক, অর্থ-সহায়ক।

(১০) বৌবাজারের আবদুল আজিজ খাঁ (সেতারী হাফিজ খাঁর  
ভাগিনা ও সেতার-শিশু) মৌর্জা সাহেবের কাছে হারমোনিয়মে তালিম  
পেয়েছিলেন।

(১১) সুপরিচিত সঙ্গীতজ্ঞ রাইচান্ড বড়ালও কিছুদিন হারমো-  
নিয়ম শেখেন মৌর্জা সাহেবের কাছে।

(১২) মটরবাবু নামে পরিচিত কোরিস্টিয়ান থিয়েটারের হারমো-  
নিয়ম বাদকও মৌর্জা সাহেবের অন্তর্ভুক্ত শিশু।

(১৩) আতা নওশেরওয়ান জা'র পুত্র লাডলি মৌর্জা ও তাঁর কাছে  
হারমোনিয়ম শেখেন।

(১৪) জোড়াসাঁকোর ছোটকামজও (লালা বাবুর পিতা) মার্জা  
সাহেবের হারমোনিয়মে একজন শিশু।

(১৫) ঢাকার নবাব পরিবারের কাজাম সাহেবের এক পুত্রও  
তাঁর কাছে হারমোনিয়ম শিক্ষা করতেন।

(১৬) বড়বাজারের বিখ্যাত হীরা-জহরৎ ব্যবসায়ী বড়িদাসের  
(যাঁর নামে বড়িদাস টেক্সেল স্ট্রিট) কনিষ্ঠ পুত্রও হারমোনিয়ম শেখেন  
মৌর্জা সাহেবের কাছে।

(১৭) বড়বাজারের তেজপাল ঝুনঝুনওয়ালা ও হারমোনিয়মে  
মৌর্জা সাহেবের এক শিশু ছিলেন।

(১৮) গড়পারের সুনন্দ ঘোষও (ব্যায়ামবীর বিষুচরণ ঘোষের  
অগ্রজ) হারমোনিয়ম শিখতেন তাঁর কাছে।

(১৯) বৌবাজারের কাশীনাথ শীল (রাইচান্ড বড়ালের আত্মীয়)  
হারমোনিয়মে মৌর্জা সাহেবের কৃতৌ শিশু হয়েছিলেন।

(২০) রামরাজ্যাত্মাৰ (হাওড়া) নীলনীতন চট্টোপাধ্যায় (গোয়ালিয়ৱেৰ কলাবতী গায়িকা মঙ্গুবাঙ্গৈয়েৰ শিষ্য) মীর্জা সাহেবেৰ কাছেও গান শেখেন কিছুকাল।

তা ছাড়াও লাডলে জঙ্গ (হারমোনিয়মে) পঞ্জ সরকাৰ (হারমোনিয়মে) প্ৰভৃতি আৱো কয়েকজন মীর্জা সাহেবেৰ কাছে শিক্ষা কৰেছিলেন। তাদেৱ সকলেৱ নাম জানা যায়নি। মীর্জা সাহেবেৰ জামাতা ছিলেন মুশিদাবাদ নবাব পৰিবারেৰ মঙ্গু সাহেব। ওস্তাদ কাদেৱ বখন্সেৱ তালিমে গঠিত সুকৃত গায়ক মঙ্গু সাহেব শঙ্গুৱেৱ সাঙ্গীতিক উত্তৱাধিকাৰও কিছু পেয়েছিলেন।

এই বিবৱণ থেকে বোধা যায় কলকাতায় মীর্জা সাহেবেৰ একটি বিশিষ্ট ভূমিকা ছিল হারমোনিয়ম চৰার ক্ষেত্ৰে। এই যন্ত্ৰেৰ শিল্পী আৱ ওস্তাদ হিসেবে সেকালেৱ সঙ্গীতজগতে তিনি সাক্ষৰ রেখে যান। একক বাদনে, সুবেৱ সঙ্গতকাৰ হয়ে, ঠঁঠি দাদৰাৱ পৰিবেশনে। কলকাতায় বাগসঙ্গীতেৱ আসৱে আসৱে এই বিদেশী যন্ত্ৰটিকে (তাৰ অপূৰ্ণতা সত্ত্বেও) তিনি অনেকেৱ কাছে জনপ্ৰিয় কৰেছিলেন।...

সেকালেৱ কলকাতাৱ সঙ্গীতসমাজে এইভাৱেই সুপৱিচিত ছিলেন মীর্জা সাহেব। আসৱে হারমোনিয়মেৰ পৰ্দায় পৰ্দায় নৃত্যপৱ অঙ্গুলি। বান্ধ-বিহীন অবস্থাতেও বাঁকানো আঙ্গুল কঠি। অধ-পেশাদাৰ, সুবেৱ সন্দাগৱ। লক্ষ্মীৰ ছিলমূল নবাব ওয়াজেদ আলৌৱ পৌত্ৰ। দীন পাঞ্জাবি পাঞ্জামায় এক নবাবী অবয়বেৱ অবশেষ। মীর্জা সাহেব। এক পুৱৰ আগেও অকল্পনীয় সে দৃশ্টি! আৱ অভাৱনীয় জীবনযাত্ৰা!

মীর্জা সাহেবেৰ সঙ্গীত-জীবন। তাৰ পটভূমিতে ছিল সেকালেৱ মেটিয়াবুকুজ—ঘেৰান থেকে তাঁৰ যাত্ৰা শুৱ হয়েছিল।

খিদিৱপুৱেৱ দক্ষণ উপকৃতি, গঙ্গাতীৱে মেটিয়াবুকুজে। উনিশ শতকেৱ দ্বিতীয়াধি ইংৰেজ সিভিলিয়ানদেৱ গার্ডেনৱীচ নবাব ওয়াজেদ

আলীর মেটিয়াবুরুজে পরিণত হয়েছিল। মেটিয়াবুরুজ নাম তারও তিনশ বছর আগেকার। মহারাজা প্রতাপাদিত্যের রাজ্যের এক প্রত্যন্ত দুর্গ ছিল এখানে। সেই মাটির গড়ের শূলিক বহন করত মেটিয়াবুরুজ নাম। মাটির দুর্গ কিংবা বুরুজের কোন চিহ্নই ইংরেজ আমলে অবশ্য ছিল না।

তবে নবাব ওয়াজেদ আলীর জন্মে মেটিয়াবুরুজের আরেক তৎপর্য দেখা দিয়েছিল। লক্ষ্মৌতে যে নবাবীর উৎপত্তি, তার পরিণতি বা পরিসমাপ্তি ঘটে এখানে।

মৌর্জা সাহেবের যথন মেটিয়াবুরুজে জন্ম, তখনে নবাবীর রেশ ছিল। লক্ষ্মৌতে মহা ধূমধামে নবাবী শুরু করেছিলেন ওয়াজেদ আলি। তার অবশেষের পর্ব তাঁর তখনে চলেছিল মেটিয়াবুরুজে। বছরে বারো লক্ষ টাকা তাঁর বৃত্তি। আর বংশানুক্রমে পাওয়া সোনাদানা হৈরে জহরৎ। সেই সব নিয়েই নবাব-জীবনের গোধূলিবেলার অস্তচ্ছট।

উনিশ শতকের পঁচাত্তর-আশি সালের সেই মেটিয়াবুরুজ ! মৌর্জাৰ তথন নিতান্ত শৈশব।

লক্ষ্মৌ থেকে নির্বাসিত নবাবের স্থায়ী আবাস সেদিনের মেটিয়াবুরুজ। আর সেখানে ওয়াজেদ আলী তখনে দরবার বহাল রেখেছেন। তাঁর সেই ভারত-বিদ্যাত সঙ্গীতের দরবার। প্রথম শ্রেণীর কলাবৎদের আসর বসে তখনে। ‘রহস্য মঞ্জিল’ জমজমাট। ‘পরৌ’দের নৃত্যগীতে মুখর। নবাব রচিত গীতিনাট্যের মহা আড়ম্বরে অভিনয় হয় সেই মধ্যে। নবাব নিজেও যোগ দেন। পরিচালনা করেন। নবাবের খাস বাসভবন শুলতান থানা। তারই কাছাকাছি শাহ মঞ্জিল, বৈতুন নাজাত ইত্যাদি সদন। নবাবের রঞ্জমঞ্চ—রহস্য মঞ্জিল প্রেক্ষাগৃহ। নবাবের নিজস্ব চিড়িয়াখানা। এ সবই মেটিয়াবুরুজের গঙ্গার ধারে সেই নবাবী এলাকা জুড়ে। সে চতুরের পূর্বদিকে শৌহ ফটক ( যার শূলিক এখনো রয়েছে ‘আয়ৱন

গেট রোড' নামের আড়ালে )। আর পশ্চিমে অবারিত গঙ্গার দৃশ্য।

নবাবের সেই শেষ বয়সে মৌর্জা সাহেবের শিশুকাল !

নির্বাসিত নবাব তখনে সরকারী বৃক্ষ পান বাষিক ১২ লক্ষ তন্থ। কিন্তু মাসে মাত্র লাখ টাকায় ওয়াজেদ আলী শার কি করে চলে ! বিশাল হারেম। এত বেগম। এত সন্তান-সন্তুতি পরিজন-বর্গ। দাসদাসী খিদমদগার। মাস মাহিনায় নিযুক্ত এত গায়ক বাদক। রহস্য মঞ্জিলের নর্তকী গায়িকা অভিনেত্রী বাঙালীরা। আর হেকিম থেকে দর্জি পর্যন্ত নানা পেশার বাঁধা সেবক। আশ্রিত জন বিভিন্ন প্রকারের। আরো আছে। বাগ-বাগিচা। চিড়িয়াখানা। মতবা-ই-সুলতানি : সুলতানের ছাপাখানা। নবাবের রচনা সব কেতাব যেখানে মুদ্রিত হয় বন্ধু-বন্ধব আঢ়ীয়-স্বজনদের মধ্যে বিতরিত হবার জন্মে। এসব ছাড়াও নবাবের নিজস্ব আরো নানা-রকম খরচপত্র আছে।

মাসে লাখ টাকায় সঙ্কুলান কিছুতেই হত না। সব দিক বজায় থাকত না নবাবের খাস কোষাগার না থাকলে। লক্ষ্মীতে ক' পুরুষ ধরে নবাবদের সঞ্চিত ধনভাণ্ডার। সওয়া শ' বছরের নবাবীর পরেও কি জমা তখনে ! সোনাদানার চেয়ে অনেক দামী দামী হীরে জহরৎ মুক্তো মানিক।

নবাব ওয়াজেদ আলী সেই সব মণি মুক্তো জহরৎ তখনে ফুরাতে পারেননি। তাই বজায় আছে তার মেটিয়াবুরুজের নানা ঠাট-বাট। সঙ্গীতপ্রাণ গুণীতে জমজমাট নবাবের দরবার। তার শ'খানেক কলাবৎ-কলাবতীদের আসর। গান বাজনা নাচ। বাঙালী বেগম। ভোগবিলাস। খাই-খিলাই। দান-খয়রাং। খরচের বিস্তর রাস্তা তখনে খোলা আছে।

টান পড়লেই নবাব হাত দেন সেই জমাতে। এক মুঠো তুলে নিজেই আপাতত চলে যায়। নবাবের হীরে জহরৎ কেনবার লোক

কলকাতায় নির্দিষ্ট কজন। তাঁদের খবর পাঠান। তাঁরা কিনে নিয়ে যান মেটিয়াবুরুজে এসে। থুব জরুরি হলে, কিংবা খেয়াল চাপলে নিজেও বেরোন নবাব। নিজের সেই প্রকাণ্ড ফিটন গাড়ির সওয়ার হন। পাকা আমের মতন চেহারায় ফিটনের গদিতে বসে, মুখে তাঁর কাপোর গড়গড়া নজ। মাথায় ময়ুরপুচ্ছে সাজানো মুক্তা-বসানো মুকুট। আরো পিছনে নবাবী গড়গড়া নিয়ে দাঢ়িয়ে উদিপরা ছঁকা-বরদার।

বড়বাজারের সেই পাকা জহুরীর বাড়িতে আসেন নবাব। জহুরীর সঙ্গে তাঁর অতি বিশ্বাসের সম্পর্ক। মণিরত্ন ইত্যাদি নবাবের ইনি কিনেছেন, বেচে দিয়েছেন। মেটিয়াবুরুজেও এই কাজে মাঝে মাঝে যান নবাবের তলব হলেই। নবাবের মান রাখতে জানেন। তাই নবাব তাঁর বাড়িতেও আসেন প্রয়োজনে।

নবাবকে খাতির জানিয়ে জহুরী গদীতে বসালেন। লক্ষ্মীয়ি আতরের খসবুতে ভরে গেল কক্ষ।

তিনি জানেন, নবাব হীরে জহুরৎ কিছু বেচতে এসেছেন। কিন্তু নবাবী কেতা আলাদা রকম। যেন কর্জ করছেন জহুরীর কাছে। জহুরীও সেই মতন কথা বলেন। নবাবের ইজৎ বাঁচিয়ে জানতে চান—আজকের ‘উধার’ কত হবে।

—দেড় লাখ তন্থ।

জহুরী উঠে গিয়ে কোন গুপ্ত সিন্দুক থেকে একটা তোড়া এনে নবাবের সামনে রাখেন।

তারপর দু-চারটে আদব-কায়দা আর বাক্যালাপের পর তসরীফ ওঠান নবাব। তোড়া নিয়ে চলে যান।

তখন জহুরীর সন্ধানী দৃষ্টিতে পড়ে রঙীন রেশমী রুমালের একটি তোড়া। নবাব যেখানে বসেছিলেন, গদীর সেখানেই রয়েছে। যেজন্তে এসেছিলেন, সেটি রেখে গেছেন নবাব।

মুগঙ্কী রেশমী তোড়াটি জহুরী খুলে ফেলেন। ঝকমক করে

ওঠে সাজা হীরে মুক্তোর ছটা। যাচাই করতে থাকেন জহুরী। হিসেব করেন। এক লাখ ষাট-পঁয়ষ্টি হাজার হবে জরুর। সন্তুর হাজারও হতে পারে।

এমনিভাবে নবাব নগদা রূপিয়া পেয়ে যান। হীরে জহুরতের কারবারী উধার দেন এইভাবে। সুতরাং সে খণ পরিশোধ হবার কোন প্রশ্নই নেই!...

ওয়াজেদ আলী শা'র মতা সৌখীন জীবন-তরণী এমনি বিচ্ছিন্ন বিলাসে বয়ে যায় শেষ পর্যন্ত। সঙ্গীতে, হারেমে, বেগমে, পরীতে। কাব্য-সাহিত্যে, গানে, গীতিনাট্যে, আসরে দরবারে, রহস্য মঞ্জিলে। ভোগে দায়িত্বে, কর্তব্যে, বাহ্লো-আত্মজন অনুগত ভরণ-পোষণে-সরকারী বৃত্তিতে সঞ্চিত সম্পদে টলমল নবাবী ময়ূর-পঞ্জী।

কিন্তু ভাঁটার স্রোতও অলক্ষিতে তলে তলে বহতা ছিল। তাই ১৮৮৭তে নববারে ঘৃত্যার পরেই ঝঁপিয়ে এল মহাপ্লাবন। মেটিয়াবুরুজের তাবৎ নবাবী এলেকা নিমজ্জিত হয়ে গেল। নৌলামে উঠল সুজতান-খানা, শাহ মঞ্জিল, রহস্য মঞ্জিল, রাধা মঞ্জিল, শার্দা মঞ্জিল, বাইতুন নাজাত, চিড়িয়াখানা, বাগ-বাগিচা ইত্যাদি নবাবের তামাম মকান জমীন। অনুক্ষণ-সুব-রণনে গুপ্তরিত সঙ্গীত-দরবার চির-নিষ্ঠক হল।

মীর্জা সাহেব তখন নিতান্ত বালক বয়সী। নাম খুরসেদ মীর্জা। বিগত নবাবের পঞ্চম পুত্র শাহজাদা আসমন জার দশম ও করিষ্ঠ পুত্র।

সরকারী নথিপত্রে নবাবজাদাদের নামমাত্র প্রিস খেতাব রইল। কিন্তু নবাবী মঞ্জিল থেকে বিদায় নিলেন তাঁরা। অনেকেই মেটিয়া-বুরুজ ত্যাগ করে গেলেন। অস্ত্র। অভাবিত অবস্থায়। কেউ বসতি করলেন নিকটবর্তী খিদিরপুরে। কেউ আর একটু দূরে গুয়েলেসলী অঞ্চলে। কেউ বা মেটিয়াবুরুজেই অন্ত এলাকায় অন্ত ভাবে বাস প্রত্ন করলেন।

ওয়াজেদ আলীর চবিশজন পুত্র আর একুশটি কন্যা (প্রথম ছই পুত্র তাঁর জীবিতকালে গতায়)। তাঁদের মধ্যে পাঁচ পুত্র ও বারো কন্যার জন্ম লক্ষ্মীতে। সেখান থেকে নবাব নির্বাসিত হয়ে ১৮৫৬ সালের এপ্রিল মাসে মেটিয়াবুরুজে আসেন। তারপর ২৬ মাস ফোর্ট উইলিয়ামে বন্দীজীবন যাপনের পর ১৮৫৮ সালের শেষ থেকে প্রায়ই হন মেটিয়াবুরুজে। এখানে তাঁর ১৯ পুত্র ও ৯ কন্যার জন্ম। এই হিসাব সরকারী পেনসনপ্রাপ্তি ইত্যাদি সূত্রে স্বীকৃত। তা ছাড়াও পুরু কন্যা হয়ত থাকতে পাবেন, যেন যায় না। আর নবাবের বেগমদের সংখ্যা নিশ্চিতভাবে জানা প্রায় অসম্ভব।

এখানে কথা এই যে, এমন মহান সঙ্গীতজ্ঞ পিতার এই গুণ এত পুত্রদেব কেউ লাভ করেননি। পৌত্রবাও নন। ব্যতিক্রম কেবল খুরসেদ, পরবর্তীকালের মীজ। সাহেব। তিনিও পিতামহের সঙ্গীতগুণের এক ভগ্নাংশ পান। কারণ তিনি শুধু হাবমোনিয়মশিল্পী এবং গায়ক। কিন্তু নবাব ছিলেন একাধারে বহুমুখী গুণী। গায়ক সেতার-বাদক নৃত্যবিদ নছ স্ববণ্ণীয় ঠুঠি গানের রচয়িতা ও সুরকার-ফুপদও রচনা করতেন, যেমন শুল্ক বেলাবলে ‘শুভ সগন শুভ লগন ছত্র ধরাট’ ইত্যাদি, সঙ্গীততত্ত্বের গ্রন্থকার (বনি প্রভৃতি), গীতিনাট্য-রচয়িতা ইত্যাদি নানা সাঙ্গীতিক পরিচয় ওয়াজেদ আলী শাহর আছে।

তব নবাবের শতাধিক পুত্র-পৌত্রদের মধ্যে সঙ্গীত-গুণের একমাত্র উত্তরাধিকারী খুরসেদ মৌর্জা। একথাও মনে বাখবার।

খুরসেদেব পিতা আসমন জার জন্ম লক্ষ্মীতে (আনুমানিক ১৮৫১)। নবাব ওয়াজেদ আলী তখন লক্ষ্মী মসনদে আসৌন। তাঁর পঞ্চম পুত্র আসমন জার জননী যে নবাব-বেগম, তাঁর নাম রসক মহল। নিরামনের আগে লক্ষ্মীতেই বেগম রসক মহলকে নবাব তালাক দিয়েছিলেন। মেটিয়াবুরুজে আসেননি বসক মহল। নবাবের অন্যান্য পরিবারবর্গের সঙ্গে পাঁচ বছরের বালক আসমন

জা মেটিয়াবুরুজে এসেছিলেন। তারপর থেকে এখানেই তার  
বসবাস।

আসমন জার সাত পুত্র, তিনি কল্পার মধ্যে সর্বকনিষ্ঠ হলেন  
খুরসেদ মীর্জা। তার জন্মস্থান মেটিয়াবুরুজ। তাঁর বাল্যজীবনও  
এখানে অতিবাহিত হয়, অস্তত ১৮৮৭ পর্যন্ত। তারপর মেটিয়াবুরুজের  
বিরাট নবাব পরিবারের বিপুল বিপর্যয়ে মীর্জা খুরসেদ কোথায়  
উৎক্ষিপ্ত হন, কোন ধারায় তাঁর জীবনচর্চা অগ্রসর হয় তার বিবরণ  
অপ্রাপ্য।

অনেক পরে যখন তাঁকে আসরে আসরে হারমোনিয়ম-শিল্পী  
হিসেবে দেখা যায়, তখন আর তিনি মেটিয়াবুরুজের বাসিন্দা নন।  
তখন ক'বছর ছিলেন বেলেঘাটার এক বাসায়। তারপর ন-দশ  
বছর জেলেটোলায়, মর্গের পেছনে এক বসতিতে। সে-সময় তাঁর  
পাশের ঘরে থাকতেন ওস্তাদ বাদল থা এবং শ্রীজান বাঙ্গায়ের পুত্র  
খাদেম হোসেন।

মীর্জা সাহেবের জেলেটোলার পর জীবনের শেষ ছয়-সাত বছর  
তাঁতিবাগানে (জোড়া গির্জার কাছে) কাটিয়েছিলেন। সেখানেই  
তাঁর শেষ নিঃশ্বাস পড়ে দ্বিতীয় মহাযুদ্ধের প্রথম দিকে। তাঁতিবাগান  
লেন ও আঙ্গুমান রোডের কোণে সেই দোতলা মাঠকোঠায়। বয়স  
প্রায় ৬০ বছর হয়েছিল।

মীর্জা সাহেবের দুই বিবাহ। দ্বিতীয় পক্ষ নিঃসন্তান। প্রথম  
পক্ষে দুই কল্পা। কনিষ্ঠার সঙ্গে পরিণীত হন মুশিদাবাদের  
সুপরিচিত গায়ক মঞ্জু সাহেব। মুশিদাবাদ নবাব পরিবারের এক  
সন্তান মঞ্জু সাহেব।

এমনি কটি তথ্য ছাড়া মীর্জা সাহেবের ব্যক্তি-জীবনের অনেক  
কথাই অজ্ঞাত আছে। মেটিয়াবুরুজের পর কিভাবে তিনি জীবন-  
যাত্রা আরম্ভ করেন সে বৃত্তান্তও দুঃপ্রাপ্য। এমন কি তাঁর সঙ্গীতচর্চার  
সূচনা ও পরিণতি কি করে হয়, সে প্রসঙ্গও উদ্ধার করা যায়নি।

বেলেঘাটার এক নগণ্য বাসায় ঠাকে পাওয়া যায় কলকাতার  
এক অগ্রগণ্য হারমোনিয়ম-শিল্পীরূপে। আর অর্ধ-পেশাদার।  
মেটিয়াবুরজের নবাব-পৌত্র বলে সামান্য সরকারী পেনসন পেতেন।  
১৯১২ সাল পর্যন্ত তা ছিল মাসিক ২০ টাকা। তারপর থেকে  
বৃদ্ধি পেয়ে মাসে ৫০ টাকা হয় মৃত্যুকাল পর্যন্ত। সেই সঙ্গে ছাত্রদের  
তালিম দিয়ে কিছু কিছু উপার্জন করতেন। মুজরো পেতেন অনেক  
আসর থেকেই। তা হলেও দরিদ্রের মতনই ঠাকে জীবন যাপন  
চলত। কারণ ঐসব আনুষঙ্গিক খরচ হত নিয়মিত। তেমন  
তেমন সঙ্ক্ষেপে বলা, নগদের বদলে ঐ পেলেই বাজিয়ে আসতেন  
যত্রতত্ত্ব। নিজেকে এমন হীন করছেন দেখে কোন হিতার্থী হয়ত  
অনুযোগ করতেন। কিন্তু ইন্দ্রিয়ের পুতুল—চৰ্বলচিত্ত, সংযমে  
অপারগ। এমনিভাবে নবাব ওয়াজেদ আলীর এক পৌত্রকে হার-  
মোনিয়ম-শিল্পীরূপে প্রথম দেখা যায় বেলেঘাটায়।

বেলেঘাটার আগে কলকাতায় অথবা কোথাও কোথাও কাটিয়ে-  
ছিলেন মৌর্জা সাহেব। তবে সে সব কথা জানা যায় না। যেমন  
জানা যায়নি তিনি হারমোনিয়ম শেখেন কার কাছে। এমন চালের  
বাজনা এমন মনোহারী শিল্পকর্ম কলাবতের তালিম তিনি সচরাচর হয়  
না। কারণ এই প্রকার বিধিবদ্ধ অঙ্গুলিচালনার কায়দা শিক্ষা সাপেক্ষ।

মৌর্জা সাহেবের কোন কোন শিষ্যের মতে, ওস্তাদজী হারমো-  
নিয়মের তালিম পেয়েছিলেন প্রসিদ্ধ চন্দ্রভাগা বাঙ্গায়ের কাছে।  
কিন্তু এবিষয়ে সন্দেহের অবকাশ আছে। কারণ ছজনের মধ্যে  
কালের অসামঞ্জস্য। খুরসেদ মৌর্জার জন্ম ১৮৮০ কিংবা ১৮৭৫  
সালের আগে অস্তিব। কারণ ঠাকের পিতার জন্ম সন ১৮৫১।  
খুরসেদ মৌর্জার হারমোনিয়ম শিক্ষা আরম্ভ সেই হিসাবে ১৮৯৫-এর  
আগে ধর্তব্য নয়। শেষোক্ত সময়ে চন্দ্রভাগার বয়স ৭০ উত্তীর্ণ।  
তাছাড়া খুরসেদ মৌর্জা ঠাকে কাছে শিখবেন কোথায়? তিনি তো  
লক্ষ্মীবাসিনী। আর ওয়াজেদ আলীর পরিবারের সেকালে লক্ষ্মীতে

যাতায়াত নিষিদ্ধ ছিল, বিশেষ অনুমতি ভিল। এইসব কারণে চন্দ্রভাগার কাছে মীর্জা সাহেবের তালিম পাওয়া বোধহয় সম্ভব নয়।

তবে গণপৎ রাওয়ের—হারমোনিয়মের সেই অপরূপ শিল্পী গণপৎ রাওয়ের গোষ্ঠীভুক্ত ছিলেন মীর্জা সাহেব। চন্দ্রভাগারই পুত্র গণপৎ রাও (ভাইয়া সাহেব)। আর ভাইয়া সাহেব হারমোনিয়ম তালিম তো জননীর কাছেই পেয়েছিলেন। চাবিতে চাবিতে অঙ্গুলি চালনার বিশিষ্ট সেইসব নিয়ম কায়দা। সেই চালের বাজন। সেই বোল বানান। ঠুংরি অনুসারী হারমোনিয়ম বাদন। আর গণপৎ রাওয়ের শিশুরাও ওস্তাদের সেই ধারা অনুসরণ করতেন। গয়ার গোফুর থাঁ আর সোহনৌজী। ইন্দোরের বসির থাঁ। কলকাতায় শ্যামলাল ক্ষেত্রী আর ইরসাদ।

গণপৎ রাও কলকাতায় এলেই তাঁর এই শিশুমণ্ডলীতে ঘেরা থাকতেন। আর তাঁর সঙ্গে মীর্জা সাহেবকেও দেখা যেত। দিনের পর দিন তিনি দেখতেন, শুনতেন গণপৎ রাওয়ের বাজন। আর বাজাবার কায়দা। অন্ত সময়ে যখন ভাইয়া সাহেব থাকতেন না কলকাতায়, মীর্জা সাহেব শ্যামলাল ক্ষেত্রীর সঙ্গে মিলতেন থুব।

প্রায়ই শ্যামলালজীর ১০১ হ্যারিসন রোডের আসরে তিনি আসতেন, বাজাতেন। তাঁর বাজনার চালও ঠিক এঁদেরই মতন। এমনি রীতির মনোহারী ঠুংরি। এই কায়দার অঙ্গুলি চালনা। আর ডান হাতে বেলো করে বাম হাতে বাজানো মীর্জা সাহেবেরও—গণপৎ রাও, গোফুর, বসির থাঁর মতন। শ্যামলালজী, ইরসাদ, সোহনৌজী বাঁ হাতে বাজাতেন না বটে। তবে তাঁদেরই মতন আঙুলে আর ঠুংরি অঙ্গে, মেজাজে, চালে, মীর্জা সাহেবের হারমোনিয়ম বাজন।

তাঁদের সকলেরই বাজাবার ঢঙ একটি বিশিষ্ট প্রকারের। তা হল—তাল জয়ের চেয়ে সুরের দিকে, সূক্ষ্ম কারুকর্মের দিকে বেশি খোঁক।

এই বাঁধা সুরের পর্দায় যত মিহি কাজ করা সন্তুষ্ট তা দেখানো। সে সবই গণপৎ রাওয়ের এই গোষ্ঠীর চাল। আর শ্যামলাল ক্ষেত্রীকে কেন্দ্র করে কলকাতায় গণপৎ রাওয়ের এই অমুগামীদের সঙ্গেই মৌর্জা সাহেবের সাঙ্গীতিক যোগাযোগ। গিরিজাশঙ্কর চক্রবর্তীর সঙ্গেও এই সূত্রে তাঁর অন্তরঙ্গতা আসরে আসরে। একযোগে গান বাজনাও। শুধু গিরিজাশঙ্কর কেন, গহর জান, মালকা জানও তো এই গোষ্ঠীর, গণপৎ রাওয়ের তাঁরাও শিষ্য। সেই সূত্রে গহর, আগ্রাম্যালী মালকা আসা-যাওয়া করতেন শ্যামলালজীর বৈঠকে। আর মৌর্জা সাহেবও যেতেন।

তাছাড়াও গহর জান, মালকা জানদের সঙ্গে ঘনিষ্ঠতা হয় মৌর্জা সাহেবের। সেসব তাঁর যৌবনকালের কথা। তখন গহর আর মালকার বাড়িতেও তাঁর যাতায়াত ছিল। পান-ভোজন বিলাসী যেমন, তেমনি এসব দিকেও সঞ্চরণ করত তাঁর বিলাস-চিত্ত।

তখন তো এমন হাল হয়নি মৌর্জা সাহেবের। চালচলন সাজ-পোশাক তখনো অনেকটা নবাব-পৌত্রের উপযুক্ত ছিল। আর যৌবনের সে লালিত্যময় স্বাস্থ্যজ্জল শরীর। গোলাপী গৌরবণ্ণ কাস্তি। মুখ চোখ ঝ-যুগলের নন্দন-ছাঁদ। অন্য সব গেলেও নবাবী চেহারা মৌর্জার সেই যৌবনে ছিল বৈকি। আর গহর জান তাঁর কদর করতেন। মৌর্জার সঙ্গে শুখের সম্পর্ক ছিল তখন গহরের।

তারই একটি উত্তর-প্রসঙ্গ এই শেষের কথায় যোগ করে দেওয়া যায়।

শ্বেরিণী, যৌবন-বিলাসিনী গহর জান। আর রূপসী বাঙ্গাজী-বিলাসী রূপবান ভোগপরায়ণ তরুণ।

কিন্তু সে সব মধু বাসন্তী দিনের অনেক বছর পরের এই কথা। গহর জানের জীবনে অনেক নাটকীয় আবর্তন, বহু উপার্জন আর খ্যাতি-প্রতিপত্তির দিনের এক উপসংহার কাহিনী। বর্ণাচ্চ নানা দৃশ্য-শেষে দুজনেরই জীবন-নাট্ট্য এসময় পঞ্চমাঙ্ক শুরু হয়েছে।

এক আসরের হাজার টাকা মুজরো ছিল যে সেরা বাঙ্গি সাহেবার, এখন তাঁর পসারহীন ছুর্দিন। আয়নার সামনে বিগত কালের সে রূপতন্ত্র দেখার প্রত্যাশায় হয়ত আনমনা দাঢ়ান। আর বেদন-বিহুল হয়ে যান নতুন প্রতিবিহু দেখে। রমণীর দৃষ্টি দিয়ে আপন দেহলতা লক্ষ্য করেন। হয়ত হাহাকার করে ওঠে অস্তর। বাইরে থেকে যা অলঙ্ক্য, পুরু কাঁচের সাহায্যে তা নিজের কাছে সুস্পষ্ট। বাহুত হয়ত অটুট-দর্শন শরীর। তবে পুরু চশমা ঘরে ব্যবহার না করলে অনেক দৃশ্যই অস্পষ্ট থেকে যায়।

এ আয়না মালকা জানের, তাঁর একটি গৃহ-কক্ষের। কলকাতা-জীবনের তখন শেষ পর্ব গহরের। এখান থেকে চিরবিদ্যায় নিয়ে মহীশূর দরবারে চলে যাবার ঠিক আগের কথা। সেই বিপর্যস্ত দিনে অনেক কালের বান্ধবী গুরুবহিন মালকার অতিথি হয়ে আছেন। আগ্রাওয়ালীর সেই ইণ্ডিয়ান মিরর স্ট্রীটের উত্তরমুখী আস্তানায়।

সেদিনের ম্লান অপরাহ্ন বেলা। দোতলার এক অন্দর কামরায় বসে আছেন গহর জান। অন্তমনক্ষ হয়ে কেশ পরিচর্যা করছেন। নিতান্ত অন্তঃপুরের বেশবাস।

এমন সময় হঠাৎ হাজির হলেন লতিফ, মালকা জানের সহোদর। সঙ্গে মীর্জা সাহেব আর তাঁর এক ছাত্র।

‘কৌন্ কৌন্? অন্দরমে আ গিয়া।’ বিরক্ত কর্ণে ধরক দিয়ে উঠলেন ক্ষীণদৃষ্টি গহর জান, ‘বে আদব! ’

লতিফ সান্ত্বনার স্বরে বললেন, ‘জেরা দেখিয়ে ত কৌন্ আয়া আপ্কা পাশ?’

লতিফকে দেখে তাঁর আশ্বাসে ক্রোধ শান্ত হল গহর জানের। কৌতুহলী হয়ে পুরু কাঁচের চশমাটি শুভ খড়গ-নাসিকায় তুলে ধরলেন।

সামনে শু কে দাঢ়িয়ে?

অনেক হিম ঝুতু সে দেহ-সৌষ্ঠবের ওপরেও কা঳-প্রবাহে বয়ে  
গেছে। বহুদিনের অদৰ্শন। তবু চিনেছেন গহর জ্ঞান।

‘মীর্জা !’ সে আকুল স্বরে পুলকোচ্ছাস না আর্তনাদ ? নাকি  
হয়েরই আশ্লেষ ? আকশ্মিকতার ভাবাবেগে উদ্বেল পরিস্থিতি।  
বাঙ্গ সাহেব। আপ্নুতা হলেন।

‘দেখো তুমহারা গউহরকি কেয়া হালাং হয়ি ।’ কণ্ঠ অবরুদ্ধ হয়ে  
গেল অশ্রুধারায়।

জীৰ্ণ, মলিন মীর্জা সাহেব ইতচকিত চেয়ে রইলেন। নির্বাক,  
অপলক দৃষ্টি বাঞ্পাছন্ন হয়ে উঠল।

সেই গউহর ! গউহর জ্ঞান !

হারমোনিয়মের পর্দায় পর্দায় ওঠানো কোন ঠুংরির সকরণ রেশ  
যেন।

কতকালের হারানো স্মরের ক্রন্দন...

## আরেকজন শীর্ষস্থানীয়া

॥ কৃষ্ণভামিনী ॥

গায়িকার গুণই দোষ হয়ে উঠল। তাঁর গান নিয়েই হল বিপত্তি  
আর সেই বিপদের মধ্যেও কলাবতী চরিত্র ফুটে উঠল।...

পাড়ার অন্য লোকদের কোন আপত্তি ছিল না। বেশ ভাল ভাল  
গান তো শুনতে পাওয়া যায়। ক্ষতি কি!

কিন্তু একজন একেবারে খড়গহস্ত হয়ে উঠলেন। এত রাত পর্যন্ত  
গান বরদাস্ত হল না তাঁর। ব্যাপারটি অসহ। আর তাও প্রায়ই।  
এ বন্ধ না করলেই নয়।

ভদ্রলোক আটৰী—আইনের পেশা। তাই স্থির করলেন  
আইনের রাস্তাতেই নিষ্ঠার পেতে হবে। রাত দশটা এগারোটা  
পর্যন্ত চলবে গান-বাজনা বাড়িটার সামনে, পথে লোক জমা হয়ে যায়।  
সব হাঁ করে শোনে—গান হচ্ছে ওপরের ঘরে। শুধু পাড়ার লোক  
নয়, অন্য জায়গা থেকেও লোক শুনতে আসে। এত লোক তো এ  
গলিতে থাকে না।

উত্তর কলকাতার শিমুলিয়া অঞ্জল। লোকে বলে—শিমলে।  
তারই একদিকে মহেন্দ্র গোস্বামী লেন। সেই গলির একখানি  
মাঝারি বাড়ি ষটনাস্তল। কাল—বিশ শতকের প্রথম দিক।

সে পথটির দুপাশে তখন অনেকখানি খাল জায়গা দেখা যায়  
কয়েকটি মাত্র বাড়ি সে পাড়ায়। তার মধ্যে এই দুটি কাছাকাছি  
বাড়ি।

সেকালের কলকাতার জনবিরল গলি। সদর রাস্তার বেশি দূরে

নয়। তবু সন্ধ্যার পর থেকেই কেমন নিখুম হয়ে আসে। আটটা-নটাতেই যেন নিষ্ঠতি রাত। বড় রাস্তার আওয়াজ সব কমে যায়। যেটুকু থাকে, পৌছয় না এখানে।

সেই নিষ্ঠতি রাতে গানের সুর ক্রমেই স্পষ্ট ভেসে আসে অ্যাটন্টি মশায়ের কাজের ঘরে। তাঁর একটি বাড়ির পরেই সেই গান-বাজনার বাড়ি। তাঁর একদিকে আবার খানিকটা বাগান। ফাঁকা জায়গার হাওয়ায় গানের সুর যেন আরো চেউ তুলে দেয়।

ভদ্রলোকের বড় ক্ষতি হয় কাজকর্মের। মকেলো আসেন। তাঁদের সঙ্গে মামলা-মোকদ্দমার জরুরি কথাবার্তা। নথিপত্র পড়াশুনা আর মুসাবিদা করার ব্যাপারে বড় অসুবিধে হতে থাকে। বিরক্তি আসে গানে। মেজাজ বিগড়ে যায়। এই শ্রেণীর মেয়েমানুষ থাকবে ভদ্রপাড়ার মধ্যে! প্রকাশে গাইবে! আর শুধু তো গান নয়! গাইছে একটা ইয়ে মেয়েমানুষ! আর তাই শুনতে ভিড় হয়ে যাবে বাড়ির সামনে! এর একটা প্রতিকার হওয়া দরকার।

এবার তৎপর হলেন অ্যাটন্টি মশায়। সেদিন খোদ পুলিস দপ্তরে মালিশ করে এলেন। এ-অঞ্চলের থানা পাছে গাফিলতি করে, তাই গেলেন লালবাজারে। লিখিত বিবরণে মেয়েমানুষটির নাম-ধার অপরাধের বিষয় সব জানালেন। আবেদন করলেন, এমন চরিত্রের রমণীর ভদ্রপাড়ায় বাস আর গানবাজনা যেন নিষ্ঠত করেন আইন-শৃঙ্খলার কর্তৃপক্ষ।

ভদ্রলোক ক্রোধের বশে একটা কথা ভুলে গিয়েছিলেন। ‘ওই শ্রেণীর মেয়েমানুষ’ সেই গলিতেই তখন ছিল আরো ক’জন। তবে তারা গান গাইত না বটে। তাই তাঁদের নামে অ্যাটন্টির কোন অভিযোগ ছিল না। তাঁর আসল আক্রোশ গানের বিরুদ্ধে। আর সেজগ্যেই গায়িকার ব্যাপারে আপত্তি। সঙ্গীত সম্পর্কে তিনি বোধ-হয় সেই স্বভাবের, যাঁর বিষয়ে শেকস্পীয়রের সেই শ্বরণীয় বাণী আছে—

The man that hath no music in himself,  
Nor is not moved with concord of sweet sounds,  
Is fit for treasons stratagems and spoils.  
Let no such man be trusted.

লালবাজারে তখন পুলিসের এক বড়কর্তা ছিলেন হ্যালিডে সাহেব।

মে জবরদস্ত বুটিশ আমলের কথা। ইংরেজ শাসনের অন্ত দিকে যা হোক, বাহ্য আইন-শৃঙ্খলার বাপারে তেমন শৈথিল্য ছিল না। পুলিস অনেক সক্রিয় থাকত ছৰ্ণৰ্তি সম্পর্কে। কারণ পুলিসের ইংরেজ কর্তাদের দস্তরমত দায়িত্ব-বোধ ছিল। অনেক সাহেব বড়কর্তা রাতে বেরুতেন তেমন তেমন অঞ্চলে। স্বচক্ষে দেখতেন, সরেজমিনে তদন্ত করতেন। স্থানীয় থানার ওপর হুকুম জারি করে বসে থাকতেন না দপ্তরে।

হ্যালিডে সাহেব ছিলেন পুলিসের তেমনি এক কর্তব্যপরায়ণ বড়কর্তা। তিনি আবার ছদ্মবেশে বেরুতেন। অপরিচিতভাবে গেলে সুবিধা হত অনুসন্ধানে। আর তিনি ছিলেন অতি সুশ্রী, সুপুরুষ। সুন্দর মুখ চোখ। নারীরূপেও তাকে চমৎকার মানাত। তাই স্ত্রী-ভূমিকাতেও মাঝে মাঝে দেখা দিতেন যথাস্থানে।

এ-ব্যাপারটিও হ্যালিডে সাহেব নিজে তদন্ত করলেন। অভিযুক্তের নাম-ঠিকানা নিয়ে বেরুলেন একদিন। মানিকতলা স্ট্রীট দিয়ে শিমলার সেই অঞ্চলে। মহেন্দ্র গোস্বামী লেনের নিদিষ্ট বাড়িটিতে হাজির হলেন। কোন নারীর ছদ্মবেশে নয়, একেবারে পুলিসের নিজস্ব পোশাকে।

নৌচের দরজা খোলা পেয়ে সাহেব দোতলায় উঠে এলেন। সামনে একটি বড় ঘর। সেখানে এক পরিচারিকা জিনিসপত্র পরিষ্কার করছিল। পুলিস সাহেবকে ঘরে ঢুকতে দেখে থরহরি কলেবরে মনিবানির কাছে ছুটল।

হ্যালিডে একদিকে দাঢ়িয়ে দেখতে লাগলেন ঘরের দৃশ্য। মেঝের অনেকখানি জায়গা ভাল কার্পেটে ঢাকা। তার একপাশে হারমোনিয়ম, তানপুরা, বাঁয়া-তবলা। অন্তর্দিকে কটি মোটা মোটা তাকিয়া। ঘরের কোণে, দেয়ালের ধারে কয়েকটি নানা আকারের সৌখীন আসবাব। একদিকের দেয়ালে একটি নারীর রঙীন ছবি। বিপরীত দিকে প্রমাণ মাপের একটি দামী আয়না। চারদিকে দেয়ালে সেজ বাতির সরঞ্জাম। সমস্তই বেশ পরিচ্ছন্ন।

সাহেব কার্পেটের এক ধারে পা মুড়ে বসলেন।

খানিক পরে পরিচারিকার সঙ্গে প্রবেশ করলেন একজন মহিলা। হ্যালিডে বুঝতে পারলেন, তাঁর ছবিই দেয়ালে টাঙানো রয়েছে। হয়ত গৃহস্থামিনী।

তিনি যেমন পরিপাটি সজিতা, তেমনি সপ্রতিভ। পুলিসের পোশাকে খাস সাহেবকে দেখেও তাঁর কোন ভাবান্তর হল না। যেন সাধারণ কোন অভ্যাগত, এমনিভাবে সাহেবকে নমস্কার করে মহিলাটি হারমোনিয়মের দিকে বসলেন।

তারপর জিজ্ঞাসু চোখে চাইলেন এদিকে। অর্থাৎ—আগন্তক কে? তাঁর এখানে আসবার উদ্দেশ্য কি?

হ্যালিডে সাহেব বাংলা জানতেন। দন্তরমত বই পড়ে শেখা ভাষা। তাছাড়া, কথ্য বাংলাও বুঝতে পারতেন ভাল। শুন্দি বলতেও পারতেন।

এখন গৃহকর্তাকে নিজের পরিচয় দিয়ে বললেন, ‘আমি লালবাজার হইতে আসিতেছি। আপনার নামে রিপোর্ট আছে। তাই জানিবার জন্য আসিতে হইল।’

সাহেব আশ্চর্য হয়ে লক্ষ্য করলেন—ভয়ের কোন চিহ্ন ফুটল না লেডির মুখ-চোখে। বরং শুকষ্টে প্রশ্ন শুনলেন, ‘বলুন কি জানতে চান?’

‘আপনার নাম কি?’

‘কেষ্টভামিনী দাসী ।’

(তিনি কৃষ্ণভামিনী উচ্চারণ করতে পারতেন না বোধহয়। সেকালের প্রথায় রেকর্ডেও তিনি নিজ কর্ণে নাম ঘোষণা করেছেন। কিন্তু সেখানেও ‘কেষ্টভামিনী’। যেমন মূলতালের ‘হৃদয় মাঝারে নাথ এস হে লুকায়ে রাখি’ গানখানির শেষে বলেছেন—কেষ্টভামিনী। কিংবা গহরজানের মতন ইংরিজীতে নাম শুনিয়েছেন ‘দিবানিশি তোর লাগি বরে মোর ছনয়ন’ গানটির পরে—‘মাই নেম ইজ কেষ্টভামিনী ।’)

তারপর দ্বিতীয় প্রশ্ন।

‘আপনার কি করিয়া চলে ?’ হ্যালিডে জিজেস করলেন।

‘আজ্ঞে হজুর।’

সাহেব ভাবলেন, লেডি হয়ত কথাটা ঠিক বুঝতে পারেননি। আসলে আসামী ভাববার সময় নিয়েছিলেন একটু।

লেডির হাতের, গজার দামী দামী অঙ্কারের দিকে চেয়ে সাহেব আরো স্পষ্ট করে জানতে চাইলেন, ‘আপনার কিসে উপার্জন হয় ?’

সপ্রতিভ কৃষ্ণভামিনী বললেন, ‘গান গেয়ে হজুর।’

‘আই সী !’ সাহেব বিস্ময় প্রকাশ করে বললেন, ‘শুধু গান করিয়া ? গান কোথায় হয় ? গানের ‘ফিস’ কত ?’

গায়িকা সবিস্তারে জানালেন, ‘সাহেব, কলকাতায় অনেক বড়-লোক আছেন যাঁরা বিস্তর খরচ করে গান শোনেন। তাঁদের বাড়িতে বিয়ে, অঞ্চলিক এমনি নানা উপলক্ষ্যে গানের আসর বসে। হৃগাপূজার উৎসবেও গান শোনেন তাঁরা। বাগান-বাড়িতেও জলসা হয়। বেনিয়ান মুছুদ্দিরা পাটি দেন সাহেব-স্বাদের আপ্যায়ন করতে। সেখানেও মুজরো পাই। আমি ইংরিজী গানও গাইতে পারি। এক এক বাড়ির জলসায় একশ দেড়শ টাকা পাই। কখনো আমার বাড়িতে আসর বসে। তাছাড়া, কলকাতার বাইরেও রাজা,

জমিদারদের দরবারে মাঝে মাঝে গাইতে যাই। সে সব জায়গায় মুজরো পাই আরো বেশি। আমার গানের গ্রামফোন রেকর্ডও বিক্রি হয়।'

এসবই অবশ্য সঙ্গীত-গুণের আমদানি। কিন্তু তাঁর প্রাচুর্যের আরেকটি বাস্তব কারণ ছিল। তা প্রকাশ করা চলে না পুলিসের কর্তার কাছে।

হ্যালিডে তারপর জিজেস করলেন, ‘এই বাড়ি কি আপনার?’

‘আজ্ঞে হ্যাঁ, হজুর।’

এবার সাহেব বললেন, ‘আমি আপনার একটি গান শুনিব।’

কৃষ্ণভামিনী সম্মতিতে মাথা নত করলেন। তারপর হারমোনিয়ম কাছে টেনে বললেন, ‘ইংরিজী গান গাইব?’

‘না, না। বাংলা গান।’

কৃষ্ণভামিনী আরস্ত করলেন—কানাড়ারসেই চমৎকারগানখানি—

সাধিলাম কাঁদিলাম কত

বুঝালাম ধরে ছুটি পায়ে

মিনতি করিলাম তায় রে।

ভাষা বুঝতে সাহেবের বিশেষ অসুবিধা হল না। আর অতি মিষ্ট কষ্ট তো গায়িকার। শুনতে তাঁর বড় ভাল লাগল। সেই করণ স্বরে তিনি মুঞ্চ হয়ে গেলেন প্রথম থেকেই। তার সহজ ভাষা যেমন তাঁর অস্তরে সাড়া জাগাল, তেমনি শ্রাণস্পর্শী হল স্বরের আবেদন। মন দিয়েই সাহেব শুনতে জাগলেন। আর ক্রমেই অস্থমনস্ক হয়ে পড়লেন স্বরের মাঝায়। গানের কথা আর বেশিক্ষণ যেন অমুসরণ করতে পারলেন না। সে ইচ্ছাও হল না। মনের মধ্যে শুধু গুঞ্জরণ করতে লাগল যাত্র স্বরের রেশ। এক একটি কথা গানের দোলায় কানে ভেসে এল—

পায়ে ঠেলে চলে গেল

সে নিউর হায় রে॥

‘গেল’ কথাটিতে এমন আকুলতা ফুটে উঠল যে সেই ভাবেই  
শ্রোতার মন আচ্ছন্ন হয়ে রইল। (সাহেব জানতেন না, কি মনোজ্ঞ  
মিড দিয়ে গায়িকা আবেদন জানিয়েছিলেন ওই কথায়। কৃষ্ণভামিনীর  
এই গানখানির প্রামোফোন রেকর্ডে তার চিহ্ন ধরা আছে।) পরের  
এক একটি কথা কথনো বক্ষার দিয়ে উঠল হৃদয়-তন্ত্রীতে। কথনো  
মনের গভীরে অ-স্ক্রিপ্ট মিলিয়ে যেতে লাগল—‘ভালবাসা যা  
ছিল’...‘আবিজলে’....‘সুখ পাখি উড়ে গেল’...

গান শেষ হতেই হালিডে উঠে দাঢ়ালেন। আর কোন কথা  
বললেন না। শুধু ধন্যবাদ জানিয়ে চলে গেলেন।

তারপর একদিন অ্যাটর্নী ভদ্রলোক সংবাদ নিতে গেলেন  
লালবাজারে।

কিন্তু এমন উত্তর পাবার তিনি কল্পনাও করতে পারেননি।

সাহেব তাকে জানিয়ে দিলেন—গায়িকাকে উচ্ছেদ করবার  
দরকার নেই। বললেন, ‘শি সিঙ্গু গুড মিউজিক।’...

অ্যাটর্নী ভদ্রলোক মুখ কালো করে চলে এলেন। সাহেবকে  
বোঝাবার আর কোন পথ পেলেন না গায়িকার বিরুদ্ধে...

সে কালের অতি বিখ্যাত গায়িকা কৃষ্ণভামিনী। শ্রেষ্ঠা বাঙালী  
গায়িকাদের মধ্যে শুধু একজন নন। তাবৎ প্রথম শ্রেণীর বাসুজীদেরও  
অন্তর্মা তিনি।

সঙ্গীতগুণে শ্বেতাঞ্জিনীর প্রায় সমকক্ষ। ছিলেন কৃষ্ণভামিনী।  
তখনকার বাঙালী বাসুজীদের মধ্যে গায়িকা হিসেবে শ্বেতাঞ্জিনীর  
নামই প্রথমে করা হত। বিশেষ খেয়াল ঠুংরি গানে। কলকাতায়  
পশ্চিমাঞ্চলের বাসুজীরাও মানতেন সেকথা। কৃষ্ণভামিনী সেই  
শ্বেতাঞ্জিনীর সমসাময়িক। ছুজনে প্রায় সমবয়সিনীও। তাদের  
মধ্যে সাঙ্গীতিক যোগাযোগও ছিল। আর তা ওস্তাদ গৌরীশঙ্করের  
যোগসূত্রে। শ্বেতাঞ্জিনী গৌরীশঙ্করের ছাত্রী। ওস্তাদজী সারঙ  
সঙ্গত করতেন তার গানের আসরেও। তেমনি কৃষ্ণভামিনীর

সঙ্গেও গৌরীশক্র সারঙ্গী থাকতেন। গায়িকার এক সঙ্গীতগুরুও তিনি।

কৃষ্ণভামিনী প্রথম সারির পশ্চিমা বাঙাজীদের পাশে আসন নিতে পারতেন গানের আসরে। এ বিষয়ে শ্বেতাঞ্জিনীর প্রায় সমতুল্য মর্যাদা আর সাংগীতিক ব্যক্তিত্ব তাঁরও ছিল।

বাঙাজী অর্থাৎ একাধারে গায়িকা ও নর্তকী কৃষ্ণভামিনী। কথক নাচে সক্ষম ছিলেন বটে। কিন্তু তাঁর নৃত্যগুণ গৌণ। গানের জন্মেই তাঁর সত্যিকার প্রতিষ্ঠা আর প্রসিদ্ধি ছিল। আর নানা রীতির গায়িকা হিসেবেই কৃষ্ণভামিনীর নামডাক।

আসরের প্রয়োজন কিংবা ফরমায়েস মতন খেয়াল ঠুংরি টপ্পা কাজরী চৈতী লাউনি সব রকমই তিনি গাইতেন। কারণ তিনি পেশাদার বাঙাজী। বিশেষ করে টপ্পা আর টপ্পখেয়াল গানে কৃষ্ণভামিনী ছিলেন একজন শীর্ষস্থানীয়া, মানদাসুন্দরীরই মতন।

সঙ্গীতরসিক অমিয়নাথ সান্ত্বালের সেই বিবৃতিটি এখানেও স্মরণ করা যায়—‘উন্নম উন্নম টপ্পখেয়ালও শুনেছি বাংলার গায়িকাদের মুখে। এন্দের মধ্যে মানদাসুন্দরী ও কৃষ্ণভামিনী মহোদয়াগণকেই শীর্ষস্থানীয়া মনে করতে বাধ্য হয়েছি।’

মানদাসুন্দরীর তুল্য গ্রামোফোন রেকর্ডের জগতেও সুপ্রসিদ্ধ। ছিলেন কৃষ্ণভামিনী। আর সেক্ষেত্রেও এক শ্রেষ্ঠ। মানদারই সমসাময়িক তিনি। তবে কৃষ্ণভামিনী হয়ত বয়োকনিষ্ঠা, যদিও মানদার আগে পরলোকগত। হয়েছিলেন।

সে-যুগে মানদাসুন্দরী ভিন্ন আর কোন গায়িকার এত বেশি রেকর্ড হয়নি—এবং লালচাঁদ বড়াল ভিন্ন অন্য কোন গায়কেরও নয়।

কৌর্তন-গায়িকা পান্নাময়ীর রেকর্ডের সংখ্যাও এখানে ধর্তব্য। তিনিও গ্রামোফোন জগতে উচ্চস্থানের অধিকারিণী। সে-যুগে সর্বাধিক সংখ্যক রেকর্ডের জন্মে পান্নাময়ীর নামও স্মরণীয় হয়ে আছে। কারণ তিনি অস্তত ৪৫খনি গান রেকর্ড করেছিলেন। তবে সে

সমস্তই কীর্তন গান, যে বিষয়ে তাঁর খ্যাতি হয়ত সবচেয়ে বেশি।  
সেজন্য রাগসঙ্গীতের প্রসঙ্গে পাঞ্চাময়ীর রেকর্ড পর্যালোচনা করা  
হল না। খেয়াল বা টপ্পা অঙ্গে গান করেননি তিনি।

রেকর্ড সঙ্গীতের প্রসঙ্গেও কৃষ্ণভামিনীকে একজন শীর্ষস্থানীয়া  
বলা যায়। কারণ তাঁর রেকর্ড করা গানের সংখ্যা ৪৭টি। সেকালের  
পরিপ্রেক্ষিতে, গায়নশিল্পীর অত্যন্ত জনপ্রিয়তা না থাকলে এত গান  
রেকর্ড করা তাঁর পক্ষে অসম্ভব হত। কৃষ্ণভামিনীর গানের চাহিদা  
বোঝা যায় তাঁর রেকর্ডের সংখ্যা থেকে।

কৃষ্ণভামিনীর গ্রামোফোন রেকর্ডের একটি তালিকা এখানে  
দেওয়া হল। সেকালের ‘রেকর্ড সঙ্গীত’ যতগুলি খণ্ড পাওয়া গেছে,  
আর অন্তর্ভুক্ত স্মৃতে জানা যায়, সেই হিসাবে এই তালিকা প্রস্তুত করা  
হয়েছে। তবে এ বিবরণের অতিরিক্ত তাঁর আরো ‘রেকড’ থাকাও  
অসম্ভব নয়। কারণ তালিকা সম্পূর্ণ করবার কোন নির্ভরযোগ্য নথি-  
পত্র নেই। গ্রামোফোন সংস্থা থেকে তাৎক্ষণ্যে ‘রেকড’ গীতাবলীর  
বিবরণীও প্রকাশিত হয়নি প্রচার-পুস্তিকায়।

যতদূর উদ্ধার করা সম্ভব হয়েছে কৃষ্ণভামিনী গ্রামোফোন ও  
জেনোফোনে ৪৭টি গান গেয়েছিলেন। সেকালের ‘রেকড’ জগতে  
বৌতিমত গৌরবের ‘রেকড’।

তাঁর এই গানগুলির প্রায় সমস্তই রাগনির্ভর। বাংলায় টপ-  
খেয়াল, খেয়াল ও টপ্পা অঙ্গের। শুধু দুখানি গান রবীন্দ্রনাথের,  
যদিও সেসব সঠিক ‘রবীন্দ্রসঙ্গীত’ নয়। কারণ, সেকালের নানা  
গায়ক-গায়িকার মতন কৃষ্ণভামিনীও নিজস্ব শুরু গেয়েছেন রবীন্দ্র-  
নাথের গান। রবীন্দ্র-সংযোজিত শুরু অনুসরণ করেননি।

কৃষ্ণভামিনীর রেকর্ড হয় এই গানগুলি—

(১) পারে কি ভুলিতে কভু (সিঙ্কুকাফি), (২) মনের মিলে  
হয় যদি প্রেম (ভীমপলাত্তি), (৩) মনে করি ভুলি ভুলি (সাহানা-  
কানাড়া), (৪) মন রাখা দেখা দিতে (খান্দাজ), (৫) জগৎ

দেখ না চেয়ে (ভৈরবী), (৬) সাধিলাম কাঁদিলাম কত (কানাড়া),  
(৭) যে দেয় যাতনা প্রাণে (হাস্তির), (৮) আমারে গোপন করে  
(গৌরী), (৯) বেসেছি ভাল, বাসিব ভাল (ভৈরবী), (১০)  
সঁপেছি জনমের মতন (কেদারা), (১১) প্রেম করে প্রাণ সঞ্চি  
(বেহাগ), (১২) বড় ভালবাসি চাকু ঝুপরাশি (ভৈরবী), (১৩)  
আমার মনোবেদনা সই (দেশ), (১৪) যামিনী যে যায় হায়  
(ভৈরবী), (১৫) হর হর শঙ্কর শশাঙ্ক-শেখর (ইমন-ভূপালী),  
(১৬) তাই কি মনে করে মান ভরে (পূরবী), (১৭) তুই মা  
তারা দুঃখ হরা (সিঙ্কু), (১৮) কে তুমি এসেছ কাছে (সিঙ্কু  
খাস্তাজ), (১৯) করেছ যে নৃতন প্রেম (আশাবরী), (২০) তুমি  
আমার সোনার পাখি আর্মি তোমার পিঞ্জরা (পিলু), (২১) দিবা-  
নিশি তোর লাগি ঝরে মোর ছনয়ন (বাগেত্তী), (২২) হৃদয়  
মাঝারে নাথ এস হে লুকায়ে রাখি (মুলতান), (২৩) হায় হায়  
আমি বুঝিতে না পারি, (২৪) ভালবাসি বলে কি রে, (২৫) গাছের  
ফুলে শোভে যেমন, (২৬) আনন্দময়ী হয়ে গো মা, (ভৈরবী),  
(২৭) বৃথা দিন গেল হে হরি (তোড়ি), (২৮) (আমি) না জেনে  
পরশ ভরে পাষাণে প্রাণ সঁপেছি (দেশ), (২৯) ঝুপেরি সাগরে  
অংঘি ডুবিল তোরি (সিঙ্কু-ভৈরবী), (৩০) আমার প্রেমের পাগল  
কই (পূরবী), (৩১) একা একা এতদিন কেটে গেল (সোহিনী),  
(৩২) মাকে কে জানে (মালকোশ), (৩৩) মন অলসে অবশে বল  
কালী (পূরবী), (৩৪) সারাটি জীবন কাঁদাবে এমন (বেহাগ পূরবী),  
(৩৫) মন যে নিল সে তো আর ফিরে দিল না (হাস্তির মিশ্র), (৩৬)  
প্রাণ তোমার স্বুখের পথে কাটা হব না, (৩৭) আসি বলে চলে  
গেল কই সই আসিল না, (৩৮) মরি হল একি দায় (বেহাগ),  
(৩৯) হেরে তোরে আমার মনোদুঃখ দূরে গেল (হাস্তির), (৪০)  
আসি আসি বলে কেন প্রাণে ব্যথা দাও (মুলতান), (৪১) যাও  
যাও ফিরে চাও (ভৈরবী), (৪২) জীবনে আমার যত আনন্দ

পেয়েছি দিবস রাতি, (৪৩) স্বপন যদি ভাঙিলে রজনী প্রভাতে,  
 (৪৪) দেখো সখা ভুল করে ভালবেস না, (৪৫) ও যে মানে না  
 মানা, (৪৬) আমার যাবার বেলায় পিছু ডাকে, (৪৭) যদি তারে  
 নাই চিনি গো।

এর মধ্যে শেষের ৬খানি গান রবীন্দ্রনাথের। শুতরাং সে যুগের  
 রেকর্ডে কৃষ্ণভামিনীও সর্বাধিক ‘রবীন্দ্রসঙ্গীত’ গেয়েছিলেন।

এই তালিকার ৩৯, ৪০, ৪১ সংখ্যক গান তিনটি জেনোফোন  
 সংস্কার, অবশিষ্ট ৪৪খানি গান গ্রামোফোনের।

সেকালের তিন মিনিট গানের এই সমস্ত রেকর্ড। কিন্তু সেটিকুর  
 মধ্যেও গায়িকার সঙ্গীতপ্রতিভা আর কুশলী কঠের পরিচয় মূর্ত হয়ে  
 আছে। তাঁর রেকর্ডগুলি মানদাসুন্দরীরই ধরনের। আর প্রায়  
 সেই মানেরই গান। কৃষ্ণভামিনীর এই রেকর্ড সঙ্গীতের বেশির ভাগ  
 টপ্খেয়াল অঙ্গের। অথচ রাগসঙ্গীতের মধ্যেই কাব্য-সঙ্গীতের  
 আবেদনে প্রাণবন্ত।

হৃদয়ের দরদে গাওয়া কৃষ্ণভামিনীরও এক-একটি মর্মস্পর্শী গান।  
 যেমন—‘আমারে গোপন করে’। চমৎকার বন্দেশের এই গানখানি  
 তিনি গেয়েছেন গৌরী-তে। গানের মধ্যে রীতিমত কলাবতী চালের  
 তানও আছে। তাঁর অনেক গানে যেমন কথার তান দেখা যায়,  
 তেমনি এখানেও। অথচ সঙ্গে ফুটে উঠেছে কাবাগীতির মাধুর্য।  
 কথায় মেলানো এমনি তান বাংলা টপ্খেয়াল গানে শুন্দর মানিয়ে  
 যায়। মানদাসুন্দরীর মতন এ-বিষয়ে দৃষ্টান্ত দেখিয়েছেন  
 কৃষ্ণভামিনীও।

তাঁর একটি গান আছে মূলতানে—

হৃদয় মাঝারে নাথ

এস হে লুকায়ে রাখি।

আর কেউ নাহি দেখে

আমি যেমন তোমায় দেখি

এই গানখানিও অতি হৃদয়গ্রাহীভাবে গাওয়া। অর্থ মূলতানের রাগক্লপও গায়িকা চমৎকার ফুটিয়েছেন। আর সেই সঙ্গে রৌতিমত তান। বাংলা গানেও তা বেশ মানানো। সেই কলাকূশলী তানের জন্যে গানের উপভোগে কোন বাধা দেখা যায় না—এইখানেই গায়িকার কৃতিত্ব।

কৃষ্ণভামিনীর একখানি গান আছে বাগেশ্বীতে—

দিবানিশি তোর জাগি ঝরে মোর দু নয়ন...

এ গানেও তিনি সুরের কাজ করেছেন নিপুণ ভাবে। তারা গ্রামেও কর্ণ রৌতিমত সুরেলা, কোন অবিকৃতি নেই। তাঁর এই গানে বাগেশ্বীর সুরবিস্তার যেমন যথাযথ, তেমনি উপভোগ্য সুমিষ্ট কর্ণের সুষমা। তিনি গহর জানের মতন এই রেকডে' ইংরেজীতে নিজের নাম ঘোষণা করেছেন—মাই নেম ইজ কেষ্টভামিনী।

গায়িকার প্রত্যেক রেকডে'র নাম না করেও বলা যায়, তাঁর গানের বেশ উন্নত মান ছিল। রেকড'গুলি থেকে ধারণা করা যায়, টপ্খেয়াল গানে তিনি বাস্তবিকই ছিলেন একজন শীর্ষস্থানীয়।

কৃষ্ণভামিনীর এই বাংলা গানের রেকড'গুলি থেকে আর একটি বিষয় লক্ষ্য করা যায়। তাঁর বাংলা উচ্চারণ যেন একটু হিন্দুস্থানী ধরনের। অর্থাৎ কোন উত্তরভারতীয়ের বাংলা উচ্চারণের মতন।

তাঁর বাংলা গানে এই হিন্দুস্থানী টানের কারণ মনে হয়—আসলে তিনি ছিলেন রাগসঙ্গীতের গায়িক। হিন্দী ভাষাতেই কৃষ্ণভামিনী গানের চর্চা করেছেন অপর্যাপ্ত। বছরের পর বছর হিন্দুস্থানী কলা-বতদের কাছে তালিম নিয়েছেন। দস্তরমত শিখেছেন খেয়াল, টঙ্গা ঝংরি। সেই সঙ্গে যুক্তপ্রদেশের গান কাঞ্জরী, চৈতী, লাউনী ইত্যাদি। তারপর তাঁর আসরও বেশির ভাগই হত হিন্দী ভাষার গানে। এক শ্রেষ্ঠা পেশাদার গায়িকা হিসেবে তাঁর অস্তরঙ্গতাও ছিল কলকাতা নিবাসী পশ্চিমাঞ্চলের কলাবতদের সঙ্গে। হয়ত এইসব কারণে তাঁর

উচ্চারণ ছিন্দী-ঘেঁষা হয়ে যায়। নাম না জেনে তাঁর অনেক রেকডে'র গান শুনলে মনে হয়—ভাল বাংলা শিখে গাইছেন কোন পশ্চিমের গায়িকা।

৪৭খানি বাংলা গান রেকড' করলেও কৃষ্ণভামিনীর সঙ্গীত-জীবনের তা আংশিক পরিচয়। খেয়াল টপ্পা ঠুংরীর কলাবতী গায়িকা-রূপেই তিনি সঙ্গীতসমাজে বেশি প্রসিদ্ধা ছিলেন। আসরেও তাঁকে বাংলার চেয়ে অনেক বেশি গাইতে হত ছিন্দী গান। খেয়াল টপ্পা ঠুংরি থেকে কাজুরী চৈতী লাউনী পর্যন্ত।

সেকালে পেশাদার গায়িকাদের সম্পর্কে তাই ছিল রেওয়াজ। শুধু খেয়াল কিংবা খেয়াল আর ঠুংরি গেয়ে সেযুগের সঙ্গীতজগতে কলাবতীদের প্রতিষ্ঠা হত না। দস্তর হিসেবে বাঙালী বা অবাঙালী যঁরাই কৃষ্ণভামিনীকে মুজরো দিতেন, তাঁর আসর করতেন, তাঁরা শুনতে চাইতেন রাগসঙ্গীত, শ্বেতাঞ্জিনীর মতন। আর পশ্চিমাঞ্চলের বাঙ্গজীদের সামনে শ্বেতাঞ্জিনীর মতন দাঢ়াতে পারতেন, সমান দাপটে আসর করতেন কৃষ্ণভামিনীও। তাঁরও সেইরকম ব্যক্তিগুলি ছিল।

কলকাতার পেশাদার সঙ্গীতজগতে পশ্চিমাঞ্চলের বাঙ্গজীদেরই মতন; অবস্থান করতেন তিনি। সেই ধরনের প্রভাব প্রতিপন্থি দেখা যায় কৃষ্ণভামিনীর।

বাঙ্গজীদের যেমন রেওয়াজ বাইবেকার কোন নতুন গায়ক বাদক এ শহরে এলে প্রথমে বাঙ্গজীগৃহে আশ্রয় নেন। সেই বাঙ্গজী তখন নবাগতকে পরিচিত করে দেন কোন কোন সঙ্গীত-প্রেমী পৃষ্ঠ-পোষকের সঙ্গে। নতুন গায়ক বাদক তাঁরপর তেমনি কোন ব্যক্তির আসরে গুপনীয় দেখাবার শুয়োগ পান। আর কৃতিত্ব দেখালে যে স্বীকৃতি লাভ করেন তাঁর ফলেই প্রতিষ্ঠা পেতে থাকেন পেশাদার হিসেবে।

নতুন গুণীরা তখন কলকাতায় পশ্চিমা বাঙ্গদের মতন কোন

কোন বাঙালী বাঙাজীর বাড়িতেও উঠতেন। তাঁর সহায়তায় পরিচিত হতেন এখানকার সঙ্গীতসমাজে। অনেক সময় কৃষ্ণভামিনীও এমনি মধ্যস্থতা করেছেন।

একবার পশ্চিম থেকে এক কলাবত এসেছেন কলকাতায়। কৃষ্ণভামিনীর শিমলার বাড়িতে আশ্রায় নিয়েছেন। তাঁর সম্বন্ধে সে গায়ক শুনেছিলেন মাত্র। গুণপনার সাক্ষাৎ পরিচয় পাননি।

কৃষ্ণভামিনী তাঁকে একতলার একটি ঘরে আশ্রায় দিলেন। আর ভজতা করে খাতির জানিয়ে বললেন, ‘আপনার যতদিন খুশি থাকুন আরাম করে। রইস লোকদের সঙে জানা চেনা হোক। ছু-চার মহফিল করুন। নিজের বাড়ির মতন ভাববেন এখানে। এই ঘরে যখন খুশি রিয়াজ করবেন। গাইবেন। অমি শুনব ওপর থেকে।’

ওস্তাদজী কলকাতায় নতুন এসেছেন। ভাবলেন, এ গায়িকার বয়স তো বেশি নয়। একটু আপ্যায়িত করে দেওয়া যাক কিছু অপ্রচলিত জিনিস দেবার কথা বলে।

একটা কুটি রাগের নাম করে বললেন, ‘বাঙ্গিসাহেবা, এই রাগের আচ্ছা খানদানী চৌজ আমার কাছে আছে। দরকার হলে ফরমায়েস করবেন, আপনাকে দিয়ে যাব।’

কৃষ্ণভামিনী তখনি বললেন, ‘আচ্ছা, এইরকম হবে কি?’ বলে, বসে সে রাগের একখানি গান শুনিয়ে দিলেন কিছু তান-কর্তব সম্মেত।

বেশিক্ষণ গাইতে হল না। গানের বন্দেশ আর পাঞ্চার ধরন-ধারণ দেখেই ওস্তাদজীর আক্লে হয়ে গেল।

গান শেষ করে কৃষ্ণভামিনী নিরীহ মুখে জিজ্ঞেস করলেন, ‘কিছু গোলমাল হয়নি তো? সব ঠিক আছে?’

শুক্ষ মুখে ওস্তাদ বলে উঠলেন, ‘সব ঠিক হ্যায়। কুছু ভি গুজমাজ নেহি।’

তাঁর কিছুদিন থাকবার দরকার ছিল কৃষ্ণভামিনীর অতিথি হয়ে।

এ বাঙ্গাজীর অনেক মুজৰো হয়, শুনেছিলেন। অনেক আশা করে ছিলেন এখানে। কিন্তু কেমন যেন ছোট হয়ে গেলেন। এই তরুণী গায়িকার এমন গান শুনে দাপট দেখে, মুষড়ে পড়লেন যেন। পরের দিনই ওস্তাদজী তপ্পিতল্লা নিয়ে এ আস্তানা ছেড়ে চলে গেলেন।

পশ্চিমের সেই কলাবত তো জানতেন না, এই বাঙালী বাঙ্গাজীর সঙ্গীতজীবনের কথা। কি মানের আর কি দাপটে তিনি গেয়ে থাকেন আসরে। কত অল্প বয়স থেকে তিনি রাতিমত তালিম নিয়েছেন। কে কে তাঁর ওস্তাদ। কি অসাধারণ রিয়াজী তিনি। প্রত্যহ শেষ রাত থেকে তাঁর রিয়াজ চলে কতক্ষণ! আসরে জলসায় কি তাঁর নামডাক! এসব কথা জানলে আর তাঁকে একটা চৌজ দেবার কথা মুখে আনতেন না।.....

কৃষ্ণভামিনীর প্রধান সঙ্গীতগুরু হুজুন। ওস্তাদ গৌরীশঙ্কর মিশ্র এবং (লছমী ওস্তাদের পুত্র) হরিদাস মিশ্র। হুজুনেই বারাণসীর ছটি বিখ্যাত ঘরানার গুণী। প্রতিভাবন গায়ক হরিদাস অকালে পরলোকগত হন।

তাঁর কিছু পরিচয় দেওয়া হয়েছে ‘ভারতের সঙ্গীতগুণী’র প্রথম খণ্ডে, ‘ওস্তাদের ওস্তাদ’ নামে অধ্যায়টিতে। আর গৌরীশঙ্করের বিবরণ ‘সুরের সঙ্গতীয়া সারঙ্গী’তে সবিস্তারে দেওয়া আছে। তাঁরা হুজুন ভিন্ন কালীশঙ্কর মিশ্রের তালিম ও পেয়েছিলেন কৃষ্ণভামিনী।

এই তিনি ওস্তাদের কাছে তিনি রাতিমতভাবে শিখেছিলেন। কিন্তু সংগ্রহ আরো অনেক সূত্রে করতেন, যেমন সব গায়ক গায়িকাই করে থাকেন অল্পবিস্তর।

এমনি সব শিক্ষায় ও পরিবেশে কৃষ্ণভামিনীর সঙ্গীতজীবন গঠিত হয়। দৈর্ঘ্যকালের চর্চায় সাধনায় তিনি হন কলাবতী। সঙ্গীতই হয় তাঁর জীবনের অবলম্বন আর বৃত্তি।

সেই মহেন্দ্র গোস্বামী লেনের যে প্রতিবেশীরা শেষরাতে জেগে উঠতেন তাঁর। সেসময় কৃষ্ণভামিনীর নিত্য সঙ্গীতচর্চা শুনতেন। অতি

প্রত্যৈ কয়েক ঘণ্টা তিনি রিয়াজ করতেন বরাবর। সঙ্গীতজীবনে  
রৌতিমত প্রতিষ্ঠা পাবার পরেও।

গানবাজনায় কৃষ্ণভামীর স্বাভাবিক পটুত ছিল। শুধু যে অতরকম  
রৌতির গান গাইতেন, তা নয়। নারী শিল্পীদের পক্ষে যে বাজনায়  
দৃষ্টান্ত সব চেয়ে কম, প্রায় ব্যক্তিক্রমই বলা যায়, সেই তবলা তিনি  
বাজাতেন খুব ভাল। আসরে অবশ্য বাজাতেন না। নিজের ঘরেই  
এই তালবাদ্দের চর্চা রাখতেন। তবলায় তাঁর হাত ছিল রৌতিমত  
তৈরি।

ওস্তাদ তবলচৌ রেখে দস্তুরমত তবলায় তালিম নেন এই বাড়ালী  
বাস্তোজী। তবলা সাধতেনও নিয়মিত। তোর থেকে যেমন গানের  
রিয়াজ চলত, তেমনি ছপুরটা প্রায়ই তবলা চর্চায় কাটাতেন। নিয়মিত  
তবলা সাধতেন তাল লয়ে আরো সিদ্ধ হবার জন্যে। এবং তা হয়েও  
ছিলেন।

শোনা যায় কলকাতায় ‘ফ্লে চেঙ্গিং’ হারমোনিয়ম প্রথম তৈরি  
করেন শুরেন্দ্রনাথ দাস। ৮৯ হ্যারিসন রোডে শ্যামলাল ক্ষেত্রীর  
বাড়ির কাছেই শুরেন্দ্রনাথের সেই হারমোনিয়মের দোকান ছিল।  
সেখানে নতুন রকমের এই হারমোনিয়ম প্রথম তৈরি হতেই কিনলেন  
কৃষ্ণভামিনী। সে হল ১৯১১-১৩ সালের কথা। শুরেন্দ্রনাথ নিজেও  
ছিলেন ভাল হারমোনিয়ম বাদক। গণপৎ রাওয়ের শিষ্য বসির থাঁর  
কাছে হারমোনিয়ম শিখতেন। শুরেন্দ্রনাথের সঙ্গে কৃষ্ণভামিনীর  
যোগাযোগ ছিল হারমোনিয়মের সূত্রে। আলাদা যন্ত্র হিসেবে  
কৃষ্ণভামিনীও হারমোনিয়মের চর্চা সেসময় করতেন।

গানবাজনার আরো স্থ ছিল কৃষ্ণভামিনীর। সঙ্গীতের নানা  
বিষয়ে কৌতুহলী তাঁর মন। একবার একটি বাজনার দোকানে দেখলেন  
কর্ণেট বাঁশি। দেখে বড় পছন্দ হল। তখনি কিনে নিয়ে এলেন  
একটি কর্ণেট। শুধু কেনা নয়, শিখতে আরম্ভ করে দিলেন। আর  
কিছুদিনের মধ্যেই বেশ বাজাতে লাগলেন কর্ণেট।

সঙ্গীতে এমনি সহজাত দক্ষতা কৃষ্ণভামিনীর ছিল।

তাঁর কথা আরো কিছু কিছু পাওয়া যায় বিখ্যাত গায়ক কালিপদ  
পাঠকের স্মৃতে। পরবর্তীকালের সুপরিচিত টপ্পাগুণী পাঠক মহাশয়  
প্রথম জীবনে কৃষ্ণভামিনীর কাছে গান শিখেছিলেন। বিশেষ টপ-  
খেয়াল আর টপ্পা। তিনি তখন নিতান্তই তরুণ। আর কৃষ্ণভামিনী  
তাঁকে পুত্রবৎ স্নেহ করতেন।

তাঁর গায়িকা জীবনের প্রথম থেকেই বাংলা গানের দিকে বেশি  
কোঁক ছিল। কৃষ্ণভামিনী তাঁকে শেখাতেন বেশির ভাগ বাংলা টপ্পা  
আর টপ্খেয়াল ধরনের গান। তাঁর এই বৌতির বাংলা গান চার  
সঙ্গে বেশ মিলে যায় কৃষ্ণভামিনীর দেওয়া শিক্ষা। তাঁর সঙ্গে  
কালিপদবাবুর দীর্ঘদিনের যোগাযোগ ছিল।

তিনি খুব বিশ্বাসের পাত্র ছিলেন কৃষ্ণভামিনীর। আর মহেন্দ্র গোপালমৌ  
লেনের বাড়িতে চাকুষ করেছিলেন সেই বিখ্যাত গায়িকার ধনসম্পদ।

এই গায়িকা যে কত ধনী হয়েছিলেন, তা বাইরে থেকে ধারণা  
করা যেত না। কিন্তু তার পরিচয় পেয়েছিলেন তাঁর প্রিয় ছাত্রটি।  
কৃষ্ণভামিনী নিজেই সেই গোপন ঐশ্বর্যসন্তার একদিন দেখিয়েছিলেন।  
সেকালের ভারি ভারি সোনার গহনা শুধু নয়। অত্যন্ত দামী হৌরে  
মুক্তার অলঙ্কার পর্যন্ত যথেষ্টই সঞ্চয় করেছিলেন কৃষ্ণভামিনী। সেই  
গুপ্ত সিন্দুক মুক্ত করে তিনি সেদিন কালিপদ পাঠককে দেখান।  
তরুণ শিশুটি সেসব গল্প শোনাতেন নিজের প্রবীণ বয়সে। এখন  
সেসব কথা থাক।

কৃষ্ণভামিনী তাঁকে যেসব বাংলা গান শেখান তার মধ্যে রবীন্দ্র-  
নাথের গানও ছিল। কিন্তু সেকালে অনেক গায়ক গায়িকা যেমন  
রবীন্দ্রনাথের গান আপন আপন ইচ্ছামতন স্বরে ও ভঙ্গীতে গাইতেন  
এমনকি 'রেকড' পর্যন্ত করতেন—যেমন গহর জান, মানদান্ডুরী,  
পূর্ণকুমারী, ব্রজেন্দ্র গাঙ্গুলী, কে মল্লিক প্রভৃতি—কৃষ্ণভামিনীও  
তেমনি একজন।

তিনিও রবীন্দ্রনাথের গান গাইতেন, কিন্তু রবীন্দ্রসঙ্গীতের স্বরে ও গায়কীতে আদৌ নয়। রবীন্দ্রনাথের গানও তিনি তখনকার প্রচলিত টপ্খেয়ালে গাইতেন। কৃষ্ণভামিনীর বাংলা গান গাইবারও ছিল শুই ধরন। বিশেষ কর টপ্খেয়াল আর টপ্পা অঙ্গে তিনি পারদশিনী ছিলেন। আর বাংলা গান যখন গাইতেন, টপ্পার অল্পবিস্তর তান দিতেন, গানের ভাষার সঙ্গে মিলিয়ে। টপ্পার ধরনে কথার তান।

তেমনিভাবে রবীন্দ্রনাথের গানও তিনি কালিপদবাবুকে শিখিয়ে ছিলেন টপ্খেয়াল রীতিতে। তারই ফলস্বরূপ অনেক পরবর্তীকালের একটি ঘটনার কথা এখানে উল্লেখ করা যায়।

একটি গানের আসরের বিচিত্র আর কৌতুককর স্মৃতিও সেটি। কালিপদ পাঠক যে কৃষ্ণভামিনীর কাছে রবীন্দ্রনাথের গান শেখেন তারই সম্পর্কিত বটে। কিন্তু বহু বছর পরের ঘটনা।

পাঠক মশায়ের তখন পরিণত বয়স। আর বাংলা গানের জগতে তিনি সে সময় সুপ্রতিষ্ঠিত। বাংলার এক নেতৃস্থানীয় গায়ক তাঁকে বলা যায়। সেই স্বাদেই তিনি আমন্ত্রিত হয়ে এসেছেন একটি বিশিষ্ট উৎসবে। রবীন্দ্রনাথের সামনেই সভাস্থলে পাঠক মহাশয়ের সেদিন গান হবে।

রবীন্দ্রনাথের জীবনে তখন গোধূলি অধ্যায়। ...সালের কথা। তিনি মেদিনীপুরে এসেছেন, নিদাসাগরের স্মরণ উৎসবে ভাষণ দিতে। সেই উপলক্ষ্যেই কালিপদ পাঠকেরও গানের ব্যবস্থা হয়েছে।

রবীন্দ্রনাথ স্বয়ং সভায় উপস্থিত। তাই পাঠক মশায় স্থির করলেন তাঁর গান শোনাবেন যথাযথ। সেই প্রথম জীবনে কৃষ্ণ-ভামিনীর কাছে শেখা একটি রবীন্দ্রসঙ্গীত তিনি গাইলেন—‘ও যে মানে না মানা।’ গায়িকার কাছে যেমন টপ্খেয়াল ধরনে শিখে-ছিলেন, সেই ভাবেই শোনালেন কবিকে। টপ্পাতেই কিছু কিছু তানকৃতিও দেখালেন।

গান শুনে রবীন্দ্রনাথ একটু বিশেষভাবে বললেন, ‘ভাষাটা যেন  
আমারই মনে হচ্ছে।’

পাঠক মশায় সরল মানুষ। তিনি ভাবলেন গানখানি শুনে  
রবীন্দ্রনাথের মনে পড়েছে যে এটি তাঁরই স্বরচিত। আসলে কিন্তু  
তিনি রবীন্দ্রনাথের মন্তব্যের তাৎপর্য বুঝতে পারেননি। রবীন্দ্রনাথ  
বলতে চেয়েছিলেন—গানের ভাষাটি মাত্র তাঁর। সুর, গায়কী  
সবই পৃথক।....

কালিপদ পাঠকের সূত্রে কৃষ্ণভামিনীর আরো কথা জানা যায়।  
গায়িকা হিসেবে তাঁর সম্পর্কে উচ্চ ধারণা ছিল পাঠক মশায়ের।  
কিন্তু এটি তাঁর সাঙ্গীতিক নয়, ব্যক্তিগত প্রসঙ্গ। কৃষ্ণভামিনীর  
শারীরিক বলশালিতার কথা। তাঁর তবলা তুল্য বাদনের এও এক  
ছল্পত ব্যক্তিক্রম যেন।

সেই শুমিষ্টকগী গায়িকার দেহের মধ্যে একটি পুরুষালী ভাবও  
ছিল। দেহে যেমন শক্তি, মনেও তেমনি অকুতোভয় তিনি।

একবার একাকিনী দুজন গুণ্ডার আক্রমণ কিভাবে প্রতিহত  
করেন, সে গল্লও শোনাতেন পাঠক মশায়। কৃষ্ণভামিনীরও গহর  
জানের মতন নিজস্ব বগি গাড়ি ছিল। ছটি শাদা ঘোড়ায় টানা  
সেই ল্যাণ্ডো তাঁর। তবে তিনি তা নিজেই চালাতেন না গহরের  
মতন। কোচম্যানই হাঁকাত।

এক রাত্রে সেই গাড়িতে তিনি ফিরছেন কোন আসরে গান  
গেয়ে। গাড়ির মধ্যে তিনি এক। নিজের রাত। মার্কাস  
ক্ষোয়ারের কাছে অর্থাৎ কলাবাগান বস্তির অঞ্চলে তখন  
তাঁর গাড়ি এসে পড়েছে। এমন সময় দুদিকের দরজায়  
চড়াও হল দুজন গুণ্ডা। আরোহিনীর অঙ্গে দামী দামী গহনার  
দিকে তাদের দৃষ্টি পড়েছিল। কিন্তু গুণ্ডারা ধারণা করতে  
পারেনি সেই নারীর শৈর্ঘ্য আর সাহস কতখানি হতে পারে।  
কৃষ্ণভামিনীর বলিষ্ঠ হাতের ঘায়ে অচিরেই দুজনে দুদিকের

বাস্তায় ধরাশায়ী হল। আর তার গাড়ি চলতে লাগল বাড়ির দিকে।

অন্য স্থানে জানা যায় কৃষ্ণভামিনীর এই আশ্চর্যকর দৈহিক ক্ষমতার কারণ এবং তা আরো অস্তুত, অথচ সত্য বিবরণ। তা হল কলাবতী গায়িকা নিয়মিত পুরুষেচিত ব্যায়াম-চর্চা করতেন। রৌতিমত ডন বৈঠক দিতেন সকালে। শেষ রাত থেকে উঠে যেমন কর্তৃসাধনা করতেন, তেমনি তার পরেই আরস্ত হত তার ওই ভাবের স্বাস্থ্য-চর্চা। শারীরিক শক্তি এমনি অভ্যাসের ফলেই তিনি আয়ত্ত করেছিলেন। অবশ্য এই ধরনের পুরুষালী প্রবণতা ছিল তার স্বভাবে।

আমাদের দেশের নারীর পক্ষে ব্যক্তিক্রম কিংবা কঢ়িদৃষ্ট বলা যায় কৃষ্ণভামিনীকে। অর্থাৎ তার এই পৌরুষ চরিত্রকে। কোন কোন পুরুষের মধ্যে মেয়েজী ধাত যেমন দেখা যায় তিনি তার বিপরীত দৃষ্টান্ত। অথচ পরিপূর্ণ নারী-অঙ্গ। এবং কমনীয় সংগীতকর্তৃ মিষ্টের জন্যেই মনোহারী ছিল। অমন প্রচণ্ড পুরুষ-স্বভাব কোন ক্ষতি করতে পারেনি কৃষ্ণভামিনীর গানের গলা কিংবা মাধুর্যের।

হয়ত এই শারীরিক শক্তি তার চরিত্রে একটি প্রবল ব্যক্তিত্ব দিয়েছিল। আর তা প্রকাশ পেত তার কথাবার্তায়, ব্যবহারে, ধরনধারণে।

পরের যুগের গায়ক জমিকদ্দিন থা ছিলেন কৃষ্ণভামিনীর চেয়ে বয়সে কিছু ছোট। আর সে সময়ে আসরে গানও গাইতেন না। তখন সারঙ্গ-বাদক ছিলেন। কৃষ্ণভামিনীর সঙ্গে সেই হিসেবেই পরিচয় ছিল জমিকদ্দিনের।

একেকদিন কৃষ্ণভামিনী তাকে মুরুবিয়ানা চালে বলতেন, ‘আরে কেয়া সারেঙ্গী বাজাতা। গান। শুরু করো, গান। শুরু করো।’

এমনি ব্যক্তিত্ব ছিল কৃষ্ণভামিনীর। যত বড় আসরই হোক,

বত নামী কলাবত আশুন—তিনি সদা সপ্রতিভ, ঠিক শ্বেতাঞ্জলীর মতন। আর নির্ভীকা তো সর্ববিষয়ে। অতি-স্মৃতিতে ঠাঁর এই ব্যক্তিচরিত্র সবচেয়ে উজ্জ্বল হয়ে আছে।

পুলিসের সাহেব কর্তা বাড়িতে তদন্তে এলেও যাঁর ভয় ডর নেই—বরং মিষ্টি করে গান শুনিয়ে ঠাঁর মনে ছাপ দিতে পারেন, যিনি একাই পরাভূত করে দেন কলাবাগানের দুটো সশস্ত্র গুণাকে ঠাঁর সাহসের কথা তো বোঝাই যায়।

তেমনি মামলা-মোকদ্দমা কিছুতেই ভয়ের বালাই কৃষ্ণভামিনীর ছিল না। কিন্তু স্বভাবের এসব দিক ছিল ঠাঁর শিল্পী-সন্তার সমান্তরালে। অর্থাৎ সেই দুর্জয় মানসিক ও শারীরিক শক্তি ঠাঁর সলিত-কলা চর্চাকে কখনো ছায়াচ্ছন্ন করেনি। আরো দৃষ্টান্ত আছে এবিষয়ে।

আগেই বলা হয়েছে, গৌরীশঙ্কর মিশ্র ছিলেন ঠাঁর প্রধান শিক্ষাগুরু। গৌরীশঙ্করের কনিষ্ঠ কালী ওস্তাদের কাছেও শিখতেন কৃষ্ণভামিনী।

ঠাঁরা দুজনেই কৃষ্ণভামিনীর সঙ্গে আসরে সারঙ্গ বাজাতেন। আর সেজন্তে মজুরোর অংশ পেতেন গায়িকার কাছে। সেই বাবদ টাকার হিসেব নিয়ে একবার কৃষ্ণভামিনীর মন কষাকষি হল। গৌরীশঙ্করের সঙ্গে নয়। কালী ওস্তাদের সঙ্গে কৃষ্ণভামিনীর মতান্তর ঘটল মুজরোর ব্যাপারে।

প্রথমে কলহ। তারপরে পরস্পরের মুখদর্শন বন্ধ। সুতরাং একযোগে গান বাজনা আর কি করে হয়।

কৃষ্ণভামিনীর জিদ চাপল, কালী ওস্তাদের সঙ্গে আর গাইবেন না আসরে। কালীশঙ্করের কাছে ঠাঁর গান শিক্ষা সংগ্রহ করাও আর হল না।

কথাটা রটে গেল সঙ্গীত-সমাজে। অন্য সারঙ্গী নিয়ে কৃষ্ণভামিনী আসর করতে লাগলেন।

এমনি কিছুদিন চলবার পর অবশেষে মামলা পর্যন্ত গড়াল  
বিবাদের পালা।

কালী ওস্তাদের মজুরোর ভাগ পাওয়া বন্ধ হয়ে গেল। গান  
শেখাবার মাস মাহিনাও বন্ধ। বিষম রাগে প্রতি-আক্রমণ করলেন  
পেশাদার ওস্তাদ। মামলার ভয় দেখিয়ে বাঙ্গজীকে জব করতে  
চাইলেন।

কালীশঙ্কর আদালতে কৃষ্ণভামিনীর নামে মোকদ্দমা কর্জু  
করলেন। দেয় টাকা অনাদায়ের জন্যে নালিশ।

শমন পেয়ে কৃষ্ণভামিনীকে ছোট আদালতে হাজির হতে হল।  
কিন্তু তিনি কি ভয় পাবার পাত্রী? উকিল দিয়ে মামলা  
চাসাবার যথোচিত ব্যবস্থা করলেন। নিজে আদালতে উপস্থিত হতে  
জাগলেন।

বাঙ্গজী মোকদ্দমার দিন বিচারালয়ে আসতেন মহাসাজগোজ  
করে। এমন আসামী কদাচিং দেখা যায়। সুতরাং হাকিম থেকে  
পেসকার সেপাই সবাইকার চোখ পড়ত বাঙালী বাঙ্গজির দিকে।  
তাঁর দামী দামী সব সোনার গয়না গায়ে। কোনদিন হৌরে মুক্তাব  
ঘটা! সেই উপযুক্ত কাপড় জাম। পরিপাটি সজ্জ। গৌরাঙ্গিনী,  
সুড়োল স্বাস্থ্যবত্তী। শুভ ললাটে পাতাকাট। সেকালের কেশ-রচনা।  
তবে আদালতের লোকদের জানবার কথা নয়—পাতায় কপাল  
চাকবার কারণ, একটি ক্ষতচিহ্ন। সেকালের চলতি বেণীসজ্জায়  
কৃষ্ণভামিনী সেই দাগটি ঢাকা রাখতেন।

কালী ওস্তাদের এই মামলা প্রথমে বিপক্ষে ছিল কৃষ্ণভামিনীর।  
বাঙ্গজীরই দোষ সাব্যস্ত আর কালীশঙ্করের ক্ষতিপূরণ পাবার মতন  
অবস্থা। কিন্তু এমন কায়দায় কৃষ্ণভামিনীর পক্ষে মোকদ্দমা  
পরিচালিত হল যে বিবাদের মোড় ঘুরে গেল।

মামলা আর না এগিয়ে, তবির তদারকে এসে পড়ল আপোসের  
পথে। শেষে হাকিমের কামরার বাইরে গোল টেবিলে বাদী বিবাদী

পক্ষ বসলেন। বিরোধ মীমাংসা হতে জাগল পারস্পরিক আলোচনায়।

এই মামলায় কৃষ্ণভামিনী গায়িকা ইন্দুবালাকে সাক্ষা মেলেছিলেন। ইন্দুবালার তখন সতের-আঠারো বছর বয়স। গৌরীশঙ্কর ও কালী ওস্তাদের কাছে গান শিখছেন। গৌরীশঙ্কর ওস্তাদই তাকে নিয়ে যান কৃষ্ণভামিনীর কাছে। ছাত্রী হিসেবে তুজনের মধ্যে পরিচয় করিয়ে দেন।

সেই থেকেই ইন্দুবালার সঙ্গে তাঁর আলাপ। গানের জন্মে ইন্দুবালাকে কৃষ্ণভামিনী ভালবাসতেন। ইন্দুবালাও তাঁকে মান্ত করতেন বয়োজ্যেষ্ঠা গুরুবোন বলে। শ্রদ্ধা করতেন অতবড় কলাবতী গায়িকা হিসেবে। তাই কৃষ্ণভামিনীর পক্ষে সাক্ষা দিতে রাজি হয়ে যান। কিন্তু কালী ওস্তাদ সেজন্মে রাগ করেছিলেন ইন্দুবালার ওপর।

যখন গোলটেবিলে বসে আপোসের কথাবার্তা চলত তখনো ইন্দুবালার সাক্ষ্যের গুরুত্ব ছিল। তাঁকে সেজন্মে কাছে নিয়ে বসতেন কৃষ্ণভামিনী। কালী ওস্তাদের প্রভাবের বাইরে রাখতেন।

আলোচনায় বিরতির সময় তুজনে থাকতেন জনান্তিকে। কখনো হয়ত ইন্দুবালার কানে কানে চমৎকার গান শুনিয়ে দিতেন মেজাজ খুশি রাখতে। কারণ জানতেন, ভাল গান শুনিয়েই ইন্দুবালাকে সবচেয়ে খুশি রাখা যায়। উৎকৃষ্ট গানে বড় তৃপ্তি পেত ইন্দুবালার শিল্পীমন। আর কৃষ্ণভামিনীর ভাল ভাল গান তিনি শুনেছিলেন অনেক আসরে। তাই তাঁর বিপক্ষে যাবার সাধ্য ইন্দুবালার ছিল না।

যা হোক, শেষ পর্যন্ত মিটমাট হয়ে গেল সে মামলা। মতান্তর মনান্তরের পালাও তুজনের শেষ হল।

কিছুদিন পর থেকেই যথারীতি তাঁকে গান শেখাতে এলেন কালীশঙ্কর। পুনরায় কৃষ্ণভামিনীর গানের সঙ্গে গৌরীশঙ্কর ও কালী ওস্তাদ আসরে আসরে সারঙ্গ বাজাতে লাগলেন।

সবাই দেখলেন আবার আগের মতন কালী ওস্তাদের সঙ্গে ভাব হয়ে গেছে বিচিৰ-চিৰিত্ৰ এই বাঙ্গজীৱ। ওস্তাদ ছাত্ৰীৰ, সাৱন্ধী বাঙ্গজীৱ হাসি হাসি কথাবাটা গল্পসমূহ আগেৱ দিনেৱ মতন হতে লাগল। তাৱপৰ থেকে কালী ওস্তাদেৱ সঙ্গে কৃষ্ণভামিনীৰ সন্তাব ছিল সঙ্গীতজীৱনেৱ শেষ পৰ্যন্ত।

কৃষ্ণভামিনীৰ একজন জীৱনসঙ্গীৰ কথাও জানা যায়। ইনি ছিলেন উত্তৱ বাংলাৰ একটি জমিদাৱীৰ মালিক। রংপুৰে ভদ্ৰলোকেৰ খাস আবাস। কিন্তু রাজধানীৰ সঙ্গে তাঁৰ কাজেৰ এবং অকাজেৰ সম্পর্কও বেশ ছিল। কলকাতায় এলেই তিনি কৃষ্ণভামিনীৰ কাছে আসতেন, থাকতেন। তাঁদেৱ এই সম্বন্ধ বজায় থাকে বৱাবৱ। অৰ্থাৎ কৃষ্ণভামিনীৰ জীৱনকাল যাবৎ।

কিন্তু কৃষ্ণভামিনীৰ দৌৰ্ঘ্য হননি। শ্বেতাঞ্জিনীৰ আগেই তাঁৰ মৃত্যু হয়েছিল, মধ্যবয়সেই।

১৯২২-২৩ সাল কিংবা তাৱ কিছু আগে বিগতা হন কৃষ্ণভামিনী। সেকালেৱ অনেক সঙ্গীতশিল্পীৰ স্মৃতিই একেবাৱে লুণ্ঠ হয়ে গেছে। কিন্তু কৃষ্ণভামিনীৰ তা হয়নি বলা চলে। কাৱণ ৱেকেডগুলিতে আছে তাঁৰ সঙ্গীতকণ্ঠেৰ কিছু নিৰ্দশন। আৱ মেই বিচিৰ-চিৰিত্ৰ গায়িকাৰ একটি আঘৃণ্যোৱণ—‘মাই নেম ইজ কেষ্টভামিনী !

## যাদুকরী ঠংরী

। মৌজুদিন থঁ।

মাল্কা জান কদিন থেকেই লক্ষ্য করছেন ফৈয়াজ থাকে। তাঁর  
বড়ই আশ্চর্য বোধ হচ্ছে। কিন্তু তার কারণ ঠিক বুঝতে পারছেন  
না।

কেমন থামোশ হয়ে থাকেন ফৈয়াজ থঁ। গন্তীর, বিষম যেন।  
গুম হয়ে আছেন নিজের মনে। একলা দিন কাটাতে চান।

মাল্কা খবর নিয়েছেন—তবিযঁ ঠিক আছে তো?

না, শরীরে কোন গোলযোগ নেই। কিন্তু মন যেন ভার ভার।  
কথা বলেন না ভাল করে। শুধু ‘হঁ’ কিংবা ‘না’ জবাব দেন, কিছু  
জিজ্ঞেস করলে। আর বসে থাকেন চুপচাপ।

মৌজুদিন তালিম দিতে আসেন মাল্কা জানকে। ফৈয়াজ তখন  
অন্ত দিকে চলে যান।

বাসুজীকে বাতিয়ে দেবার সময় নিজে গেয়ে দেখান মৌজুদিন।  
তখন ফৈয়াজ কথনো অন্ত ঘৰৈ অপেক্ষা করেন। কথনো বা বেরিয়ে  
পড়েন বাইরে, কথনো একতলায় থাকেন।

মাল্কা জান অবাক হয়ে ভাবেন—থঁ। সাহেবের কি হল?  
মৌজুদিন সম্পর্কে কিছু উর্ধা নাকি?

স্পষ্ট জিজ্ঞেস করাও যায় না এ বিষয়ে। যদি কিছু মনে করেন।  
একে তো মেহমান। সম্মানিত অতিথি। আবার অতবড় ঘরানাদার।  
তা ছাড়া, কিছু কিছু চীজও দিচ্ছেন। তাঁকে এসম রাখা গৃহকর্ত্তার  
কর্তব্য।

তাঁর বাড়িতে থেকে মুখ ভার করে থাকছেন ফৈয়াজ খ। মাল্কা  
জানের বড়ই খারাপ লাগছে।

মৌজুদিনকে ফৈয়াজের এড়িয়ে চলবার কারণ কি? হসরৎ  
খান্দান? আলাদা ঘরানার জন্যে পেশাদারী প্রতিদ্বন্দ্বিতার ভাব?  
না অশ্ব কিছু? বাড়ির কর্ত্তা হিসেবে নিজের দায়িত্বের কথা ভাবেন  
মাল্কা জান।

ইগ্নিয়ান মিরর স্ট্রিটে তাঁর সেই গৃহ। ধর্মতলা স্ট্রিট আর ওয়েলেস-  
লির মোড়ের কাছে। ট্রাম লাইন থেকে পূর্বদিকের রাস্তা ইগ্নিয়ান  
মিরর স্ট্রিট। তাঁর মধ্যে কয়েকটি বাড়ি পার হয়ে ডানদিকে অর্থাৎ  
দক্ষিণে সেই দোতলা বাড়ি, উত্তরমুখী। সেখানেই আগ্রাওয়ালী বাঈজী  
মাল্কা জানের অতিথি হয়েছেন ফৈয়াজ খ।। তিনিও আগ্রা থেকে  
কলকাতায় এসেছেন। এখানে এখন কিছুদিন তাঁর থাকবার ইচ্ছা।

তা হল ১৯০৯-১০ সালের কথা।

তখনকার আগ্রা ঘরানার শীর্ষস্থানীয় এবং প্রবীণতম শস্ত্রাদ  
গোলাম আববাস। অশীতিপর বয়সে তিনি তখনো সর্গোরবে বর্তমান।  
পরে আরো দুই যুগ ব্যাপী আয়ুষ্মান হয়ে গোলাম আববাস শতবর্ষ  
অতিক্রম করেছিলেন। তাঁরই দৌত্ত্ব ও দস্তরমত তালিমে তৈয়ারি  
ফৈয়াজ খ। মাতামহের মতন তিনিও আগ্রার সন্তান।

আর মৌজুদিন কাশী থেকে কলকাতায় আগত। সেখানেই  
তাঁর জন্ম। পেশাদার গায়ক হিসাবে "কলকাতা-নিবাসী থাকবার  
প্রয়াসী মৌজুদিন। আগেও একাধিকবার এখানে এসেছেন, মহফিল  
করেছেন। এখন স্থায়ী হতে চান শস্ত্রাদরূপেও। মুজরো করেন  
বাঈজী মহলে তালিমও দিচ্ছেন কয়েকজনকে। আগ্রাওয়ালী মাল্কা  
জান তাঁদের মধ্যে বিশিষ্ট।

মৌজুদিন আর ফৈয়াজ খ'র বয়স কাছাকাছি। কয়েক বছরের  
জের্জেষ্ট মৌজুদিন। তবে তা চার-পাঁচ বছরের বেশি নয়।

শৈশবে পিতৃহীন ফৈয়াজ। রঙিলে ঘরানার খেয়ালগায়ক তাঁর

পিতা ছিলেন সব্দুর খঁ। পিতাকে হারিয়ে বাল্যকাল থেকেই ফৈয়াজ মাতামহের কাছে মানুষ হয়েছেন। গানের তালিমও পেয়েছেন তাঁর নিকটে।

গোলাম আবাসের একেবারে হাতে গড়া ফৈয়াজ সে সময়ে বিশ বছরের ঘরানা তালিম-পাওয়া কলাবৎ। বাপের ঘর দিল্লীর সঙ্গে বিশেষ সম্পর্ক নেই তাঁর। আগ্রাতেই শুদ্ধীর্ধকাল বসবাস করে, মাতামহেরই শগুর্দি, আগ্রা ঘরানাদার হয়েছেন ফৈয়াজ খঁ। আগ্রা ঘরানার যা বৈশিষ্ট্য, ঝুপদ-ধামার-ভিত্তিক শিক্ষা পেয়েছেন। আর আসরে প্রধানত খেয়াল অঙ্গের গায়ক। আগ্রা ঘরানার যে আসল চৌজ খেয়াল—তারি চালের খেয়াল গোয়ালিয়রের ধরনের।

সেই ছন্দের কারিগরিতে তান কর্তবের মুলিয়ানায় দুরস্ত হয়েছেন ফৈয়াজ খঁ। কর্তৃপক্ষের তাঁর অন্তর্ম প্রধান সম্পদ। কি ভরাট নিপাট জোয়ারিদার গলা। আর এমন পাল্লাদার আওয়াজের মধ্যে কত বিচিত্র কারুকর্ম। কি দাপটের তানকারী।

সেই ফৈয়াজ বিষাদগ্রস্ত হয়ে আছেন কেন? মৌজুদিনের সঙ্গে তাঁর কিছু হয়েছে নাকি?

মাল্কা ভাবেন, কিভাবে কথাটা তোলা যায়:

যে সময়ের কথা, কলকাতার সঙ্গীত-সমাজে তখন কেউ চেনে না ফৈয়াজকে। পেশাদার-রূপে আত্মপ্রকাশের শুয়োগও তিনি পাননি।

নওজওয়ান ফৈয়াজ খঁ। বয়স তখনো তাঁর ত্রিশ স্পর্শ করেনি। পশ্চিমাঞ্চলের দীর্ঘকায় স্বাস্থ্যবান যুবক। শৌখীন বেশভূষা, শুপুরুষ। কথাবার্তায় ব্যবহারে মার্জিত। সঙ্গীতই জীবনের একমাত্র অবলম্বন।

আগ্রা থেকে হাজির হয়েছেন কলকাতায়। মাঝে দিল্লী ইত্যাদি কোন কোন কেন্দ্রে মহফিল করেছেন। এলেম দেখিয়েছেন কলাবৎ হিসাবে। কিন্তু এমন তৈয়ারী গায়ক হয়েও কলকাতায় কোন রীতিমত আসর হয়নি এখনো। এত বড় সঙ্গীতামোদী শহর তাঁর কাছে প্রায় অপরিচিত।

তাই মাল্কা জানের বাড়িতে ফৈয়াজ থাঁ উঠেছেন। আগ্রাওয়ালী  
বাঙ্গাহেবার কলকাতায় সঙ্গীতবিলাসী সমাজে বিলক্ষণ প্রতিপত্তি।  
তাঁর সূত্রে শহরের গুণী পোষক রইস লোকদের সামনে গুণপনা  
দেখাতে পারবেন ফৈয়াজ। তখন এখানেও তাঁর গানের কদর  
হবে, এই আশা।

ফৈয়াজের প্রায় সমবয়সী আগ্রাওয়ালী মাল্কা খেয়াল ঠুংরি  
দাদরা গজলের উৎকৃষ্ট গায়িকা বলে তখনই বাঙ্গজীর বেশ নাম ডাক  
কলকাতায়। বিশেষ ঠুংরি গানে। আর বাঙ্গজীদের যা দস্তর, নৃত্য-  
পটিঘ়সীও। নাচে গানে মুজরো করেন ভালই। ইতিয়ান মিরর  
ঙ্গীটের এই গৃহ তাঁর স্বোপাজিত।

মাল্কা জানের সুন্দরী মুখ চোখ। ঈষৎ স্ব জাঙ্গিনী হলেও সুগঠিত  
তনু। মাজা মাজা শ্রামবর্ণ। সঙ্গীতগুণের সঙ্গে আচরণ সহবতেও  
প্রথম শ্রেণীর পশ্চিমা বাঙ্গ।

কথায় কথায় একদিন তিনি ফৈয়াজকে বললেন, ‘থাঁ সাব, আপনি  
আমার মেহমান। অতিথির কোন অসুবিধা না হয়, তিনি আরামে  
থাকেন, তা দেখা আমার কর্তব্য। তাই জিজেস করছি, আপ,  
থামোশ কাহে? আপনার কি তক্লিফ আমায় বলুন। আমি  
যথাসাধ্য তা দূর করব। আপনি এ বাড়িকে আপনার নিজের বলে  
জানবেন।’

ফৈয়াজ থাঁ প্রতিবাদ করে বললেন ‘না না, আপনার যত্ন-আত্মির  
কোন ত্রুটি হয়নি। বেফিকর রহিয়ে। আমার মন খারাপ হয়ে  
আছে অন্ত কারণে।’

বলে, মৌন রইলেন অল্লক্ষণ। কিন্তু মাল্কা জান কৌতুহল  
প্রকাশ করলেন না।

তখন ফৈয়াজ থাঁ বুঝিয়ে দিলেন তাঁর ভাবান্তরের কারণ।  
অকপটে বললেন, ‘আপনার কাছে তা বলতে আমার আপত্তি নেই,  
যদিও আপনি সে বিষয়ে কিছু করতে পারবেন না। দেখুন, কথাটা

মৌজুদিনের গান নিয়ে। বলতে কি, তার গান শুনেই আমি বিষণ্ণ হয়ে আছি। আর ভাবছি নিজের কথা। আমিও দস্তর মাফিক তালিম পেয়েছি। বিয়াজ যা করবার যথাসাধ্য করেছি, বাচ্পনসে। কোন কাঁকি দিইনি। তা একরকম তৈয়ার হয়েছি। আসরে দশজনের সামনে গানও গাইছি ঠিক ঠিক। সমবর্দ্ধাররা আমায় তারিফও করেন বটে। লেকিন্ কিসিকো অৰ্থ মে অঁশু আতা নেহি। মৌজুদিনের গান শুনে এই ব্যাপারটা বুঝতে পেরেছি। আমার সঙ্গে তার গানের তফাত। আমার গানে কোন শ্রোতার চোখে তো অক্ষ ঝরে না। যেমন আমার চোখে জল আসে মৌজুদিনের গান শুনে।'

ফৈয়াজ থা আবার একটু থামলেন।

এ পর্যন্ত শুনে চমৎকৃতা হলেন মাল্কা জান। কিন্তু কোন প্রশ্ন করে থা সাহেবের আবেগে ব্যাঘাত ঘটালেন না। বুঝলেন যে বক্তার কথা এখনো বাকি।

শ্রোতাকে বেশিক্ষণ অপেক্ষা করতে হল না।

স্বগতোক্তির মতন শোনাল ফৈয়াজ থার কথা, ‘আহা, কি গান গায় মৌজুদিন। শুই রকম না হলে আর গান। অমন গাইতে না পারলে জীবনে হল কি? বুথা গান শেখা। মৌজুদিনের কি দরদের ঠুংরি।’

আগ্রাওয়ালীর কাছে এবার পরিষ্কার হল, ফৈয়াজের আসল কথা বা মনের ব্যথা। বুদ্ধিমতী তিনি। মৌজুদিনের ঠুংরি শুনে, নিজের কাছে তেমন গানের অভাব দেখে বিষণ্ণ ফৈয়াজ থা।

একটু চিন্তা করে, আস্তে আস্তে জিজ্ঞেস করলেন, ‘তাহলে কি করবেন থা সাব? মৌজুদিনের কাছে কিছু নিতে তো পারবেন না আপনি। এত নাম আপনাদের আগ্রা ঘরানার। তার খেয়াল আর আমার গানে স্বয়ং গোলাম আবাসের তালিমে আপনি সেই ঘরানাদার। কি করে নেবেন মৌজুদিনের ঠুংরি?’

তা তো বটেই। মৌজুদিনের সামনে গানের প্রার্থী হতে একে-  
বারে নারাজ ফেয়াজ।

দৃঢ় আপত্তি জানিয়ে বললেন, ‘আমার মুশকিল তো এইখানে। এই  
কথা নিয়েট কদিন ভাবছি। আর কোন কিনারা দেখতে পাচ্ছি না।  
এত বড় খনদান আমার। আমি কি মৌজুদিনের কাছে হাত  
পাততে পারি? অথচ যেমন ধরনের গান এতদিন গেয়ে এসেছি,  
তাতে আর তৃপ্তি পাচ্ছি না। কি করি?’

ফেয়াজ খাঁর এই সমস্তা। সমাধানের কোন রাস্তা না পেয়ে বির্মু  
হয়ে আছেন। অত্পুর শিল্পী-চিত্ত বিক্ষুক। অন্তরের চাহিদার সঙ্গে  
বংশ-গরিমার বিরোধ।

ফেয়াজের সংকট নিয়ে ভাবতে লাগলেন মালুক। অবশেষে  
একটি উপায় স্থির করলেন। ফেয়াজের দুদিক রক্ষা হতে পারে এই  
সূত্র অনুসারে।

বাঙ্গিসাহেবা বললেন, ‘আমি একটা মতলব বাংলাতে পারি খাঁ।  
সাব। আপনি মন খারাপ করবেন না। এমন বন্দোবস্ত হবে যে,  
আপনার কাজ হাসিল হয়ে থাবে অথচ মৌজুদিন কিছু জানতে  
পারবেন না।’

সাগ্রহে জিজ্ঞাসু হলেন ফেয়াজ খাঁ।

তখন মালুক। জান জানালেন, ‘মৌজুদিন যখন আমায় তালিম  
দেবেন আর গাইবেন, তখন আপনি এরকম তাঁর সামনেই থাকবেন।  
আর ভাল করে শুনে নেবেন তাঁর চৌজা, বন্দিশ, আর গাইবার ঢং-  
চাং সব। অথচ মৌজুদিন তাঁর কিছুই জানতে পারবেন না। তবেই  
তো ফায়দা।’

ফেয়াজ খাঁ উৎসাহ পেলেন, তবে জিজ্ঞেস করলেন, ‘কিন্তু তা কি  
করে সন্তুষ্ট? এ নিয়ে না ঝঞ্চাট বেধে যায়?’

‘কোন ভাবনা নেই আপনার। আমার মতলবটা শুনুন। এবার  
থেকে মৌজুদিন এলে আমি শেই বড় কামরায় থাকব। ওখানেই

তালিম নেব তার কাছে। একেকটা গান ঘুরিয়ে ফিরিয়ে তাকে দিয়ে গাওয়াব। তখন একদিকের দেওয়ালের ধারে একটা চৌপাই থাড়া করা থাকবে। আর সেই চৌপাইয়ের আড়ালে, দেওয়ালের দিকে হবে একটি বিছানা। আপনি সেখানে আরাম করে থাকবেন। শুয়ে বসে, শুনে নেবেন মৌজুদিনের সব গান আর কারিগরি। মৌজুদিন আপনার পাত্তাই পাবেন না।'

ফৈয়াজ সায় দিলেন কর্তীর কথায়। মাল্কাও সেই মতন সব বন্দোবস্ত করলেন।

তারপর থেকে, মৌজুদিন শেখাতে আসেন বাঙ্গজীকে, দোতলার সেই বড় কামরায়। আর চৌপাইয়ের আড়ালে উৎকর্ণ শ্রোতা নিবিষ্ট হয়ে থাকেন।

মৌজুদিন খেয়ালেরও তালিম দেন মাল্কাকে। তবে ঠুংরিই বেশি। আগ্রাগ্রালী যে ঠুংরির গানের জন্যে অত নাম করেন তা মৌজুদিনের প্রসাদেই।

এইভাবে বেশ কিছুদিন যায়। সেবার ইঙ্গিয়ান মিরর স্টীটের বাড়িতে মৌজুদিন আসেন মাস দুয়েক। ফৈয়াজও সে সময় শুধানে বরাবর থাকেন। চৌপাইয়ের শুধার থেকে ঘনিষ্ঠভাবে শুনে নেন মৌজুদিনের গানের চাল। তার গায়কীয় খুঁটিনাটি নানা কাঙ্কাশ। সেই গীতিমাধুর্যের নিবিড় সান্নিধ্য জাত করেন। তার অন্তরঙ্গ মর্মসন্ধান যেন। কত রঙিনী ভাব, কত শুষমা। কি আবেগে অনুভবে অত প্রাণবন্ত হয়ে গঠে, শ্রোতাকে অভিভূত করে তার গান—তার সাক্ষাৎ পরিচয় পেলেন ফৈয়াজ থাঁ। তার ফলে, সঙ্গীতকৃতিতে বহুলাংশে উপকৃত হলেন।

স্বয়ং সিদ্ধকষ্ট, উচ্চকোটির শিল্পী-প্রাণ ফৈয়াজ থাঁ। যা গ্রহণীয় তা আস্ত্র করে নেন। বিশেষ ঠুংরি, যার চলন নেই তাদের আগ্রা ঘরানায়।

পরবর্তী জীবনে ফৈয়াজ থাঁ। ঠুংরি গানের চর্চায় উদ্বৃক্ত হন, যে তৃপ্তি

পেতেন ঠঁঁরি পরিবেশনে, নিজের সঙ্গীত বিষয়ের যে অস্তর্গত করে নেন ঠঁঁরি গানকে—তার মূলে মৌজুদিনের সাক্ষাৎ দৃষ্টান্ত ও প্রভাব। ইগ্নিয়ান মিররঃস্ট্রীটের সেই বাস-পর্বে মৌজুদিন এবং তারই তালিমে গঠিতা মাল্কা জানের প্রতিশ্রুতি ফৈয়াজ খাঁ খণ্ডী ঠঁঁরি সম্পর্কে। মৌজুদিনের গান ও তালিমের সঙ্গে এমন নিবিড় সংযোগ না ঘটলে আগ্রা ঘরানাদার ঠঁঁরির প্রতি আকৃষ্ট এবং তা গ্রহণ করতেন কিনা সন্দেহ।

শুধু ঠঁঁরিতে নয়। ফৈয়াজ খাঁর গায়ক জীবনে মৌজুদিনের সামগ্রিক প্রভাবও ধর্তব্য। অসামান্য দক্ষ গায়নগুণী এবং জোয়ারিদার কণ্ঠসম্পদের অধিকারী হলেও ফৈয়াজের আওয়াজ ছিল বাজখাই। স্বভাবতই মাধুর্যরস বক্ষিত। সেই ঘাটতি তিনি পূরণের প্রয়াস পান মৌজুদিনের অপূর্ব গায়নভঙ্গিমা, ধরনধারণ আকৃষ্ণ করে। সেই অপরূপ মাধুরী আপন গানে সঞ্চারিত করতে সচেষ্ট হন, যা শ্রোতার আঁখিপট অঙ্গসজ্জ করে তোলে। রসনিষ্ঠাত হয় চিন্ত।

মৌজুদিনকে সচেতনভাবে অনুধাবনের ফলে সমৃদ্ধতর হয় ফৈয়াজের গানের চাল, তাঁর পেশাদার কলাবৎ জীবনের উদ্বোধন লগ্নে।

অবশ্যই মৌজুদিনের নিকটে এ সংবাদ অপ্রকাশিত থাকে এবং তা মাল্কা জানের কৃতিত্বে।

মৌজুদিনের মধুরতার সাক্ষাৎ দৃষ্টান্তে আরো শ্রীময়ী সৌন্দর্যময়ী হয়ে ওঠে ফৈয়াজ খাঁর গান। অধিকতর রস-সঞ্চারী হয় তাঁর আগ্রা ঘরানায় উত্তরাধিকার। সঙ্গীত-রসিক সমাজে একথা শু প্রচলিত যে, আগ্রা ঘরানা কৃথা ঘরানা। কৃথা বা কৃক্ষ এই অর্থে যে, আগ্রা ঘরানার খেয়াল গায়নে ছন্দ-লৌলা, তান-কর্তব্যের দাপট বেশি প্রকট। মাধুর্য রস সেই অনুপাতে গৌণ। অনেকাংশে গোয়ালিয়র ঘরানার তুল্য। গোয়ালিয়রী চালেও রসমাধুরীর আবেদন অপেক্ষা ছন্দ-কর্ম তথা লয়কারীর প্রাধান্ত। এখানে প্রশ্ন এই যে, নিষ্ঠাবান আগ্রা

ঘরানাদার হয়েও ফৈয়াজ থাঁ যে ঠুংরি গাইতেন, তা কোথায় ছিল  
আগ্রা ঘরানায় ? কোথা থেকে পেলেন ফৈয়াজ ? তার সহস্ত্র—  
মৌজুদিন এবং তাঁরই ঠুংরির এক উত্তরাধিকারিণী মাল্কা জান।

গায়ক মৌজুদিন হতে ফৈয়াজ যে গানকে হৃদয়স্পর্শী, অধিকতর  
সুষমামণ্ডিত করবার অভিজ্ঞাবী হলেন, একথায় তাঁর গৌরবের কোন  
হানি ঘটে না। যথার্থ শিল্পাচিক্ষিত চির-গ্রহিষ্যু। অনেক শ্রেষ্ঠ কলাকার  
যে অপরের থেকে গ্রহণীয় বস্তু সংগ্রহ ও আত্মস্থ করে নেন, তা আদৌ  
দোষাবহ নয় অন্দনজগতে। ‘আটিস্ট হচ্ছে কালেক্টর’—ভারতীয়  
চিত্রশিল্পের আচার্য অবনৌন্দুনাথের এই ভূয়োদৰ্শী মন্তব্য জলিতকলার  
সকল ক্ষেত্রেই সত্য, বিশেষ সঙ্গীতে। ফৈয়াজ থাঁও তেমনি নিজের  
খেয়াল গানের অবয়বে মর্মস্পর্শী রসসূষ্টিতে সচেতন হলেন,  
মৌজুদিনের গানের অভিজ্ঞতায়।

এখানে বলে রাখা যায়—মাল্কা জান এবং ফৈয়াজ থাঁর উল্লিখিত  
কথাবার্তা, চৌপাইয়ের আড়ালে মৌজুদিনের গান ফৈয়াজের শোনার  
ব্যবস্থাদির বিবরণ, অলৌক কিংবদন্তী নয়। এই ঘটনাপরম্পরার  
কথা স্বয়ং মাল্কা জান জানিয়েছিলেন অনাথনাথ বস্তুকে। মৌজুদিন—  
ফৈয়াজ থাঁ প্রসঙ্গের ক বছর পরে, ইঙ্গিয়ান মিরর স্ট্রিটের সেই বাড়িতে  
বসেই। তরুণ সুদর্শন অনাথনাথ তখন বাংলার উদৌয়মান প্রতিষ্ঠাত-  
বান খেয়াল ঠুংরি শিল্পী। উপরন্তু রৌতিমত তবলাবাদক। নানা আসরে  
গানের উপলক্ষ্য মাল্কা জানের সঙ্গে তাঁর পরিচয়। মাল্কার  
বাড়িতেও শিক্ষার্থীরূপে যেতেন পুত্রতুল্য স্নেহপাত্র অনাথনাথ।  
সেখানে মাল্কার অনুরোধে মৌজুদিনও তাঁকে কিছু তালিম দিয়ে-  
ছিলেন। সেকথা পরে, মৌজুদিনের অন্য প্রসঙ্গে।

বসু মশায়ের উত্তরজ্ঞীবনে ফৈয়াজ থাঁর সঙ্গে বিশেষ প্রীতির সম্বন্ধ  
গড়ে উঠেছিল গানেরই স্মৃত্রে। অনাথনাথের গুণমুগ্ধ থাঁ সাতেব তাঁকে  
বরাবর প্রীতির দৃষ্টিতে দেখেছেন।

রায়গড় দরবারে নিযুক্ত কলাকারদলপে এবং পশ্চিমাঞ্চলের বিভিন্ন

ଆসରେ ଗାୟକ-ବାଦକ ରୂପେ ବସୁ ମଶାୟ ଫୈୟାଜେର ସଂସ୍କରେ ଏମେହେନ ବହୁବାର । ନେତୃଷ୍ଠାନୀୟ ଗାୟନଗୁଣୀ ଥାି ସାହେବେର ପ୍ରତି ଅତ୍ୟନ୍ତ ଶ୍ରଦ୍ଧାସମ୍ପନ୍ନ ତିନି । ଏଥାନେ ପ୍ରାସଙ୍ଗିକ କଥା ଏହି ଯେ, ମୌଜୁଦିନେର ସୁବାଦେ ଫୈୟାଜ ଥାିର ଲାଭବାନ ହୁଓରାର କଥା ଅନାଥନାଥ ନିରପେକ୍ଷଭାବେ ଉଲ୍ଲେଖ କରତେନ ଫୈୟାଜେର ଠୁଁରି ଗାୟାର ଦୃଷ୍ଟାନ୍ତ ଦିଯେ, ଖେୟାଳ ଗାନେଓ ରମ୍ଭଣ୍ଡିତେ ତୁାର ଆରୋ ମନୋଯୋଗୀ ହୁଓରାର କଥା ବଲେ ।

ସମକାଲୀନ ବହୁ କଲାକାର ସମ୍ପର୍କେ ଓୟାକିବହାଳ ଅନାଥନାଥ ମାଲ୍କା ଜାନେର ବିବୃତି ଅବିଶ୍ୱାସ କରବାର କୋନ କାରଣ ପାନନି । ଆର ଫୈୟାଜେର ଠୁଁରିର ଉଣ୍ସ-ସ୍ଵରୂପ ମନେ କରତେନ ମୌଜୁଦିନ ଏବଂ ମାଲ୍କା ଜାନକେଓ । ଆସଲେ ଯା ଏକଇ ଧାରା ।

ବସୁ ମଶାୟେର ବିବୃତି ଯେ ନିରପେକ୍ଷ ହିସାବେ ବିଶ୍ୱାସଯୋଗ୍ୟ ତଥା ଗ୍ରହଣୀୟ, ମେଜଗ୍ରେଇ ତୁାର ପ୍ରସଙ୍ଗେର ଅବତାରଣା ।

ତଥନକାର ଅଭିଜ୍ଞ ମହିଳେ ଏକଟୀ ବେଶ କଥାଟି ତୋ ଆଛେ । ଫୈୟାଜ ଥାି ଇଣ୍ଡିଆନ ମିରର ଷ୍ଟୀଟେ ମାଲ୍କାର ବାଡିତେ ପ୍ରବେଶ କରେଛିଲେନ ତୁାକେ ଖେୟାଳ ଗାନେର ତାଲିମ ଦିତେ । ଆର ବେରିଯେ ଏଲେନ ମେଥାନ ଥେକେ ଠୁଁରି ଦାଦରା ନିଯେ । ଆଗ୍ରାଓୟାଲୀର କାହ ଥେକେଓ ତିନି ଠୁଁରି ଦାଦରା ସଂଗ୍ରହ କରେଛିଲେନ ବୈକି । ଆର ପ୍ରକାରାନ୍ତରେ ତାଓ ମାଲ୍କାର ଓଷ୍ଟାଦ ମୌଜୁଦିନ ଥେକେ ପ୍ରାପ୍ତ । ଏବଂ କଥାଓ ଅନ୍ତରଙ୍ଗଭାବେ ଜାନାତେନ ଓୟାକିବହାଳ ଅନାଥନାଥ ବସୁ ।

ଆଗ୍ରାଓୟାଲୀର ଠୁଁରି ଦାଦରା ଫୈୟାଜ ଥାି କେମନ ନିଯେଛିଲେନ ତାର ଏକଟି ନମୁନାଓ ଦେଖ୍ୟା ଯାଇ ।

ଏମନି ଦୁଇନି ହାଲ୍କା ଚାଲେର ଗାନ ରେକର୍ଡ କରେଛିଲେନ ଫୈୟାଜ ଥାି । ଏକଟି ହଲ, ‘ବାଲମ୍ ପରଦେଶୀ ନା ଯାଇଓ ।’ ଆର ଏକଥାନି— ‘ଆଓ ପିଯା ମ୍ୟା ମେଜ ବିଛାଉ/ଗରୋଯା ଲାଗୁ କରୁ ତୋ କୋ ପେଯାର ।’

ଏହି ଦୁଇ ଗାନେର ମାଲ୍କା ଜାନେରେ ରେକର୍ଡ ଆଛେ । ଜାନବାର କଥା ଏହି ଯେ, ଗାନ ଦୁଇନି ପ୍ରଥମ ରେକର୍ଡ କରେନ ଆଗ୍ରାଓୟାଲୀ, ଫୈୟାଜେର କି ବହୁର ଆଗେ ।

সঙ্গতভাবেই অনুমান করা যায় ফৈয়াজ থার ওই দাদরা ঠুংরি  
মাল্কা জান থেকে জন্ম, কিংবা মৌজুদিনের তালিম দেবার সময়।

ফৈয়াজ থা মৌজুদিনকে কত বড় কলাকার জ্ঞান করতেন, আপন  
সঙ্গীতজ্ঞীবনে কি সম্মানের আসন দিতেন সেই প্রতিভাধরকে,  
তার পরিচয় ছিল মাল্কা জানের গৃহ প্রসঙ্গে। যেমন অকপট  
স্বীকৃতিতে তেমনি অক্ষ দিয়ে সঙ্গীত-ভাবপ্রবণ ফৈয়াজ থা প্রথম  
যৌবনে মৌজুদিনের অভিষেক করেছিলেন। তেমনি তাঁর স্মৃতি-  
তর্পণেরও নজির দেওয়া হবে উপমা হারে।

এখন মৌজুদিনের কথা। অর্থাৎ তাঁর গীতিকলা প্রসঙ্গ।

আসরে তাঁর অনুষঙ্গে আছে—এক আশ্চর্য সুরেজা কঠ। গানে  
অপরূপ রসসৃষ্টি এবং দুর্লভ স্বরমাধুর্য। আর আসর মাত করবার  
শক্তি।

সংক্ষেপে এই হল মৌজুদিনের সঙ্গীতগুণ। এমনি গুণেই তিনি  
শ্রোতাদের সম্মোহিত করে রাখতেন। আর তাঁর গানের যাহুতে  
শ্রোতারা যে মুঝ, এবিষয়ে সচেতনও ছিলেন নিজে। তবে এই নিয়ে  
অহঙ্কার প্রকাশ করতেন না। তৃপ্ত থাকতেন সার্থকতার পৌরবে।

শ্রোতাদের যেমন মোহগ্রস্ত করতেন, তেমনি আবার অনেক  
আসরে নিজেও আত্মবিশ্বত হয়ে যেতেন। গানে গানে কোন্  
মায়ালোকে অস্তর্ধান করতেন শ্রোতৃমণ্ডলীর সঙ্গে। কত সময়,  
কেমন করে অভিবাহিত হয়ে গেছে সে বিষয়ে বাহ্যজ্ঞানশূন্য হতেন।  
বাস্তব জগৎ লুপ্ত হয়ে যেত সঙ্গীতের গহন অনুভবে।

তাঁর অতি সফল আসরজ্ঞীবনে তাঁর নানা দৃষ্টান্ত বিক্ষিপ্ত হয়ে  
আছে। বলতে গেলে গল্পের মতন শোনায়।

যেমন সেবার হল রামপুরে। উত্তর ভারতের এক শ্রেষ্ঠ সঙ্গীত-  
কেন্দ্র তখন রামপুর। তাঁর নবাব কাল্বে আলী থার আমলের সেই  
রামপুর দরবারে।

মৌজুদিনকে সেবার কিছুদিন সেখানে থাকতে হয়। তাঁর গানে

মুঞ্ছ নবাব রেখে দেন তাকে। আর যখনি ইচ্ছা হয়, ফরমায়েস করে তার গান শোনেন।

একদিন তার গান শুনতে চেয়েছেন কালুবে আলি। মৌজুদিনের তলব হয়েছে। তখন সকাল। তবে বেলা হয়ে গেছে বেশ খানিক।

নবাবের একেলা পেয়ে মৌজুদিন প্রস্তুত হতে লাগলেন। তার আসর-পূর্ব প্রস্তুতিপৰ্ব কিছু সময়সাপেক্ষ। ডন-বৈঠক করে নেন কয়েকটা। তারপর গোসল সারতে যান। স্নানের পরে সাজগোছ, পরিপাটি প্রসাধন—চোখে সুর্মার বাহার পর্যন্ত। তা ভিন্ন কিঞ্চিৎ ভোজন এবং সেই সঙ্গে আবশ্যিক পানযোগও ধর্তব্য।

এইসব পাট সমাধা করতে বড় দেরি হয়ে গেল মৌজুদিনের।

যখন দরবারে এলেন, তখন নবাব গাত্রোথানের উদ্যোগ করছিলেন। মৌজুদিনের বিলম্বে অসন্তুষ্ট, বিরক্ত। বেলা হয়েছে অনেক। এখন নাস্তার সময়।

কালুবে আলি বিরস মুখে বললেন, ‘এখন আর গানের দরকার নেই। ও বেলা শুনব।’

নবাব কথা বলবার আগেই মৌজুদিন তার মেজাজ বুঝেছিলেন মুখ দেখে।

তখন প্রস্তুত হয়ে হাত জোড় করে আজি জানালেন, ‘খোড়া শুন লিজিয়ে নবাব সাব—পন্থ মিনিট তক।’

দরবারে তখন মাত্র কয়েকজন হাজির। সঙ্গতকার শুধু এক সারঙ্গবাদক আর তবলচৌ।

নবাব অনিচ্ছার সঙ্গে রাজি হলেন।

সম্মতি পেয়েই গান আরম্ভ করে দিলেন মৌজুদিন। বৈরবীতে ঝঁঁরি ধরলেন।

প্রথম থেকেই জমে উঠল বৈরবী। বিরুপতা দূর হয়ে নবাব আকৃষ্ণ হলেন। আর ক্রমেই নিমগ্ন হতে লাগলেন সুরের ইন্দ্রজাল।

কালুবে আলী শুধু সঙ্গীতপ্রেমী কিংবা সমবাদাব মাত্র নন। তিনি একজন সঙ্গীতজ্ঞও। তাঁর সঙ্গীত দরবারের নায়ক উজীব থার অন্তর্ম শিশু তিনি। তৎকালীন রামপুর ঘরানার নেতা, সেনীয়া বীণকার উজীব থার কাছে ক্রপদ গান ও আলাপচারীর পাঠ নেন। নবাবের পরম আগ্রহ রাগসঙ্গীতে। তাঁর দরবারে ক্রপদ সঙ্গীত ও রাগালংকারের বিশেষ মর্যাদা আর প্রাধান্ত। কিন্তু তেমন ঠুংরি হলে আরও কদর করেন কালুবে আলী।

এখন মৌজুদিনের ভৈরবীর সঙ্গীতে অভিভূত হয়ে পড়লেন। সব কিছু বিস্মৃত হয়ে গানের মায়ায় একান্তমুখী নবাব। সময় কোথা দিয়ে পার হয়ে যাচ্ছে, কতক্ষণ অতিক্রান্ত হয়েছে, কিছুই খেয়াল নেই তাঁর।

কখন ভৈরবীর পরে খান্দাজ ধরেছেন মৌজুদিন দিবা তৃতীয় প্রহরে, তাও লক্ষ্য করেননি কালুবে আলি। সুরের এক অবিচ্ছিন্ন প্রবাহে যেন তিনি তাসমান। এক গানের শেষে অন্ত গান শুরু হয়েছে বটে, কিন্তু শ্রোতার মনে কোন ছেদ পড়েনি এমনি যাত্তকরের তুল্য তাঁর প্রভাব।

খিদ্মদ্গারেরা এর মধ্যে কয়েকবার এসেছে। কিন্তু নবাবকে সেলাম করে কাছে দাঢ়াবার সাহস হয়নি তাদের, তাঁকে সময় জানানো তো দূরের কথা। কারণ সঙ্গীতের সম্মোহনে আচ্ছন্ন কালুবে আলী। বাধা পড়লে বিরক্ত হবেন নির্ধাত।

মৌজুদিনের এক একটি গান যেন ফুলে ফুলে পাতায় লতায় মঞ্জুরিত হয়ে উঠেছে। সেই পুষ্পিত পল্লবিত বাগিচার সৌরভে আমোদিত নবাব। সময়ের হিসাব তাঁর নেই। কিন্তু সেকথা তাঁকে জানিয়ে দেবারও হিস্ত নেই কোন খিদ্মদ্গারের। তারা কামরার দরজায় অপেক্ষমান।

কিন্তু ক্রমে যে শেষ হয়ে এল দিনের আলো। বিকালের পালা আর কি বাকি? ঝাড়ের বাতিদানে রোশনি জ্বালতে হবে তো।

দৱাৰী ফৱাস আৱ স্থিৱ থাকতে পাৱে না। বাড়মঠন জালিয়ে দেয় একে একে।

এতক্ষণে নবাবেৰ ছঁশ ফিৱে আসে।

কিন্তু তখনো গেয়ে চলেছেন অক্লান্ত মৌজুদিন।

এবাৱ তিনি থামলেন। লজ্জিত নবাব। কিন্তু তাৱিফ কৱলেন বিস্তুৱ। সন্ধ্যাৱ পৱে দৱাৱ থেকে উঠলেন।...

মৌজুদিনেৱ আৱেকটি আসৱেৱ গল্প। এটিৱ সূত্ৰ হলেন পৱবৰ্তী কালেৱ বিখ্যাত পাখোয়াজগুণী বিঠলদাস গুজৱাটী। তিনিও বলতেন এই ধৱনেৱ একটি আসৱেৱ কথা। তবে এ ষটনা বিঠলদাসেৱ সমকালীন নয়, তাঁৱ পূৰ্ব্যুগেৱ বিবৱণ। তাঁৱ কাকাৱ একদিন এমনি অভিজ্ঞতা হয়েছিল।

একটি ঘৰোয়া মজলিস বসেছিল সেদিন। পশ্চিমেৱ এক শহৱে, কোন রাইস্ লোকেৱ বাড়িতে জলসা। আসৱটি ছোট, শ্বেতাদেৱ সংখ্যাও বেশি নয়। তবে তাঁদেৱ অনেকেই বেশ বোন্কা। আৱ গায়ক ছিলেন কয়েকজন। তাঁদেৱ অন্তম মৌজুদিন।

সন্ধ্যাৱ পৱথেকেই আসৱ শুন্দ হল। প্ৰথম কজন যথন গান শেষ কৱলেন, তখন রাত হয়ে গেছে অনেকটা। বিঠলদাসেৱ কাকা এতক্ষণ বসে গান শুনছিলেন। কিন্তু এবাৱ তিনি দাঁড়িয়ে উঠলেন, রাত হতে দেখে। কাৱণ তাঁৱ নিয়মানুবৰ্তী দৈনন্দিন জীবনযাত্ৰা। আহাৱ শয়ন ইত্যাদিৱ সময় নিৰ্দিষ্ট রাখা অভ্যাস। আৱ রাত জাগলে শৱীৱ খাৱাপ হতে পাৱে। তাই তিনি এগোলেন বাইৱেৱ দৱজাৱ দিকে।

এমন সময় শুনলেন, এবাৱ মৌজুদিনেৱ গান হবে।

গুজৱাটী ভদ্ৰলোক মৌজুদিনেৱ নাম শুনেছিলেন বটে। কিন্তু তাঁৱ গান কখনো শোনেননি। কৌতুহলী হয়ে ভাবলেন, একটু শোনাই যাক মৌজুদিনেৱ গান কেমন।

তিনি আৱ আসৱেৱ মধ্যে এসে বসলেন না, পাৰে উঠতে বা

বেরতে না পারেন গান শেষ হবার আগে। দরজার ধারেই দাঢ়ালেন, একটি পাল্লায় হাতের ভর রেখে। একটু শুনেই চলে যাবেন, এই ইচ্ছা।

এ বাড়ির কোন কোন লোক তাকে বসে ভাল করে শুনতে বললেন।

কিন্তু তিনি আপন্তি জানালেন, ‘না, আর বসব না। একটুখানি শুনে চলে যাব। আমার দেরি হয়ে গেছে।’

দাঢ়িয়ে থাকাই তার স্মৃতিধা বোধ হল।

এদিকে মৌজুদিন জমিয়ে তুলছেন তার গান। ভরাট আসর। শ্রোতারা যে যার জায়গায় স্থির হয়ে শুনছেন। কখনো বা প্রশংসা-সূচক কেউ বলছেন কিছু। এই পর্যন্ত মনে করতে পারেন বিঠলদাস গুজরাটীর কাকা।

সে রাত্রে মৌজুদিনের যে কি মনমাতানো খেয়াল ঠংরি হয়েছিল তার আর কোন বিবরণ আর তার মনে নেই। একেবারে সকালের আলো যখন ঘরে এসে পড়েছে, ওদিকে রাস্তা পরিষ্কার করছে পৌর-কর্মীরা, তখন তার খেয়াল হয়েছে যে সারা রাত কেটে গেছে মৌজুদিনের গানে। কখন যে তিনি দরজার পাশ থেকে আসরের এক কোণে এসে বসেছেন, ঘন্টার পর ঘন্টা কখন পার হয়েছে, সেসব কিছুই তার স্মরণে নেই। তার কান প্রাণ মন ছেয়ে আছে শুধু শুরের এক অফুরন্ত সুরধূমী।...

এমনি আরেকদিনের কথা। ঘটনাস্থল বাংলা।

সেবারে মৌজুদিন এসেছেন মুশিদাবাদ দরবারে। মীর্জা সাহেব তাকে এখানে এনেছেন। নবাব ওয়াজিদ আলী শাহর এক পৌত্র, হারমোনিয়ম-গুণী মীর্জা সাহেব। তার কুটুম্বিতাও আছে মুশিদাবাদ নবাব পরিপারে। সেসব কথা তার সম্পর্কে অধ্যায়ে বলা হয়েছে।

কলকাতায় সঙ্গীতক্ষেত্রে মৌজুদিনের বে অন্তরঙ্গ গোষ্ঠী, মীর্জা

সাহেবও তার একজন। মৌজুদিনের সঙ্গে কোন কোন আসরেও তিনি হারমোনিয়ম সঙ্গত করেছেন। প্রামোফোন রেকর্ডেও বাজিয়েছেন তার গানের সহযোগী হয়ে। তিনিই উদ্যোগ করে মৌজুদিনকে মুশিদাবাদে নিয়ে এসেছেন। মৌজুদিন গান শোনাবেন নবাবকে এই প্রথম নবাব তার গুণপন্নার পরিচয় পাবেন। থুবই আশায় উৎসাহে মৌজুদিনকে এনেছেন কলকাতা থেকে।

মুশিদাবাদ দরবারে কালে থাও ছিলেন সেসময়। পাতিয়ালার মহাঙ্গণী খেয়ালীয়া। পরবর্তী কালের সুপরিচিত কৃষ্ণলীগোলাম আলী থার কাকা এবং প্রথম গুস্তাদ। কালে থার গায়নকৃতির সবিশেষ ও মনোজ্ঞ পরিচয় সঙ্গীতরসিক অমিয়নাথ সান্তাল তার ‘শুন্তির অতলে’ পুস্তকে দিয়েছেন। কালে থার সঙ্গীত-জীবনের সঙ্গে ব্যক্তি-জীবনেরও কিছু বিবরণ আছে বর্তমান লেখকের ‘সঙ্গীতের আসরে’ বইটিতে।

মুশিদাবাদ দরবারে মৌজুদিনের আসর যখন হল, কালে থাও তখন শ্রোতা হিসাবে উপস্থিত। নবাবের সঙ্গে তার কয়েকজন ঘনিষ্ঠ ব্যক্তি শ্রোতাদের মধ্যে আছেন। মৌজুদ সাহেব হারমোনিয়মে।

আসর বসেছে সন্ধ্যার পর। একমাত্র মৌজুদিনেরই গান হবে।

এখন, তার আসরে গাইবার আগে যে অভ্যাসটি ছিল—অমিয়নাথ সান্তাল বণিত ‘কৃষ্ণশুন্তি’—তার ব্যত্যয় হয়েছিল সেদিন। ঘটনাচক্রে মৌজুদিন ‘অপ্রস্তুত’ অবস্থায় অর্থাৎ শুক্রকর্ত্তার আসরে এসেছেন। মৌজুদ সাহেব তার উপযুক্ত ‘প্রস্তুতি’র বন্দোবস্ত করতে পারেননি কোন কারণে। এর দক্ষে নবাবেরও কড়া লুকুম আছে, দরবারে বসে ওসব চলবে না।

অগত্যা সেই অতৃপ্তি মেজাজে গান শুরু করেছেন মৌজুদিন। গান ধরার আগে একটু উস্থুস্ করেছিলেন। অর্থপূর্ণ চোখে চেয়েছিলেন মৌজুদ সাহেবের দিকে। জনান্তিকে ইসারায় মৌজুদ বুঝিয়ে দেন—

নাচার। এ দরবারে শুস্ব দস্তুর নেই। কোন রকমে গেয়ে নাও, পরে  
দেখা যাবে।

কিন্তু তা কি করে হয়! মৌজুদিনের সে মৌজ না হলে আসলে  
গান গাইবে কে! এই বাহু বস্তুর দাস তিনি যে।

মৌজুদিন গাইতে লাগলেন বটে। মীর্জাও দেখলেন —গান জমছে  
না ঠিক। প্রাণ নেই গানে। এ যেন অশ্ব মৌজুদিন।

কালো খাঁ কখনো মৌজুদিনের গান শোনেননি। নামডাক  
শুনেছিলেন মাত্র। এখন অবাক হয়ে ভাবলেন—এই মৌজুদিন!  
এমনি গানের জন্যে এত নাম। মনের ভাব কালো খাঁ মীর্জা সাহেবকে  
জানিয়েও দিলেন! লজ্জিত হয়ে শুনলেন মীর্জা। কিন্তু আসল  
কারণটা ভেঙে বলতে পারলেন না।

নবাব বাহাদুরেরও ভাল লাগছিল না মৌজুদিনের গান।

সেকথা বুঝে মীর্জা সাহেব আরো সরম বোধ করেন। তিনিই  
বড় মুখে বলে মৌজুদিনের আসর করেছিলেন এ দরবারে। এখন  
মৌজুদিনের সঙ্গে তাঁরও ইজ্জৎ যাবার দাখিল। নবাব বাহাদুর আবার  
মীর্জা সাহেবের কুটুম্ব।

অগত্যা তিনি নবাবের কানে কানে ব্যাপারটা জানালেন।

‘মৌজুদিনের আসল গান যদি শুনতে চান তাহলে একটু ব্যবস্থা  
করবার হৃকুম দিন।’

‘কিন্তু আপনি তো জানেন, আমার দরবারে শুস্ব বেদস্তুর।’

‘জানি, নবাব বাহাদুর। শুধু আজকের জন্যে একবার হৃকুম  
জারি করুন। মৌজুদিনকে পেয়েছেন, তাঁর গান ভাল করে শুনে  
নিন। পরে এ সুযোগ হয়ত নাও পেতে পারেন। আর কখনো  
আপনাকে এমন আজি জানাব না।’

তখন অমুমতি দিলেন নবাব। আর দরবারেই কঠশুক্রির সাজ-  
সরঞ্জাম সব এসে গেল। মৌজুদিনের প্রস্তুতির উপযুক্ত উপকরণ।

দেখে, কালে খঁ। একবার আফ্শোষের গুঞ্জরণ শোনালেন,  
'নবাব বাহাদুর কখনো আমার জগ্নে এমন মেহেরবানি করেন নি...'  
ইত্যাদি। ১

কিছুক্ষণের মধ্যেই মেজাজ-থুশ তৈয়ার হয়ে, নতুন করে গান শুরু  
করলেন মৌজুদিন। আর আসর জমাতে তাঁর বেশি সময় লাগল  
না। এবার গান শুনতে শুনতে মশ-গুল হয়ে গেলেন নবাব।

কালে খঁ'রও ভাবন্তর ঘটল। উচ্ছসিত তারিফ করতে লাগলেন  
সরল শিল্পীচিত্তে। আর মৌর্জা সাহেবেরও বুক দশ হাত হয়ে  
উঠল।

এদিকে সময় যে কোথা দিয়ে বয়ে চলেছে, সে খেয়াল করেননি  
কেউ। মৌজুদিনের গানের পর গানে রাত কখন কাবার হয়ে গেছে,  
কারুর সে জ্ঞান নেই।

সকালে মশালচৌ এসে নিভিয়ে দিতে লাগল বাড়লঠনের বাতি-  
গুলো। তখনো দাপটের সঙ্গে গাইছেন মৌজুদিন। আর নবাব  
থেকে কালে খঁ। পর্যন্ত ঠায় বসে তাঁর গান শুনছেন।

ক্রমে বেলা আরো বাড়ল। কিন্তু নিরস্ত হবার কোন লক্ষণ  
দেখালেন না শ্রোতা কিংবা গায়ক।

তখন মৌর্জা সাহেবই উদ্যোগী হয়ে আসর ভঙ্গ করালেন।

একটি গানের শেষে নবাবের অনুমতি নিয়ে বসলেন, 'ভাই  
মৌজুদিন, এবার ব্যাস করো। নবাব এখানেই সারাদিন থাকবেন  
নাকি? নাস্তা গোসল কিছু হবে না? আজ গান এই পর্যন্ত থাক।  
আবার আরেকদিন মহফিল হবে।'.....

মৌজুদিনের নামের সঙ্গে জড়িয়ে আছে এমনি নানা আসরের  
স্মৃতি। তাঁর দুলভ গায়নশক্তি ও কঠমাধুর্যের, আসরের পর আসর  
মাত করবার ও শ্রোতাদের সম্মোহিত করবার বিচিত্র প্রসঙ্গ সব।  
বিভিন্ন জলসার এমনি বিচিত্র শ্রুতি কালের সরণি বেয়ে  
উপনীত হয়েছে।

কাহিনীগুলিতে কিছু অতিরঞ্জন থাকতে পারে হয়তো। উচ্ছাসের খানিক আতিশয্যও সন্তুষ্ট। কিন্তু একেবারে অমূল কিংবা অনুভূত ভাষণ নৈব চ। অজীক নয়, অলিখিত হলেও। মাত্র পঁয়ষট্টি-সন্তুষ্ট বছর আগের ঘটনা। তার শ্রোতৃ পরম্পরায় আজও জীবন্ত। আর সেকাল একালের সেতুস্বরূপ ওয়াকিবহাল কোন কোন বাস্তি বিদ্যমান ছিলেন সাম্প্রতিক কালেও।

কিন্তু এর বিপরীত ব্যাপারও আছে। মৌজুদিনকে নিয়ে প্রত্যক্ষ-দশী রচিত এমন বিবরণ পাওয়া যায় যা হার মানায় গাল-গল্লাকেও। অবাস্তু, ভিত্তিহীন, খুশিমাফিক ধারণা। স্মৃতিচারণার নামে বিসদৃশ অহমিক। আর জল্লনা-কল্লনার একাকার সমাহার। সে প্রসঙ্গও আলোচ্য, মৌজুদিনের তথ্যভিত্তিক জীবনকথার প্রয়োজনে।

‘স্মৃতির অতলে’র লেখক অমিয়নাথ সাহ্যাল বাংলা সাহিত্যে মৌজুদিনকে প্রথম পরিচিত করেন। সাহ্যাল মহাশয়ের সাহিত্যের আসরে প্রবেশ ঘটে ওই গ্রন্থের মাধ্যমে। তাঁর দ্বিতীয় কোন পুস্তকও প্রকাশ পায়নি এই ধরনের বিষয়ে।

যৌবনে তিনি মৌজুদিনের গান নানা আসরে শুনেছেন। গায়কের সঙ্গে বাক্যালাপও করেছেন কয়েকবার। তিনি স্বয়ং সঙ্গীতবিদ। তবু তাঁর বিবৃতিতে মৌজুদিন সম্পর্কে গুরুতর ভ্রমপ্রমাদ রয়েছে। তাদের নিরাকরণ দরকার। কারণ তা সত্যের মর্যাদা লাভ করতে পারে সমসাময়িক বিবরণ-রূপে। পরবর্তীকালের গবেষক তথা পাঠকদেরও বিভ্রান্ত হবার সন্ত্বাবনা।

সেজন্তে অমিয়নাথের তিনটি উক্তি বিশেষভাবে সমালোচ্য :

(১) শ্যামলাল ক্ষেত্রীর জ্বানীতে—‘পরে জানলাম তার বাপ মা আত্মীয় বলতে কেউ নেই। ডালকামগুৰির তয়ফাওয়ালীরা তাকে গান গাইয়ে নেয়, সকালে জিলাপী ও লুচি হালুয়া খেতে দেয়।’ ( স্মৃতির অতলে, পৃঃ ২০ )।

(২) ‘শ্যামলালজী শেষে বললেন, আর মৌজুদিনের সঙ্গেও আলা।’

করে দেখো। সে না জানে রাগ কাকে বলে, না জানে তাল, অথচ রাগ  
ও তালে গান করে। মাত্র একবার শুনেই একটা গোটা গান আয়ত্ত  
করে ফেলে। লজ্জার কথা বাইরে প্রকাশ করব কি! মৌজুদিন রেখাব  
গান্ধার জানে না। ওকে কথনও সারগম করতে শুনবে না।

...‘মৌজুদিন সেবার বাবুজীর বাসায় দিন কুড়ি ছিলেন। সকালে  
বিকালে যখনই স্থবিধা পেয়েছি, এই সরল শিশুর মত ব্যক্তির সঙ্গে  
গল্ল-গুজব করে বুঝতে পারলাম, বাবুজী যা বলেছিলেন তাই ঠিক।  
মৌজুদিন রাগ তাল জানেন না, শিক্ষাও করেননি, সারগমও সাধেননি।  
ঠিক যেমন হাঁসের বাচ্চাকে জলে ছেড়ে দিলে সে আপনি সাঁতার  
কাটে, খেলা করে, মৌজুদিনও সে রকম গান করেন রাগে ও  
তালে।’... ( স্মৃতির অভ্যন্তর, পৃঃ ২২ )।

(৩) ‘বাস্তবিকই মৌজুদিনের বিজাতীয় বিদ্বেষ ছিল অপরিচিত  
বাঙ্গজীদের উপরে। আসরে সকলে এসে জমায়েত হয়েছে, মৌজুদিন  
খাসা এদিক-ওদিক চেয়ে সকলের সঙ্গে গল্ল করছেন। এমন সময়  
একজন বাঙ্গজী এসে বসলেন। মৌজুদিন অমনি তার দিকে পিছন  
ফিরে ঘুরে বসলেন। কথা বলা দূরের কথা, তার দিকে তাকাতেনই  
না। এর সামান্য ব্যক্তিক্রম ছিল গহর ও মাল্কা বাঙ্গ যুগলের পক্ষে।  
কারণ এঁরা ছিলেন ভাইয়া সাহেব ও শ্বামলালজীর অনুগৃহীত। কিন্তু  
অদৃষ্টের এমনি পরিহাস যে সাদা চোখে যে প্রকৃতিকে তিনি অবজ্ঞা  
করতেন রাঙ্গা চোখে তিনি আত্মবিশ্বত হয়ে সেই প্রকৃতির হয়েছিলেন  
অসহায় ক্রীড়নক।’.... ( ঐ, পৃঃ ২৩-২৪ )।

প্রতিভাধর খেয়াল, টপ্পা, ঠুংরি-শিল্পী জগদীপ মিশ্রের কথাও  
সান্তাল মহাশয় উল্লেখ করেছেন মৌজুদিনের প্রতিষ্ঠানীরূপে। কিন্তু  
তার জগদীপ মিশ্র-মৌজুদিনের সেই যুক্ত প্রসঙ্গেও ব্রাহ্ম বিবৃতি ও  
বিভ্রান্তিকর মন্তব্য প্রকাশ পেয়েছে। কিন্তু জগদীপ যে মৌজুদিনের  
চেয়ে মহত্তর গায়ক ও বৃহত্তর প্রতিভা ছিলেন, শেষ দুলীচাঁদের দমদম  
গৃহের আসরে মৌজুদিন যে জগদীপের সামনে অবতীর্ণ না হয়েই

আসৱ থেকে পলায়ন করেছিলেন, কলকাতায় পেশাদার জীবনে জগদীপকে যে তিনি কণ্টকস্বরূপ মনে করেছিলেন এবং জগদীপ কলকাতায় অবস্থান করলে তিনি এখান থেকে বিদায় নিতে বাধ্য হবেন একথা জানিয়েছিলেন শ্যামলাল ক্ষেত্ৰী প্ৰমুখ প্ৰতিপত্তিশালী গোষ্ঠীকে, তাৰপৰ শ্যামলাল ক্ষেত্ৰী, গণপৎ রাও প্ৰভৃতিৰ চক্ৰান্তে শাস্তিপ্ৰিয় নিৰ্দল জগদীপ মিশ্ৰকে কলকাতাৰ সঙ্গীত জগৎ থেকে চিৰবিদায় নিয়ে নেপালে চলে যেতে হয়—ইতাদি ঘটনাবলী বৰ্তমান লেখকেৰ ‘আসৱেৱ গল্প’ পুস্তকেৰ সঙ্গীতেৰ দীপশিখা ( পৃঃ ১৬১-১৭৮ ) অধ্যায়ে বৰ্ণনা কৱা হয়েছে। পুনৰুন্নেখ নিষ্পত্যোজন। এখানে শুধু উন্নত তিনটি প্ৰসঙ্গ পৰ্যালোচনা কৱা হবে। সেই শুত্ৰে পাওয়া যাবে মৌজুদিনেৰ ব্যক্তিজীবন তথা সঙ্গীত-জীবনেৰ সত্য পৱিচয়ও।

এখন, ‘শুত্ৰি অতলে’ লেখকেৰ মৌজুদিন সম্পর্কে উল্লিখিত বিবৃতিগুলিৰ কথা।

(১) সান্তাল মহাশয় মৌজুদিনকে এক অনাথ বেওয়ারিশ বালকৰূপে বৰ্ণনা কৱেছেন—কাশীৰ ডালকমিণিৰ তয়ফাওয়ালীদেৱ ভিক্ষান্নে যাব দিন গুজৱান হত।

কিন্তু মৌজুদিনেৰ প্ৰকৃত পূৰ্ববৃত্তান্ত এই :—

কাশীৰ চৌকেৰ পিছনে ছাতাতলা নামে এক পল্লী আছে। সেখানকাৰ এক বাসিন্দা ছিলেন ক্রপদ ও খেয়াল গায়ক গোলাম হোসেন। তিনি বাৱাগসী নিবাসী হলেও এখানে তাঁৰ জন্ম কিংবা প্ৰথম জীবন অতিবাহিত হয়নি। পাঞ্জাবেৰ তিলমণ্ডী নামক স্থানেৰ অধিবাসী ছিলেন গোলাম হোসেন। সেখান থেকে কাশীতে বাস কৱতে আসেন। তাঁৰ দুই পুত্ৰ ও দুই কন্যাৰ জন্ম হয় বাৱাগসীতে। সেই জ্যোষ্ঠ পুত্ৰেৰ নাম মৌজুদিন। কনিষ্ঠ রহিমুদ্দিন।

গোলাম হোসেনেৰ বিবি অৰ্থাৎ মৌজুদিনেৰ জননী গায়িকা না হলেও সঙ্গীতে যথেষ্ট অভিজ্ঞা ছিলেন। স্বামী পেশাদার গায়ক বলে

বাড়িতে ছিল সঙ্গীতের রৌতিমত পরিবেশ। গৃহে নানা গায়কবাদক-দের আসা-যাওয়া ও গানের অনুষ্ঠান, গোলাম হোসেনের নিয়মিত সঙ্গীতচর্চা, সঙ্গীতবৃত্তিধারী আজীয়স্বজন—এ সবের সামগ্রিক প্রভাবে এবং স্বভাবের প্রবণতায় মৌজুদিনের মাতারও সঙ্গীতজ্ঞান ও সঙ্গীত-সংগ্রহ ভালই হয়েছিল। আরো জানা যায় যে, গোলাম হোসেনের বিবির কঠস্ত ছিল নানা গানের বন্দিশ ও চীজ। ঝুপদের চেয়ে বেশী খেয়াল তাঁর সঙ্গীত ভাণ্ডারে জমা হয়।

গোলাম হোসেনের আদি নিবাস ছিল পাঞ্জাবের যে অংশে সেই তিলমণ্ডী বিখ্যাত ছিল ঝুপদ চর্চার একটি উচ্চ মানের কেন্দ্রস্থলে। তিলমণ্ডী ঘরানা যে জন্যে সুপরিচিত। উনিশ শতকের দ্বিতীয়ার্ধে কলকাতায় আগত স্বনামধন্য ঝুপদী মূরাদ আলী থাও তিলমণ্ডী ঘরানারদার বলে কথিত আছেন। মূরাদ আলী সুদীর্ঘকাল কলকাতায় অবস্থান করেন, তাঁর মৃত্যুও হয় এখানে। তাঁর বাঙালী শিষ্যদের মধ্যে যদুনাথ রায়, অঘোরনাথ চক্ৰবৰ্তী, কিশোরীলাল মুখোপাধ্যায় (বিপ্লবী যাতুগোপাল ও আমেরিকা-প্রবাসী লেখক ধনগোপালের পিতা), আশুতোষ রায়, প্রমথনাথ বন্দ্যোপাধ্যায়, অবিনাশ ঘোষ প্রভৃতির নাম উল্লেখ্য।

সেই তিলমণ্ডী ঘরানার ঝুপদ-ঐতিহ্য মৌজুদিনের পিতা গোলাম হোসেনও অনুসরণ করেছিলেন কিনা তা অবশ্য জানা যায় না। কিন্তু তিনি সঙ্গীত-ব্যবসায়ী হিসাবে একান্ত সঙ্গীতসেবী ছিলেন বলে প্রকাশ। ঝুপদ ও খেয়াল-গায়ক পিতার দৃষ্টান্তের সামনে, সঙ্গীতচর্চার সেই অন্তরঙ্গ আবহে বাল্যকাল থেকেই মৌজুদিনের গীত-শক্তি মুকুলিত হয়। পেশাদার গায়ক গোলাম হোসেন জ্যেষ্ঠ পুত্রকে রৌতিমত সঙ্গীতশিক্ষা দিতে থাকেন অন্ত বয়স থেকে। যেমন বিধিবন্ধু পদ্মত্বিতে স্বর-সাধনা বা কঠসাধনা উচ্চশ্রেণীর গায়ক হবার জন্যে অবশ্য প্রয়োজন, সঙ্গীতহৃণী পিতা বালক মৌজুদিনকে সেইভাবেই প্রস্তুত করতে জাগলেন। পেশাদার গায়কের ঘরে এমনিই দন্তর।

বাল্যকালেই বিদ্যাশিক্ষার মতন গুরুত্ব দিয়ে সঙ্গীতশিক্ষা দেওয়া হয়ে থাকে এবং মৌজুদিনও তার ব্যতিক্রম নন।

প্রায় শিশুকাল থেকে গোলাম হোসেনের কাছে মৌজুদিনের সঙ্গীতশিক্ষা অগ্রসর হয়েছিল। তারপর দুর্ভাগ্যক্রমে তাঁর চোদ্ধ-পনের বছর বয়সে পিতৃবিয়োগ ঘটে। কিন্তু তা সত্ত্বেও তাঁর সঙ্গীতশিক্ষায় বিরতি দেখা দেয়নি, জননীর প্রথম ত্বাবধানের জন্মে। স্বামীহারার পারিবারিক আশা-ভরসার স্থল মৌজুদিন পেশাদার গায়ক হবেন, সংসার স্থিতিলাভ করবে, এই ছিল তাঁর আশা।— স্বাভাবিকভাবেই এই উদ্দেশ্যে গোলাম হোসেনের বিবি পুত্রের সঙ্গীতচর্চার দিকে তীক্ষ্ণ দৃষ্টি রাখেন। বিশেষত মৌজুদিন বালক বয়সেই হন অতি শুক্ষ্ম গায়ক এবং প্রতিশ্রুতিসম্পন্ন। ভবিষ্যতের আশা, জ্যৈষ্ঠ পুত্রের নিয়মিত রিয়াজ শুধু জননী দেখতেন না। আপন সংগ্রহ থেকে নানা চৌজ দিয়েও সহায়তা করতেন মৌজুদিনের সঙ্গীত অনুশীলনকে।

গোলাম হোসেনের সুগায়ক বলে বারাণসীতে নাম ডাক কিছু ছিল। উপার্জনও এক প্রকার হত সেকালের হিসাবে। তাঁর মৃত্যুতে পরিবারটি বিপদগ্রস্ত হল বটে। কিন্তু একেবারে ভেসে গেল না কর্তৃর তৎপরতার জন্মে।

মৌজুদিন, রহিমুদ্দিন ও দুই ভগিনী জননীর পক্ষপুঁটি বড় হতে লাগলেন। অনটেনের মধ্যে দিন কাটলেও তাঁরা গৃহবাসী। গৃহস্থ-সুলভ তাঁদের সংসারযাত্রা। মৌজুদিনকে ভিক্ষুক বালক বলা সত্যের নিতান্ত অপলাপ। তয়ফাওয়ালীদের তাঁকে আহার্য দান করার কথা ও তেমনি অলৌক।

শিক্ষক পিতার অবর্তমানে মৌজুদিনের ক্ষতি হয়েছিল। কিন্তু নিয়মিত সঙ্গীতাভ্যাসে ছেদ পড়েনি। তাঁর রিয়াজ বন্ধ হতে দেননি তাঁর জননী। বালক বয়সে তয়ফাওয়ালীদের সঙ্গে মৌজুদিনের সংস্রবও অসম্ভব।

সঙ্গীতজ্ঞ পরিবারের কর্তৃ কর্তৃর জীবনসংগ্রামের মধ্যে দিয়ে  
বড় করতে লাগলেন প্রতিভাবান মৌজুদিনকে। জননী জ্যোষ্ঠ পুত্রের  
সঙ্গীত-শিক্ষায় কোনদিন টিলা পড়তে দেননি। শুধু তত্ত্বাবধান নয়।  
পিতার দৃষ্টান্ত দিয়ে, প্রেরণা দিয়ে, সহযোগিতা দিয়ে ভবিষ্যৎ গায়ক-  
জীবনের জন্যে প্রস্তুত করে তুলতে লাগলেন মৌজুদিনকে। গোলাম  
হোসেনের শিক্ষাধারাকে পুত্রের জীবনে অগ্রগতির পথে যাত্রা করিয়ে  
দিলেন।

মৌজুদিনের রৌতিমত শিক্ষার ভিত্তি রচিত হয় আপন ঘরেই।  
পেশাদার পিতার তালিমে পদ্ধতিগত আদর্শে বীজ রোপিত হয়।  
জল-সিঞ্চনে জননী লালন-পালন করেন সেই পেলব সঙ্গীতলতিকাকে।  
কিন্তু সঙ্গীত-শিক্ষার শেষ কথা সেখানেই হতে পারে না। ঘোবন-  
কালে মৌজুদিন অবশ্যই সঞ্চয় করেন বৃহত্তর সঙ্গীতক্ষেত্রের আরো  
নানা স্থূত্রে। গণপৎ রাণ্ডয়ের কাছে লাভ করারও উপযুক্ত সেসব।  
আত বিচিত্র, অলঙ্ক্ষ্যচারী শিল্পী-প্রাণের সংবেদনশীল সেইসব সংগ্রহ,  
সমীকরণ, আভ্যন্তরণের নিগৃত প্রক্রিয়া।

মৌজুদিনের তরুণ উদীয়মান কালে বারাণসীর আকাশে বাতাসে  
সঙ্গীত ভাসমান থাকত। খেয়াল, ঠুংরির কত চিত্রঞ্জিনী রস-সঞ্চারী  
মনোহারী সব রূপ। মৌজুদিনের শুগঠিত সঙ্গীত-কঢ়ে শিল্প-মানস-  
পটে শুবর্ণ রেখায় সেসব স্বরধ্বনি মুদ্রিত হতে লাগল। মধুকঠ  
গায়ক উজ্জীবিত হতে লাগলেন নব নব সংগীতের উন্মেষে। প্রাণবন্ত  
ঠুংরিও তার নবীন প্রাণে অপরূপ ঐশ্বর্য মাধুর্যে ধরা দিতে লাগল।  
আবার খেয়াল গানের তান বিস্তার লীলাও।

বারাণসী তখনো রাগসঙ্গীতের এক মহা পীঠস্থান। নানা গুণীর  
সমাগমে ধৃত। কাশীতে মৌজুদিনের শিক্ষা-সংগ্রহের সব তথ্য  
পাওয়া যায় না। কাল-পর্বের হিসাব-নিকাশও জানা যায়নি  
নিশ্চিতভাবে। কিন্তু বারাণসীতেই মৌজুদিন একাধিক দিকপাল  
কলাবত্তের সান্নিধ্য লাভ করেন ও উপরুক্ত হন।

তাঁর পরবর্তী জাবনের সঙ্গীত-গুরু গণপৎ রাওয়ের সঙ্গে যোগাযোগের আগে এবং পরেও তখন লক্ষ্মীর খেয়াল ও টপ্পা গুণী বড়ে দুনি থাঁ কাশীতে ছিলেন একসময়। তখন তরুণ মৌজুদিন তাঁর কাছে কিছু লাভ করেন। তা ছাড়া, গোয়ালিয়রের হন্দু থাঁর যোগ্য পুত্র অধিতীয় খেয়াল-গায়ক রহমৎ থাঁর কথাও উল্লেখ্য। তিনি মস্তিষ্করোগী হয়ে বারাণসীতে থাকেন প্রায় এক বছর। তাঁর কাছেও অনেক সংক্ষয় করেন মৌজুদিন। তাঁর পারিবারিক সূত্রে জানা যায়, রহমৎ থাঁ বেশ কিছুকাল মৌজুদিনের ছাতাতলার ডেরায়ও আস্তানা নিয়েছিলেন।

মৌজুদিনের সঙ্গে শ্যামলাল ক্ষেত্রী ও গণপৎ রাওয়ের প্রথম যোগাযোগের বিবরণ বারাণসীতে এইভাবে পাওয়া যায়—

একদিন বিকালবেলা। কাশীর গঙ্গার ধারে বসে মৌজুদিন গান গাইছিলেন আপন মনে। অন্য দিনও এমনি গাইতেন। আর গানের পরে গোটাকতক ডনবৈষ্ঠক দিতেন। তারপর গঙ্গায় স্নান করে, ফিরে আসতেন ঘরে। চৌকের পিছনে ছাতাতলার সেই বাড়িতে।

সেদিন দশাশ্঵মেধ ঘাটের একটি পাশে তখন বসেছিলেন মৌজুদিন। আর মনের আনন্দে এই ঠুংরিটি ধরেছিলেন—

অব হারি ননদীয়া

পান খায়ে মুখ জোব কিয়ো।

রঙ ঠুঁয়ে যেইসা কেসরকা।...

গণপৎ রাওয়ের প্রিয় শিষ্য ও সেবক শ্যামলাল ক্ষেত্রী তখন কাছেই কোথাও ছিলেন। তিনি আকৃষ্ট হলেন অতি স্বকংগ্রে ওই গান শুনে।

দশাশ্঵মেধ ঘাটে এসে শ্যামলাল ভাল করে মৌজুদিনের গান শুনতে লাগলেন। আর গান শেষ হতেই আলাপ করলেন তাঁর সঙ্গে। মৌজুদিনের প্রতিভা তিনি ঠিক বুঝেছিলেন। তাঁর এত

তরুণ বয়স দেখে, গুরুজী অর্থাৎ গণপৎ রাণ্যের কাছে নিয়ে যাবার কথাও ভাবলেন ক্ষেত্রীজী। এমন আধাৰেৱ আৱো শিক্ষা সংগ্ৰহ দৰকাৰ। এমন গ্ৰহীতা দেখলে গণপৎ রাও যে অকৃপণ দান কৱবেন সে বিষয়েও নিঃসন্দেহ শ্যামলাল।

কিশোৱ গায়ককে তিনি আহ্বান কৱে নিয়ে গেলেন। ভাইয়া সাহেব ( এই নামেই গণপৎ রাও সঙ্গীত সমাজে সুপৱিচিত ) তাঁৰ সঙ্গেই থাকতেন একত্র। সেখানে শ্যামলাল এবং তাঁৰ গুরুজী মৌজুদিনেৱ সঙ্গে পৱিচিত হলেন ভালভাবে। তাঁৰা মৌজুদিনকে জিজ্ঞাসাবাদ কৱে তাঁৰ সঙ্গীতচৰ্চা ও বাড়িৰ কথা সমস্তই জেনে নিলেন। সেদিনই মৌজুদিনেৱ সঙ্গে গিয়ে শ্যামলালজী সাক্ষাৎ কৱলেন তাঁৰ জননীৰ সঙ্গে। নিজেৰ এবং গুৰু গণপৎ রাণ্যেৱ পৱিচয় তাঁকে জানালেন।

তাৰপৰ মৌজুদিনেৱ অভিভাৱিকাৰ কাছে শ্যামলাল ক্ষেত্ৰী এই ধৰনেৱ প্ৰস্তাৱ কৱেন—মৌজুদিনকে তাঁৰ ও গণপৎ রাণ্যেৱ সঙ্গে রাখবেন। তাঁকে আৱো সঙ্গীতশিক্ষা দেবেন; যেখানে যাবেন সেখানেই সঙ্গে নেবেন সয়ত্বে। আৱ মৌজুদিনেৱ যেন মাহিনা স্বৰূপ তাঁৰ জননীকে মাসিক কিছু টাকা দেবেন। দু-চাৰ দিনেৱ মধ্যেই তাঁৰা কাশী থেকে যাত্ৰা কৱবেন মৌজুদিনকে সঙ্গে নিয়ে।

শ্যামলাল ক্ষেত্ৰী ও গণপৎ রাণ্যেৱ সমন্বেগ থবৰ নিলেন মৌজুদিনেৱ মা। তাৰপৰ নিশ্চিন্ত হয়ে তাঁদেৱ সম্মতি দিলেন।

এমনিভাৱে ওস্তাদ গণপৎ রাও-এৰ শিশুমণ্ডলীভুক্ত হলেন মৌজুদিন। আৱ নব নব শিক্ষায়, অভিজ্ঞতায় তাঁৰ সঙ্গীত-জীবনেৱ পুষ্পিত পৰ্যায় আৱস্থা হল। আচাৰ্য-স্থানীয় গুণী ভাইয়া সাহেবেৱ বিশেষ আকৰ্ষণ ছিল ঠুংৰিতে। অবশ্যই ঝৰ্পদ খেয়ালেও তিনি রীতিমত অধিকাৰী ছিলেন। কিন্তু আসৱে ঠুংৰি অঙ্গে বাজাতেন হারমোনিয়ম। ঠুংৰিতে একটি চালেৱ ( লচা ও ঠুংৰি ) ধাৰা-প্ৰবৰ্তক রূপে কথিত আছেন তিনি। মৌজুদিনও তাঁৰ প্ৰভাৱে ঠুংৰি গায়ক

হিসাবেই বেশী জনপ্রিয় হয়ে ওঠেন। তাঁর গানের সঙ্গে কলকাতা  
ও অগ্ন্যান্ত আসরে হারমোনিয়ম সঙ্গত করেছেন গণপৎ রাও। তাঁর  
শ্যামলাল, বশির, ইরসাদ, গোফুর প্রভৃতিদের নিয়ে গঠিত শিয়া-  
গোষ্ঠীর মধ্যমণি হয়ে থাকেন মৌজুদিন।

গণপৎ রাওয়ের সে যাত্রায় তিনি কাশী থেকে উস্তাদের সঙ্গী  
হলেন।

গণপৎ রাও নানা সঙ্গীতকেন্দ্রে যোগ দিতেন, অবস্থান করতেন  
কিছুদিন। সেবারও শ্যামলাল ক্ষেত্রী এবং মৌজুদিনকে নিয়ে  
ত্যাগ করলেন বারাণসী। অন্তর কিছুদিন থেকে সদলে কলকাতায়  
উপস্থিত হলেন।

মৌজুদিনের বয়স তখন বিশ বছরের কিছু কম।

সঙ্গীতে মহা পত্তি এবং ঠুঁঁরির এক নেতৃস্থানীয় গুণী গণপৎ  
রাও। তাঁর সঙ্গলাভে মৌজুদিন তারপর থেকে অনেক শিক্ষার  
সুযোগ পান। তাঁর প্রতিভা গণপৎ রাওয়ের সাহচর্যে দীপ্ত হয়ে  
ওঠে নতুন প্রভায়।

সঙ্গীতসমাজে সম্মানিত ভাইয়া সাহেব নানা সঙ্গীতকেন্দ্রে  
বিশেষ কলকাতায় মৌজুদিনকে ক্ষেত্র করে দিলেন। আসরে স্বয়ং  
হারমোনিয়ম নিয়ে সঙ্গত করতে লাগলেন মৌজুদিনের গানের সঙ্গে।  
মৌজুদিনের গান এবং ভাইয়া সাহেবের হারমোনিয়ম-বাদন আসরে  
আসরে পরিপূরক হয়ে উঠল। কলকাতায় শেষ ছলীচাঁদ প্রমুখ  
মুক্তহস্ত সঙ্গীতপ্রেমীর আনুকূল্য লাভ করালেন মৌজুদিনকে।

কলকাতাই হল মৌজুদিনের প্রতিভার প্রধান বিচরণ-ক্ষেত্র।  
তাঁর পেশাদার সঙ্গীতজীবনের শ্রেষ্ঠ কর্মক্ষেত্রও। কলকাতা সে  
সময়—বিশ শতকের প্রথম ভাগে—ঠুঁঁরি গানের চর্চা ও কদরদানের  
জগ্যে মহা অনুকূল জগৎ ছিল। দাক্ষিণ্য প্রকাশ করে ঠুঁঁরি  
গুণীদের সমাদরের এমন স্থান তখন বেশী ছিল না উত্তর ভারতে।

তারপর থেকে মৌজুদিন বেশির ভাগ কলকাতাতেই অবস্থান

করতেন। কাশীতে যেতেন খুব কম। কনিষ্ঠ রহিমুদ্দিনকেও নিয়ে আসেন কলকাতায়। তাকেও ঠুংরি গায়ক হিসেবে এই শহরে প্রতিষ্ঠিত করে দেন। এখানকার সঙ্গীতক্ষেত্রে দীর্ঘকাল একজন হয়ে থাকেন রহিমুদ্দিন। তার মৃত্যুও হয় কলকাতায়। সে অনেক পরের কথা।

মৌজুদিনের নিজের পেশাদার সঙ্গীত-জীবনও আরম্ভ হল এই শহরে। তার একমাত্র প্রতিদ্বন্দ্বী জগদীপ মিশ্রকে শ্যামলাল ক্ষেত্রীরা কলকাতার ফলন্ত সঙ্গীতক্ষেত্র থেকে আশ্রয়চূড় করে দেন। আর প্রতিভার অনুকূল নিরঙ্গুশ পরিবেশ লাভ করেন কাশীর মধুকর্ণ গায়ক মৌজুদিন।

ঙ্গপদ খেয়াল গায়ক গোলাম হোসেনের পুত্র যে বারাণসীর এক ভিক্ষুক বালক ('তার বাপ মা আত্মীয় বলতে কেউ নেই') এবং অশিক্ষিত-পটু গায়ক ছিলেন না। অমিয়নাথ সাঙ্গালের এই ছটি বিবৃতিই অবাস্তব এবং বিভ্রান্তিকর। সেই কথার স্ফূর্তে মৌজুদিনের ব্যক্তি—তথা সঙ্গীতজীবনেরও একটি রূপরেখা দেওয়া হল। এ বিবরণের মধ্যে কোন কল্প-কুহেলি নেই। আষাঢ়ে গল্প বর্জিত এবং বংশীয় ওয়াকিবহাল স্ফূর্তে সমর্থিত মৌজুদিনের এই পারিবারিক সাঙ্গীতিক পটভূমিকা। গঙ্গার ঘাটে মৌজুদিনের গান শুনে শ্যামলাল ক্ষেত্রীর সঙ্গে তার প্রথম যোগাযোগের কথা মৌজুদিন-জননী তার কোন আত্মীয়কে ওইভাবে বিবৃত করেছিলেন। মৌজুদিনের সঙ্গীতজীবন গঠনে তার পিতা-মাতার দান ও ভূমিকা অন্তর্লেখ রাখা ও গুরুতর ত্রুটি। তথ্যভিত্তিক প্রতিবেদনের পক্ষে এই বৃত্তান্ত বিশেষ প্রয়োজনীয় বিবেচনায় প্রকাশ করা হল, অহেতুক বাদামুবাদের উদ্দেশ্যে নয়।

(২) 'স্মৃতির অতলে'র দ্বিতীয় উন্নতির বিষয়টি আরো অন্তুত, অবিশ্বাস্য এবং অর্যাক্রিক। মৌজুদিন রাগ তাল কাকে বলে জানে না, শিক্ষাও করেনি, সারগম সাধেনি, রেখাব গান্ধার জানে

না—এইসব দায়িত্ববোধহীন কাণ্ডজ্ঞানবর্জিত উক্তি প্রতিবাদেরও অযোগ্য। কিন্তু এ প্রসঙ্গে আলোচনা করতে হল, সান্ত্বাল মহাশয়ের মন্তব্য বলে। সমালোচনা না হলে তাঁর ওই মতামতগুলি সত্য হিসেবে প্রতিষ্ঠিত থাকত। সঙ্গীত সম্পর্কে কিছুমাত্র ধারণা যাঁর আছে ওই ধরনের মন্তব্যের অসারতা তিনি উপলব্ধি করবেন।

দীর্ঘকালের সচেতন স্বর-সাধনা, রাগ ও তালের পদ্ধতিগত শিক্ষা চান্দি ভিন্ন রাগ সঙ্গীত, বিশেষ খেয়াল গান যে অসন্তুষ্ট—এই ক্ষেত্রে সত্যের বিস্তারিত সমর্থন নিষ্পত্তিযোজন। ওয়াকিবহাল মহলে সান্ত্বাল মহাশয়ের ওই উক্তি উন্নত ও হাস্তরসের উপাদান যোগাবে মাত্র। কিন্তু সাহিত্যজগতে এমনি মজাদার চটকদার কথা আশ্চর্য সত্য বলে গৃহীত হতে পারে। কারণ সাহিত্য-পাঠকরা এবং লেখকরা সচরাচর রাগ-সঙ্গীত কিংবা তার ব্যাকরণাদি বিষয়ে অনবহিত। স্বতরাং অলৌকিক বিবরণে আকৃষ্ট হয়ে পড়েন। এক্ষেত্রেও হয়েছে তাই।

জনপ্রতিষ্ঠ এবং বহুমুখী শক্তিধর সাহিত্যিক শ্রীহেমেন্দ্রকুমার রায়ও পরিণত বয়সে মৌজুদিনের ওই কাহিনী পাঠ করে লিখেছিলেন, ‘...শ্রীঅমিয়নাথ সান্ত্বাল এক আশ্চর্য গায়কের গল্প বলেছেন। তাঁর নাম মৌজুদিন। তিনি কোনদিন সাৱে গা মা সাধেননি, রেখাৰ গান্ধাৰ জানতেন না, রাগ-রাগিণী চিনতেন না, কোন্টা কি তাল তাও বুৰতেন না। অথচ বড় বড় ওস্তাদদের সঙ্গে বসে তিনি একেবারে নিভুলভাবে উচ্চ শ্রেণীৰ যে কোন কালোয়াতী গান গেয়ে বৈঠক মাং করে দিতে পারতেন। ভাৱতবিখ্যাত ওস্তাদৱাও তাঁৰ সামনে গান গাইতে নারাজ হতেন। কারণ দীর্ঘকালব্যাপী কঠিন সাধনার পৰ যে সব গান তাঁৰা আয়ত্তে আনতে পেৱেছেন, সে সব একবার মাত্র শুনেই মৌজুদিন তৎক্ষণাৎ শিখে ফেলতেন এবং নিজেই আবাৰ গেয়ে সকলকে বিশ্বয়ে হতত্ত্ব করে দিতেন। মৌজুদিন এখন পৱলোকে। তাঁৰ গান আমিও শুনেছি বটে, কিন্তু

তাঁর এই অলৌকিক শক্তির কথা জানতুম না। অমিয়বাবুর মত বিশেষজ্ঞের মুখে না শুনলে একথা আমি বিশ্বাসের অযোগ্য বলেই মনে করতুম।’ ( যাঁদের দেখেছি, দ্বিতীয় পর্ব, পৃঃ ৯ )। হেমেন্দ্রকুমার প্রথমে ওই যে লিখেছেন, ‘শ্রীঅমিয়নাথ সান্তাল এক...গন্ধ বলেছেন।’ আসল কথা অতর্কিতে এসে গেছে ওইখানে। এ-সব নিতান্তই ‘গন্ধ’।

এই অঙ্গুত অশিক্ষিতপটুত্ব মৌজুদিনের বাস্তব জীবনকথা নয়। ‘হাঁসের বাচ্চাকে জলে ছেড়ে দিলে সে আপনি সাঁতার কাটে, খেলা করে’ বটে। কিন্তু তেমনভাবে প্রথম শ্রেণীর খেয়াল-গায়ক হওয়া যায় না। মৌজুদিনও হাঁসের বাচ্চার মতন অঙ্গেশ, অশিক্ষায় গায়ক হয়ে ওঠেননি। বারাণসীর সেকালের সঙ্গীতসমাজে সকলেই জানতেন এই সত্তা। মৌজুদিনের গান শুনেছেন, তাঁকে বিলক্ষণ অবগত আছেন এমন একাধিক গুণী কাশীতে এখনো বিদ্যমান। যেমন, ওস্তাদ বেচু মিশ্রের বংশীয় খেয়াল-টপ্পা গায়ক, অশীতিপর রামু মিশ্র। তাঁরও দ্বিতীয় উক্তি : ‘যেমন পদ্ধতিগত-ভাবে বছরের পর বছর খেয়াল গায়করা শেখেন, তেমনিভাবে মৌজুদিনও শিখেছিলেন—’ সম্পূর্ণ নির্ভরযোগ্য, কারণ নিরপেক্ষ। বাল্যকাল থেকে দ্রুপদ খেয়াল গায়ক পিতার শিক্ষাধীনে স্বর-সাধনা ও দস্তরমত সঙ্গীতচর্চা করেই খেয়াল ঠুঁঠি দাদুরা গায়ক হয়েছিলেন মৌজুদিন। হাঁসের বাচ্চার উপমা এক্ষেত্রে নিতান্ত অর্থহীন, অবাস্তুর, অযথার্থ !

হেমেন্দ্রকুমারের আরেকটি বাক্যও বর্তনান প্রতিবাদের প্রেরণা দিয়েছে। ‘অমিয়বাবুর মত বিশেষজ্ঞের মুখে’ না শুনলে অনেকেই মৌজুদিনের ওইসব ‘অলৌকিক শক্তির কথা’ বিশ্বাসের অযোগ্য বিবেচনা করবেন, এই আশঙ্কায় প্রসঙ্গটি করা হয়েছে, জীবনী-লেখকের কর্তব্য ও দায়িত্ববোধে। সান্তাল মহাশয়ের প্রতি ব্যক্তিগত বিস্রূতির বশে নয়। মনে হয়, তিনি প্রিয় গায়ক

সম্পর্কে ‘বীরপূজা’র বাগাড়স্বর করে ফেলেছেন ভাবের উচ্ছাসে। অমিয়নাথের ‘কালে থাঁ’ অধ্যায়েরও (একই পৃষ্ঠকে) একাধিক বিবরণের অসারতা প্রদর্শন করতে হয়েছে ‘কালে থাঁ’ বনাম এমদাদ থাঁ’ নিবন্ধে (সঙ্গীতের আসরে, পৃঃ ৯৯-১১৯)।

(৩) তৃতীয় উন্নতির বিষয়টিও কম উন্ট নয়। বাস্তবিকই মৌজুদিনের ‘বিজাতীয় বিদ্বেষ ছিল অপরিচিত বাঙ্গজীদের ওপর’ ‘সাদা চোখে যে প্রকৃতিকে তিনি অবজ্ঞা করতেন’ ইত্যাদি বিবৃতির সঙ্গেও বাস্তব সত্ত্বের সম্পর্ক কোথায়?

মৌজুদিনের সমগ্র পেশাদার সঙ্গীত-জীবনেই বাঙ্গজীদের সঙ্গে ঘনিষ্ঠ সংস্রব ছিল। এমন কি সত্ত্বের খাতিরে স্বীকার্য, ওয়াকিবহাল মহলের অতিস্থানিতে তাঁকে পাঞ্চয়া যায় এই শ্রেণীর রমণীদের সঙ্গকামী রূপেই। মাসের পর মাস, বছরের পর বছর তিনি নানা বাঙ্গজীকে তালিম দিয়েছেন তাঁদের ঘরে বসে। ‘বিজাতীয় বিদ্বেষ’ কিংবা ‘সাদা চোখে অবজ্ঞা’ কিছুই প্রকাশ পায়নি তাঁর বাঙ্গজীদের সঙ্গে সুদীর্ঘ সময়ের মেলামেশায়। কিংবা শিক্ষাদান কালের সাঙ্গীতিক যোগাযোগ ও আদান-প্রদানের বেলায়। মৌজুদিন অন্তত কুড়ি বছর কলকাতায় সঙ্গীতজীবন যাপন করেন। সে সময়ের মধ্যে তালিম দেন আগ্রাওয়ালী মাল্কা জানকে, জদুন বাঙ্গিকে, চুলবুলাওয়ালী মাল্কাকে, আসমৎ বাঙ্গ ও চন্দা বাঙ্গ (রোশেনাৱাৰ জননী) ভগীৰুয়কে।

উল্লিখিত বাঙ্গজীরা বেশী পরিচিত ও প্রসিদ্ধি ছিলেন। কিন্তু তাঁরা ভিন্ন আৱো বাঙ্গজী মৌজুদিনের কাছে নানা সময়ে কলকাতাতেই ঠুংৰি দাদুৱা শেখেন যাঁদের নাম জানা যায়নি তাঁদের খ্যাতির অভাবে।

তাছাড়া, কলকাতা থেকে অল্পকালের জন্যে মাঝে মাঝে বারাণসীতে মৌজুদিন বাস করে আসতেন। তাৱই মধ্যে তালিম দিতেন বড়ী মতী বাঙ্গিকে বিশেষ করে। তা ভিন্ন

মানুকী বাঙ্গি প্রভৃতি আরো কজন বাঙ্গিজীকেও তিনি কাশীতে  
শিখিয়েছেন।

এত বাঙ্গিজীকে মৌজুদিনের এতকাল যাবৎ তালিম দেওয়া  
অসম্ভব হত তাদের প্রতি 'বিজাতীয় বিদ্বেষ' বা 'সাদা চোখে অবজ্ঞা'  
থাকলে - একথা বোঝা আদো কঠিন নয়।

কথা যখন উঠেছে, প্রসঙ্গত আরো একটি বিষয় এখনে ঘোগ  
করা যায়। মৌজুদিনের বিবাহিতা বিবি থাকতেন কাশীতে।  
সেখানে তাঁরা নিঃসন্তান। কিন্তু কলকাতায় মৌজুদিনের আর এক  
জীবনসঙ্গী বাস করতেন এবং তাদের এক পুত্রের কথা জানা  
যায়। মৌজুদিনের সেই আঘাত এখনো কলকাতায় বর্তমান। তাঁর  
বয়স এখন প্রায় পঞ্চাশ বছর। মৌজুদিনের উত্তরাধিকার তাঁর শপর  
কিছু বর্তেছে। কারণ তিনি ভাল হারমোনিয়ম-বাদক।  
হারমোনিয়মে ঠুঁঁরি অঙ্গ বাজাবার দিকেই তাঁর স্বাভাবিক প্রবণতা।  
তাঁর কাছে জানা যায় যে তাঁর সাত বছর বয়সে মৌজুদিনের মৃত্যু  
হয়। মৌজুদিনের এই পুত্র কাশীতেও ছিলেন কিছুকাল। মৌজুদিন  
জননীর আদর যত্নেও পেয়েছিলেন।

নানা সূত্রে যতদূর বোঝা যায়, ১৯২৮-২৯ সালে ষবনিকা পতন  
ঘটে মৌজুদিনের সঙ্গীতজীবনে। মৃত্যুকালে তাঁর বয়স চলিশ পার  
হয়েছিল। কিন্তু পঁয়তালিশ উত্তীর্ণ কিনা সন্দেহ। সেই হিসাবে  
তাঁর অকাল-মৃত্যু বলা যায় হয়ত। কারণ গৌরবণ্ণ সুপুরুষ মৌজুদিন  
বেশ স্বাস্থ্যবানও ছিলেন। ছেলেবেলা থেকে স্বাস্থ্যচর্চা করতেন  
নিয়মিত। তাছাড়া পশ্চিমের সন্তান। সুতরাং শরীর তাঁর সুগঠিত  
ছিল। কিন্তু উদাম উচ্ছৃঙ্খলতার ফলে শরীরে ভাঙন ধরে ঘৈবন-  
কালেই। মৌজুদিনের তুল্য গায়ক উচ্চ-কোটির শিল্পী। কিন্তু  
একথাও অস্বীকার করা চলে না যে, ভারতীয় সঙ্গীতকে এঁরা বড়ই  
গ্রানিময় তামসিকতায় নামিয়েছিলেন। সাত্ত্বিক চরিত্র আশা করা  
যায় না এই পটভূমির শিল্পীদের কাছে। কিন্তু উপরুক্ত শিক্ষা-দীক্ষা

থাকলে রাজসিক হওয়া সম্ভব ছিল। তাদের শিল্পী-জীবনও তাহলে যেমন শোভন, সৌন্দর্যময় দেখাত, তেমনি মণিত হত পরিপূর্ণ সার্থকতায়।.....

জীবনের উপসংহার পর্বে মৌজুদিনের কলকাতায় বাস আর সম্ভব হয়নি। অসুস্থতার জন্যে অবসর নিতে হয় পেশাদারী সঙ্গীতজীবন থেকে।

নৈরাশ্যকর ভগ্ন শরীরে তিনি এতকালের সঙ্গীত-ক্ষেত্র থেকে বিদায় নিয়ে যান। স্বাস্থ্যাভের আশায় প্রথমে আসনে লক্ষ্মীতে। গণপৎ রাওয়ের আর এক প্রিয় শিষ্য এবং সুবিখ্যাত ঠুঁঁরি শিল্পী ববন সাহেবের (সৈয়দ আলী কদর) লক্ষ্মী-আবাসে অতিথি থাকেন কয়েক মাস। কিন্তু স্বাস্থ্যেকার অসম্ভব হয়। নিশ্চিতভাবে ঘনিয়ে আসে অমোঘ অস্তিমকাল। তখন কাশীতে ফিরে আসেন। অবশেষে একদিন ছাতাতলার সেই আবালা বাসস্থানেই শেষ নিঃশ্বাস পড়েছিল মৌজুদিনের।...

তার কয়েকটি গানের গ্রামোফোন রেকর্ড হয়েছিল। (১) রং দেখ জিয়া ললচায় (ভৈরবী ঠুঁঁরি)। (২) পিরায় মোরি আঁখিয়া, রাজা হাম সে না বোলো (খাস্বাজ, দাদরা)। (৩) পানি ভৱেলি কোন্ আলবেলি কিনার ঝমাঝম (গারা, দাদরা)। (৪) ফুলওয়া বিনত ডার ডার (বসন্ত। খেয়াল)। (৫) লঙ্গর কা করিয়ো জিনে মারো (গুর্জরি তোড়ি। খেয়াল) ইত্যাদি।

মৌজুদিনের পেশাদার জীবনের প্রায় সর্বাংশই—অন্ততঃ কুড়ি বছর—কলকাতায় অতিবাহিত হয়। কলকাতায় অজস্র মহাফিল থেকে উপার্জন করতেন—শনি-রবিবার একটা-চুটো আসর তার হতই। দমদমের নানা বাগানবাড়িতে, বড়বাজার বৌবাজার জোড়াসাঁকো অঞ্জলের বিভিন্ন সঙ্গীতবিলাসীদের আসরে আসরে মৌজুদিনের গান কলকাতার সঙ্গীত-সমাজের অঙ্গ ছিল দীর্ঘকাল যাবৎ।

মধ্য ও উত্তর কলকাতার নানা স্থানে তিনি বাস করেছেন।

রাজাবাজারে ছিলেন অনেক দিন। লালবাজার বৌবাজার অঞ্চলের বাঙ্গজী পাড়াতেও থাকেন। শেষ ছুলীঁচাদের দমদমের বাগান-বাড়িতে আসর হলেই থেকেছেন অনেক সময়। শ্যামলাল ক্ষেত্রীর ১০১ হ্যারিসন রোডের আস্তানায়ও মৌজুদিন কখনো কখনো অবস্থান করেছেন। আরো নানা জায়গায় থেকেছেন কলকাতায়।

কাশী, বিশেষ কলকাতার অনেক শ্রেষ্ঠ বাঙ্গজীই রীতিমত গান শিখেছেন তাঁর কাছে। বিভিন্ন বাঙ্গজীদের যে সারা জীবন ধরে তালিম দিয়েছেন তাও তাঁর পেশাদার সঙ্গীতজীবনের এক বৈশিষ্ট্য। কাশীর বড়ী মোতি বাঙ্গ, মানুকী বাঙ্গ প্রভৃতি এবং কলকাতার আগ্রাওয়ালী মাল্কা, জদুন বাঙ্গ, আসমৎ বাঙ্গ, চন্দা বাঙ্গ, চুলবুলা-ওয়ালী, মাল্কা, হেনা বাঙ্গ এবং আরো অনেক বাঙ্গজী তাঁর কাছে গান শিখেছেন দীর্ঘকালের সংস্কৰণে ও সঙ্গ লাভে। মৌজুদিনের সঙ্গীত-জীবনের প্রতি-স্মৃতিতে যেমন গুতপ্রোত হয়ে আছে তাঁর বহু আসর মাত করার কাহিনী, তেমনি সেরা বাঙ্গজীদের সঙ্গে তাঁর প্রীতিময় ঘনিষ্ঠ সম্পর্কের কথাও। বাঙ্গজীদের প্রতি তাঁর ‘বিজাতীয় বিদ্বেষ’ কিংবা ‘সাদা চোখে’ তাঁদের প্রতি অবজ্ঞার একটিমাত্র দৃষ্টান্তও পাওয়া যায় না।...

গহর জান কখনো মৌজুদিনের কাছে তালিম নেননি, আগ্রাওয়ালা কিংবা জদুন, আসমৎ বাঙ্গ প্রভৃতির মতন। কিন্তু গণপৎ রাওয়ের শিষ্যা বলে তাঁর সঙ্গেও মৌজুদিনের সহযোগিতায় একটি হার্দিক সম্বন্ধ ছিল। বহু আসরে গহর জান শুনেছেন মৌজুদিনের গান। একই গোষ্ঠীর অন্তর্ভুক্ত তাঁরা। ইন্দোরের যে বসির খাঁ ( গণপতের শিষ্য এবং আল্লাদিয়া খাঁর ভাতুশুত ) মৌজুদিনের গানের সঙ্গে আসরে হারমোনিয়ম বাজাতেন, তিনি গহর জানেরও হারমোনিয়ম বাদক। বসির খাঁ যেমন মৌজুদিনের রেকর্ডে হারমোনিয়ম সঙ্গত করেছেন, তেমনি গহর জানেরও রেকর্ডে। এমনি নানাভাবে মৌজুদিনের সঙ্গে গহর জানের সাঙ্গীতিক যোগাযোগ ছিল।

বাঁজী মহলের মতন কলকাতায় মৌজুদিনের গায়ক শিষ্যদের নামও উল্লেখ্য। বাংলার স্বনামধন্য ঠঁঁরি-গুণী গিরিজাশঙ্কর চক্রবর্তী মৌজুদিনের কাছে দীর্ঘকালের সান্নিধ্যে অনেক গ্রহণ করেছিলেন। শ্বামসাল ক্ষেত্রীর আবাসে, ছলৌঁচাদের ভবনে এবং বহু ঘরোয়া, প্রকাশ্য আসবে মৌজুদিনের গান তন্মিষ্ট অনুধাবন করে সেই চালেব র আস্থ করেন গিরিজাশঙ্কর। মৌজুদিনের সঙ্গে বহুদিনের সংশ্বে গিরিজাশঙ্করের ঠঁঁরি-শিল্পীর জীবন সার্থকতার পথে অগ্রসর হয়ে যায়। এই সব কারণে তিনিও পরোক্ষে মৌজুদিনের শিষ্যরূপে গণনীয়।

বরাহনগরের অমৃল্যধন পাল ছিলেন মৌজুদিনের এক সঙ্গীতশিল্পী।

তখনকার উদীয়মান খেয়াল ঠঁঁবি গায়ক অনাথনাথ বস্তুর কথা বলা হয়েছে প্রথমেই। তিনি মৌজুদিনের কাছে ঠঁঁবি দাদরা-শিক্ষার সুযোগ পান। আগ্রার মাল্কা জানের অনুরোধে মৌজুদিন অনাথনাথকে ( ইঞ্জিয়ান মিরব স্ট্রিটের বাড়িতে ) যে সমস্ত গানের তালিম দেন তার মধ্যে ছিল--(১) ‘পিরায় মোরি আঁখিয়া রাজা হাম সে না বোলো, (২) সাঁচি কহো মুসে বাতিয়া ( খান্দাজ, ঠঁঁরি ), (৩) সজন কাহে কো নেহা লাগাও, আঁখিয়া তরস ত হায় তুমহাবি দরশ কো ( খান্দাজ মিশ্র, ঠঁঁরি ), (৪) নির মহি মোরা জিয়ারা কেইসে জাহ ডরা ( পিলু মিশ্র, দাদরা )—এইসব চমৎকার গান।

পরবর্তীকালে সুপরিচিত ঠঁঁরি, দাদরা গায়ক জমিরূদিন খাণ্ড মৌজুদিনের এক শিষ্য বলা যায়। বহুদিন যাবৎ তিনি মৌজুদিনের সেবা পরিচর্যা করে, ঘনিষ্ঠ সাহচর্যের ফলে এবং সঙ্গীতক্ষমতায় আয়ত্ত করেন মৌজুদিনের ঠঁঁরির চাল। সংগ্রহ করেন তার দাদরা ঠঁঁরির সম্পদ। মৌজুদিনের মৃত্যুর পর কলকাতার সঙ্গীতাসবে তার স্থান খানিক অধিকার করেছিলেন জমিরূদিন থঁ। তারই ধারা অনুসরণে।

আর আখতাব-এ-মুসিকী ফৈয়াজ থঁ? তার সঙ্গীত-জীবনের

সঙ্গে মৌজুদিনের গানের এক নিগৃত রহস্যময় সম্বন্ধ ছিল। মৌজুদিনের রসোত্তীর্ণ সঙ্গীতের অনুভবে, ঘোবনকালে ফৈয়াজ থাঁর চোখে ঝরত আনন্দের, আবেগের অশ্রু, তখন মাল্কা জানের সেই কক্ষে চৌপাইয়ের আড়ালে থেকে দিনের পর দিন অন্তরঙ্গভাবে মৌজুদিনের গান তিনি শুনেছিলেন। আর গানকে রসাপ্ত, রমণীয় করবার এক মহৎ ধারণা ও আদর্শ পেয়েছিলেন মৌজুদিনের গায়ন-রীতি থেকে। ফৈয়াজ থা ঠার দৃষ্টান্তে শুধু ঠুংরি গানের প্রেরণা পানান। খেয়ালের কোন কোন কারুকর্মও যে গ্রহণ করেন তা বোঝা যায় মৌজুদিনের গানের রেকর্ড থেকে।

মৌজুদিনের সঙ্গে ফৈয়াজের প্রথম ঘোবনকালে সেই অদৃশ্য সংযোগ। মাল্কা জানের ইতিহাস মিরর স্ট্রিট ভবনে, এক নাটকীয় পরিস্থিতিতে। ফৈয়াজ-জীবনের সেই অপ্রকাশিত অধ্যায়।

তারপর দীর্ঘকাল পার হয়ে গেছে। মৌজুদিনের সঙ্গে আর ঠার তেমন যোগাযোগ ঘটেনি। ভারতের দুই প্রান্তে প্রধানত অবস্থান করেছেন ছজনে। মৌজুদন পূর্বাঞ্চলে এবং ফৈয়াজ দাক্ষিণাত্যে পশ্চিমে। লক্ষ্যে অলক্ষ্যে কি বিপুল পরিবর্তন ঘটেছে ভারতের সঙ্গীত-জগতে, ফৈয়াজ থাঁর সঙ্গীত-জীবনে। কবে মৌজুদিন জীবনের রঙ্গমঞ্চ থেকে প্রস্থান করেছেন। আর মহীশূরের রাজদণ্ড উপাধি ‘আফ্তার-এ-মুসিকী’-কে সার্থক করে তিনি সঙ্গীতকাশে পরিক্রমণ করেছেন প্রথম দীপ্তিতে। সেই সূর্য এখন ঢলে পড়েছে পশ্চিম দিগন্তে, করুণ ছটায় গগন আকীর্ণ করে।

অন্তের ক্ষণকাল বিলম্ব মাত্র। এমনি এক সময়ের কথা।

মৌজুদিনের কোকিল-কণ্ঠ প্রায় দুই যুগ আগে চির-নীরব হয়ে গেছে। এখন বরোদায় ফৈয়াজও একই পথের পথিক।

ভারতপ্রসিদ্ধ কলাকার একই পন্থায় ইহলোক ত্যাগের যাত্রী। অহোরাত্র পানে পানে মরণকে ভৱান্বিত করে আনছেন। স্বর্থাত সলিলে নিমজ্জন্মান।

সেদিনও ফৈয়াজ থাঁ ঘরে ছিলেন সঙ্গের সঙ্গী বোতলবাহিনী  
নিয়ে।

এক গায়ক, একজন বাস্তিজী এবং একটি সঙ্গীতপ্রিয় ব্যক্তি তখন  
ফৈয়াজের সঙ্গে সাক্ষাৎ করতে এসেছেন! তাঁদের আলাপন হচ্ছে  
পুরানো জমানার গীত-শিল্পীকুল সম্পর্কে।

অতিথিরা পূর্ব যুগের একেকজনের নাম করে জিজেস করছেন,  
'উও গাওয়াইয়া কেইসা থে? আপকা গানা কিস ঢং কা?' এমনি  
ধরনের প্রশ্ন।

ফৈয়াজ থাঁ পান করছেন। আর একেক মন্তব্যে নস্তাৎ করে  
দিচ্ছেন এক-একজন নামী ওস্তাদকে—'আরে গোলি মারো।' 'আরে  
বাড়ু লাগাও।' ইত্যাদি।

কথায় কথায় একজন জানতে চাইলেন মৌজুদিনের বিষয়ে।  
তিনি কেমন গাইতেন? তাঁর গানের চাল কিরকম ছিল, থাঁ সাব?

অমনি স্তুক হয়ে গেলেন ফৈয়াজ থাঁ। তাঁর মুখ-চোখের ভাব  
অন্ত রকম হয়ে উঠল। পানপাত্র সরিয়ে রাখলেন এক পাশে।

উচ্চারণ করে কি যেন তিনি বলতে চাইলেন। কিন্তু আবেগে  
অবরুদ্ধ হয়ে গেল কণ্ঠস্বর। কোন কথার পরিবর্তে তাঁর বিস্ফারিত  
চক্ষু দিয়ে শুধু বিন্দু বিন্দু অঙ্গ ঝরতে লাগল। বাক্যহারা  
ফৈয়াজ থাঁ।

কিন্তু এ তাঁর সেই যৌবনের শিল্পী-প্রাণের আনন্দাঙ্গ নয়।  
মৌজুদিনের নাম শুনে, তাঁর গানের শ্বরণ-মননে উচ্ছ্বসিত, অস্তিমের  
শ্রদ্ধাঞ্জলি।

ফৈয়াজ থাঁর জীবনসায়াহে চোখের জলে মৌজুদিনের স্মৃতি-  
তর্পণ। ..

॥ দ্বিতীয় খণ্ড সমাপ্ত ॥